

6437.

Price R./4/—



विजयसुक्तावली

کتابخانه

छत्रकविरचित

जिसमें

दोहा चौपाई आदि छन्दों में सम्पूर्ण महाभारत
का संक्षेप अति उत्तमता से वर्णित है
श्रीयुत विद्या प्रकाशक सुन्शी नवलकिशोर
अवधसमाचार सम्पादक ने

दूसरी प्रति छपी हुई से
अपने परिश्रमों के द्वारा शुद्ध कराया
दूसरी बार

लखनऊ

स्वकीय मन्त्रालय में छपवाया
जुलाई सन् १८८२ ईसवी

1882

विज्ञापि

इस महीने अर्थात् जून सन् १८८२ ई. पर्यन्त जो पुस्तकें बेचने के लिये तय्यार हैं वह इस फेहरिस्त में लिखी हैं और उनका मौल भी बहुत कम पाया तसे घटा कर लिखा है परन्तु व्यापारियों के लिये और भी सस्ती होगी जिनको व्यापार की इच्छा हो वह व्यापारिखाने के मुहत्तमि अथवा मालिक के नाम पर तसे जकर कीमत का निराया कर लें ॥

नाम किताब	नाम किताब	नाम किताब	नाम किताब
भाषा (इतिहास)	२- सभापर्व	तसवीरव शेषक	नाटक
महाभारत	३- वनपर्व	रामायण तुलसीकृत	प्रबोधचंद्रोदय
१- पहिले हिस्सा में	४- विराट पर्व	सातों काराड	रामाभिक
आदिपर्व सभापर्व	५- उद्योगपर्व	१- बाल काराड	आनंदरघुनंदन
वनपर्व	६- भीष्मपर्व	२- अयोध्या काराड	भ्रमजाल नाटक
२- दूसरे हिस्सा में	७- द्रोणपर्व	३- आराध्या काराड	वेदज्ञ
विराटपर्व उद्योगपर्व	८- करणपर्व	४- किष्किन्धा काराड	योग बाशि
३- तीसरे हिस्सा में	९- शल्यपर्व वगैरा	५- सुन्दर काराड	आनंदः मृतवर्धिरा
करणपर्व शल्यपर्व	१०- शौनिकपर्व मय	६- लंका काराड	सारव्यतत्त्वकोमुदी
गदापर्व शौनिकपर्व	योशिकवविशोकव	७- उत्तर काराड	काव्य
योशिकपर्व विगोक	स्त्रीपर्व	रामायण शब्दार्थको	सूरसागर
पर्व स्त्रीपर्व शान्ति	१०- शान्तिपर्व राज	रामायण का इतिहास	कलसागर
पर्व मेराजधर्म आष	धर्ममोक्षधर्मवदा	रामायण मानसदीपिका	विश्रामसागर
वधर्ममोक्षधर्म	नधर्म	रामायण कवितावली	प्रेमसागर
४- चौथे हिस्सा में	११- अश्वमेध आश्रम	रामायण गीतावली स-	ब्रजबिलास बड़ा
शान्तिपर्व दानधर्म	सुवासिकगुशलपर्व	विनयपत्रिका बा-मो-	ब्रजबिलास छोटा
अश्वमेध आश्रम	महाप्रस्थानस्वर्गागे-	विनयपत्रिका बा-शि-	कृष्णप्रिया
वासिकपर्व वमोश	हरा	विष्णुपुराण भाषा	अनेकाथी
लपर्व ववारा प्रस्था	१२- हरिवंशपर्व	लिंगपुराण	कुन्दोर्गावपिंगल
नस्वर्गागेहनपर्व ह	रामायण रामविलास	ब्रह्मोत्तरखण्ड	रसराम
रिवंशपर्व	रामायण तुलसीकृत	शुक्रनीति	सत्सर्वमूलवसदीक
महाभारतपर्व अ-	रामायण सटीक नय	सदृशिवंस चंद्रोदय	सभाबिलास
लेहदा भी है	मानसदीपिका कोष-	सुदमाचरित्र	तुलसी शब्दार्थप्र-
१- आदिपर्व	आदि	रुक्मिणीतावली	भजनावली
	तथानित्दवंधी	श्रीअनुरागरस	प्रेमरत्न
	तथामोटेअक्षरोंकीमय	मोदागरलीला	युगलविलास

श्रीगणेशायनमः ॥

विजयमुक्तावली ॥



दोहा ॥ विघन हरण तुम हौ सदा गणपति होउ
सहाइ ॥ बिनती करजोरे करों दीजैग्रन्थ बनाइ १ ज्यहि
कीनो परपंच सब अपनी इच्छापाइ ॥ ताको हौं बंदन करों
हाथजोरि शिरनाइ २ करुणाकर पोषत सदा सकल
सृष्टिके प्रान ॥ ऐसे ईश्वर को हिये रहै रैन दिनध्यान ३
मेरे मनमें तुमबसौ ऐसे क्यों कहि जाइ ॥ ताते यहमन
आपसों लीजै क्यों न लगाइ ४ जागुरु गिरिधर देवकी
सुंदर दया दरेर ॥ गुंग सकल पिंगल पढ़ें पंगु चढ़ें गिरि
मेर ५ ब्रजरक्षण भक्षण अनल रक्षण गोधन ग्वाल ॥
भुजवर करवर सुभुज पर गिरिवर धरन गोपाल ६
हरि दीपक मन सदन धरि कपट कपाट उघारि ॥ नशै
सकल अघकालिमा कृत्र सुदेखि विचारि ७ ॥ दंडकच्छंद ॥
झूमिझूमि आये कोपि बासव पठाये नभ धाये दिशिदिशन
ते बासव तरज पर । मेघकी मरोर महापवन झकोर
जोर नीरद निपट घोर घोष सो गरज पर । ऐसे लखि
कृष्णने उठायो गिरिगोवरधन ब्रजकी सहाइकरी करकी
करजपर । राखे सुरपाल के कराल क्रोधते गुपाल कृत्र
हवै दयाल गोपी ग्वालकी लरजपर ८ ॥ सर्वैया ॥ आनन
एक कहै नरको चतुरानन चारिहु वेद बतावैं । जे ऋषि

वृद्ध प्रसिद्ध हैं सिद्ध सदा मनवांछित सिद्धि जो पावें ।
 नारद शारद जोवतहैं सनकादि शुकादि सबै गुणगावें ।
 वंदत ये सब शेष सुरेश दिनेश धनेश गणेशहु ध्यावें ६
 दोहा ॥ जगजननी जगवंदनी जगपावनि सुखकारि ॥
 गिराधिरा मतिदीजिये बरगों ग्रन्थ विचारि १० मथुरा
 मंडल में बसै देश सदा वरग्राम ॥ ऊखल तहाँ प्रसिद्ध
 महि क्षेत्र बटेश्वर नाम ११ ताम्रग जनके पगपरत अघ
 को लेश रहै न ॥ बिकट जटे संकट तड़ित डरत सदा
 शिव नैन १२ सूक्ष्म स्थूल समूल अघ जरे जात दुख
 शूल ॥ फूल होत उरमें तहीं निरखि कलिंदी कूल १३
 सबैया ॥ चंग उपंग मृदंग कहूं सुकहूं ध्वनि शंखन की
 सुनिये । कहूं ऋषि वृद्ध प्रसिद्ध कहूं कहूं सोहत साधु
 महा मुनिये । वेदनि वेदत भेदनिसों कहूं नृत्यत गावत
 हैं गुनिये । शूली बटेश्वर के छिन बंदत दंतहैं मुक्ति सदा
 दुनिये १४ ॥ दोहा ॥ सुयश सुवसता निकटही पुर अट्टर
 इहिनाम ॥ यज्ञ यजन होमादि व्रत रचत धाम प्रतिधाम १५
 नगर मनहुं अमरावती बासी बिबुध समान ॥ आखंड-
 लसो लसत तहं भूपति सिंह कल्याण १६ कीरति
 दान कृपाणकी कोबरगौ विस्तार ॥ जययुत सुयश प्रताप
 से छाँय रही दिशि चार १७ ॥ दंडकछंद ॥ बदर बदक
 सान बंगसों तिलंगछाई छाँयरही बंदरमें बारिधि के घाट
 लैं । माडूकर कामरू फिरंगरोही रीहतास छाईहै कुमाऊं
 विवि बंधव कुहाटलैं । गौड़वानौ मारवाड़ मालवा उड़ी-
 सा छाई छाईहै सुदेश देश देशहू विराटलैं । छाई धरा

केहरी कल्यानसिंह कोरतिसो काबिल कलिंग काशमीर
करनाटलों १८ ॥ दोहा ॥ श्रीवास्तव कायस्थहै कृत्रसिंह
यहनाम ॥ बसत भदावर देशमें गृहअटैर सुखधाम १९
कौरव पांडवकीकथा तिन सब सुन्यो पुरान ॥ तातेभाषा
ग्रन्थको कीनी कृत्र बखान २० संवत् सत्रहसै वरष सप्त
बाढ़ पंचास ॥ शुक्लपक्ष एकादशीरच्यौ ग्रन्थ नभमास २१
नाम विजयमुक्तावली हितकरि सुनै जो कोइ ॥ अष्टादशौ
पुराणको ताहि महाफल होइ २२ लसत हस्तिनापुर
अवनि अमरावती समान ॥ सुरपति सो शंतनु तहाँ चहुँ
चक्रमें आन २३ सायरऋषिके शापते शंतनुभयो नरेश ॥
भुजवर करवर स्वर्गवर जीतिलियो बहुदेश २४ ताघर
तरुणी सुरसरी पतिव्रता सुखकारि ॥ प्रजा सकल आ-
नन्दसों निशि बासर नरनारि २५ बचन सुरसरी यों
लयो शंतनु पै सुखपाइ ॥ पुत्रहोत मो पूरमें दीजो भूप
बहाइ २६ जब यह विधि करिहौ नहीं तबहिं तजौं यह
गेह ॥ जौलैं बचनन दृढ़ रहौ तौलों तजौं न नेह २७
अष्ट पुत्रनृपके भये दीनो गंग बहाइ ॥ नवमभये गांगेय
तब भूतल जनमे आइ २८ ॥ दोधकछंद ॥ भूपतियोंमन
माहिं विचारी । कौनलहै नृपता अधिकारी ॥ पुत्र भये
सब गंगबहाये । मंत्रीसब नृप शोधि बुलाये ॥ बातसबै
भुव भूप बखानी । मंत्र कहाकरिये सुखदानी ॥ जोवरजों
गृह गंग नरैहैं । पुत्रहि राखत पूर समैहैं २९ (मंत्र्युवाच)
राखिय पुत्र रहै नृपताई । गंगरहै नृपके गृहजाई ॥ मंत्र
सुनोयह भूपतिभायो । सोबलिकै त्रियपै तबआयो ३०

(शन्तनुरुवाच) दै सुत गंग अबै इक मोहां । मांगत
हैं हितसों यह तोहीं ॥ लैत्रिय पुत्र तबै करदीनो । चंद्र
सो आनन रूपनवीनो ३१ ॥ दोहा ॥ पतिसों कहि पुरब
कथा रही समाय प्रवाह ॥ महा दुःख नृपको भयो चकित
चित्त नरनाह ३२ ॥ नगस्वरूपिणी छन्द ॥ भयो नरेशको
महा । सो दुःख हों कहों कहा ॥ महीप देखिये इसों । निशा
बिना शशी जिसों ३३ (मंत्र्युवाच) न भूप शोक की-
जिये । सो पुत्र देखि जीजिये ॥ अनेक भाति पारिये ।
सो ईश ता सुधारिये ३४ ॥ दोहा ॥ बीते वासर जूषघने
तब गांगेय कुमार ॥ अस्त्र शस्त्र विद्यापढ़ी सीखे मंत्र अ-
पार ३५ भूपति शन्तनु एक दिन गयो अखेटके काज ॥
सघन विपिन सरिता निकट लै प्रिय लोग समाज ३६
केवटतनया शशिवदनि योजनगंधा नाम ॥ निरखि
रूप मोहित भयो बिज्जुलतासी बाम ३७ अति आशक्त
भयो नृपति केवट लियो बुलाइ ॥ देहु मोहिं अपनी सुता
मन बच क्रम सुखपाइ ३८ (केवट उवाच) तुम पृथ्वी-
पति भूपहौ नीच जाति मल्लाह ॥ आपहि कहौ बिचा-
रिकैं किहि विधि होइ बिवाह ३९ तौ बिवाह तुम को
करों जो यह मांगे देहु ॥ नृपता याको सुत लहै करौ
आप करिनेह ४० ॥ चौपाई ॥ यह सुनि राजा मन
बिलखानो । गृह तन कौ तब कियो पयानो ॥ अब सोई
हों कहों बिचार । योजनगंधा को अवतार ४१ पाराशर
मुनिवन पगुधरयो । तरुणी वचनप्रकट यों कर्यो ॥ किती
वरष बन जहैं बीती । कहु संतानि होइ किहि रीती

४२ (पाराशर उवाच) चौपाई ॥ ऋतुवंती हवै जबहीं
 न्हाई । शुकदीजै सो पास पठाई ॥ ध्यान उमंगि कंद्रप
 ढरकाऊं । शुक कर देतो पास पठाऊं ४३ तुम जलमेलि
 कीजियो पान । इहि संयोग होई अवधान ॥ यह कहिकै
 मुनि बिपिन सिधाये । तप हित महा बिपिन में आये ४४
 दोहा ॥ ऋतुवंती मज्जन कियो शुक पठयो पतिपास ॥
 पहुंच्यो पाराशर निकट तबहीं क्वाड़ि अवास ४५ ॥ चौ-
 पाई ॥ देखत ध्यान ऋषीश्वर धर्यो । मन मथि मदन
 तबै जल ढर्यो ॥ धर्यो पत्रमंशुक करदयो । ऋषिनीहित
 सों लीने गयो ४६ आयो सरिता निकट सुकीर । गिर्यो
 मदन जल अँचवत नीर ॥ एक मीन सों कीनो पान ।
 ताको प्रगटभयो अवधान ४७ शेष रह्यो सो तबहीं ल-
 यो । ऋषिनी पास कीर लैगयो ॥ जाविधि सो कहि-
 गये मुनीश्वर । सोविधि कीनी त्रिय तिहि अवसर ४८
 दोहा ॥ बीते पूरण मास तब गर्भ सुच्यो त्यहि काल ॥
 भयो पुत्र कविछत्र कहि उर आनंदति बाल ४९ ॥ त्रौ-
 टकछंद ॥ उतमीनहि पूरण गर्भभयो । चलि केवट तासु
 शिकार गयो ॥ लहि मीनसुगेह गयो जबहीं । निकसी
 तनया तेहि गर्भतहीं ५० चपला जनु सोहत देह धरे ।
 रति मानहुं अद्भुत रूपकरे ॥ दिन कोटिक ताकहँ बीति
 गये । कुल धर्म सबै हितकै सिखये ५१ ॥ दोहा ॥ नाम
 सुता मत्स्योदरी करति आप कुल धर्म ॥ पथिक उता-
 रति आपगा करि मलाह के कर्म ५२ कीनो द्वादश वर्ष
 तप पाराशर मुनिआइ ॥ निरखि रूप मत्स्योदरी गिर्यो

पुहुमि अकुलाइ ५३ निरखि निरखि आशक्त हवै कही
 बात मुनिराय ॥ मोहि तोहि मृगलोचनी सुरति होइसुख
 पाय ५४ (मत्स्योदरीउवाच) सुन्दरीछंद ॥ बातअबूझि
 तर्योकहि आवहि ॥ क्योंकहि आप कलंक लगावहि ५५
 (ऋषिरुवाच) दैरतिकै लहि शाप अबै त्रिय । नाहिं रह्यो
 कछु धीरज मो हिय ॥ त्रास भयो सुनि ताउर में अति ।
 जानि न जाय कछू विधि की गति ॥ आतुर हवै ऋषि-
 राज दई रति । ताहि प्रसन्न भयो सु महामति ५६
 दोहा ॥ तुम तनकी दुरगन्धता नशि जैहै सुनि बाल ॥ होइ
 सुगंध शरीरको योजनलों सबकाल ५७ लखै न कोऊ
 गर्भ तुम जाहु अनंदित धाम ॥ होइहै पुत्र प्रसिद्ध महि
 तीन भुवन ज्यहि नाम ५८ ॥ चौ० ॥ यह कहि कै ऋषि
 गृह को गयो । प्रगट गर्भता त्रियको भयो । लखै न कोऊ
 ताहि अवास । लीनो जन्म महाऋषि व्यास ५९ बन
 उठि चल्यो जनमि ऋषिराई । अति हित बचन कह्यो
 सुनु माई ॥ जहँ सुधि करै तहां चलि आऊं । तेरो कठिन
 कलेश मिटाऊं ६० लख्यो न काहूसो व्यवहार । ज्यहि
 विधि लीनो ऋषि अवतार ॥ योजनगन्धा इहि विधि भई ।
 परम रूपविधना निरमई ६१ ॥ दोहा ॥ ताकोशंतनु देखिकै
 गृह आये नरनाथ ॥ कुम्हिलानो आनन महा धीरज रह्यो
 न हाथ ६२ गांगेयउवाच) कौन हेत नृप मलिनहौ कहौ
 पिता सो काज ॥ पाऊं आज्ञा रावरी कहौ सो सारौ
 काज ६३ (राजोवाच) जबतें सुत गंगा गई बीती
 वर्ष सात ॥ छिन छिन बीततु वर्ष सम युग भरि याम

विहात ६४ ॥ चौ० ॥ त्रियविन धर्मकर्मनहिं होई ।
 नहिं नरलहै बड़ाईकोई ॥ धन संपत्ति लागै नहिं नीकी । ता
 विन सकल वस्तु हैं फीकी ६५ ॥ दोहा ॥ योजनगंधाकी
 नृपति सब विधि कही बखानि ॥ देत नहीं अपनी सुता करै
 न केवट कानि ६६ ॥ चलि गांगेय गयेतहाँ ताके बटकेपासा ॥
 देहु सुता भूपाल को कीनो वचन प्रकाश ६७ (केवट उ-
 वाच) होइ राज या पुत्रको तौहों करों बिवाह ॥ मनसा बा-
 चा कर्मना वचन देहिं नरनाह ६८ ॥ चौ० ॥ तबगां-
 गेय वचन यों कहै । तुव तनया सुत नृपता लहै ॥ करों
 बिवाह न त्रिय संग्रहों ॥ सत्य वचनहों तोसों कहों ६९ ॥ मेट-
 हि वचन सुनकहि जाई । करों सेव हों जानों माई ॥ साधु
 जानितव यह पितु मानी ॥ आये व्याहन नृप रवदानी ७०
 करि बिवाह लै त्रियहि सिधाये । तबहीं भीषमनिकट बो-
 लाये ॥ तैं अति सुख दीनो है मोही ॥ हों प्रसन्न दीनो बर तोहीं
 ७१ ॥ सवैया ॥ मीच बोलाइ बिना नहिं आयहै चाहे
 बिना मरिहै नहिं मार्यो । तेरे न निष्फल जाहिंगे बाण
 टरैगो नहीं रण काहु को टार्यो । तोसों तुहीं सरि और
 नहीं उर अंतर को सब शोच निवार्यो । धन्यघरी जिहि
 जन्म लयो भुव धन्य तु पुत्र पिता पन पार्यो ७२
 दो० ॥ सुनि शंतनु के वचन ये भीषमजी सुख पाय ॥
 मातु पिताकी भाक्ति अति करि लीनी मनलाय ७३ ॥

इति श्रीमहाभारतपुराणे विजयमुक्तावल्यांकवि

कृत्रविरचितायां व्यासावतारवर्णनो

नामप्रथमोऽध्यायः ॥ १ ॥

त्रोटकछंद ॥ नृप शंतनु के सुत दोय भये । शुभनाम
 सुचित्र विचित्र ठये । गुणज्ञान कृपान सबै सिखये । दि-
 नसीखत कर्म सुधर्म नये १ बहु भूपतिके मनमोदभयो ।
 क्षितिमें यश भूपति भूपलयो । इहिभांति कितेदिन बीति
 गये । सब बासर आनंदमें बितये २ ॥ दोहा ॥ आयु
 भुगुति नरनाह तब बासलयो हरिलोक ॥ पुत्र कलत्र
 कुटुंबको उर बाढ्यो बहुशोक ३ सुरसरि सुत समझाय
 सबक्रिया कर्म सबकीन्ह ॥ जेठेसुत तब चित्रको राज्यभार
 शिरदीन्ह ४ बहु ऋषिराजन बोलिकै कर्ष्यो राज अभि-
 षेक ॥ सब परिवार प्रजानको आनंद बढ्यो अनेक ५
 सोरठा ॥ काशिराज के गेह हुतीसुता दुइ इंदुमुखि ॥
 इक अंबा अंबेह मृगनयनी चंपकवरणि ६ ॥ दोहा ॥ अंबा
 दीन्ही चित्रको करि विवाहको चार ॥ अरु अंबेह विचित्र
 गृह भई सकल सुखसार ७ ॥ सोरठा ॥ बाढ्यो गर्भव-
 पार अपनीनृप संपति निरखि ॥ सकल सहज भंडार
 बरणि कहाँलौ कविकहै ८ ॥ चौ० ॥ निशिदिन राजनीति
 बिसराई । रचे कुकर्मनिके सबभाई ॥ कुलको सकल धर्म
 नशि गयो । बहुसंदेह मातउर भयो ९ जान्यो जबहि
 राजको नाश । योजनगंधा सुमिरै व्यास । आइगये तब
 हीं ऋषिराई । धाइ जननिके बंदे पाई १० (योजनगं-
 धाउवाच) यद्यपिमो सुत पायोराज । करै न राजनीति
 के काज ॥ ऐसोकुछ कोजै उपदेश । राजनीति मत चलै
 नरेश ११ (व्यासउवाच) दोहा ॥ सुनु माता तोसों
 कहों राजनीति समुझाय सोसिख दीजै सुतनको सुयश

रहै घरछाय १२ दिनप्राति व्यास कहै कथा राजनीति
 सब धर्म ॥ चित्र नृपति यह बातसुनि मनमें वस्यौ कुक-
 र्म १३ को यहद्विज मातानिकट बैठत निशिदिन आइ ॥
 ताको हतन बिचारिकै गुप्त भयो तहँजाई १४ ॥ गीति-
 काछंद । आयकै ऋषिब्यास माता निकट बैठि कथाकहै ।
 सुनत पाराशरसुता सुतवचन दीरघ दुखदहै । माय कहि
 कहि राजनीतिहि सकल विधिसों उच्चरै । पुत्रकहिवूझै
 जननि इहिभांति श्रवण कथाकरै १५ अर्द्ध निशि बीती
 जहाँ ऋषि व्यासपग गृहको धर्यो । निरखि यहविधि
 चित्र नृप तब बचन तिनसों उच्चर्यो । हेमहा ऋषिराय
 तुमसब भांति बुद्धि प्रवीनहौ । लोककी परलोककी सब
 वेदविधि सों लीनहौ १६ भयो मनसा पाप जाकहँ सो
 कहौ क्यों उदरै । देहुबुद्धिनिधान शिक्षा काज कैसे कै
 सरै । व्यास साध अगाध मति तब बचन तिनसों भा-
 पियो । कहौ तोसों विधिसबै मनमाहिं हितकरि राखियो
 १७ ॥ दोहा ॥ चलदल द्रुमकों खंडिके तामें अग्निप्रजारि ॥
 धूम घूटि प्राणन तजै सब अघडारै बारि १८ सीखलई
 सोपै सोई सोई कियो उपाय ॥ धूमघूटि तिहि भांतिही
 गये देव पुरराय १९ ॥ त्रोटकछंद ॥ यहि भांति नरेश
 बिलोकि तबै । बहुदीन भये नरनारि सबै ॥ तब मात
 महा उर दुःखभयो । उड़िमानहुं भीषम प्राणगयो २०
 तब भूपति भूमि बिचित्र कर्यो । विधि सों शिर ऊपर
 छत्र धर्यो ॥ बरणौ नृप के सब कर्म कहा । सु अखेटक
 सोहित आहि महा २१ एक दोस गयो अतिही बनमें ।

भय नाहिं कछू नृपके मनमें । उठि सिंह तहां नरनाह
 हयो । प्रिय लोगनि के अति दुःख भयो २२ ॥ दोहा ॥
 सब साधिन पुरमें कही बनमें बीती बात ॥ शोकयुक्त माता
 भई अति भीषम पछितात २३ तबहीं माता चित्रकी सुत
 हित बहु दुख पाय । हितकै अरु अति मोहकै भीषम लये
 बुलाय २४ (रानीउबाच) चौपाई ॥ नृप बिन पुरबा-
 सिन के शंका । ज्यों दशशिर बिन सूनी लंका । अब स्वइ
 काज करौ जगदीश । राजभार सुत तेरे शीश २५ प्रजा
 पालिये सुत ज्यों मात । राखौ राज जो बूड़ेउ जात । नाम
 नृपति शन्तनु को रहै । भीषम सों यों माता कहै २६
 (भीषमउबाच) माता सत्य हियेमें राखौ । सत्यहि छांड़ि
 असत्य न भाखौ ॥ नृपता करों न तरुणी करों । तुव सेवा
 निशिदिन उर धरौं २७ ॥ (रानीउबाच) दोहा ॥ भयो
 राज संदेह उर कीजै कहा उपाय । प्रगटी भीषम सों कथा
 लज्जायुत अकुलाय २८ पाराशर संयोग ते भये व्यास
 अवतार ॥ बरणि सुनायो भीषमहिं विधि सों सब व्यो-
 हार २९ जन्मत कानन को गयो व्यास महा ऋषिराय ॥
 ताही क्षण मोसन कह्यो बचन परम सुखपाय ३० जहां
 कछू संकट परै कष्ट होइ कछू आय । सुमिरतही तहँ प्रगट
 हवै डारों सकल नशाय ३१ ॥ सुन्दरीछन्द ॥ भीषम
 यों सुनि सुख भयो मन । बैन कहेउ हितवन्त ततक्षन
 मातु बुलावहु ता ऋषिराजहि । दुःख दहै सब कारज
 साजहि ३२ भीषम को अनुराग रहेउ चित । व्यास तहां
 सुमिरै करिके हित । शोभित आप कियो ऋषिसों बल ।

जटा कसे कर दण्ड कमण्डल ३३ बंदतु है पग मातु महा
मति । भीषम के उर सुख भयो अति । बात विचारि
कही सगरी गुनि । राज चलै क्यहिभांति महामुनि ३४
(श्रीव्यासउवाच) चौपाई ॥ एक उपाय करौ जो माई ।
तौ संतान प्रगटहो आई ॥ चित्र विचित्र नृपतिकी नारी ।
होइ नगन सब वस्तर डारी ३५ मो आगे आवैं तजि
लाज । देहुं अशीश होइ सब काज ॥ हौं तपसी नहिं चित्त
बिकार । तातें जिनि कछु करौ विचार ३६ रानी गई
महल में धाय । पुत्र बधुन सों बिनयो जाय ॥ उन
सुनि बात अचंभो कियो । कैसो है माता तो हियो ३७
दोहा ॥ इहि विधि आगे जेठके काढ़ै कुलकी बाल ॥
ऐसी कौन निलज्ज त्रिय करै जु कर्म कराल ३८
चौपाई ॥ रानी कहि समुझाई बाला । भई नगन वह
ताही काला ॥ चहुंधा केश देह पर डारि । नैन मूँदि कै
अंबा नारि ३९ आई सो सामुहे ऋषीश । हवै प्रसन्न
ऋषि दई अशीश ॥ यहि विधिकै ऋषि बोले बैन । होइ
अंध सुत लहै न नैन ४० फिरि रानी अंबैपै जाई । लै
आई ताको समुझाई ॥ तिनहुं बसन दिये सब डारि ॥
अंग मृत्तिका लाई नारि ४१ (व्यासउवाच) दोहा ॥
पांडु पुत्र या गर्भतें हवैहै बहु सुखकार ॥ मृत्तिका लाई
अंग इनि भेद कह्यो निरधार ४२ बाँझित फल मातहि
दयो गेह गयो ऋषि राइ ॥ चित्र विचित्र त्रियानके गर्भ
भये सुखदाइ ४३ ॥ सुंदरीछंद ॥ पूरण मास भये तिन
के जब । मातनि के उर सुख बढ्यो तब । अंध भये सुत

चित्रकि नारिहि । पांडु बिचित्र बधू सुख कारिहि ४४
 तापरहू निशि दुंदुभि बाजत । धुनि सुनि कै मघ-
 वा जनु लाजत । मंगलचार सखी सब गावहिं । भांतिन
 भांति अनन्द बढ़ावहिं ४५ भीषम कर्म बिचारकिये
 सब । दीनगुनी कहँ दानदिये तब । बीतिगये यहिभांति
 कछु दिन । बाढ़त आनंद है छिनहूँ छिन ४६ भाट तहां
 बिरदावलि गावत । वारन अश्व समूह न पावत । प-
 गिडतआय तहां गुनसागर । नृत्यत हैं बहुधा नटनागर
 प्रमुदित नगर नारि नर भारी । सुख भुज तननि सकल
 सुखकारी ४७ ॥ दोहा ॥ को बरगौ आनन्द को सुख
 समूह बिलास ॥ जबहीं फिरि सुमिरे जननि आयगये
 ऋषिब्यास ४८ (योजनगन्धाउबाच) तुम प्रसाद ते
 पुत्र द्वै प्रगट भये यहि गेह ॥ आशिष देहु उदार ह्वै
 मोमांगे सुत देह ४९ (श्रीब्यासउबाच) बिना बसन
 यहि भांतिही आवै मोतट बाल ॥ आशिष देहुं उदारह्वै
 ताको तेहीकाल ५० आनी दासी नगन करि योजन
 गन्धा माइ ॥ करति कटाक्ष न लाज उर मन्द मन्द
 मुसकाइ ५१ ॥ चौपाई ॥ काशिराज की सुता न होई ।
 यह माता दासीहै कोई ॥ याके गर्भ होय सुतएक । विष्णु
 भक्त अरु ज्ञान अनेक ५२ दै आशिष तबही ऋषिगयो ।
 प्रगट गर्भ दासीके भयो ॥ पुत्र स्वरूप तबै अवतर्यो ।
 नामविदुर ऋषियों उच्चर्यो ५३ तीनों शिशु खेलैं इक
 संग । लखि सुख उपजत मातनि अंग ॥ लरैं भिरैं खेलैं
 यहि रीति । केते वर्ष दिवसगे बीति ५४ ॥ सोरठा ॥

भीषम सकल समाज बोल बुधजन ज्योतिषी ॥ दयो
अन्धको राजतिलक शीश शिर छत्रधरि ५५ ॥ दोहा ॥
राजनीति मारगु थप्यो भीषम बुद्धि निधान ॥ सुवशवास
चरों वरण आप धर्मयुत ज्ञान ५६ ॥ विजय करन को
तब सज्यो भीषम दल चतुरग ॥ जीते अरि पुर जायकै
लखि मुख उपज्यो अंग ५७ ॥ चौपाई ॥ एक नृपति पै
लीनो दण्ड । पाटन नगर जीति बहु खण्ड । एक
नृपति अपने कर थापै । बहुत नरेश महा भय कांपै ५८
॥ दोहा ॥ भीषम करिकै दिग्विजय आये अपने गेह ।
पांडु अंध धृतराष्ट्र सों दिन दिन बढ्यो सनेह ५९
चौपाई ॥ अंधराय की चलै दोहाई । सब विधि करै पांडु
नृपताई ॥ यहि विधि सुख बीते बहुकाल । रहत यथा
क्रम तहँ भूपाल ६० ॥ इति श्रीमहाभारतपुराणविजय-
मुक्तावल्यांकबिच्छत्रविरचितायां धृतराष्ट्रपांडुविदुरजन्मव-
रणनोनामद्वितीयोऽध्यायः ॥ २ ॥

दोहा ॥ सुवस भूमि कनवज पुरी चारि वरण की
भीर ॥ गंधवराय महीप तहँ परम शील गंभीर १
सोरठा ॥ सुरपति गंधव राज अमरपुरी कनवज नगर ॥
पुरजन त्रिवुध समाज दूजो सरि दीजै कहा २ ॥ दोहा ॥
ताके दुहिता शशिमुखी गंधारी यह नाम । शची कियों
है इंदिराकै मनसिज की बाम ३ ॥ अंधराय को थापि कै
दीनी लगन पठाय ॥ करि विवाह को चारु सब मंगल
चार कराय ४ ॥ पुनि भीषम आनंद युत आये साजि बरात

अंधराय दूलह बने सुख समूह सरसात ५ बिन लोचन
 को पतिसुन्यो गंधारी दुखपाया ॥ सखी आपनीसों कही
 यह सब विधि समुझाय ६ को मेटै विधि को लिख्यो
 पायो पति बिन नैन ॥ सोई प्रभुहैं प्राणपति सत्य कहों
 सुनु बैन ७ ॥ चौपाई ॥ तबहीं यो गंधारी कहै । परम
 पतिव्रत मो उर रहै ॥ कैसी तरुणी वै जगमाहीं । पति
 के दुःख आप दुख नाहीं ८ गुरु देवता आप पति जानै ।
 ताकी आज्ञा निशिदिन मानै ॥ पगन देहिं पति शासन
 भंग । रचै पतिव्रत के जो रंग ९ शुभ गति तिनकी
 करता करै । तब गंधारी यों अनुसरै ॥ अन्धराय पति
 के दृग हैं ॥ लै पट्टी तिन बांधे नैन १० ॥ दोहा ॥
 जो विधि दोऊ कुलन की ब्याह भयो तिहि रीति ॥ कन्या
 दै दासी दई भूषन बसन समीति ११ ॥ नाराचकुन्द ॥
 मतंग औतुरंग सूर साजि साजि साजियो । अनेक
 भांति दायजो अशेष वस्तुको दियो । श्याम श्वेत नील
 पीत आसने बिछावने । दये सुवर्ण मालमुक्त राजते घने
 घने १२ बिवाह कै नरेश आप गेहको सिधारियो ॥
 दरिद्र हीन दीन के सबै नशाइ डारियो । गीत नाद
 ठौर ठौर सुकखसों घने घने । उपंग चंग दुंदुभीनि भेरि
 कुंद को गने १३ ॥ दोहा ॥ कही नृपति धृतराष्ट्र यह
 भीषम सों समुझाइ । करों पांडु को ब्याह अब उत्तम
 ठौर सुघाइ १४ (भीषमउवाच) नगर निरखि नावलि
 बनी मधि नायक कुतवार ॥ कुंतलराज बखानिये तह
 भूमि भरतार १५ सूरसेन नृपकी सुता हितकै आन

गेह ॥ जन्म काल के कर्म सब कीने सहित सनेह १६
 नाम धर्यो कुंती तहां सकल बुधीश बुलाय । दिन दिन
 दुहिता इंदुमुखि अति द्युति सों सरसाय १७ द्वादश
 बीते वर्ष तब करि कुंती चित ज्ञान ॥ सेयो ऋषि दुर्वास
 तब मन क्रम बचन सुजान १८ ॥ तोटकछंद ॥ ऋषि-
 राज प्रसन्न भये जबहीं । अति निश्चल ध्यान धर्यो
 तबही ॥ सिखयो आकर्षन मंत्र तबै । हितकै तिहि सी-
 खि लये सुसबै १९ ॥ दोहा ॥ सूरजको इक धर्मकोतीजो
 पवन बखान ॥ चौथे सिखयो इंद्रको सब गुन ज्ञान नि-
 धान २० ॥ चौपाई ॥ पंचम तहँ अश्वनी कुमारा । दीनो
 ऋषि सो परम उदारा ॥ जाको मंत्रजपौ सुख पाई ।
 सोई देव प्रगट हवै आई २१ ॥ त्रोटकछंद ॥ उनसूरज
 मंत्र जप्यो जबहीं । प्रगटे सबिता घर आइतहीं । सकुची
 डरपी अति भीति पगै ॥ नरमो जग मोहिं कलंक ल-
 गै २२ (सूर्यउवाच) बिनयोजबतें बहुजाप कर्यो ।
 अति भक्ति करीपग भूमि धर्यो । तब दृष्टि संयोग
 अधान रह्यो । त्रियसों तबहीं यह बैनकह्यौ २३ सुतहो-
 य बली तुवगर्भ महा । बहुधा बणौंगुण तासुकहा । प्र-
 गटे तन बर्मअभेद धरै । धर बारिधलों अतिकीर्तिकरै २४
 चौपाई ॥ लखैनकोऊ तुव अवधानु । योंकहि बैनसिधाए-
 भानु ॥ आईकुंती अपने गेह । धाय बोलाई परम सनेह २५
 रविकौ रमिबौ सबविधि कह्यो । तब उन मरम स-
 कल बिधि लह्यो ॥ जबदश मास गये तहँबीति । क-
 हीधायसों तबयहरीति २६ आजु मुचैगो मम अवधानु । हवै

है पुत्र कहिगये भानु ॥ लाउ मजूषा तुरत गढ़ाय ।
 तामें सुत धरिदेहुं बहाय २७ ॥ दोहा ॥ आन्यौ धाय मजूष
 तब करि मनमांह विचार ॥ अर्द्ध निशा बीती जबहिं लयो
 पुत्र अवतार २८ पहिरे कवच अभेद तनु कुंडल झल-
 कत कान ॥ सोकुमार भनि चंदसों षोडश कला निधान
 २९ धरिमजूषमें धायतब दीने सहित बहाय ॥ दृष्टिपर्यौ
 श्रुति धारकी हितकरि लियौ उठाय ३० ॥ नाराचकुंद ॥
 लसै महा स्वरूप पुत्र सूरसो उदय कियौ । गयौसु भौन
 आपने हुलाससों महाहियौ । दयौत्रियाहि जाति कर्मआ-
 दि कर्मतेकरे । अनन्दभौ महा घनो अशेष दुःखते टरे ॥
 ३१ धर्यौ विचारि नाम कर्ण पुत्रयों सिखावही । नित्य
 नित्य अंगअंगमें सुज्योति आवही । भयौ प्रवीण अस्त्रश-
 स्त्र सीखबो हियेधरे । सहस्रबाहु जीतिये गयौ विचारि
 योंकरे ३२ ॥ दोहा ॥ आराधे तब कमल पद परशुराम
 केजाय ॥ द्विजसुत ह्वै विद्यापढ़ी मन बच क्रम चितला-
 य ३३ यहिबिधि बहु विद्या पढ़ी सिखदै सो ऋषिराज ॥
 अस्त्रशस्त्र सीखे तहाँ करण तजे मुखराज ३४ परशुराम
 ऋषि राजतब आलस सों अलसाइ ॥ करण जंघपर शीश
 धरि सोयरहे सुखपाइ ३५ चौपाई ॥ कीट रूप नाराय-
 ण आये । भृगुनन्दन तहँ सोवत पाये ॥ करण जंघतर
 पहुंचे जाई । काटत रहे रुधिर धरछाई ३६ त्वचाकाटि ब-
 हु आमिष फोर्यौ । करण सुभट अंग नंक न मोर्यौ ॥
 सोवतते तब भृगुपति जागे । देखि रुधिर तब पूछन
 लागे ३७ (परशुरामउवाच) सुत यह रुधिर कहांते

आयो । तब रबि नंदन भेद बतायो ॥ जान्यो करण बिप्र
 नहिं होई । यह क्षत्री बालक है कोई ३७ ॥ दोहा ॥
 यद्यपि क्षत्रीवंश सों है विरोध अति मोहिं । कपट रूप
 विद्यापढ़ी अंत फुरो नहिं तोहिं ३८ ओढ़ि शाय आये
 सदन रबिनंदन अकुलाय ॥ उतकुंती गृहको गई तन के
 चिन्ह मिटाइ ४६ तबहीं कुंती रायपै नेगी दये पठाय ॥
 भीषम इती कथा कही सबनि सुनी सुखपाय ४० सोरठा ॥
 कुंतल नृपपै जाय कही बात समुझाय सब ॥ तब भूपति
 सुखपाय पठये नेगी लगन दै ४१ सुनत सुखद यह बात
 शुभ घटिका लीन्ही लगन ॥ भीषम सजी बरात हय ग-
 यंदपरि बहुघने ४२ ॥ भुजंगप्रयात छंद ॥ चले मत्त मातंग
 ऐसे विराजें । मनो श्याम भारे महा मेघ गाजें । चले तेज
 सों तेज ताते तुरंगा । मनो लेत भाजे कुरंगी कुरंगा ४३ च-
 ले बाजि साजे रथी शूर सेना । चले बीर बंका कहूं शंक
 हैना । चले दुंदुभी आदि दै सर्व बाजे । चले नृत्य कारी
 मृदंगी विराजे ४४ ॥ दोहा ॥ नियराने कुंतल नगर अद्-
 भुत गई बरात ॥ निरखि सकल बिधि नगर के आनंद
 उरन समात ४५ दुहूं कुलनि की रीति जो तिहि बिधि
 कियो विवाह ॥ दै कन्या बहु धन दयो समदे सब नरनाह
 ४६ करि विवाह नृपपांडु को भीषम पहुंचे धाम ॥ भये
 सगुन पैठत नगर होय सकल मन काम ४७ ॥ दंडक छंद ॥
 सगुन को सोसार देख्यो दाहिनो कुरंग दौर भारद मयूर
 चारु दर्शन देखायो है । दाहिनोई जंबुक उलूक श्वान
 दाहि नोई नीलद नब्रात शुभ सगुन जनायो है ॥ दाहि-

नोई शब्द खर शकर भयो दाहिनोई उज्ज्वल बसन लैके
 रजकधर आयोहै । अन्न पकवान दूब मृत्तिका सुगंध पान
 फलन की मालको बिलोकि सुख पायोहै ४८ ॥ चौपाई ॥
 कुंती गृह भीतर पगु धारी । देखन मुख आई गंधारी ॥
 सब गुन शुभ लक्षण लखि नैना । मनमें बिलखी कहै न
 बैना ४९ बूझी सब गुनकी बिधि सबै । सकल सगुनिया
 बरणत तबै ॥ पैठत नगर सगुन शुभ भये । नित नित
 आनंद देखें नये ५० ॥ दोहा ॥ धर्मधुरंधर होय सुत कुंती
 गर्भप्रवीन ॥ एक छत्र महि भोगवै करि समूह अरि हीन
 ५१ ॥ त्रिभंगीछंद ॥ सज्जन मन रंजै दुर्जनगंजै भंजै जग
 दारिद्र घने । सत्य कहै मुख सत्य लहै सुख दुःख दहै
 कवि छत्रभनै । धर्मनिधारै असुरन मारै जारै रोग किते ज-
 गके । भारी भय मानै निर्भयठानै जानै गुन जसके मगके
 ५२ ॥ दोहा ॥ झुकि गंधारी सगुनिया दीनी तुरत निकारि ॥
 लोभ असित लोभी कहै बातन एक बिचारि ५३ बढ्यो
 पांडु नृप तरुनि सों दिनदिन प्रेम अपार ॥ क्रीडा निशि
 बासरची सुयश सकल संसार ५४ दूजो कर्यो बिवाह
 तब आनी तरुनी धाम ॥ नाममाद्री लसतसों बिज्जुलता
 सी बाम ५५ गयो बिपिन को पांडु नृप आखेटकके काज ॥
 तहां हते तप युक्त द्विज ऋषिनी अरु ऋषिराज ५६
 तबहीं मनमथ मन मथ्यो कामातुर ऋषिराय । रति
 मांगी त्रियपै तहां अंग अंग अकुलाय ५७ (ऋषिनी-
 उवाच) पतिरति निशि में उचित है बासर युक्ति न
 आहि ॥ किती बिनय तरुनी करी धीरज होइ न ताहि

(ऋषिरुवाच) चौपाई ॥ पशुपक्षी दिनमें रतिकरै
हमतुम रूप मृगनि को धरै । ऋषिनी मृगी आप मृग
भयो । या बिधि त्रियसों रति रसठयो ५६ ताछिन
पांडु आय तहँ गयो । बिषम बाण सों ऋषिमृग हयो ।
लागत बाण भयो संताप । प्राण तजत तहँ दीनो शाप
६० ॥ दोहा ॥ जिहि बिधि छोड़ी देह में लागत बिषम
सुबाण ॥ यहि बिधि त्रियसों रति करत जैहें तेरे प्राण
६१ ओढ़ि शाप ऋषिराज को ग्रह आयो दुखपाय ॥
महामलिन निशि के समय पौढ्यो शय्या जाय ६२ तब
कुंती नृप पै गई करि षोडश शृंगार । मिस करि नृपसो
बत लख्यो अर्द्धनिशा सुखकार ६३ करत सेव पति
की त्रिया और पलोटति पाइ ॥ अंग अंग दुखसों दह्यो
उत्तर देहि न राइ ६४ बड़ीबेर जाग्यो नृपति कुंती अति
सुख पाय ॥ रतिमांगी त्रिय लाजतजि कामातुर अकु
लाय ॥ ६५ बिषको इषसो उरलग्यो सुनत त्रियाकीबात ॥
बचननिही नाशी निशा जौलों भयो प्रभात ६६ ॥ त्रोटक
कुंद ॥ उठिबाहर पांडु महीप गयो । न सुहाइकछू बहुदुःख
भयो । गज बाजि सबै संग साजितहां । चलिकेपहुंचे बन
घोर जहां ६७ ॥ सबैया ॥ देखितहां बनतालकेजाल तमा-
ल विशालनि कौनगनै । चंदन चंपक अंबकदंब सदां फल
श्रीफल बेलघनै । केवरो केतकीऔ करनाकुलि कुन्द सु-
कुमनिकोवरनै । बेला चमेली जुही बहु कुंजनिपुंजनि पुंजनि
मोहिमनै ६८ ॥ दोहा ॥ सुबस बसायो इंदुपथ कानन में
त्यहि ठौर ॥ रह्यो बिरमि नृप पांडुतहँ भूपतिको शिर

मौर ६६ ॥ इति श्रीमहाभारते राजा पाण्डुवनवास वर्णनो
नाम तृतीयोऽध्यायः ॥ ३ ॥

॥ दोहा ॥ तब कुंती मन दुखित हवै चली पाण्डु नृप पास ॥
गृहरक्षा को कृत्र कहि राखे दासीदास १ पहुंची भूपतिके
निकट नगर इंद्र पथमाह ॥ रहत सुचैने लोग सब
पाण्डु नृपति की छाँह २ ॥ चौपाई ॥ जानी तरुणी आवति
जवहीं । शोक भयो भूपति उर तबहीं ॥ निशि सून्यो नृप-
सेज सँवारी । इंदुबदनि त्रिय तहँ पगुधारी ३ पतिको
मन त्रिय लहै न सोई । बहु संदेह तासु उर होई ॥ तजि
लज्जा यों बोली बैना सुनहु प्राणपति बहु सुख दैन ४
(कुंत्यु उवाच) काहे रचत न हमसों मोह । यह लखि मोउर
बाढ़त छोहा ॥ तुमसों कहों वचन तजिलाज । क्यों न रचत
रति सुतके काज ॥ सुखद वचन रानीयों सुने । दुखकरि
राजा मनमें गुने ५ ॥ दोहा ॥ बज्रतुल्य उरमें लगी तरुणी
की यह बात ॥ बरनी कानन की कथा बिकल देह अकु-
लात ६ (पाण्डु उवाच) सोरठा ॥ मृगनयनी के रूप ऋषिनी
ऋषि रति रचतमें ॥ हयो कह्यो यों भूप द्विजके उर शर-
मृदमें ७ ॥ दोहा ॥ दयो शाप ऋषियों कह्यो ज्यों छाड़े
में प्राण ॥ त्याँ तरुणी संयोगते मरण आपनो जान ८ यों
सुनि त्रिय लखरि गिरी तनकी नहीं सँभार ॥ सुधि आई
बोली तबै यहि बिधि बारंवार ९ ॥ दंडककुंद ॥ किधों हेम
हरयो आपमान कर्यो बिप्रन को किधों धन धर्यो जाको
ताही में दीनो है । किधों में बिछोये कहूँ तरुणी को प्राण

पति किधों निंद निगमकै गुरुको दोष लीनोहैं । होम में
 बुझायो तृण चरत बिडारीधेनु झूठी साखि बोलीकै वचन
 महा दीनोहैं । कुंतीके बिलाप कह दीनो ऋषि शापजाको
 अंग अंग ताप ऐसोकौन पाप कीनोहैं १० (राजोवाच)
 ॥ दोहा ॥ होनहार सोइ ह्वै रहै नहीं सुमेटी जाय ॥
 सावधानके वच कहि राखी त्रिय समुझाइ ११ यहिविधि
 बीते दिनवने चिन्ता करी भुवारा ॥ किहिविधि उपजै बंश
 गृहहोइ सकल सुखसार १२ (कुंत्युउवाच) देव अकर्षण
 मंत्र मोहिं दीने ऋषि दुर्वास ॥ तुम आयसुलै जो
 भजौं सो आवै मोपास १३ धर्म जपन पति तब कह्यो
 तरुणी सों सुखपाइ ॥ आज्ञालै सुमिरन कियो सो पहुंच-
 च्यो ढिग आइ १४ आयो दृष्टि संयोग तबसूने महल
 मझार । धर्म अशीश दर्ईघनी इहि बिधि बारंवार १५
 (धर्मउवाच) चौपाई ॥ तेरे गर्भ होय सुत ऐसो
 षोडश कला चन्द्र है जैसो ॥ धर्म दुरन्धर धर्महि जानै ।
 दत्त सत्तके सब मग ठानै १६ भूमि भोगवै यकछतराज ।
 सबबिधि सारै जगके काज ॥ यह कहि धर्म गयो सुर-
 लोक । गर्भ धर्यो त्रिय नाशे शोक १७ दशयें मास
 पुत्र अवतर्यो । मनो अतनु तनु भूमें धर्यो ॥ जैजैशब्द
 अकाशहि भयो । धर्म जन्म महि मगडल भर्यो १८ ॥
 दोहा ॥ निशिदिन नारी नर सबै गावहिं मङ्गल चार ॥
 होत बधाई छत्र कहि नृपति पांडु दरबार १९ तब बूझे
 नृप ज्योतिषी कहिये लगनविचार ॥ कौन मुहूरत सुत
 भयो सो बेणों बिस्तार २० (ज्योतिषीउवाच) शुभदिन

शुभ घटिका भयो भाग्यवन्त बहु होय ॥ एकक्षत्र महि
 भोगवै अरि कहुं बचै न कोय २१ ॥ दण्डकच्छन्द ॥ सज्जन
 हुलासकार दुर्जन को नाशकार मित्रन विलासकार
 पृथ्वी को सिँगार है । मित्रको विश्वासकार पाटनि वि-
 लासकार भिक्षुक अवासकार भूमि भरतार है । जगजाको
 आशकार शत्रुको विनाशकार दीनन को यशकार रतन
 भँडार है । पुण्यको प्रकाशकार पापन को नाशकार नृपता
 को भासकार धर्म अवतार है २२ ॥ दोहा ॥ उपज्यो पूरण
 भाग्यते तुम गृह सुत बलवंड ॥ उन्नत सकल अधीन कै
 देह अदंडनि दंड २३ यहि सुख दिन बीते किते नृपति
 पांडु यक काल ॥ कही बोलि रानी तबै देव अकर्षण
 बाल २४ जा प्रसाद सुत दूसरो प्रगट होय मम गेह ॥
 सो आयसु अब उर धरौ भूपति कह्यो सनेह २५ जप्यो
 मंत्र बोल्यो पवन अन्तःपुर यक धाम ॥ तहां भयो संयोग
 तब गर्भ धर्यो हठि बाम २६ ॥ सुन्दरीछन्द ॥ पूरणमास
 भयो प्रगट्यो सुत । काम स्वरूप सुशोभिन संयुत । अंध
 तिया यह बात सबै सुनि । व्यास भजे तिहिवार महा
 मुनि २७ आयगये ऋषिराज तहां तब । जो त्रिय बैन
 कहे तिनसों सब ॥ सो वर दै ऋषिराज महामति । सोई
 करौ प्रगटै सुत या गति २८ (व्यासउवाच) दोहा ॥
 शीश न धुनि सुनि बात यह देखु पराये ऐन ॥ आपु कियो
 सो पाइये कहे व्यास यह बैन २९ दीन्हीं हरषि अशीष
 तब व्यास महा ऋषिराय ॥ गंधारीको गर्भ तब प्रगट
 भयो तहँ आय ३० जहाँ शैलके शिखर पर कुटी ऋषिन

को धाम ॥ कुंतीलहि भीमहिगई कीने अमित प्रणाम ३१
 सन्मुख गाज्यो सिंह तहँ भीमसेन त्यहिकाल ॥ हुलसि
 गोदते तब गिर्यो पाहन पै उताल ३२ अरु हूँ क्यों
 ज्यों जलद धुनि सुनि हरिगयो पराय ॥ सुनि गंधारी
 मूर्च्छितव गिरी धरणि अकुलाय ३३ थोरे दिनको गर्भ
 हवै मूचि गयो त्यहिकाल ॥ पर्यो पिंड सो धरणि पर
 अंग अंग बेहाल ३४ भयो कुलाहल सदनमें भजे व्यास
 मुनिराय ॥ हितकारी ता वंशके तबहीं पहुंचे आय ३५
 चौपाई । बरणि सबै विधि दासी कही । सो सब सुनि
 मुनि हिरदे लही ॥ करि सत अंश पिंड के धरै । प्राण
 सबनि में तब संचरै ३६ सो घट घृत भरि लये मँगाया
 प्रति घट अंश पिंड सुखपाय ॥ राखे एक एक गुणग्राम
 धरे सुअन्तहपुर एक धाम ३७ व्यास सिधाये तब ऋषि
 राव । करि गंधारी के चित चाव । पूरण मासगये जब बी-
 ति । खोले घट आनंद समीति ३८ प्रथम जन्म दुयौ-
 धनलयो । दूजे घट दुश्शासन भयो ॥ तीजे दूरध बहुसुकु-
 मार ॥ रूपवंत ज्यों सोवत मार ३९ चौथे घट उपज्यो
 दुहुं बैन । मानों तन धरि आयो मैन ॥ इहि विधि करि
 सत भये कुमार । शील वंत राचे कर तार ४० । दोहा ॥
 आनंद भौ धृतराष्ट्र गृह जहँ तहँ मंगलचार ॥ कंचन
 भूषण हेम नग पावत मंगन हार ४१ सब पुरमें आनंद
 भयो मन भायो सब लेत ॥ हरषि हरषि कै सकल विधि
 सबै अशीषन देत ४२ (धृतराष्ट्र उवाच) कहौ बिदुर आनंद
 मति जनम लग्न को भाव ॥ तुमते और प्रवीण को हित

कै बोल्यो राव ४३ (विदुरउवाच) मैं बिचारि देखी लगन
 कही नमोपै जाय ॥ मेरो विलगु नमानिये सब बिधि देहुं
 बताय ४४ जेठो सुत ऐसो भयो भलो नकरिहै काज ॥
 कुलहिकलंकलगाइहैअरुखोवैसबरज ४५ ॥ नाराचछंद ॥
 भलो बुरो गनै नहीं समूह गोत संहरै । लहै नसीख ए-
 कहू सबैकुकर्म सो करै । नराखु पुत्र भूप नीर माहिं सो
 बहाइये । सदा अलीनता करै सुगेह में न चाहिये ४६
 भये कितेक पुत्र और राज काज ते करे । बिचार औरहै
 न भूप बैन मो मनै धरै (गांधारीउवाच) नबोलु मढ़
 झूठ मा भलो नतोहि भावई । बोलाय तोहिं लीजिये
 इहां सुक्यों न जावई ४७ ॥ दोहा ॥ भीषम विदुर उठे
 तहीं यों कहिकै अकुलाय ॥ जेठो सुत कुल संहरै कुलहि
 कलंक लगाय ४८ ॥ चौपाई ॥ दिनदिन बाढ़त वे सोभाई ।
 यह सब पांडु नृपति सुधि पाई ॥ फूले अंग अंग दीनो
 दान ॥ सब याचक को राख्यो मान ४९ ॥ इति श्रीमहा
 भारतपुराणे विजयमुक्तावल्यां कबिछत्रसिंहविरचितायां
 दुर्योधनअवतारवर्णनोनामचतुर्थोऽध्यायः ॥ ४ ॥

भुजंगीछंद ॥ दई पांडु अज्ञा तहांबोलि भामैं । जपो इंद्र
 को मंत्र आवै सुकामैं । कर्यो शक्रकोध्यान सोगेह आयो ।
 भलो ष्टिसंगमों सुख छायो १ भयेमास पूरे भयो पुत्रनी-
 को । लखेशंक नाशेनशे शोकजीको ॥ महापांडु नरपतिअ-
 नन्दहीको । बधायो कियो दान दीन्हो दुनीको २ (राजोवा-
 च) कहौ ज्योतिषी पुत्रकी लगन कैसी । सुनावो सबै मोघरी

होय जैसी (ज्योतिषीउवाच) सुनौ भूप ऐसी घरीकी
निकाई । चहूंचक्र फेरें धरामें दुहाई ३ ॥ छप्पै ॥ वाण
निक्काय अकाश बाट सुरपुरको ठानै । देवन करि आतंक
भूमि ऐरावत आनै ॥ शरसमूह सोंसेतु सिंधुको मारग मं
डहि । लंकहि पुर वर जीति लंकपति घरुकरि दंडहि ॥
छत्रवषट वरनषटवर अंकतसो जीतै समर । तीन भुवन
कीरति करहि शुभ लच्छन सुन पंडुघर ४ ॥ दोहा ॥
कोहर द्रुम तन सुतभयो अर्जुन पायो नाम ॥ मनभायो
कारज करै जीतैबहु संग्राम ५ ॥ चौपाई ॥ अर्जुन जन्म भ
यो जब सुन्यौ । तब गंधारी माथो धुन्यो ॥ कुंतीपुत्रबली
सबजाये । पंडुराय गृह बजे बधाये ६ फिर भूपति मनमें
यह आई । इन्दु बदन त्रिय निकट बोलाई ॥ आयसु
मानि हमारो लंब । जपौमंत्र फिरि आवै देव ७ (कुंत्युवा-
च) मंत्र नजापौं पतिगुणग्राम । पुत्रबली प्रगटे तुमधाम ॥
पंच पुरुष सोजारति माने । तासों गनिका कहैं सयाने ८
तुम अज्ञाते यहि विधि करों । देवबुलाये उरमति धरों ॥
जोयह पतिको कह्यौ नकीजै । घोर नर्कतौ आप परीजै ९
(पांडउवाच) दोहा ॥ देहुमाद्रीको यही मंत्र विचक्षण वा-
म ॥ तौप्रसाद सुत पावई होय सकल मनकाम १०
तब अश्विनी कुमारको मंत्रदियो तिनवाहि ॥ सुमिरत
आयो देवतहँ कोटिमदन छबिजाहि ११ भयो सदन
संयोग तहँ गर्भ धर्यौ तिहिवाल ॥ करिमनपूरण कामना
देव गये त्यहि काल १२ उपजे ताके गर्भते रूपवन्त
सुत दोइ ॥ मंगलचार भये सदन आनन्द्यौ सबकोइ १३

चौपाई ॥ सुर किन्नर कौतुक चलिआये । व्योम विमान
 सकल छबिछाये ॥ कोटि काम छबि बरणि नजाई । निशि
 दिन आनंद होइ बधाई १४ जेठेसुतको सहदेव नाम ।
 लहुरे नकुल लसै छबि काम ॥ कहे ज्योतिषी सुनु भुव-
 राइ । पुत्रनके गुण कहौं सुनाइ १५ जेठोबली सकल
 जग जानै । जाकोबल सब दुनी बखानै ॥ पंडित ह्वैहै
 आगमकहै । मानसकल अरि गणको दहै १६ खांडेबली
 न दुसरो होइ । महि मंडल जानै सबकोइ ॥ भयेस-
 याने पांचौ भाइ । बहुतक दिन जवगये सिराइ १७
 दोहा ॥ देख्यो स्वप्न अरिष्ठ तब एक द्यौसनर नाथ ॥
 श्याम वरणा टेढ़े रदन तिहित्रिय पकरे हाथ १८ चलि
 चलि कंठा योंकहै बारंबार सुनारि ॥ कारो नर ठाढ़ो
 लख्यो केश भूमिलों डारि १९ छाया लखी शरीरकीबिन
 शिर देखीदेह ॥ जागतही नरनाह उर भयोमहा सन्देह
 २० जप तपदान कियेघने पंडित विप्र बुलाय ॥ सात्विक
 दान दयेतहां सबहीको सुखपाय २१ तीन द्यौस अन्त-
 र भये कीनो नृप बहु दान ॥ पुहुप वती माद्री भई तब
 कीन्है असनान २२ पतिकी सय्याको चली करि षोडश
 शृङ्गार ॥ नवलचीर आभरण बहु कंकन तरव निहार २३
 सवैया ॥ खंजनकी गति गंजन नैन करी दृग अंजन रेख
 निकार्ड । भूषनके मुक्तानिकेहार सिंगार सजीसब सुंदर-
 तार्ड ॥ पीनउरोज मुखी सब देह मनोज के ओज सरोज
 सोछार्ड । चातुर काम की पातुर सी अतिआतुर ह्वैपति
 पास सियार्ड २४ दोहा ॥ इंदुबदन त्रिय पति निरखि

कामातुर अकुलाय । दंपतिरतिमानी हरषि ऋषि के बचन
नसाइ २५ तबहीं सुखसंयोग में भूपति छांडे प्राण । अंधकार
दुख को जगत भूप आथयो भान २६ शोक कुटुंबिन के
भयो नर नारिन उर दुःख । रह्योन चारो बरुमें काहू के
उर सुख २७ ॥ चौपाई ॥ ऋषिन आयकुंती समुझाई । क-
रता गति सो कहा बसाई ॥ सहदेव नकुल माद्री लये ।
मोह छांडि कुंती को दये २८ (माद्री उवाच) ज्यों अपने
तीनों सुत जानौ । त्यों भो पुत्रन सों हित ठानौ ॥ यह
कहि उठो शीघ्रही कामिनि । भूपति संग भई सहगा-
मिनि २९ जब यह सुधि भीषम को गई । सहित वि-
दुर बहु चिंता भई ॥ कीनो पंडुनृपतिको शोण । खानपान
बहु भूल्यौ भोग ३० ॥ दोहा ॥ चलि आये ते इंदु
पथ समुझाये नर नारि । लै पांचौ पुत्रन चले कुंती युत
सुख कारि ३१ नगर हस्तिनापुर गये सबही लै सुख
पाइ । गांधारी उर सुख भयो देखत बहु पछिताइ ३२
(गांधारी उवाच) दुर्योधन की सब करौ सेवा तन मन
लाइ । आधी नृपता लै जिये धर्मपुत्र सुख पाइ ३३ ॥
इति श्री महाभारतपुराणे विजयमुक्तावल्यां कविकृत्रसिंह
विरचितायां अर्जुनसहदेवनकुलअवतारवर्णनो नाम पंचमो
ध्यायः ५ ॥

दोहा ॥ दुर्योधन को आदिदै सत बंधव बलबीरा ॥ इतहि
पंचसुतपंडु नृपते खेलें इकतीर १ राखत उरमें दुष्टता को रव
भांति अपार । ताको बारुन बां कई जो समाय करतार २ मत्त

सहस्र दश भीम बल दीनो त्रिभुवननाथ । चाहत बांध्यो
 ताहि बल जुरि कौरव इकसाथ ३ ॥ सुंदरीछंद ॥ मंत्रकियो
 इहिभांति सबै जन । भीमहि बाँधो दैदृढ़ बन्धन ॥ याहिदयो
 विधि आय महाबर । मारत ताहि अनाथ युधिष्ठिर ४ वे
 नहिं बन्धु कछूकरि जानहिं । जो कहिहों सोइ आयसु मा-
 नहिं ॥ तेसरिता तट खेलत हैं सुत । कौरव पांडव आनंद
 संयुत ॥ ५ कौन हरावहि भीमहिको बर । साजहुबार कछू
 अपनोछर ॥ सोवत बाँधै दैदृढ़ बंधन । गंग बहावहुयाहि
 ततक्षन ६ ॥ दोहा ॥ भीम सुवायो सदनमें सत बंधव
 सुखपाइ ॥ दृढ़ बंधनसों बाँधिकरि चाहत लयो उठाइ ७
 रह्यो मुष्टकरि पवनसुत देखत तिनके भाइ ॥ कैसे सोये
 मूढ़मति मोको सकै उठाइ ८ पचिहारे बन्धन सबै सकेन
 ताहि उठाइ ॥ दुर्योधन अद्भुत गन्यो अवलोक्यो सो आ-
 इ ९ (दुर्योधन उवाच) प्रथम कह्यो तुम प्राणबिन फिर
 यह बांधो आइ ॥ अब कंटक मेरो मिट्यो दीजै गंगबहा-
 इ १० बरुकरि लयो प्रयंक युत दुश्शासन धरि शीश ॥
 चले बहावन सुरसरी संग बंधु दश बीश ११ डार्यो
 गंग प्रवाहमें देख्यो कोसक जात ॥ दुर्योधनसों आयकै
 कही सकल बिधिबात १२ चौपाई ॥ सब कौरव मन
 आनंद भयो । अबनिज शालु हमारो गयो ॥ अबवे चारों
 बंधु अनाथ । दीजै चारि ग्राम नरनाथ १३ जो कहि
 होसो सेवा करिहों । अबनहिं गर्व कछू चित धरिहों ॥
 बंधन तोरि भीम तबधायो । कौरव जहांतहां चलिआयो
 १४ ॥ सुंदरीछंद ॥ देखतही कुन्हिलाय गयो सब । केतिक


भागि चले गृह को तब ॥ बोलत हैं सब कौरवयागति ।
 खेलकियो हम बंधु महामति १५ खेलकियो तुमसों हम
 जान्यो । हाँसिन आप बिसासहि ठान्यो ॥ भूप युधिष्ठिर
 आयसु मानहुं । नातरु आजु सबै तुम जानहुं १६ ॥
 (दुर्योधनउवाच) गंग बहाय दयो जबतू इन । मोहिं भई
 उरमें रिस योंसुन ॥ मैपठयो दह बैन तहांतब । तूचलि
 आयगयो कित ह्वैअब १७ गीतिकाकुंद ॥ करीझूठीसों-
 ह इन ककुनाहिं मोहिं जनाइयो । खोलि बंधन फांसि
 चलि कै भले मोढिग आइयो ॥ (भीमसेनउवाच) करों
 भूपति कानितेरी धर्मसुत सिखमैंलई । नातरु बचों कत
 मोहिं सेरत जायरिस क्यों आगई १८ कहिबैन येचलि
 सदन आयो आय मातासों कही । अंधसुत मिलि दुःख
 दीनो सो परै कैसे सही ॥ जानिकै वे क्षुधित मोसब
 बचन कर्कस उच्चरैं । जब करत सुख धर्मसुत की आन
 वेसब पज्जरैं १९ बांधिकै गंगा बहायो दया किरजि-
 यमें भई । कोरि बंधन सकल दीने बाट गृहकी मैंलई ॥
 (कुंतीउवाच) मानि दुर्योधन महीपति कानि तिनकी
 कीजिये । जोकहै नरनाथ सोईमानि आयसु लीजिये ।
 २० क्षुधित जान्यो भीमजब आहारलै आगे धर्यो ।
 भारकेते अन्न व्यंजन तृप्तह्वै भोजन कर्यो ॥ उदर पर-
 णकै उठ्यो बहुवस्तु बसननि साजिकै । उठिगयो कौरव
 सभा तब द्विरद सो गल गाजि कै २१ देखि कै कुरु-
 राज आदर हेतसों बहुविधि कर्यो । कूरस भोजनकर्यो
 तुमहितसों रसोंईमें धर्यो । प्रीति तुमसों मोहिये अरु स-

सकल अनुजनके हिये । निशि द्यौस देखत तोहिं आनंद
 छिनक बिछुरै नाजिये २२ (विदुरउवाच) दोहा ॥ सबको-
 रवकी दृष्टिछमि विदुर कही यह आन ॥ तूकित आयो भीम
 ह्यांविषज्यों नारहि खान २३ ॥ सवैया ॥ आवत ह्यां बहुते
 दुचितो लखि तोहिं पसीजि चलयो अंग ह्वै । मानतु नाहिं
 सबै मिलि जागत दुःख दियो बहुना कछु ह्वै । भोजन
 कीनो महा विष संयुत आवहि तूकत बावरो ह्वै । धर्म
 के नन्दन जैसे बचावत काल बचावत हू दिन ह्वै २४
 (भीमउवाच) ॥ दोहा ॥ सिंह कवन कहि क्यों जिये जो
 कछु पक्षी खाय ॥ मेरे कृष्ण को ध्यानउर काल कहा
 नियराय २५ कही नृपति सों मोहिं तुम जो चाहो अघ
 वाइ ॥ सकुच छाड़ि भोजन करौं विदुरगेह जो जाइ २६
 दुःशासन उठि तुरत ही विदुर पठायो धाम ॥ जेवत
 बैठ्यो भीम तब सजे सकल मन काम २७ ॥ दंडकछंद ॥
 रसहू अनरसहूमें हांसी अरु खेलहूमें गृह अरु बाहिरहू
 नेक मन सञ्चयो । दुष्ट दुर्योधन हलाहल कै आवे आधु
 ताके हिये दुष्टतानि भाजन है रञ्चयो । ल्याइ ल्याइ
 आमिष अनेक पकवान तहाँ स्वारनि सवारि कै समूह
 आगे सञ्चयो । कीनी न गलानि सों बखानि कबि कूत्र
 कहै जानि बूझि पवनपूत सोई विष पञ्चयो २८ ॥ दोहा ॥
 जितनो ल्यावत स्वार कछु झारनलगै नबार ॥ बचो र-
 सोई में नकुछ जेयें कैयो थार २९ ॥ दोषकछंद ॥ भीम
 चलयो तबहीं गृह आयो । कंचन पालकि धाम बिछायो ॥
 सोइ रह्यो मन आनंद कीनो ॥ सोधि तहाँ सत बंधव

लीनो ३० रैनगई तब कौरव धाये । कुंतलकी तनया
 ढिग आये ॥ सोवत भीम कहाँ सुख पायो ॥ खेलन को
 अब क्यों न जगायो ३१ जागि उठ्यो चलि सो तहँ
 आयो । दुष्टन के मन संभ्रम छायो ॥ बेगि नरेशहि
 जाय जुहार्यो ॥ कौरव के मन संभ्रम पार्यो ३२
 (दुश्शासनउवाच) ॥ दोहा ॥ कहाकरैं कैसीकरैं कीजैकौन
 उपाय ॥ सोई सब बिधि कीजिये याको लेहिं हराय ३३
 चौपाई ॥ बट तर चलि कै खेल खिलावैं । सब मिला
 छल करि ताहि हरावैं ॥ जब जब भीम दंड लै आवे ।
 बट चढ़ि रहौ छुवन नहिं पावै ३४ तब सब बट द्रुमतर
 चलि गये । बोलि भीम दुश्शासन लये ॥ खेलें भैया खेल
 अखंड ॥ जोहारै सो ल्यावै दंड ३५ (भीमसेनउवाच)
 दूखत है पग वीर हमारो । देखैं कौतुक बैठि तुम्हारो ॥
 हरुवे खेलै खेलि है ऐसे । खेलत भैया बंधव जैसे ३६
 दंडकछंद ॥ खेलें वीर ऐसो खेल आपुस को जैसे जो-
 पै खेलिहौ अनैसो तौन खेल खेल्यो परिहै । आनिहै
 जुरोष ताहि देहैं हम रोष फिरि खैहै आफसोसन हमारो
 कछु करिहै । पगहैं पिरात ताते चल्यो हू न मोपैजात
 सांची कहों बात पै न याहूते उसरि है । हारे हारे दाव
 दंड दीजै तू चलाय तौतो खेलै हम आय पाय पीर तन
 डरि है ३७ (दुश्शासनउवाच) ॥ दोहा ॥ जोहारैंतौ दाउं
 हम द्यौस पांचमें देहिं ॥ जो जीतैं तो आपनो पकरिहा-
 लिही लेहिं ३८ दंडचलायो भीम जब पर्यो गंगकेपार
 दुश्शासन तब पैरिकै लायो तेही बार ३९ आवतजान्यों

निकट सो धायो भीम खुराइ ॥ चढ़ि न सक्यो बटवृक्षपर
 लयो दुश्शासन आइ ४० चौपाई ॥ सोभाई वेफूले गातना
 सबै उच्चरत ऐसी बातन ॥ दीजै अबहीं दांड हमारो ।
 नातरु कहु हमसों तूहारो ॥ (भीमसेन उवाच) सुनो
 कहौ तुमसों सत भाउ । द्यौसपांच में लीजै दांड ॥
 पगमेरोहै महा पिरात । ताते मोपै चलयौ न जात ४२
 (दुश्शासन उवाच) बकसो अंत कहैं सतिभाउ । तबहम
 छाँड़ै अपनो दांड ॥ ठाढ़े भीमसेन यों भाषै । दांड बि-
 रानो कैसेराखै ४३ दयो दुशासन दंड चलाय । पर्यो सो
 कोस एकपै जाय । ढूढ़त भीम लाय यों तहां ॥ कौरव
 बंधु हतेसब जहां ४४ दुश्शासन फिरि उतर्यो धाय ।
 चाहत दंडहिदेहुं चलाय ॥ पकर्यौ भीम बीचही आया
 सक्यौ न दूरि दंड पहुंचाय ४५ तब दुश्शासन बटको
 धायो । अग्रपर पवनपूत छ्वैपायो ॥ उतरि दांड दुश्शा-
 सन दीजै । अब कछु लोभन आपन कीजै ४६ ॥ दोहा ॥
 सबमिलि बटपर चढ़िरहे सुने नहीं कोउ बात । भीम ग-
 ह्यो द्रुममूल तब हर्षवंत हैं गात ४७ गहियौ गाढ़ी
 डार को रहियौ सबै सम्हारि । पवन चलायो कृष्ण
 तब सकल गिराये झारि ४८ ॥ दंडकछंद ॥ एकपरे
 आँधे मुख एकगिरि उर्ध्वमुख धुकि धुकि परै घराघर
 धरकत है । एक लोट पोट हवै के चोट खाइ खाइ उठे
 एक अग्रपर शाखागहे लरकत है ॥ एक हरबर उठि
 भागत है डारि डार कँपि कँपि थर थर फर फरकत
 है । अंध सुत बंधु सुत डारि डारि डारनि ते घायल हवै

घूमि घूमि भूमि परे बरकत है ४६ ॥ दोहा ॥ जे बराइ
गृहको भजे गहे भीम तेजाय ॥ सब पौरुष साहस गयौ
उबरे हाहा खाय ५० दई महीपति को सबै बीती कथा
सुनाइ ॥ रोषवंत भूपति भयौ सुनि कै बहु दुख पाइ ५१
(दुर्योधनउनाच) ॥ दोहा ॥ सन्मुख बैर न कीजिये
रहो सकल अरगाइ ॥ तौलाजौ सुनि जो उन्हें ठौर नदेहु
छुटाइ ५२ ॥ इति श्रीमहाभारतपुराणे विजयमुक्तावल्यां
कविकृत्रविरचितायां भीमसेनकौरवसंवादवर्णनो नाम षष्ठो
अध्यायः ६ ॥



॥ सोरठा ॥ खेलत एकहि साथ कौरव पांडव अनुज
सब ॥ मारत कंदुक हाथ जैसे शशाबहीर को १ ॥ दोहा ॥
उछरी कंदुक त्यहि समय परीकूप में जाय ॥ काढ़न
को सब बंधु मिलि साजत किते उपाय २ ॥ गीतिका -
छंद ॥ कूप तट ऋषिद्रोण आये निरखि या बिधि सों
कहै । नहीं है समरत्य को ऊकाढ़ि कंदुक को लहै । वंशक्षत्री
को लजावत जनत नहिं करि आवही । काढ़ि तुमको
देहुं यह तृण सींकजो कोउ लावही ३ ॥ आनि आपीसींक
ताकरि धनुष ताको तिहि कर्यो । बाण ताहीको रच्यो
तिहि काल धनु उपर धर्यो । लग्यो कंदुक माहिं सो
शर साक दूसर कर लयो । करि कर्म अद्भुत बेगिदेइषु
माहिदीइषु सोदयो ४ ॥ दोहा ॥ यहि बिधि बेधो सींक
सों सींक कूप मंझार ॥ अन्त सींक गहि काढ़ियो गेंद
छत्र तिहिवार ५ ॥ चौपाई ॥ देखत सकल अचम्भैर है ।

समाचार भीषम सों कहै । लयो पितामह बिदुर बुलाई ।
 द्रोण विप्र ढिग पहुंचे आई ६ लै द्विज आये अपने गेह ।
 करि सनमान रच्यो बहु नेह ॥ सब शिशु तापहँ विद्या
 पढ़ै । नित नित चाउ चौगुनो बढ़ै ७ अस्त्र शस्त्र विद्या सब
 जानी । बिदुर पितामह के मनमानी ॥ तिनमें अर्जुन भो
 अधिकारी । गुरु प्रसाद पायो गुणभारी ८ ॥ दोहा ॥
 देख्यो चाहत शिशुनको तब गुरु द्रोण प्रभाउ ॥ कर्यो
 अखारो सदनमें बोले राजा राउ ६ ॥ त्रोटकछंद ॥ रवि
 पुत्र तहां तब कर्णगयो । कुरु नन्दन साथ मिलापभयो ।
 अति आदर भाउ विशेष कर्यो । हितसों नरनायक हाथ
 धर्यो १० गज दन्तन के बहु मंचबने । बहुचित्र बिचित्र
 अवास घने । तहँ बैठे पितामह आदि सबै निरखैं शिशु
 कौतुक लोग सबै ११ गुणकी रचना प्रगटी जबहीं । लखि
 अद्भुत वर्णत लोग तहीं । भट और न अर्जुन की सरिहैं ।
 गहिकै धनुको समता करिहैं १२ यह बात सुनी दुर्योधन
 जबही । प्रगट्यो उर कोपमहा तबही । धनुलै तब अर्जुन
 पास गयो । अवलोकि सुरोषहि छाड़ गयो १३ (कर्ण-
 उवाच) तोमरछंद ॥ अस समर मोसों माड़ि । सबदेहु
 बतन छांड़ि । सजि बाण तू डर डारि । अब पांडुपुत्र स-
 म्हारि १४ (अर्जुनोवाच) साजि तो कह बान । यह नाहिं
 मेरो स्यान । निज होय भूपति कोय । पुनि समर तासों
 होय १५ ॥ दोहा ॥ कैसे कहों बराबरी मोसों तोसों आय ॥
 तू सुत है निज सुतको नहीं अवनिपति राय १६ सुनि
 दुर्योधन कोप करि थप्यो करण भुव राय ॥ टीको नृप

ताको कर्यो शुभ घटिका सुखपाय १७ ॥ सर्वैया ॥
 अर्जुनके सुनि बैन सरोष तहां कुरु राज महा रिसभीनो ।
 देशदियो सब कोशदियो बहुबाजि दै साजि कै बाहन
 दीनो । भूषण दै गज भूषण भूपति भूपकियो कबि छत्र
 नवीनो । राज्य दियो सुख साजदियो सबकाज के कर्ण
 महीपति कीनो १८ ॥ दोहा ॥ जुरे कर्ण नर नाह तब
 अर्जुन सों करि क्रुद्ध ॥ दुओ धनुर्वर धीर अति करत अ-
 मित गति युद्ध १९ देखै जननी पुत्र बिधि करत वृष्टि
 शर जाल ॥ कही महा अकुलाय सुत दोऊ राखि गुपा-
 ल २० पांच बार धर मरछो कर्ण सुभट बलिवंड ॥ बार
 सात अर्जुनधुको विक्रम कियो अखंड २१ दोऊ बरजे द्रोण
 गुरु दोऊ शिशु इकसार ॥ राखि अखारो समदियो लोग
 सकल तिहिबार २२ दुर्योधन लै करण को गये आपने
 धाम ॥ आजु पैज राखो महा सुनि रबिसुत गुण ग्राम २३
 (द्रोणाचार्यउवाच) । चौपाई ॥ धनिधनि सुरपतिसुत
 सुखदाई । सनते तुम पौरुष अधिकाई ॥ यहकहि अपने
 कंठ लगायो । ह्वै है तो तैं जो मन भायो २४ जाडर
 करण कर्यो नरनाह । तोहिं निरखि दुर्योधन दाह ॥
 गुरुदक्षिणा सकल मिलिदेह । द्रुपदजीति मेटौ संदेह २५
 (अर्जुनउवाच) जो आज्ञा म्वहिं देहो आप । सोई
 करिहौं तुम परताप ॥ प्रथमहिं दुर्योधन सों कहौ । यह
 गुरुदक्षिणा उनपै लहौ २६ जो वे यह करिसकैं न आजु ।
 तब सारोंगो हौं सबकाजु ॥ यह सब कही द्रोण तह
 जाय । कौरव सजी चमू सुखपाय २७ कियो द्रुपद सों

सन्मुख युद्ध । तब पंचाल कियो बहु क्रुद्ध ॥ बाननि जुर्यो
 समर भुव आय । अम्बर लीनो ततक्षण वाय २८ ॥
 दंडकच्छन्द ॥ द्रुपद सों जुरे अङ्ग सोदर सकल संगलीनो
 रणरंग महा शूरन के गणमें । बाणनि अकाश छायादोऊ
 समुदाय युद्ध क्रुद्ध बाढ्यो शुद्ध दुहूं वीरन के मनमें । केते
 शर जालको प्रयोग कियो पांचाल कौरव बिहाल काहू
 धीर नहीं तनमें । सेना अकुलानी देखि राख्यो छत्र कुल
 पानी लेखि पांडुपुत्र पांचौ तहां आय गाजे रणमें २९
 दोहा ॥ अर्जुन करि संग्राम बहु जीतो सो नरनाथ ॥ आ-
 न्यो बाँधि सु गुरु निकट चकित भयो सबसाथ ३० ॥
 चौपाई । डार्यो गुरु के चरणनि सोई । देखत अद्भुत
 गति सबकोई ॥ बाल मित्रता की सुधिकरी । विप्रद्रोण
 करुणा हिय धरी ३१ अति हित भूपति कंठलगायो ।
 तुमते भयो सकल मनभायो ॥ धनि अर्जुन गुरुद्रोण
 पुकारे । तो बिन मो कारज को सारे ३२ (युधिष्ठिर उ-
 वाच) सुनि अर्जुन सोदर गुणग्राम । आजु करों नीको
 संग्राम ॥ भयो हमारो सब मनभायो । दुर्योधनको गर्व
 नवायो ३३ द्रुपदराय बिलख्यो गृहगयो । महाशोच
 उर अन्तर भयो ॥ द्रोणहि हितकै परिह सुसारें । ऐसे
 कोटि बिचार बिचारें ३४ पुत्र शिखंडी ताके धाम । ताते
 सरै नहीं मनकाम ॥ यज्ञारम्भ बोलि द्विज कीनो । भू-
 पति अति करुणा रस भीनो ३५ दोहा ॥ यज्ञकुंडते तब
 कढ़ी कन्या रूपनिधान ॥ कै रति शची पुलोमजा हैं
 मेनका समान ३६ नाम द्रोपदी तब भयो निरखत दुहिता

नैन ॥ धृष्टद्युमन पुनि कुंडते कळ्यो पुत्र जनु मैन ३७ ॥
 (दुपदउवाच) या कन्या यापुत्रते ह्वैहै सब मनकाम ॥
 परण करिके यज्ञको हर्षो भूपति धाम ३८ तबहीं यज्ञ
 सिरायके सबसमदे ऋषिजाल ॥ बर्ण बर्ण सुवरणसहित
 सुरभी देतिहिकाल ३९ ॥ इति श्रीमहाभारतपुराणे वि-
 जयमुक्तावल्यांकविच्छत्रसिंहविरचितायां अर्जुनविजयव-
 र्णनोनामसप्तमोऽध्यायः ॥ ७ ॥

(दुर्योधनउवाच) त्रिभंगीछन्द ॥ कहां मति कीजै क्यों
 जगजीजैवेसब कीजैउर धरिये । कछु मंत्र विचारैवे ज्यों
 हारैभीमहिमारै सो करिये । कछु व्यंजनकीजै बहुविषदी-
 जैबालि सुलीजै भोजनको ॥ सुनि धावन धायेतुरतहिलाये
 बहुभाषेभूपति मनको १ अति आदर कीनोबहु सुख भीनो
 ताहितवै । संमुखभये भारे अंधदुलारेआयजुहार बंधुसबै ।
 निशिदिनतुम भावत मनकरि आवत सरसावत आनंदध-
 ने । सबही सुखपायोनेहबढायो मनभायो वहको बरने २
 (भीमसेनउवाच) दोहा ॥ सेवक जानत मोहिं तुम कृपा
 करत सब कोय ॥ ताते दिन प्रति को इहां आवन को
 मन होय ३ ॥ चौपाई सहस हाथ पनवाररो आयो । प-
 वनपत जेंवत बैठायो ॥ दश बीसक जन परसत धाई ।
 सोईलेय छिनक में खाई ४ ॥ दंडकछन्द ॥ दुष्टताको पूर
 अति तामस को मूरमहा क्रूर दुर्योधन रहतु तासों क्रोध
 में । कालकूट फोरि फोरि जोरि जोरि केते विष घोरिघोरि
 डारै बहु भोजन अशेष में । व्यंजन अपार घृतसार कैयो

भार आनि कीनों हलाहल आधे आवु सुविषमें । लावत
 ही हारिजात स्वार जेतो डारिजात भीमसेन झारिजात
 पातरि निमेषमें ५ ॥ सवैया ॥ तद्यपि आन न चित कछू
 नहिं यद्यपि भाव महा छलको । जाननि जानतु भोजन
 खातु नहीं डरु ताहि हलाहलको । भोजन व्यंजन वृन्द
 घने सु कितेकनि जेंये न लग्यो पलको । दृष्टि इतै उत
 सो न करै न करै सुतौ पान कहुं जलको ६ ॥ दोहा ॥
 भोजन करि बीरालयो चल्यो आपने गेह ॥ छायगयो
 तिहि काल विष अंग अंग सब देह ७ ॥ चौपाई ॥ पवन
 पुत्र जब बाहर आयो । जान्यो भीम महाविष खायो ॥
 आई लहरि गिर्यो बिकराल । तब यह शोचत वारंबार ॥
 ८ तीनों मोलघु सादर आई । तिनकी इनसों कहा ब-
 साइ ॥ भूपति मन में नेक न क्रोध । कौरव सों को करै
 विरोध ९ यों सुमिरत तब छांडे प्रान । प्रफुलित कौरव
 भये निदान ॥ बोल्यो वैद नाटिका देखो । मुयो हलाहल
 सूचित लेखो १० (वैद उवाच) है अजहूं याके उर श्वाश
 ताते है जीवन की आश ॥ आयसु दीजै करों उपाय । यों
 सुनि क्रोध भयो भुवराय ११ ॥ दोहा ॥ तबै वैद जान्यो
 कपट गेह गयो अकुलाय ॥ जाहु करण लै भीमको आवो
 गंग बहाय १२ आयसु लै रविपुत्र सो दीनों गंग बहाय ॥
 देव विमाननि आरहे रहे व्योममें छाये १३ (सुर उवाच)
 जीवैगो सुत वायुको श्रीहरि सदा सहाय ॥ सुरसरिजल
 में सो बह्यो पर्यो पतालहि जाय १४ बासुकि दुहिता
 इन्दुमुखि अहिलमती त्यहि नाम ॥ देखि भीम मूरति

मदन प्रफुलित भई सुबाम १५ शिशुता से पूजी गवरि
मन बच क्रम चितलाय ॥ यकदिन सो बिधना करी रही
महा अरसाय १६ बासी पानी सो गवरि पूजी यकदिन
आप ॥ तब देवी मन क्रोध करि दीनो ताको शाप १७
मृतक मिलै तोको पुरुष जाहु सुरसरी तीर ॥ अहलमती
सो प्राणपति देख्यो मृतक शरीर १८ लै राख्यो सो
सदन में सखि सों कही बुलाय ॥ अब मोई कीजै यतन
याको लेहुं जिवाय १९ ॥ चौपाई ॥ ततछिनहीं तिहि
बुद्धि उपाई । जीरन पटकी गेंद बनाई ॥ सुधाकुंड सो
ततक्षण डारी । धाये पन्नग रक्षक भारी २० रहे सुधा
कुंडनिपै छाई । नहि रंचक कोऊ लै जाई ॥ अहिलमती
यहिविधि कहि धाई । गेंद मोहिं दीजै किन आई २१ का
निराय बासुकि की करों । जीव छाँड़ि तुम ऊपर मरों ॥
गेंद निचोरि ताहिलै दई । लै सो पवनपूत ढिगगई २२
रंचक तामहिं अमृत पायो । भीमसेनके मुख में नायो ॥
जीय उछ्यो जनु सोवत जाग्यो । निरखि त्रियायों बूझन
लाग्यो २३ (भीमसेनउवाच) ॥ दोधक छंद ॥ को त्रिय
तू जिहिं चित्त चुरायो । सोवत तैं कित मोहि जगायो ।
ब्याल लिये संग को कहि बाला । चंद्र मुखी गुणरूप
रसाला २४ कोकहुतू अबमो ढिगआई । कोयहदेशकहो
समुझाई २५ (त्रियउवाच) आय पतालसुनो सुखसाज ।
बासुकिमोपितुया थलराज २६ ॥ दोहा ॥ बासुके दुहिता
आहुं मैं अहिल मती मोनाम । गवरि कृपा पाये पुरुष मो
गृह करि विश्राम २७ अब अपनी सबविधि कहो कोहो

आप निदान । कौन वंश का नाम है किहि कारण ह्यां
 आन २८ (भीमसेनउवाच) सोम वंश हम सुखद त्रिय
 कृत्री जाति सुजान । भूपति जंबूदीप के महि मंडल में
 आन २९ तब संग दीखें ब्याल बहु कहो कौन यह भाउ॥
 जितै तितै ये देखियत सो सब बरणि सुनाउ ३० (अ-
 हिलमत्युवाच) ये पियूष के कुंडनव जगकी जीवन
 मरि । रखवारे तहँ सर्प बहु रहे चहुँदिशि पूरि ३१ (भीम
 सेनउवाच) दोधकछंद ॥ मैं अब कुंडसकललखि पाये ।
 सोखों सबै करों मन भाये । अहिलमती तब बिनवै
 ताहि । यह कछु बात न नीकी आहि ३२ जैहैं ब्यालकि-
 ते लिपटाइ । रंचक सुधा सको नहिं खाइ ॥ करि बिवाह
 जो मोसों लेह । जानि हितू माने सब नेह ३३ (दंडक-
 छंद) भारे भारे ब्याल महा कारे कारेविकराल कालहू
 के काल जहां तहां छाइ जायँगे । आनन की ओरजे श्र-
 वतविष ज्वाल जोर घोर घोर चहुँओर कहां धों समाइं
 गे ॥ सप्तमुखी एकअष्टमुखी तेरे अनैक एकएकमुखी आशी
 बिष आइ लपटाइंगे । जोरे दोऊ हाथ कहों मानो प्राण
 नाथप्यारे देखि ऐसे साथकैसे धीरज धराइगे ३४ (नारा-
 चछंद) फुरै न मंत्रमूरि एक एक ब्याल जोड़सैं । करौ
 बिचार कौन आपअंग आय जो ग्रसैं । कछू सुनै न नारि
 बात भीमसेन योंकहैं । सरोष मोहि देखिके कहोसुको
 इहांरहै ३५ ॥ भुजंगप्रयातछंद ॥ लखे कुंडनैनानि सोखों
 अबैहों । सबैनागके यूथको त्रासदेहों । चलयो धायकेना-
 रियों चित्तशोचै । करै दुःखसों नीर नैनानिमोचै ॥ ३६

(अहिलमत्युवाच) कहा कर्म कीनो मुयामें जियायो ।
 दुहूं भांतिसों कालह्वै खानआयो । करैजो कहूं यह प-
 राजै पिताकी । बिनाशै किधों युद्धमें देहयाकी ३७ दुहूं
 भांति मोको महादुःख ह्वैहै । अभैदान मोको कृपासिंधु
 दैहै । महां क्रोध ह्वै पवनको पूत धायो । हतेनागसों
 कुंडमें पैठिआयो ३८ महाक्रोध कीनो सबै व्याल
 धाये । चहूंओर घेरे सबैकुंड छाये । उठ्यो कोपिके भीम
 धायो तहांते । भगेनागसों नैन देख्यो जहांते ३९
 (दंडक छंद) एकमारे तोरिकै मरोरि मारे एकैनाग एकै
 मारे मींडकैकहांलौकहों करनी । एकै धाये धायकै धुकाय
 दये धावतहीं धर धर धरकत एकैपरे धरनी । एकनि
 के कारे फन फर फर फरकत थर थर कंपभगे एकै लैलै
 घरनी । भागि भागि एकै गये बासुकिनरेश आगे जाय
 कै अकह कह बातसबै बरनी ४० (नागउवाच) चौ-
 पाई ॥ आयो असुर एक अति भारी । क्योंहुं नमानत
 आन तुम्हारी ॥ कुंडएक करिलीनो पान । मारयो सब
 नागनको मान ४१ शोषन कुंड सकल कहै कहै ।
 पठयो काहू सोंसुधिलहै ॥ बासुकि कहै असुर नहिं हो-
 ई । नृपति युधिष्ठिर बंधव सोई ४२ भीमसेनहै ताको
 नाम । यहिथल जीत्यो तिहि संग्राम ॥ वाबिन इतोबली
 को और । सोम बंश सुभटन शिरमौर ॥ ४३ ॥ दोहा ॥
 युधिष्ठिर नरनाहकी देहु दुहाई धाइ ॥ भीमसेन कुंडननि-
 कटसकैननियरो जाइ ४४ चौपाई ॥ पाय रजायसु घाम
 न धायो । तुरतहि पवन पुत्र ढिग आयो ॥ आनि युधि-

छिर नृपकी दीनी । कानिभीम कुंडनकी कीनी ॥ ४५
 (भीमसेन उवाच) जौन दुहाई देते आई । कुंडल सकल
 लेत सोखाई ॥ कौने तुम्हें बतायो भेद । यह मनमें बहु उपज्यो
 खेद ४६ पाई सुधि बासुकि उठि धाये । भीमसेन तब कंठ
 लगाये ॥ बहु सुख संयुत लै गृह गये । अष्टकुली मन आनंद
 भये ॥ ४७ दोहा ॥ शुभघटिका शुभलग्न गनि शुभ
 वासर शुभवार । अहिलमती भीमहिं दई करि बिवाह
 सब चार ४८ पाइ दाइजो व्याहिकै विधुबदनीवरनारि ॥
 हियहुलास कीनो महा बदन मयंक निहारि ४९ बहु
 प्रताप पूरण कला भीमसेन ज्यों मान ॥ फूलति लखि अ-
 म्बुज मुखी सबगुण रूप निधान ५० ॥ सोरठा ॥ धर्म
 पुत्र भुवराय सहदेव सों यह कह्यो । यह सँदेह मोहिं
 आय भीमहिं भयो बिलंबबहु ॥ ५१ (सहदेव उवाच)
 जयोवीर पाताल भूपर नहीं सुभूमिपति । कौरव कर्म
 कराल करि भोजनमें बिषदयो ५२ ॥ दोहा ॥ दीनो गंग
 बहाइसो पर्यो पतालहि जाय ॥ बासुकि तनया तिनब-
 री रहत तहां सुखपाय ५३ पठ्यो धावन भूपतब पहुंच-
 च्यो भवनपताल ॥ बोलेहो तिनसों कही यूधिष्ठिर भू-
 पाल ५४ पवनपुत्र मांगी विदा बासुकिपे सुखपाइ ॥
 नाय शीश तिनको चलयो अहिलमती संगलाइ ५५ ॥
 चौपाई ॥ सब नागन मारग दरशायो । निकसि भीम भुव
 ऊपर आयो ॥ धर्मपुत्र के आनंद भयो । कुंतीको सब दुख
 मिटि गयो ५६ सकल अनुज मिलि आनंद ठयो । महा दु-
 खत कुरुनंदन भयो ॥ दयो दुष्ट सुरसरी बहाई । कह्यो

कहांतेप्रगट्यो आई ५७ सकल जगतअपयश हवैगयो ।
अब यह सालु हमारो भयो ॥ अब कछु ऐसो करौ विचा-
र । भीमसेन को सकिये मार ५८ (युधिष्ठिरउवाच)
दोहा ॥ अंघ सुतन को मानहति कियो सुयश संसार ।
गांधारी को गर्व अब गयो बार इहिबार ५९ ॥ इतिश्री
महाभारतपुराणेविजयमुक्तावल्यांकविद्धत्रसिंहविरचिता
यांभीमसेनविवाहवर्णनोनामअष्टमोऽध्यायः ॥ ८ ॥

दोहा ॥ आश्विन कृष्णा अष्टमी नर नारिन की भीर ॥
पूजन गज नारिन सजे भूषन वसन शरीर १ महा
मलिन कुंती भई अर्जुन निरखी नैन ॥ कहा बिसूरति
माय तुम सोकहि मांसों बैन २ (कुंत्युवाच) मेरे पांचो
पुत्र तुम वै सतबंधु विचारि ॥ सौ लौंदा ले आवहीं सक-
ल मृत्तिका डारि ३ करि गजपूजै आजुसो गंधारी सुख
पाय ॥ तिनसों हमसों कौन बिधि करी बराबर जाय ४
अर्जुनउवाच) पंचपुत्र तेरे बली क्यों मलीन बिचचित्त ॥
ऐरावत आनों द्विरदतेरे पूजन हित ५ ॥ सवैया ॥ काहे
को माय बिसूरति याबिधि बाण अनेकनि अंबर छाऊं ।
बाट करौं शरजाल पठै नभ भूमि अकाशहि मेंट कराऊं ॥
मानहैंतौं दुर्योधन को बल कौरवको सबगर्ब नवाऊं ।
आनो भुजा बलसों ऐरावत अर्जुन तौ तुवपुत्र कहाऊं ६
दोहा ॥ करि प्रणाम गुरुद्रोण को लीनो धनुष उठाय ॥
हित ऐरावत सुरपुरी दीनो बाण पठाय ७ अर्जुन इषु
देवन लख्यो कह्यो इंद्र सुनिलेहु ॥ तुम सुत मांगत तय

द्विरद करो कृपा सो देहु ८ जो न देहु ऐरावतैं तौ वह बरु
 करिलेइ ॥ अमरपुरी भटभंजि कै दुख देवनिको देइ ६
 देन कह्यो वारण सुनी देवनि की मनुहारि ॥ क्यों धरि
 जैहैं स्वर्गते सो सब कहौ बिचारि १० ॥ चौपाई ॥ सब
 देवन मिलि बाण पठायो । भूतल अर्जुन के ढिग आयो ॥
 ऐरावत को मारग कीजै । यहि विधि वारण आपन लीजै
 ११ (अर्जुन उवाच) बाण अनेकन अंबर छाऊं । ऐरावत
 को बाट बनाऊं ॥ इंद्रसभा में बाण पठायो । देवन इंद्रहि
 जाइ जनायो १२ ॥ दोहा ॥ आज्ञा सुरपति तब दई साखि
 दये सुरपाल ॥ पूजा करि पठवै इहां वारण याही काल
 १३ आयो पत्री भूमिको अर्जुन लिखिये भाइ ॥ निकसि
 नगरतें सुभट तब लीनो धनुष चढ़ाइ १४ करि प्रणाम
 गुरुद्रोण को कृष्णहिं शीशनवाय ॥ शर पंजर पूर्यो तबै
 लयो व्योम सब छाये १५ ॥ सवैया ॥ व्योमको पठायो
 बाण प्रथम सहस्र एक दूसरे सहस्र दशस्वर्गको पठाये
 हैं । तीसरे अयुत पांच चौथे लक्ष एकशर एक कोटि पांचये
 आकाश माहिं छाये हैं । षष्ठमें करोड़ दश अर्ब एक सातये
 सु कहाँ लौ बखानों शरजाल जेते धाये हैं । पूर्यो सुर
 लोकते धरालों शर पंजर बिलोकि अंधपुत्र शत बंधुतें
 सवाये हैं १६ ॥ चौपाई ॥ देखत कौतुक सब जग जाल ।
 कौरव कुललखि भये बिहाल ॥ कौतुक बिदुर पिताहम
 भूले । नृपति युधिष्ठिर तनमन फूले १७ अर्जुन महा परा-
 क्रम कीनो । मित्रनि सुख दुष्टन दुख दीनो ॥ सकल व्योम
 शर पंजर छाये ॥ उतमै कहा मेघ जनु आयो १८

दोहा ॥ योजनद्वादश लक्षलौं शरपंजर नभ छाड ॥
 देखतही सब सुरन मिलि कही शक्र सों जाइ १६
 आज्ञा लै सुरराजकी चल्यो मत्त मातंग ॥ गर्व धर्यो
 शरजालको करौंकोपिकै भंग २० ॥ भुजंगीकुंद ॥ धर्यो
 व्योम तैं गर्व कै शक्र हाथी । किथौ मेघ कै योध के शैल
 हाथी ॥ कहै बाण के पंजरे तोरिडारों । धरा में धसों
 जायके शेर पारों २१ जहां जोर करि कै करी बाण तो-
 रे । तहाँइंद्र को पुत्र लै बीस जोरे ॥ चल्यो मत्त मातंग
 सो भूमि आयो ॥ लख्यो मातुकुंती महा सुख पायो २२
 (भीष्मउवाच) न ऐसो सुन्यो मैं नैनादि देख्यो । सुतो
 में अचम्भो महा चित्त लेख्यो ॥ महावीर आकाश को
 पंथ कीनो । भयो पंथ तानाम श्रीराम दीनो २३ (अर्जु-
 नउवाच) करों जू अबै मातु पूजा करी की । नकीजै क-
 छू बेर एकौ घरी की ॥ तबै मात आनंद जी मांझ आन्यो ।
 कही को सुतौ धन्य कै द्यौस मान्यो २४ गये सर्वसंशय
 सो संदेह जीके । भुजा दंड पूजे तबै पार्थही के ॥ महा
 धन्यहों पार्थ सो पुत्र जायो । दये बायने और कीनो
 बधायो २५ ॥ दोहा ॥ आनंदयुत पूजा करी सब बिधि
 बात बनाइ ॥ गंधारी लखि लखि तबै मनहीं मन पछि-
 ताइ २६ करि पूजा मातंग की फिरि पठ्यो सुरलोक ॥
 दुर्योधन को आदि दै भयो सबनि को शोक २७ (युधि-
 ष्ठिरउवाच) धनि अर्जुन तैं राखियो लोक लोक में नाम ॥
 अब नकरेंगे गर्बवे रहे सशोक धाम २८ दुर्योधन को
 आदिदैं भये गर्वकरि हीन ॥ नैक सुहायन धाम धन क्षण

क्षण हवैगये क्कीन २६ (गंधारीउवाच) कहाभयो सुत सो
 जाने सरै नतिनसों काम ॥ जाये अर्जुन भीमउन धनि
 धनि कुंतीबाम ३० देखि पराक्रम दुहुन के लख्यो नहीं
 कुशलात ॥ लैहैं तुमते राज वे यह सूझति है बात ३१
 ॥ दोहा ॥ लाज भई दुर्योधन दुश्शासनके चित्त ॥ थाके
 अमित प्रकाश करि कुंती पुत्रनि हित ३२ ॥ सवैया ॥
 राज सुहाय न काज सुहाय न लाज सुहाय नहीं मन
 माहीं। ग्राम सुहाय न धाम सुहाय न बाम सुहाय हिये
 सुधि नाहीं। देश सुहाय न कोश सुहाय सुकौरव के मन
 रोष वृथाहीं। खान सुहाय न पान सुहाय सुहाय न पांडु
 के पुत्र न छाहीं ३३ (दुर्योधनउवाच) दोहा ॥ अ-
 र्जुन भीम भये बली कीजै कछूउपाय ॥ सब मिलि ऐसो
 कीजिये शाल हमारो जाय ३४ इति श्रीमहाभारतपुराणे
 विजयमुक्तावल्यां कबिछत्रसिंहविरचितायां ऐरावतआग-
 मनोनामनवमोऽध्यायः ॥ ६ ॥

दोहा ॥ गंधारी भ्राता शकुनि बोलि लियो अकुलाय ॥
 भीषम अरु बोले विदुर मंत्र काज सुखपाय १ (दुर्योधन
 उवाच) जैसे क्कीजें पंडु सुत सोमति कहौ बिचारि ॥ बी-
 चहि बोले शकुनि तब देहु गेहमें जारि २ बरुण नगर
 लै कोटि रचि तामें दीजै बास ॥ चहुंदिशि अग्नि प्रजा-
 रिये होय सबन कोनाश ३ ॥ चौपाई ॥ भीषम मंत्र कहन
 नहिं पायो । शकुनि कह्यो सो नृप मनभायो । समझो
 सोई कोटि करावहु । बेगहि चलो बार जनि लावहु ४

सवैया ॥ तेल भरे घट आनि धरे घृतके भरिकै घट
 केते सवारे । तूलदै मूलमें रार अपार सुलाख मिलेकिये
 गंधक गारे । अंतर सूत निरंतर काठ बनाय कै पावक
 धाम सुधारे । चित्रित चित्र सवारि दिवालनि देखिय
 सदन सबै उजियारे ५ ॥ दोहा ॥ वर्ष दिवस बीते श-
 कुनि कह्यो नृपति सां आय ॥ सपर्यो मंदिर पांडुसुत
 दीजै तहां पठाय ६ ॥ गीतिकाछंद ॥ बोलिलीने बिदुर
 भीषमलै सभा बैठारियो । नृप युधिष्ठिर आदिदै सब पांडु
 पुत्र हँकारियो । बात भीषम पै कहाई मानि आयसु लीजि-
 ये । तुमहेत मंदिर वरण राच्यो वास तामें कीजिये ७ धर्म
 सुतके हर्ष उपज्यो तुरत सबरथ पर चढ़े । राज आज्ञा
 मानिकै युत मांतु पुर बाहिर कढ़े । बिदुर साथचले पठा-
 वन सकल सिक्षाते कहें । बैठिकै पर सदन में निश्चिन्त
 भूपति नारहें ८ ॥ चौपाई ॥ अति सचेत रहियो गृह
 माहीं । आप उठायो तुमबह नाहीं ॥ जायबासना गृहकी
 लीजौ । आप सूझतौ सबकुछ कीजौ ९ पैठन पेटजु कोई
 आवै । सो नहिं भेद कछू लखिपावै ॥ बुधिदै बिदुर गये
 फिर ग्राम । पहुंचे नृप चलि ताहीधाम १० गेह प्रवेशकियो
 भूपाल । सनमुख छीक भई तिहिकाल ॥ सहदेव कहै
 सुनिये महाराज । हरहु इहां नहिं नीकोकाज ११ (नकुल
 उवाच) क्यों न हस्तिना पुर पगुधारो । जियमें काह
 बिचार बिचारो ॥ कही भूप वहिपुर नहिं जैहैं । दुखसुख
 बीर इहां हमरैहैं १२ यह दुख बिदुर पितामह पायो ।
 सो भ्रातनि उर आनंद छायो । बिदुर कह्यो सबतें सो

देख्यो । पावक पुंज धामसों लेख्यो १३ सावधान निशि
 बासर रहैं । मरम न काहूसों कछु कहैं ॥ दुर्योधन प्रतिहार
 बुलायो । भेद सकल दै ताहि पठायो १४ (राजोवाच)
 हमसों अनरस करि तुमजाहु । जहां युधिष्ठिर रहैं नर-
 नाहु ॥ भूलै अग्नि सो वारो धाम । करिहौ सब
 तुव पूरण काम १५ ॥ सुन्दरीछन्द ॥ आयसु पाय गयो
 वह ता थल । जाय प्रणाम कियो पलहीपल ॥ और कहे
 दुर्योधन के दुख । पेट विश्वास कहै हितकी मुख १६
 दोहा ॥ वचन सम्हारे बिदुर के कपटी उर पहिं चानि ।
 सबबिधि सकल सचेत हवै कर्यो पवरि मग आनि १७
 मालतीछन्द ॥ भीम सिधायो । सुरंगखनायो ॥ बन कहैं
 कीनों । पंथ नबीनों १८ ॥ चौपाई ॥ हमहिं मरे ज्यों कौ-
 रव जानौ । ऐसे सब मिलिकै मति ठानौ ॥ भिक्षुक पंच
 दिवस यक आये । जननी वृद्ध संग ते लाये १९ देखि
 भीम यों कहै बिचारी । बनमें जाहिं इन्हें ह्यां जारी ॥
 बहुबिधि भोजन तिनहिं कराये । उत्तम ठाम तहां पौढ़ा-
 ये २० ॥ दोहा ॥ जबहीं बीती अर्द्ध निशि सोवत सबही
 जानि ॥ कही भीम नरनाहसों चलौ बिपिन सुखदानि २१
 सुरंग बाट सब मिलि कढ़े लै जननी त्यहिकाल ॥ लै
 पावक तब पौरि पर भीमहुं गयो उताल २२ ऊंक दई
 प्रतिहार शिर दीनी पौरि जराय ॥ महल महल परि
 जारिकै गयो भय पै धाय २३ ॥ दोधकछन्द ॥ बाटलई
 बनको उठि धायै । मंदिर दुर्गम कोटि कराये ॥ मूंदिगयो
 मग कोउ न जानै । जात चले थकिकै हहराने २४ भीम

महीपति कंध चढ़ाये । पार्थ तबै उरसों लिपटाये ॥ बंधव
 दोय लये एक बारी । शीश धरी जननी सुखकारी २५
 लै दशकोस गयो बनमाहीं । भयजिनके मनमें कछु नाहीं ॥
 धाम जर्यो सुनिकै कुरुराई । बैठि सभा बहुतै पछि-
 ताई २६ सुखबाढ्यो अतिही उरमाहीं । देखत लोगनके
 पछिताहीं ॥ शाल मिट्यो उरको यह जान्यो । शुद्धभयो
 तब दै करि पान्यो २७ ॥ दोहा ॥ नयो जन्म जान्यो तबै
 शतबंधव उर फूल ॥ बड़ी कृपा करता करी नशे हमारे
 शूल २८ उत पांडव बनको गये उतरे बटकी छांह ॥ सब
 सोये पहरे जगे भीमसेन बनमांह २९ नरदेही की बास
 लहि आई त्रिय गलगाजि ॥ नाम हिडंबी राक्षसी घोर
 महा बपु साजि ३० तन दीरघ दीरघ उदर दीरघ दंत
 कशाल ॥ दीरघ मुख दीरघ श्रवण दीरघ बाहु सुबाल ३१
 आई गर्जत नारि वह भीम न मानी शंक ॥ तरुवर लै
 संमुख गयो करी न भय कछु अंक ३२ देखत साहस
 भीमको भई परमबपु बाल ॥ राकाशशि षोडशकला
 रूपलख्यो त्यहिकाल ३३ (हिडंबीवाच) दोधकछन्द ॥
 मो मन रोचक आपु न मानो । आपु त्रिया करिके उरजा-
 नो ॥ मैं तुम देखि बली बरकीनो । नित्तचलों तब आयसु
 लीनो ३४ आय हिडंब तहां तब गाज्यो । भीम इतै द्रुम
 लैकर साज्यो ॥ को कहि नारि कहां यह आयो । भेद कछू
 नहिं मैं अब पायो ३५ (हिडंबीउवाच) दोहा ॥ मेरो वीर
 हिडंब यह कीजै युद्धनिशंक ॥ कछु बिस्मयजिय जनि करो
 लज्जा धरो न अंक ३६ नहिं गाजत धीरज रह्यो तेरो

बुद्धिनिधान॥ यह न करूँ तेरो करै हतिबर याहिनिदान ३७
 (भीमसेन उवाच) चौपाई ॥ तेरो कहा भरोसो मोहिं ।
 बीरहततरिस लागै तोहिं ॥ जब याकी तू होइ सहाय । तब
 कहु मेरी कहाबसाय ३८ (हिडंबी उवाच) दोहा ॥ जानति
 तोकों प्राणपति नहिं राखति चित और ॥ तोसम या में ब-
 ल नहीं हति हिडंब यह ठौर ३९ भयो असुर अरु भीम
 सों अतिगति मुष्टिप्रहार ॥ मल्ल युद्ध करि घर परे ह्वै
 दोऊ बिकरार ४० निकट न पायो भीम जब जागे बंधव
 चारि ॥ निशिचरसों मंडत समर अवलोक्यो सुखकारि
 ४१ ॥ त्रोटक छंद ॥ अवलोकत भीमहि लाज भई । तब दा-
 नवके भुज कंठ दई ॥ बरु कै वह दानव वीर हयो । सब
 बंधवको बहु सुख भयो ४२ गीतिका छंद ॥ धर्म सुतको
 माँगि आयसु सीख कुंती पैलही । तब हिडंबी भीम व्या-
 ही विधिकरी जैसीचही । रहत बीते दिन किते ताबि पि-
 नमें सुख साजही । कंदमूलनि खात खनिखनि जीवका
 यों राखही ४३ ॥ दोहा ॥ रहत किते दिन जब भये
 ता काननके धाम ॥ पुत्र हिडंबीके भयो धर्यौ धरूका
 नाम ४४ बीति किते दिन तब गये तज्यो बिपिन वह ठाम ॥
 छाड़ि धरूका ताथली पहुंचे इकचक ग्राम ४५ रूपक प-
 रियाको सजे रहे एकद्विजधाम ॥ उद्यम करि भोजन करै
 सब बंधव गुणग्राम ॥ ४६ ॥ इति श्री महाभारतपुराणे
 विजयमुक्तावल्यांकविच्छत्रसिंह विरचितायां धरूका जन्म
 वर्णनो नाम दशमोऽध्यायः ॥ १० ॥

त्रिभंगीछंद ॥ इकचक नगरी सबगुण अगरी कीरति
 बगरी सकल दिशा । पुरनर सबगाजत इहिविधिराज-
 त साजत सीकन द्योसनिशा ॥ सब कंपत थर थर बक
 दानव डर घरघर शोच सकोचमहा । नितप्रति नरमारैं
 किते सँहारैं बरणों निशिचर कर्मकहा १ ॥ दोहा ॥ नाश
 जानि पुरनरसबै तबयह कियो विचार ॥ दिनप्र-
 ति दीजै एक नर चैनलहै संसार २ निशिचरसों कीनो
 विनय सबही मिलि तहँ जाय ॥ प्रतिदिन को तुव भक्ष
 हित नरयक पहुँचो आइ ३ मानि विनय प्रतिद्योस को
 भक्ष एकनरलेहि ॥ जाको जबही औसरा सोभक्षन ते-
 हिदेहि ४ द्विज तरुनीके धाम जहँ बसत युधिष्ठिर राइ ॥
 ताके सुतको औसरो पहुँच्यो इकदिन आइ ५ ॥ सोरठा ॥
 द्विज तरुनी अकुलाइ बार बार घर मूरछै । फिर फिर
 यह पछिताय क्योंन काल्हि यह पुरतज्यौ ६ ॥ दोहा ॥
 मोहमहा देखत भयो कुंतीकेउर आइ ॥ ततक्षण वाको
 दुख कह्यो भीमहिपांस बुलाइ ७ (भीमसेनउवाच)
 चौपाई ॥ याके सुतके पलटे जैहों । फिरि मिलिहों जो
 जीवत रहों ॥ भोजन दानव हितजो भयो । भरिकै महि-
 ष भीम संगलयो ॥ ८ दानव ठाँउ तहांचलि आयो ।
 बैठभीम तहँ भोजन खायो ॥ धायो असुर क्रोध करिभा-
 री । बज्रपात सम दोहथिमारी ९ ॥ दोहा ॥ मुष्टिप्रहार
 कियो असुर आपु शक्तिअनुसार ॥ भीमनआन्यो चित्तमें
 भोजन भखे अहार १० ॥ दोधकछंद ॥ मारतही सब भोजन
 खायो । शंकनहीं अपने उर लायो ॥ बीरदुहुँ मिलिके रण

कीनो । कोउ नहीं तिन में बल हीनो ११ युद्ध भयो
 अति ही गति ऐसो । राघव रावण को रण जैसो ॥ ग्रीव
 दयो पगु दुष्ट सँहार्यो । ऐंचतब्रै पुर बाहर डार्यो १२
 दोहा ॥ ठाढ़ो कीनो पँवरि पर मृतक असुर सो ला-
 इ ॥ प्रात होत पुरनर सकल निरखि भगे अकुलाइ १३
 सबही को शंका भई सकैंन नियरे जाय ॥ हैदोनव नि-
 रजीव यह कही भीम तहँ आय १४ भीमसेन ढिग जाय
 कै संभ्रम दियो भगाय ॥ यह गति जानी व्यासमुनि
 तबहीं पहुँचे जाय १५ (श्रीव्यासउवाच) पवनपुत्र मा-
 र्यो असुर सबजग भयो बवाउ ॥ अब सिख मानो बे-
 गिही नगर कंपिला जाउ १६ मानि सीख ऋषि व्यास
 की तिहि पुर पहुँचे जाइ ॥ होत सगुन सहदेव सों कही
 नृपति सुख पाइ १७ ॥ चौपाई ॥ कैसे सगुन भये अब
 भाई । सो अब मोसों कहि समुझाई ॥ सुनहु गोसाईं स-
 गुन प्रभाव ॥ होइ लाभ चित चौगुन चाव १८ आमिष
 लीने देख्योश्वाना गयो दाहिनो उत्तम जान ॥ लीनो अ-
 र्जुन धाय छुटाइ ॥ लाभ बहुत पहिचानो राइ १९ र-
 हे सुकुंभकार गृहजाय । पंचवीर संग कुंती माय ॥
 यहि बिधि बीति काल बहु गयो । भूपति द्रुपद स्वयंबर
 ठयो २० ॥ दोधकछंद ॥ सोहत पंचन की अवली अति ।
 पेखत तासुको मोहतिहै मति ॥ उज्ज्वल है गज दंत म-
 हा कृबि । जोन्ह मनो द्युति बर्णत हैं कबि २१ आय
 जुरे भुवके सब भूपति । है जगमें जिनकी बहु कीरति ॥
 कौरव सेन तहांसब सोहति । दीरघ सायर सोमन मो-

हति २२ ॥ दोहा ॥ यज्ञ द्रुपद नृपकै भयो आये सब ऋ-
 पिराई । रच्यो द्रोण गुरु यत्र नभ राहा बेध बनाय २३
 राख्यो परम कठोर धनु मीन यंत्रके पास ॥ हवैहै सो
 समरत्थ जग बेधै यंत्र अकाश २४ ॥ चौपाई ॥ तप्त तेल
 सों भरो कराह । राखो नीचे तब नरनाह ॥ तरे दृष्टि
 करि देखे झाई ॥ मीनयंत्र जो बेधै आई २५ ताउर
 कन्या ताही काल । कही भूप यह डारै माल ॥ बारन
 चढ़ी फिरै सो बाल ॥ लीन्है हाथ पुहुप की माल २६
 (दंडकच्छंद) बेनी ज्यों फणीन्द्र और इंदु सो मुखारविंद
 चंपक बिलास हास मोहत है मन को । खंजन चपल
 गति भंजन है ऐन नैन अंजन सहित मन रंजन है बनको ॥
 अधर चिबुक चारु बाहु है सुदार कुच कनक कलश रंग
 कंचन सो तनको । कदली के खंभसे युगुल जंघ छत्रक बि
 कोमल कमल जिमि बानिक चरनको २७ चौपाई ॥ देखि
 कुमरि सब उमहे राई । करि करि गर्व क्यो धनु आई ॥
 तानि सकैं नहिं सकैं उठाई । गये सबन के मुंह कुम्हि-
 लाई २८ कौरव सब बंधव पचिहारे । सबही के मुख हवै
 गये कारे । धृष्टद्युम्न तब शकुनिहि देखि ॥ करत धर
 पना कुमर विशेखि २९ (धृष्टद्युम्न उवाच) सवैया ॥ शूर नहीं
 शूरन में कूर महा कूरन में दुष्टता सों पूरण है पूर पुर-
 बाईको । मूढ़ महा मूढ़न में गुणी मंत्र गूढ़न में पगन-
 आरूढ़न में संग्रह चवाई को ॥ ऐसो अबिबेकी है कुटेव
 टेवटेकी जिहि तासों एक येका जौन खोज है भलाई
 को । नाहिं बली बालिन में छली महा छलिन में सुदेखिये

नमुख ऐसे कुटिल कसाइ को ३० ॥ दोहा ॥ बार
 लाक्षा गेह में पाण्डु पुत्र यहि जाइ ॥ होतो जीवित पार्थ
 जो लेतो धनुष चढ़ाइ ३१ यन्त्र बार दश बेधतो महा
 बीर बलवण्ड । सुनि पुनि कोप्यो कर्ण तब बाढ्यो कोप
 अखंड ३२ (कर्णउवाच) जो मारों अब द्रुपद सुत कौन
 छुड़ावै तोहिं ॥ मरो मर्मना तूल है कानि भूप की मोहिं
 ३३ ॥ सोरठा ॥ चलयो कर्ण धनु पास बरजि कृष्ण तब
 योंकही ॥ छांड़ि देहु यह आश बेधो जाय न यंत्र यह
 ३४ ॥ दोहा ॥ जो बेधो इक बाण सों तौ जगमें यशहोता ॥
 हारे होय कलंक बहु और लाज हो गोत ३५ रूप कप-
 रिया को कियो अर्जुन बचन प्रकाश । नहीं सभा समर-
 त्थ कोउ बेधै यंत्र अकाश ३६ (द्रुपदउवाच) चौपाई ॥
 कै भूपति कै तपसी होई । एहा बेध करै जो कोई ॥ ता
 उर कन्या तेही काल । डारै अमल कमल की माल ३७
 तब चलि अर्जुन आगे गयो । धनुष चढ़ाय हाथसों लयो
 अति कठोर जान्यो धनु जबहीं । भीमसेन मुख चाह्यो
 तबहीं ३८ दोहा ॥ भीमसेन बलवंत गति अर्जुनकी पहिं
 चानि । कोमल करि धनु पार्थ कर दयो बारदश तानि ३९
 लेधनु गयो करांह तन इकटक ताहि निहारि ॥ झांड़िपाई
 मीनकी रह्यो ध्यान उरधारि ४० दीठमंदि मन एककरि
 बेध्यो सो शर एक ॥ फेरि गयो इषु दृगनि को कौतुक करत
 अनेक ४१ ॥ चौ० ॥ चूकि गयो नर एक बखानै । बेधिगयो शर
 एकतैं जानै ॥ बाल लियेकर मालहि आई । अर्जुनके तब
 ही उर नाई ४२ देखत कर्ण महा रिस भीनो । दारुण

विजयमुक्तावली ।

५५

कर्म महा इन कीनो लै तपस्वी अब याको जैहो ।
 लाज सबै भुवपालन ऐहै ४३ ॥ दोहा ॥ कर्ण चढ़ायो
 कोपि धनु देखत सब भूपाल ॥ निरखि शोच उरमें भयो
 बिकल भई उरबाल ४४ (अर्जुन उवाच) सबैया ॥ चंद्र-
 मुखी कत शोचकरै जियगर्व हरौ कुरुनंदन कोतो । आजु
 करों छिनमें रण में जययुद्ध जरै यम आयकै जोतो ॥
 हों समरत्थ अकेलोइ वे किनि सोदर जूझहि धायकै
 सौतो । जोन बधों तौ लजाउं पिताकहं अर्जुन नाम
 कहाइहक्योंतो ४५ ॥ दोहा ॥ कोपे दोऊ बीररण रह्यो
 बाण नभ छाइ ॥ लोपे सूरज तमभयो उपमा कही न
 जाइ ४६ देख्यो करण प्रचंडरण पार्थकोपि ज्यों काल ॥
 रुद्रबाण बेध्यो कवच बिकल भयो बेहाल ४७ तबहिं
 करण छांड्यो समर जयजय करि तिहि काल ॥ दुर्योधन
 इत भीममों कीनो युद्ध कराल ४८ (करण उवाच) अरे
 कपरिया कौन तू मोसों कहि सतभाइ ॥ तेरे शर ऐसे
 लगें ज्यों अर्जुन के घाइ ४९ यों कहि करण बराइ गौ
 भिरे भीम भुवराइ ॥ मल्लयुद्ध करि बीर द्वउ थाकिरहै
 अकुलाइ ५० ॥ चौपाई ॥ बर करि भूपति भीम उछार्यो
 मल्लयुद्ध करि भूपरडार्यो ॥ जयजयकार पार्थ तब
 कर्यो । सम्हर्यो भीम कोपि तबलर्यो ५१ मार्यो
 गुरज गिर्यो भुवराउ । ठाढ़ो भीम करैनहिं घाउ ॥
 चेति फेरि यों कहै नरेश । तूको सुभट तपीकै भेश ५२
 दोहा ॥ पवन पुत्र अरु पार्थके ऐसेहुते प्रहार ॥ वैसोईमें
 तू लख्यो बल दीनो करतार ५३ सोरठा ॥ सहदेवहु तहं

आय गहि करलै भीमहि गयो ॥ द्रुपद सुता संग लाय
 पहुंचे कुंती निकट सब ५४ (युधिष्ठिरउवाच) चौपाई ॥
 सुनि सुनि मात महासुखदाई । आजु कछू हम भिक्षा
 पाई ॥ तुम आज्ञा सब बांधव मानैं । सो तजि और न
 चित्तिहि आनैं ५५ (कुंत्युवाच) दोहा ॥ पांचौ बंधुन
 सों तुम्हें पुत्र आय बहुनेहु ॥ जो कछुपाई भीख तुमबाटि
 सकल मिलि लेहु ५६ (अर्जुनउवाच) माता को सुनि
 सुखद त्रिय वचन न मेढ्यो जाइ ॥ मुख जोयो तब पार्थ
 को पंचाली अकुलाइ ५७ निरखी कुंती द्रौपदी मनहीं
 मन पछिताइ ॥ वचन अनैसो में कह्यो पुत्र न सकैं नशाइ
 ५८ आये हलधर कृष्ण तहँ जानत सगरो भाउ ॥ करि
 कुंती को बंदना मिले युधिष्ठिर राउ ५९ तब बिचारिकै
 द्रुपद नृप धृष्टदुमन सुत बोलि ॥ आप कपरिया को
 भये भेदलेहु सुतखोलि ६० ॥ सुंदरीछंद ॥ नीच कि-
 धों कोउ उत्तम है नर । कैबन में कि बसैं पुर सुंदर ॥
 श्रीयदुनंदन भूपति है जहँ । आय दुर्यो सुत भूपति
 को तहँ ६१ बात बितीत कहे भुव भूपति । कृष्ण सुनी
 बहुधा हरषी मति ॥ पूछत पार्थहियों यदु नायक । तैं
 सुख आजु दयो सुखदायक ६२ ॥ दोहा ॥ एहा बेध
 कर्यो भलो सुनिहो पार्थ सुजान । गर्ब नवायो करण
 को मारे कौरव मान ६३ (अर्जुनउवाच) सबैया ॥ कष्ट
 पर्यो जबही जहँ आय के राखी तहीं सब पैज हमारी ॥
 मांझ स्वयंबर द्रौपदी कै अति कर्णहि गर्व बढ्यो तहँ भारी
 जीतिकै बीरधनंजय धीर सुआजु लई बलकै बरनारी ।

कीजै कहौ सरतौ किहि भांति जो होते सहाय न आय
 मुरारी ६४ ॥ दोहा ॥ भलो दृढ़ानो करण रण यहै स-
 राहेउ ताइ ॥ भीम कहै करुराज हरि बड़ोबली यह
 आइ ६५ में अघवायो युद्ध में धनि दुर्योधनराय ॥ हन-
 तो एक निमेष जो करते सबै सहाय ६६ ॥ चौपाई ॥
 धृष्टद्युम्न सदरी गति जानी । कही पिता सों सब सुख
 दानी ॥ वे क्षत्रीकुल उत्तम आहि । नहीं कपरिया जानो
 ताहि ६७ हरि हलधर तिनपै चलिआये । देत बड़ाई
 बहु गुणगाये ॥ यह सुनि भूपति फूल्यो हियो । विधना
 सबमन भायो कियो ६८ (द्रुपदउवाच) चामरछंद ॥
 साजि साजि बाजि राज मत्त दंत गाजि के । चर्मचर्म
 अस्त्र शस्त्र चीरद्रव्य साजिकै ॥ जायकै अवास द्वार बस्तु
 सो रखाइयो । देखिकै तपीनिको सुकर्म मर्म पाइयो ६९
 दोहा ॥ आयसु दीनो भूपजो सोई कीनो जाइ ॥ मंडप-
 छायो विधि सहित मुक्तन चौक पुराइ ७० ॥ गीतिका
 छंद ॥ आइकै तहं पंचबंधव सकल सौजनिहारियो ।
 नकुल लखि बाजी सराहे पार्थ धनु टंकारियो ॥ भीम
 फूल्यो देखिकुंजर खड्ग सहदेव करगह्यो । नृपति सब
 देखत सराहत हाथतिन कछु नालह्यो ७१ देखिया विधि
 द्वारभूपति परम सुखहिरदै भयो । है देवगंधर्व यक्षकोऊ
 भेष तपसी को लयो । बोलिलीने पार्थ भीतर द्रुपद नृप
 सुखपाइकै । तबयों कह्यो हँसि भीमजेठो प्रथम व्याहै
 आइकै ७२ सुनि भयो बहु संदेह भूपति नीच कोऊ हे
 महा । पंचजन त्रिय एक व्याहै मूढ़ता बरनौ कहा ॥

बोलि पठये व्यास आये कही तिनसो बिधि सबै । एक
 पतिहै धर्म पुत्री कही ऋषि सों यहसबै ७३ ॥ दोहा ॥
 जेठो व्याहै जात्रियहि लहुरे कीहै माय । लहुरे कीत्रिय
 जेठके सुता बराबरि आइ ७४ (व्यासउवाच) सोम
 वंश एपांडु सुत एकजोति मन एक ॥ पूरब जन्म सुरेश
 ए सुनिये सहित बिबेक ७५ पंचइंद्र इनवहि जनम पायो
 शिव बरदान ॥ पांडु नृपति गृह अवतरे क्षत्री रूप निधान
 ७६ रवि कन्याहै द्रौपदी सेये शिवचित लाइ ॥ पंचकला
 कै देहुवर यह बांझों सुखपाइ ७७ दिव्यदृष्टिकै नृपति
 को दरशायो ब्यौहार ॥ देखे ऐकै जोति तहं पंचइंद्र अ-
 वतार ७८ (द्रुपदउवाच) चौपाई ॥ तुम बिनको संभ्र-
 महिं भगावै । तब क्षितिनायक ऋषि गुणगावै ॥ नृप
 बिवाह की सब बिधिठानी । बोलि युधिष्ठिर सब सुख
 दानी ७९ तिनकी भांवरि करि नरनाह । फिरि चारों
 का कर्यो बिवाह ॥ दुहुं कुलनि की बिधिही जैसी ।
 भांति भांति सब कीनी तैसी ८० पंचपुरुष को कन्या
 दीनी । बिदा दाइजो दैकरि कीनी ॥ हय हाथी पट
 भूषण घने । दासी दास दिये कोगने ८१ ॥ दोहा ॥
 लैदल परिगह गृहचले द्रुपदफिरे पहुंचाइ ॥ गये हस्ति-
 नापुर सबै आप सदन सुखपाइ ८२ सुनि दुर्योधन के
 भयो अंगअंग अति दाह ॥ नेक सुहाय न द्यौस निशि
 चकित चित नरनाह ८३ ॥ इति श्रीमहाभारत पुराणे
 विजयमुक्तावल्यां कविकृत्रसिंहविरचितायां बकदानवबध
 द्रौपदीबिवाहवर्णनो नाम एकादशोऽध्यायः ११ ॥

(दुर्योधन उवाच) दांहा ॥ ग्राम धाम अपनो लयो
 पांचो बंधव आय । कहो बंधु कीजै कहा इनसों कछु न
 बसाय १ बरुण नगर को आदिदै कीनेकिते उपाय ॥
 तबहुं मुये न पांडुसुत फेरि प्रगट भे आय २ तपीभेष
 आये हुते भूप द्रुपद अस्थान ॥ हम काहूजाने नहीं मारे
 सबके मान ३ भीषम बिदुर बुलायकै बूझेमंत्र सुजान ॥
 कौन उपाव करै कहो सोमत देहु निदान ४ (भीष्म उ
 वाच) अपकारी तुवबंधु नृप उनको कछू नखोरि ॥ महा
 सयानो पवनसुत अवगुण सहै करोरि ५ बरजौ अपने
 सोदरन अवगुणकरै नकोइ ॥ अति सनेह तुमसों उ-
 महिं ताहीदिन नृप होइ ६ (राजोवाच) दोष लगावत
 हौ हमें उनको भलो सुहाइ ॥ शकुनि कह्यो यह मंत्र
 तबबीच बैठिकै आइ ७ कत बूझत भीषम बिदुर यहै
 मानि मनलेहु ॥ जो कछु उनको देशहै उन्हें आपु सो देहु
 ८ गयो नृपति धृतराष्ट्र पै सुनि भूपति यह बात ॥ शकु-
 नि कह्यो सोई कह्यो पितु के आगे जात ९ बोलियुधिष्ठिर
 तब कही सुनि बिनयो सो मानि ॥ रह्यो इंद्र पथजाइकै
 आपुग्राम उरजानि १० ॥ चौपाई ॥ मानि रजायसु
 चले नरेश । सुबस इंद्रपथ कीनो देश ॥ मणिमय खचित
 बने सबधाम । मनहुं लसत सुरपति के ग्राम ११ फटिक
 थंभकी जागति जोति ॥ होडसूर किरननिर्तैं होति ॥ बापी
 कूप सुनीर तड़ाग । दिशि दिशि दीसत सुंदर बाग १२
 कल्पवृक्ष से द्रुम मनमोहैं । फूलेफलें छहूं ऋतु सोहैं ॥
 चंचल हय अतिधाम बिराजै । तमके सुतसेकुंजरगाजैं १३

भाट भले बिरदावलि गावत । जो मन बांछित सोई
पावत ॥ भूप युधिष्ठिर आज्ञा होइ । चारों बंधु करत हैं
सो १४ करत सबै आनंद मनभाये । एक चौस नारद
मुनि आये ॥ आदर करि वह आसन दीनो । तब ऋषि
बचन प्रगट यों कीनो १५ तीनिहु लोक जातुहों जहां ।
अति आतिथ्य करत सब तहां ॥ मरो बचन न मेटै कोइ ।
जोई कहों वहै पैहोइ १६ (ऋषिरुवाच) तुमहो सोदर
पंचसनेह । तरुणि द्रौपदी है तुमगेह ॥ मिलि सब बंधव
यह मनधरो । मो आगे सब बाचाकरो १७ जैलों बी-
ति जांय षटमास । एक रहै द्रौपदी अवास ॥ अवधि
मांझ दूजो जो जाइ । बारहवर्ष होइ बन ताइ १८ सबही
मिलि कै आज्ञा मानी । स्वर्ग सिंघाये ऋषि सुखदानी ॥
प्रथम नृपतिकी बारी भई । पांचाली शय्या परगई १९
द्विजकी सुरभी चोरन लीन्ही । आय पुकार बिप्र तहँ
कीन्ही ॥ सुनै न कोऊ लगै गुहारि । सो तब थक्यो
पुकारि पुकारि २० (द्विजउवाच) कृप्यै ॥ क्षत्री कुलहि
कहाइ आपजग अपयश लावत । सुरभी बिप्र गुहारि
क्योंन तुम पापी धावत ॥ कायर है कितरहे मूढ़ तुम
धामनि गहि गहि । और न जानै नाम रटै यह अर्जुन
कहि कहि ॥ त्रीयकाज सुरभि द्विजकाज जो नहि इनको
उप करहि । द्विज दोष लगै ता पुरुष कों घोरनरक में
सो परहि २२ (अर्जुनउवाच) दोहा ॥ रहि रहि बिप्र
सुजानतू जागन दैनरनाथ ॥ बिनती करि तबहीं चलौलै
कृपानतुवसाथ २३ सोरठा ॥ धनु नहमारो हाथधरों सदन

में बिप्र तहँ । दुपद सुता नरनाथ पौढ़े ताही धाममें २४
 त्रोटकछंद ॥ द्विज एकहु बात न मानतु है । मुख बैन कु
 बैनन आनतु है ॥ रचिकै सबबात बनाव न छोड़हु । लहि
 पाप महा शिर शापहि ओढ़हु २५ डरि शापहि सो अकु-
 लाइमनै । चितमें द्विजको अपमान गनै ॥ नृप धामगयो
 धनु बान जहां । दृग ओझिल बाह दईजु तहां २६ तबहीं
 बर बीर चलयो धनुलै । मुकराइ दई सुरभी बलुलै ॥ ऋषि
 नारद बैन धरे मनमें । हित तीरथ बेगि चलो वनमें २७
 अवलोकि सुदेव नदी जवहीं । हित सज्जन पथ धर्यो
 तबहीं ॥ लखि नागसुता लगि दृष्टिरही । अवलोकि तहीं
 तब बांह गही २८ गहि ताहि पतालहि लै सुगई । वह
 व्यालसुता अतिमोह भई ॥ तुमतो वर ईश्वरमोहिं दये ।
 अति निष्ठुर क्यों तुम नाहभय २९ (अर्जुनउवाच) ऋषि
 नारदको हम बैनलह्यो । अब याविधि तीरथ पथगह्यो ॥
 व्रत भंग महा तिय अंकभरै । बहु तीरथकी हमजात क-
 रै ३० यह अपने जीमहँ नेम धरौं । फिरि तो कहँ सुदरि
 आइ वरौं ॥ इमि व्याल सुता तब बातकहै । इहि भांति
 नहीं तुम धर्मरहै ३१ चलिहो मम बैन नशाइ जबै । पुनि
 जाय अकारथ धर्म सबै ॥ पुनि तासँग पथ बिवाह भयो ।
 तहँ केतिक दोस बिरामलयो ३२ त्रिय नाम उलूपिहि गर्भ
 भयो । सुत मन्मथ ज्यों अवतार लयो ॥ उर तीरथकी तब
 सुद्धि भई ॥ कहि पथ तबै गहि बाटलई ३३ (उलूपी
 नागकन्योवाच) सुनु प्राणपती इक बात कहौं । किहि
 भांतिनि हों कुशलात लहौं । द्रुम दाड़िम को दरशाइ

दयो । जब जानहु जू यह सूखिगयो ३४ ॥ दोहा ॥ तब
 सँदेह भो प्राणका कीजौ नागरि नारि ॥ आयो निकसि
 पतालते तीरथ हेत विचारि ३५ ॥ सोरठा ॥ नैमिषार
 चलिजाय परसि बनारसको गयो ॥ बाराणसी अन्हायगया
 तृप्त कीन्हे पितर ३६ ॥ दोधकच्छंद ॥ सागर संगम गंग
 गयेजू । द्यौस किते बनमें बितयेजू । न्हाइतवै मथुराहि
 चलेजू । देखत आश्रम कुंड भलेजू ३७ न्हाय न ता जल
 में नरकोई । जाय लखै फिरि आवत सोई ॥ बिप्रन को
 लखि पार्थ कही यों । पैठत कोउ न मध्य कही क्यों ३८
 (बिप्रउवाच) यामें जंतुरहैं अति भारी । सो जगजीवन
 को दुखकारी ॥ पार्थ नहीं कछु त्रास कर्योजू । लै पगता
 जल मात्र धर्योजू । ३९ आय गह्यो पगता छणपाहीं ।
 अर्जुन के उर भय कछु नाहीं ॥ लै जलते वह बाहर आनी ।
 हवैगई सो त्रिय रूप सयानी ४० अर्जुन सों यह बैन
 कह्योजू । शापदियो ऋषि पाप गयोजू ॥ ता जलते त्रिय
 पांच कढ़ीयों । मानसरोवर इंद्र त्रियाज्यों ४१ ॥ दोहा ॥
 पांच त्रियनि को मोक्ष करि चलि अर्जुन बरवीर । तज्यो
 द्वार मग तब गयो मानिकपुर रणधीर ४२ ॥ सोरठा ॥
 त्रिया बाहुबर बाहु जीत्यो छिति मंडल घनो ॥ राजें तहँ
 नरनाह सकल जगत को कामतरु ४३ ॥ दोहा ॥ ताके
 दुहिताइंदुमुखि चित्रांगदा सुनाम । रूप बहिक्रम उरबसी
 बिज्जुलता सी बाम ४४ ॥ सोरठा ॥ कनक बरण तन
 ज्योति लसत नीलपट ओट ज्यों ॥ जगर मगर द्युतिहोति
 मानो घनमें दामिनी ४५ नाहि निमिष इक ताकि विकल

सकल जिय कल नहीं ॥ रही पार्थ मनि थाकि करी
 बसीठी बंदि जन ४६ ॥ गीतिकाळंद ॥ जाय नृपकोतब
 जनायो ब्याह अर्जुनको भयो । सनमान दंती दियेवाजी
 द्रव्य बहु कंचन दयो ॥ चारि वर्षहि रहे ताथल पुत्रइक
 अर्जुन लह्यौ । जाहुंतीरथ जातको नरनाह सों तिन यों
 कह्यौ ४७ नायमाथो भूपको चलि द्वारकानगरी गयो ।
 पाय सुधिआये कृपानिधि दुःख सब के उरभयो ॥
 रुक्मिणी दै आदि सब त्रिय ताहि भेटन आइयो । चली
 कौतुक हित सुभद्रा निरखि बहुसुखपाइयो ४८ सोरठा ॥
 चंचल नैननि ताकि झीने पट चहुं दिशि लखिन । रही
 पार्थगति थाकि परि फंदा तरफै सफर ४९ ॥ दोहा ॥
 नख शिख सकल बनी ठनी करै सकल शृङ्गार । धीर
 रही नहि पार्थ उरब्याकुलतन न सम्हार ५० चौपाई ॥
 सबहि सुभद्रा अर्जुन देख्यौ । अपनो पति करि
 उरमें लेख्यौ ॥ शिव सेवाको यह सब सार । दीजोमोहिं
 पार्थ भरतार ५१ यहसब विधि श्रीहरि पहिंचानी ।
 तब यह अपने उरमें आनी ॥ गर्भ सुभद्रा को यहभयो ।
 जठर बासु अहिदानव लयो ५२ दीजै पार्थहि मिटै
 कलंक । श्रीहरि आनी यहबुधि अंक ॥ बोलि पार्थ सों
 यह तब कही । बसि तुम मनहिं सुभद्रारही ५३ मैंआज्ञा
 दीनी हरि लेहु । पाछे ह्वैहै अधिक सनेहु ॥ हरी कुमरि
 अर्जुन सुखपाय । भई शुद्ध अंतहपुर जाय ५४ ॥ दोहा ॥
 कोप भयो बलभद्र को अब अर्जुन कित जाय ॥ लाऊं
 गहिकै द्वारका छाँड़ौं भीख मंगाय ५५ कोपि चलयौ

सजि सेन बहु बरजे श्रीहरि आइ ॥ को पारथ के सरस
 है क्यों रण जीत्यों जाइ ५६ हारे होय कलंक कुल जीते
 हूयश नाहि । ताते कोपहि परिहरो चलौ द्वारका जाहिं ५७
 (बलभद्र उवाच) तेरी यह करतूति सब कछू न जानी
 जाय ॥ फेरि न कछु उद्यम कियो बैठि रहे अरगाय ५८
 आये अर्जुन इंद्रपथ भूपति बहु सुख पाइ ॥ लई सु-
 भद्रा गेहमें मंगलचार कराइ ५९ पुत्रबधू कुन्ती लखी
 बहुविधि करि आनंद ॥ शुभलक्षण गुण आगरी मुख
 द्युति राकाचंद ६० ॥ चौपाई ॥ यह बिचार श्रीहरि जू
 करयो । सबही सों ऐसे अनुसर्यो ॥ चलौ इंद्र पथ जैयै
 भाई । जाय पार्थकों करें सगाई ६१ लीने गज रथ तुरी
 तुषार । जात रूप भूषण भंडार ॥ हरि हलधर सबसंग
 लिवाई । पहुँचे बेगि इंद्रपथ आई ६२ पार्थहि बिहँसि
 सुभद्रा दई । भामरि पारि रीति सब ठई ॥ हस्ती हय
 रथ भूषण दीने । याचक सबै अयाची कीने ६३ दोहा ॥
 करी बिदा बलभद्र की नगर द्वारिका हेत ॥ आपु कृपा
 करि हरि रहे भूपति के संकेत ६४ गर्भ सुभद्राको भयो
 पुत्र कला जनु चंद्र ॥ नाम धर्यो अभिमन्यु तब कीन्ह
 परम आनंद ६५ द्रुपद सुताके पंचसुत प्रगट भये सुख
 कारि ॥ मात एक पितु पांचते पांचहुं की अनुहारि ६६
 दुरयोधन संशय कियो रची कहा करतार ॥ हते अकेले
 पंचवे अब बाढ्यो परिवार ६७ ॥ इति श्रीमहाभारत
 पुराणे विजयमुक्तावल्यां कविकृत्रसिंहविरचितायां सुभद्रा
 विवाह वर्णनो नाम द्वादशोऽध्यायः ॥ १२ ॥

सोरठा ॥ खेलत पासेसार अर्जुन कृष्ण अनंद सों ॥
 डारत दाँव हँकारि अपनो अपनो भाषिकै १॥ भुजंगप्रयात
 छंद ॥ धर्यो बिप्रको रूप्यों अग्नि आये । दुखी दीन
 ह्वैकै महारोग छाये ॥ तहाँ आयके दीनबाणी बखानी।
 हरो पीर मेरी महादुःख दानी २ कहै अग्नि मोको क्षुधा
 नेक नाहीं । दया आप कीजै महा जीव माहीं ॥ किते
 यत्न करि इंद्रको बिप्र जार्यो । महा कोपिकै नीरसों
 बोरि मार्यो ३ सबै झोरको में भरोसो नशायो । चलयो
 हों अबै रावरे पास आयो ॥ चरोंकाननै इन्द्रको वीरजैसो।
 महारोग नाशै करो काज तैसो ४ चले कृष्णजू पार्थ
 को संग लीने । बनै जारिबे को सबै काज कीने ॥ तबै
 अग्निसों पार्थ बाणी बखानी । धनुर्बाण नाहीं सुनौ सुःख
 दानी ५ दोहा ॥ अक्षय तून दीनो अग्नि आप काज
 पहिचानि ॥ दियोधनुष गाँडीवतब नंदघोष रथआनि ६
 साजि दियो रथ अर्जुनहिं तबहीं श्रीयदुराय ॥ पूरब
 दिशि पठयो सुभट पावक साजे जाय ७ आपरहे पश्चिम
 दिशा छाड़ लई दिशिबान ॥ जीव जंतु ता विपिन में
 भाजि न पावैं जान ८ पूरबतैं साजीअग्नि अर्जुनपरम
 प्रचंड ॥ दीन शब्द रावैं सबै सावजु पक्षि अखंड ९ जीव
 पुकारैं दीन रट सुनि सुरपतिसुखदाय ॥ तुव बनजारैअ-
 ग्नि यह यहकत तोहिं सुहाय १० प्रलय कालके मेघजे
 ते बोले सुरराय ॥ कोटि छानबे एकसँग बरसहु बन पर
 जाय ११ उनै जो आये मेघनभ तम चारोंदिशि छाया ॥ बर
 सौहै लखि पार्थतब लीनो धनुष चढ़ाय १२ ॥ सबैया ॥

धायकै पार्थ चढ़ायलयो धनु छाय लयोवर अंबर बानन ।
 दौरि दवागिनि लागि उठी द्रुमजारत शाख समूल स-
 पानन । कोपि महा मधवा बरस्यो कहुं एकहु बूंद न
 भीजत कानन । व्योम बिलोकत अद्भुत कौतुक किन्नर
 यक्षचढ़े सुबिमानन १३ ॥ दोहा ॥ द्वादश योजन लौं बि-
 पिन करें बूंद नहिँ एक ॥ कोटिछानवे जलद मिलि उद्यम
 करें अनेक १४ शशा स्यार सावर सुवर सेही सिंहसँकोच
 सारो शुक सोना सबै सकल सचानन शोच १५ चिरा
 चील्ह चिमनादरें चातक चक्र चकोर ॥ रजत न उबरत
 जीव सब बचत न काहू ओर १६ ॥ दंडकछन्द ॥ धाय
 धाय मेघ बर छाय छाय क्षिति पर बरसि बरसि हरि
 भागे भहरायकै । झरपि झरपि झर तड़पि तड़पि तहाँ
 जित तित नीर गये ढारि ढहरायकै । तरु तरु लागि आगि
 बरत न उबरत भागि भागि पक्षी पशु बचे न परायकै ।
 छत्र बलवंत वीर पार्थको अनंत बल अगिनि तृपतकियो
 कानन जरायकै १७ ॥ दोहा ॥ सुनि सुनि बनकी यह
 दशा तब कोप्यो सुरराय ॥ हन्यो बज्र बाणावली टूटि
 परी खहराय १८ ॥ चौपाई ॥ अर्जुन बाण लये फिरि
 छाई । बूंद न परत कहूं बन आई ॥ शर पंजर तोर्यो
 दश बार । जोरे पार्थ वहै आकार १९ यहि विधि बन
 खांडवहि बरायो । भग्यो मयासुर दानव आयो ॥ राखु
 शरण यह असुर पुकारै । मोहिं अगिनियह जारैमारै २०
 दई दिलासा राख्यो सोय । छांड़ि त्रास तो हतै न कोय ॥
 असुर कहै सुनु पार्थ सयाने । तेरे कर्मन जाय बखाने २१

(मायासुरउवाच) दोहा ॥ जितने त्रिभुवन में असुर हों
 तिनको श्रुतिधार ॥ जब चाहै तब आयहों करों काज
 सब सार २२ विदाकरी अर्जुन सुभट असुर चलयो सो
 धाम ॥ पुरई पावक कामना सब विधिकै गुण ग्राम २३
 आये सुरपति पुहुमि में बिग्रह सकल नशाय ॥ सुतहि
 देखि कछु सुखभयो कछु मनमें पछिताय २४ इन्द्र
 सिधाये सुरपुरी चले पार्थ गृह आप ॥ चले इन्द्रपथ
 कृष्णजू जिनको अमित प्रताप २५ निरखि युधिष्ठिर
 भूप तब कही परमसुखपाय ॥ श्री यदुराय प्रताप ते
 ते जीत्यो सुरराय २६ गहि है कोऊ धनुष नहिँ तोको
 सुनि बलवंड ॥ पूरि सुयश धर पर रह्यो सप्तद्वीप नव
 खंड २७ द्वारावति को तब गये विदा भये यदुनाथ ॥
 इस भूपति के निकटही शोभित बंधव साथ २८ (युधि-
 ष्ठिरउवाच) सोरठा ॥ रचिये धाम बनाय उत्तम दीखेदूरि-
 ते ॥ बहुविधि चित्र कराय धवल नवल कीनी सभा २९
 (अर्जुनउवाच) चौपाई ॥ जो तुम भूपति आयसुपाऊं नाम
 मयासुर बेगि बुलाऊं ॥ (राजोवाच) बेगिहि बंधव ताहि
 हँकारो । उत्तम उत्तम धाम सँवारो ३० सुद्धि मयासुर की
 उर आनी । आय गयो तबहीं सुखदानी ॥ आवतही
 तिन भूपति देखे । धर्मधुरंधर चित्र विशेषे ३१ इति
 श्रीमहाभारतपुराणे विजयमुक्तावल्यां कविकृत्रसिंहविर-
 चितायां इंद्रवनखांडीवदहनो नाम त्रयोदशोऽध्यायः ॥ १३ ॥

इति आदिपर्व समाप्तः ॥

दोहा ॥ धर्मधुरंधर तिहि छिनक धर्मसुवन भुवभूप ॥
 कही मयासुर असुर सों कीजै सभा अनूप १ ॥ नगस्व-
 रूपिणीछंद ॥ नवाय शीश बेगि कै । चल्यो सुबीर चेत
 कै ॥ समुद्र पास सो गयो । सुधाम शीश कै लयो २
 दोहा ॥ हरनाकुश कोसदन सो लीनो तिन धरि शीश ॥
 लै आयो सो इंद्रपथ लखि फूले अवनीश ३ ॥ सवैया ॥
 सुंदर लीले रंगीले खरे अरु पीरे हरेरचि धाम बनाये ॥
 माणिक लालनिके बहु जाल प्रवालनि के खचि थंभ
 सुहाये । स्वच्छ शिला जनु दीखत नीर बने चकवा जनु
 पैरत धाये । है अमरावति तैं अति अद्भुत सुंदर सदन
 सबै छवि छाये ४ ॥ दंडकछंद ॥ शोभाही के सार तहाँ
 फाटक किवार बने केते द्वार द्वार जिनै देखे बुधि भरमें ।
 दिये हैं कि दिये हैं बिचारत ही भूलि रहै जानिये सनीर
 पै नीर नाहीं सरमें ॥ धामनिके बीचनि धरीं चनि मरीचि-
 कानि राजति है नील मणि छत्र घर घरमें । भूप की
 सभाकी आभा कौन सों बखानि कहै ऐसी द्युति नाहीं
 कहूं इंद्रके नगरमें ५ ॥ दोहा ॥ पट दीने से देखिये दिये
 न पट तिहि द्वार ॥ जे सरवर हैं नीरयुत पृथ्वी के आ-
 कार ६ मन भायो दैके सबै गयो मयासुर गेह ॥ भूपति
 बैठे तिहि सभा बंधुन सहित सनेह ७ ॥ चौपाई ॥ ऋषि
 नारद भूपति पै आये । निरखि सभा बहु बिधि गुण
 गाये ॥ ऐसी सभा न मैं कहूं देखी । सब ठामनि मैं उ-
 त्तम लेखी ८ (ऋषिरुवाच) सवैया ॥ किन्नर यक्ष पुरी

अवलोकित धर्म पुरी अवलोकित फीकी । भोगवती अव-
लोकित सबै सु बिलोकित सुरेश पुरी सुरही की । भूपति
भूपन के धन धाम बिलोकित फिरयो न भई रुचि जीकी ।
और सभा न सभा सम लागति रावरी आहि सभा
अति नीकी ६ (राजोवाच) दोहा ॥ तीन भुवन की
बात सब जानत हौ ऋषिराय ॥ सुद्धि कहो नृप पांडु
की मोको सकल सुनाय १० (ऋषिरुवाच) चौपाई ॥
सुनि अवनीपति बहु सुख दाई । एक बात पै कही न-
जाई ॥ निरखत पंडुहि भयो सशोक । भईकुमृत्यु गयो
यमलोक ११ यज्ञ करो मिटिहै सब दोष । पांडु मही-
पति पावैमोष ॥ बिलखै भूपति बहुदुखपाइ ॥ उपदेश चले
ऋषि राइ १२ यज्ञ राजसू भूपति कीजै । भूप जीति
जगमें यश लीजै ॥ यज्ञ विधान सकल अनुसरै । एक
राय ते रक्षा करै १३ चंदन गारे क्षितिपति एक । एक
ते लावै समिध अनेक ॥ सहस्र धेनु सुबरन युत देहु ।
पितुको तारि जगत यश लेहु १४ भूपति के मन चिन्ता
आई । जिनके श्रीहरि सदा सहाई ॥ यह कहि नारद
स्वर्ग सिधाये । सुमिरे भूपति श्रीहरि आये १५ ऋषि
उपदेश महीप सुनायो । यज्ञ करो उन मोहिँ बतायो ॥
श्रीहरि कह्यो मतो यह कीजै ॥ जीतहि जरासंध यश
लीजै १६ तिन नरमेघ यज्ञहै नाध्यो । ताहित भूपतिको
गण बाध्यो ॥ एक घाटिसौ अधिपति रोके । परे बंदि तें मह
सब सोके १७ मारि ताहिहौं बंदि मिलाऊं । शोकवंत सब
भूपकुटाऊं ॥ भीमसेन अर्जुन संग लाये । रूप कपरिया

के तिन ठाये १८ नगर राज गिरि चलिते गये । दुर्गम
 ठाम बिलोकत भये ॥ मध्य नगरके लागे जान । बाजन
 बाजे हने निशान १९ यज्ञ थली भूपति हो जहां । लागे
 जान सबै मिलि तहां ॥ रक्षक हुतो मल्ल तिहिं द्वार ।
 बिन ब्रह्म क्योचले अगार २० ॥ दोहा ॥ तिनकर पक-
 र्यो भीमको दाहन क्योहूं जान ॥ तुमसों कछु सरवर
 नहीं कहत न बनई आन २१ भिर्यो मल्लसों भीमसों
 कीनो अदभुत युद्ध ॥ पवनपुत्रके उरहन्यो मुद्गर बहु
 करिकुद्ध २२ लखराय भूतल गिर्यो पार्थपक्षार्यो आ-
 इ ॥ चेति भीमकरि क्रोधअति हन्यो गुरजउर धाइ २३
 फेरिवली बरबाहु बल डारी भुजा उखारि ॥ कर्यो दुष्ट
 सो प्राणबिनु फटिक शिलासों मारि २४ कर्यो प्रणाम
 महीपको यज्ञ थलीमें जाइ ॥ देखतही सन्देह करि यों
 बोल्यो भुवराइ २५ आय तपीके भेषतुम देखत बहु बल
 वंड ॥ मांगो जो मनकामना सोईदेहुं अखंड २६ (श्रीकृ-
 ण्णउवाच) दोधकच्छंद ॥ मांगत युद्ध महीपति दीजै ।
 जीमहँ और बिचार नकीजै ॥ तीनहुमें जोआयसु पावैं ।
 सोई तुमसों जूझन आवैं २७ भूपति कृष्ण तहीं पहिचा-
 ने । बैनतबै यहिभाँति बखाने ॥ मोसँग बार अठारह
 हार्यो । मैफिर तूतब देशनिकार्यो २८ अबन युद्ध मंडों
 संग तोहीं । तूरण पीठ दिखावहि मोहीं ॥ कोमल गात
 धनंजय देख्यो । युद्धन तामहँ चितहि लेख्यो २९ भीम
 घड़ी एक युद्धहि सैहै । फेरजुर्यो कत या पै जैहै ॥ भूपति
 रोष महा उरआन्यो । कोपितभीम चढ्यो सुखमान्यो ३०

सोरठा ॥ जुरे युद्ध दोउवीर मानहुं गजमाते फि-
रत । शूर समर रणधीर मनहुं शिपरदोउ शैलके ३१
दोहा ॥ भिरत नकोऊ हारही दोऊ समर प्रवीन ॥ लट-
पटाइ गिर गिर उठत दोऊ रोषनलीन ३२ हनी भीम
भूपाल शिर भईगदा द्वैखंड ॥ जरासंध तब क्रोधकरि
गह्यो सुभट बलवंड ३३ फेर्यो गहिकै चरण विवि
तीनबार भुवपाल ॥ फेरिगदा करमें लई प्रगट्यो बचन
कराल ३४ ॥ चौपाई ॥ तूजानै कौरव सौभाई । मोसों
तेरी कहा बसाई ॥ कैअब समर छांड़ि भजि जाउ । बजू-
पातको ओढ़ौ घाउ ३५ योंसुनि पार्थहि चिंता आई ।
कहाहोइ जहँ कृष्ण सहाई ॥ फिर रण कोपे दोउवीर ।
रणमें उद्यत कोप गँभीर ३६ जरासंधबहु बरुकरि धाइ
लत्ता हन्यो पवन सूतआइ ॥ सप्त पौंडपै पर्यो सुजाइ ।
रही विकलता मुखपै छाइ ३७ जय जय करिकै उठ्यो
सम्हारि । हरिको मुख निरख्यो सुखकारि ॥ झुकिकै
कृष्णदर्ई तब सैन । तिनका फार्यो देखतनैन ३८ समुझि
सैन कोप्यो बलवीर । दूनो ह्वै गयो फूलिशरीर ॥ जरा-
संध भुव पटकपछारि । कीनो फाँक बीचते फारि ३९
सोरठा ॥ सगरे राजा राय मुकराये तब बंदिते ॥ कूटि चले
सुखपाय जो पक्षी पिँजरानिते ४० ॥ छंद ॥ (राजावाच)
जयजय नंदनंदन दुष्टनिकंदन जय जगबंदन गरुडासन ।
भवभय मोचन जनमन रोचन दुःख विमोचन भव
नासन ॥ सज्जन मन रंजन दुष्ट निकंदन परम निरंजन
जगकरता । कष्ट निवार्योदुष्ट संहार्यो मार्यो लोकनि

के हरता ४१ ॥ दोहा ॥ हरि गुण गावत भूप सब गये
 आपने धाम ॥ जरासंध सुत बोलि कै दुरासंध वहि नाम
 ४२ नगर राज गिरि को तिलक कीनो ताके शीश । अ-
 र्जुन भीमहि संगलै चले तिहूपुर ईश ४३ (दुरासंध
 उवाच) ॥ कृष्णै ॥ कैटभमधु मुर हरण धरन नख अग्र
 शैल बर । हिरनाकुश हिरनाक्ष हरण प्रभु रदन धरणि
 धर ॥ शंखासुर संहरण हरण हरि अंध कबंधहि । खर
 दूषण बपु भंजि गंजि भंजन दश कंधहि ॥ गज राज
 काज प्रह्लाद ध्रुव दयासिंधु अशरण शरण । नमो नमो
 कवि छत्र कहि सुनारायण जगउद्वरण ४४ ॥ दोहा ॥
 चलि हरि आये इंद्रपथ ताको दैकै राज ॥ भूप युधिष्ठिर
 सुखभयो भये सकल मनकाज ४५ (श्रीकृष्णउवाच)
 पठयो बंधव आपने जीतिहि चहुं दिशि देश ॥ गये कृष्ण
 तब द्वारका यह कहि कै उपदेश ४६ इति श्री महाभारत
 पुराणे विजयमुक्तावल्यांकविच्छत्रविरचितायां जरासंधयुद्ध
 वर्णनो नाम चतुर्दशोऽध्यायः ॥ १४ ॥

दोहा ॥ करीकृपा चारों अनुज भूपति लये बुलाय ॥
 कह्यो करो सब दिग्विजय दिशि दिशि जीतहु जाय १
 भीमसेन पूरव गये उत्तर पार्थ सुजान ॥ सहदेव दक्षिण
 गये पश्चिम नकुल पयान २ दिशिदिशि जोते जायसब
 आने बाधि महीप ॥ कीरति सो छाई धरा थल थल जंबू
 दीप ३ ॥ चौपाई ॥ सब बंधव नृप अंक मिलाये । समदे
 नकुल द्वारका धाये ॥ करी विनय कृष्णहि लै आये ।

नगर इंद्रपथ भये बधाये ४ आये दुर्योधन गुण ग्राम ।
 अतुल रूप ताको संग्राम ॥ कीने सकल यज्ञ के साज ।
 बोले तहां सकल ऋषिराज ५ ॥ कृष्णै ॥ आये गौतम व्यास
 अत्रि पाराशर आये । विश्वामित्र बशिष्ठ गर्ग शृंगी ऋषि
 धाये । बालमीकि दुर्व्यास जासुमति पार न लहिये । बहुरि
 सुभद्रक द्रोण और नारद मुनि कहिये । कवि छत्र अठासी
 सहस ऋषि सकल जुरे भूपति भवन । यज्ञस्थल लागे
 सबे वेद ध्वनि द्विज उच्चरण ६ ॥ सोरठा ॥ भूपति के
 चित चाउ रक्षक कीने सब नृपति ॥ दुर्योधन भुवराउ
 भंडारी शोभित तहां ७ ॥ दोहा ॥ जहां चाहिये एकतहँ द्वै
 दुर्योधन दानि ॥ रीतो होय भंडारज्यों सोराजै मतजानि ८
 जितो लुटावै भूपधन दूनो दूनो होइ ॥ देखि भर्यो भंडार
 तब भूलि रह्यो सबकोइ ९ ॥ चौपाई ॥ कीने गर्व युधि-
 ष्ठिर राय । कौन आजु मेरी सरआय । धरिहों जाको
 भर्यो भंडार । यहै सकल वस्तुनमें सार १० कीनो गर्व
 कृष्ण जब जान्यो । यह विचार अपने उर आन्यो ॥ कर्ण
 राय भंडारी कीनो । बेगि द्रव्य हवै गयोजो हीनो ११
 सोरठा ॥ चिंता करि नरनाह विश्वंभर सों यों कही ॥
 सुनिये त्रिभुवन नाह रीतो भयो भंडार सब १२ (श्रीकृ-
 ष्ण उवाच) दोहा ॥ तें कत कीनो गर्व मन कमल हस्त
 कुरुराय ॥ घटै घटावै द्रव्य नहिं जो वहदेइ लुटाइ १३
 दंतकरण के कँपिउठे शंके गिरिवर मेर ॥ है कुरु राजहि
 करणको इतनोई नृप फेर १४ आज्ञा अर्जुनको दई लंका
 को तुमजाउ ॥ जीति लंकपति को सुभट बहु सुवरण लै

आउ १५ ॥ सवैया ॥ धायकै जाय चढ़ायलयो धनुसागर
 बाणनि छायालयोई । कौरवमें बहु बाहु पराक्रम मारगलंक
 को बीरकियोई । पायकैगर्व निशाचर नाथको घोरअदगड-
 नि दंड दियोई । कोसरि दीजिये देवअदेव सो पार्थ समा-
 न न और बिगोई १६ ॥ दोहा ॥ आन्यो कंचन बीर बहु
 फिरि यह कियो बिचार ॥ कौरव कर फिरि सोंपियो धर्म-
 पुत्र भण्डार १७ ॥ सुंदरीछंद ॥ पूजन यज्ञ कर्यो भुव
 राय । भीम कह्यो उठि कै सुखदाय । आयसु देहु सबै
 अबनीको । कौनके भाल करें अब टीको १८ ॥ दोहा ॥
 यह बनिआई सबनको कही सुखद सुखपाय ॥ प्रथम
 तिलक हरि शिर करो ये प्रभु त्रिभुवन राय १९ बैठयो
 तहँ शिशुपाल नृप झुकिबोल्यो यों बैन ॥ कहो कहां को
 भूप यह कहत तिलक शिरदै न २० ॥ चौपाई ॥ गैया
 राखत जन्म सिरानो । ताको नाम कहासुख आनो ॥ कौ-
 रव आदि महीपति जहां । हरिको देत मानकत तहां २१
 जरासन्ध छलिकैजिन मार्यो । मैंहूँअब यहमंत्र बिचार्यो ॥
 मारों याहि बैरसो लेहुं । रहन गेहहों याहिन देहुं २२ द्रव्य
 इतेमें चाह्यो और । अलका गये पार्थ शिरमौर । जीत्यो
 धन प्रति तिनबर जाइ । मिल्यो पार्थ को माथोनाइ २३
 कंचनमणि गण माणिक जाल । दीनीचन्द्र बदन बहुबाल ॥
 तब सुख सदन बीर चलिआयो । नृपति युधिष्ठिर हरि सुख
 पायो २४ जबतैं टीको हरि शिर सुन्यो । करि करि क्रोध
 शीशतिन धुन्यो ॥ बारबार अन उत्तरकहै । श्रीपति सन्मु-
 ख बैठयो सहै २५ ॥ सवैया ॥ एककही सद बीसकही

कहिसौहूतें जाबिधि आगरि नाखी । देव अदेव सबै नर
देव जिते क्षिति देव भये सब साखी ॥ जेतिक चूक क्ष-
मी हुती कृष्णजहीं मर्याद हुतै बढि भाखी । चक्र हन्यो
शिशुपाल के शीश सभा मह रंचक कानि नराखी २६
दोहा ॥ सब के उर शंका भई सब कंपे भुवराय ॥ जय
जय जय भाषत भये जय जय त्रिभुवन रांय २७ प्रथम
तिलक हरि शिर कर्यो फिरि भूपन के शीश ॥ विधि
सों सब पहिराय कै कीने बिदा क्षितीश २८ इति श्री
महाभारतपुराणे विजयमुक्तावल्यां कबिच्छत्रसिंह विरचि-
तायां शिशुपालबधवर्णनो नाम पंचदशोऽध्यायः ॥ १५ ॥

सोरठा ॥ दुर्योधन भुवराय न्योति बुलाये इंद्र पथ ॥
कर्ण सहित सुख पाय आदर कीनो धर्म सुत १ सुंदर
मंदिर चाहि भूलि रहे कौरव सकल ॥ जनु अमरावति
आहि आखंडल सो धर्मसुत २ ॥ दोहा ॥ जब भीतर
को नृप चले सरवर सों चितचाहि ॥ जानत अमित अ-
गाध जल पै तहँ नीर नआहि ३ बसन उठाये आ-
ष नृप धर्यो फटिक के ताल ॥ गयो गर्व सो सदन
लखि भयो बिकल बेहाल ४ आगे सरवर बावरी नीर
नपरै लखाय ॥ जानि भूमि धोर्यो पर्यो । जल अगाध
में जाइ ५ दरवाजे दीनेहुते उज्ज्वल फटिक कपाट ॥ तिहि
मारग अवलोकि कै लीनी सोई बाट ६ तामारग कुरुराज
के लागीचोट लिलाट ॥ तब आगे सहदेव ह्वै नृपहि गहाई
बाट ७ निरखि भूपकी यह दशा पंच वीर मुसकाइ ॥ अरु

हँसि द्रुपदसुता गई रह्यो नृपति सुरझाई ८ हिमकर हत
 जैसे नलिन त्यों भूपति मुख देखि । उतराये भीजे बसन
 आदरकियो बिशेखि ९ बैठारे भूपति सभा धर्मपुत्र तिहि
 काल ॥ रच्यो अखारो नृत्य को बोलि गुणिनके जाल १०
 आनी अर्जुन जीतिकै उत्तर तें जे बाल ॥ भीम जीति पू-
 रब लई ते आई तिहि काल ११ जीति नकुल सहदेव
 वर आनीही जे नारि ॥ नृत्य हेत आगे नृपति ते सब लई
 हँकारि १२ ॥ सोरठा ॥ नृत्यत त्रिय बहु भाय सुरपति
 रति उलथा सहित ॥ उपमा दीजै काहि मानहुं रंभा
 उरबशी १३ इंद्रपुरी समसी सभा धर्मपुत्र सुर-
 राय ॥ नृतत त्रिया मनु मेनका तिलोत्तमा क्विच्छाय १४
 चौपाई ॥ देखि सभा आये ज्योनार ॥ जिवत पटरस
 भोजन सार ॥ भांति भांति के व्यंजन आने । नाम
 कहाँ लागि कौन बखाने १५ जेइं उठे तब दीनो पान ।
 गये गेह तब बुद्धि निधान ॥ महा मलिन मन कछु न
 सुहाइ । सब बंधुन सों कह्यो बुलाइ १६ पांडु सुतन को
 कह मत कीजै । कहो तोदेश निकारो दीजै ॥ भारत
 सब बिधि मेरो मान ॥ देश तजैं सो करो सयान १७
 चलि धृतराष्ट्र भूप पै गये । पंडुसुतन बहुधा दुखदये ॥
 तब जैहें पितु मोर अदेश । पांचो बीरन छूटै देश १८
 (धृतराष्ट्र उवाच) दोहा ॥ जब पांचों बालक हते दीने देश
 निकारि ॥ भ्रमत फिरे बन बीयिकनि रह्यो सहाय मु-
 रारि १९ मन न बिचारो दुष्टता कारज भलो न एहु ॥
 कह्यो मान मेरो उन्हें जीवदान किन देहु २० यों सु-

निकै उतरे नृपति आये अपनेगेह ॥ शकुनि दुशाशन
 कर्ण तहँ बोले सहित सनेह २१ दुष्ट चौकरी जुरि तहाँ
 कहै विचारि विचारि ॥ सो कीजै पांचौ अनुज दीजै देश
 निकारि २२ (शकुनिउवाच) मंत्र विचार्यो एक में आपु
 मानि मन लेहु ॥ भूप हरावो यूप में देश निकारो देहु
 २३ जो विरंचि उनको करै यहि थल आनि सहाउ ॥
 भूप जीति हौ आपुवै लहै न क्योंहूँ दाउ २४ ॥ दोधक-
 छंद ॥ मंत्र मही पति के मनमान्यो ॥ सत्य यही अपने
 उर आन्यो ॥ भीषम कर्ण तहां तव बोले । बुद्धि कपाट
 हृदय के खोले २५ द्रोणहिं आदि सबै चलि आये । भेद
 सबै तिनको समुझाये ॥ ऐसो मंत्र कछु प्रति पारो । भूप
 युधिष्ठिर देश निकारो २६ (बिदुरउवाच) ॥ दोहा ॥ जौ
 लगि उनको भूपसुनि त्रिभुवन नाथ सहाय । तौ लगि
 काहू की कछु कैसहू न बसाय २७ (द्रोणउवाच) ॥ दंड-
 कछंद ॥ देखिकै परायो कछु कीजिये न अनरायो दाये
 बिना दायो किये ह्वैहै महा हानिये । ऐसो अविबेकीहै
 कुटेव टेव टेकीजिहि नेकहू तौ त्रास हरिजूको उरआनिये ॥
 साजतु है काज तू कसाई अघदाई कैसा ह्वै है अप-
 यश यह नीके उर आनिये । बंधुन सो कीजै मोह द्रोह
 उर कोह छाँड़ों कीरतिकलित जाते भूतल बखानिये २८
 दोहा ॥ पर द्रोही अरु कृतघनी ते अंतक सब होत ।
 दीजत नर्क अघोर में जिते सँहारत गोत २९ सुनि नृप
 महि उत्तर दियोबचन कह्यो गुरु थोर ॥ शरसों लाग्यो
 चित्तमें चितये भीषम ओर ३० (भीषमउवाच) खेल कपट

को नाश जो ह्वैहै मूल बिनाश ॥ बाढ़ै वंधु बिरोध
 अति ह्वैहै जग उपहास ३१ ॥ कृप्यै ॥ बिनशै सोई धर्म
 जहाँ पाषंडहि कीजै । बिनशै सोई प्रीति जहां हाँसीमन
 दीजै ॥ बिनशै सोई पुत्रलाड़ माता पितुमंडहि । बिनशै
 सोई बंश आप कुल करनी छंडहि ॥ बिनशै सोधन वेग
 ही धनहोते जो ऋणकरै । कृत्रसुमति मारग चलो कुमति
 कलह नृप परिहरै ३२ बिनशै सोई बिप्र जोन षटकर्म
 हि साजै । बिनशै मन्दिर वहै निकट रावरके राजै ॥
 बिनशै सोई कथा जो न ता महुँ मनदीजै । बिनशै सोई
 काज जहाँपर आशा कीजै ॥ बिनशै सोई नारि प्रचंड गृह
 सकल कुमति गति परिहरो । सिख सीख भूप भीषम
 कहे सुनृप ताहि मंडल करो ३३ बिनशै सोई अधिक
 दया जाके उर आवै । बिनशै तस्कर वहै भेद आपनो बता-
 वै ॥ बिनशै सोई नेह कपट जो उरमें धरिये । बिनशै स्वइ
 ब्योहार नीचसों जो कछु करिये ॥ बिनशै द्विजसेवा कर-
 त बिनशै द्रुम सरिता निकट । इहि भाँति सीख भीषम
 कहै समझहु भूपति आप घट ३४ ॥ दोहा ॥ तजो यूपकी
 बाणि सब अयश बढ़ै संसार ॥ ह्वैहै कलह कुटुम्ब में
 रचि राखी करतार ३५ धर्मपुत्र को भूपजो आयसु देहु
 बुलाइ ॥ बचन न मैटै रावरो उठि काननको जाइ ३६
 भीषम के यों बचन सुनि भूपति गयो अवास ॥ आप बु-
 लाये अनुज सब हितकै अपने पास ३७ पास रजायसु
 शकुनि तब रच्यौ कपटको यूप ॥ निरखि करन रविपुत्र
 को यों बोल्यो तब भूप ३८ आनहुं बोलि युधिष्ठिरहि

यों बोल्यो सुखपाइ ॥ कपट यूप में खेलिकै लेहों ताहि
 हराइ ३६ करण गयो चलि इन्द्रपथ कह्यो भूप सों
 जाइ ॥ बोलत खेलत यूप सों दुर्योधन सुखपाइ ४०
 चले भूप यह बातसुनि भीमसेन सुधिपाइ ॥ जाहु हस्ति-
 ना पुरनहीं कही नृपति सों जाइ ४१ (युधिष्ठिरउवाच)
 चौपाई ॥ युवा युद्ध को क्षत्री भागै । ताको भुव अपयश
 बहुलागै ॥ कह्यो भीमसों कर्यो न कान । चले भूपतव
 बुद्धिनिधान ४२ चलो अनुज सबकसि किरवार । चली
 द्रौपदी लिये भंडार ॥ साहन लैपरि गेहसिधाये । नगर
 हस्तिनापुर चलि आये ४३ कोश एक आगे ह्वैलिये ।
 आदर भाव अमित विधिकिये ॥ हित करिलिये सभामें
 आये । निरखत विदुर महादुख पाये ४४ तब आरंभ
 यूपको कीनो । बोलि शकुनि दुश्शासन लीनो ॥ भीम
 विदुर भाव यह जान्यो । कपट खेल अपने उर आन्यो
 ४५ भूप युधिष्ठिरको तबदेखि । दावैं रदन करज सबि-
 शेखि ॥ चकृत भये चहूंघा ताके । भूपति डर कछुकहि
 नहिंसाके ४६ कपट खेलको कियौ बिचार । कौरव
 जाते सब भंडार ॥ राज पाट आपनपौ हार्यो । बिलख
 बदन भये बंधव चार्यो ४७ फूल्यो दुर्योधन भुव राई ।
 लयो दुश्शासन निकट बुलाई ॥ तुरत जाइ नहिं लागै
 बार ॥ ल्याव द्रौपदी सभा मझार ४८ इतनी बात क-
 हत उठि धायो । तुरत द्रुपदतनया ढिग आयो ॥ अजु-
 गत बात आय कै भाखी ॥ ताकी नेक कानि नहिं राखी
 ४९ (दुश्शासनउवाच) दोहा ॥ जीत्यो कौरव यूप में पुरी

युधिष्ठिर हारि ॥ तू दुरयोधन मन बसी चलि मेरे संग
 नारि ५० (द्रौपदी उवाच) दंडक छंद ॥ सत्त धर्म पुत्र के अ-
 सत्त कहूं देखिये न जाके सत्त तेज क्षिति छोरे लों मढ़िति
 है । तामेंत अधर्म कहि भाषतु है दुश्शासन की रति न शत
 अपकी रति बढ़ति है । करको करज दावि दंतनिमें बारबार
 मींजि मींजि हाथ ऐसे द्रौपदी रटति है । मातके समान
 जेठे बंधुकी बधूसो अब ऐसी क्यों अनैसी तेरे मुखते कढ़-
 ति है ५१ ॥ दोहा ॥ दुश्शासन फिरि तहँ गयो कह्यो नृपति
 सों जाइ ॥ द्रुपद सुताकी बिनय बहु रही गेह भुवराइ ५२
 (दुर्योधन उवाच) दुश्शासन जिय मारि हों लाउ द्रौपदी
 बाल ॥ पकरि केश नहिं कानि करि आनि सभा उताल ५३
 जायगहे कर केश तिन कीनी कछू न कानि ॥ सभा माँझ
 आनी पकरि आई मन न गलानि ५४ (दुर्योधन उवाच)
 बैठि त्रिया मोजंघपर मनमानी तनारि ॥ मैतुम हित स-
 गरी तजी निज तरुणी सुखकारि ५५ (द्रौपदी उवाच)
 पापी बोलि न दुष्टता कहु न अबलत बैन ॥ राज पाट
 मिटि जायगो इहि त्रिय कछू रहैन ५६ झुकि भूपति
 तब यों कह्यो लेहु दुकूल उतारि । सुनि दुश्शासन मो
 निकट आई नग्यो बहुनारि ५७ ॥ चौपाई ॥ दुश्शासन कर
 पकर्यो चीर । भीमसेन थर हर्यो शरीर ॥ कही युधि-
 ष्ठिर सों अकुलाई ॥ आयसु दै त्रिय लेहुं छुटाई ५८
 राजा उत्तर कछू नदीनो । तब दुश्शासन उद्यम कीनो ॥
 पंचाली सुमिरे अकुलाई ॥ दीन बंधु किन करो सहारि ५९
 द्रौपदी उवाच ॥ दंडक छंद ॥ जिनकी पतनीकी तिन

पतिनकी तुम पति खोवत पतित गति कैसेकै कसाईकी ।
 रानी अकुलाइ कही फाटिहू न जाय मही कैसे जात स-
 ही दुष्ट दुश्शासन दाई की । कीनी करण कानि नहीं द्रो-
 ण न गिलानि करी तजी पहिचानि बानि भीषम भलाई
 की । जैसेप्रहलाद काजकीनोहै इलाज त्योहीं कीजै महा-
 राज आज लाज शरनाई की ६० ॥ सवैया ॥ काहू कि
 बार सह्यो गिरि भार सुकाहू कि बार अंगार चबाये ।
 काहू कि बार बिदारि अदेव सुकाहू कि बार पयादेइ धा-
 ये । काहू कि बार को पाहन फारि कढ़े नरसिंह के रूप
 हि आये । दीनके नाथ कहाइकै वे गुणवार हमारी कहां
 बिसराये ६१ ॥ दंडकछंद ॥ मेटी कुलरीति मानों जानि
 पहिचानि नहीं द्रौपदी सभा में छोर गह्यो आनि चीर
 को । रानी अकुलाय कही फाटिहू न जाय मही हूजिये
 सहाय धर्यो ध्यान यदुबीर को । दीनन की लाज राखि
 लीजे महाराज आप और कहों कासों कोऊ हीरको न
 पीर को । जोर साथ दुश्शासन हाथ थाके पाथर ज्यों
 छूट्यो नहीं क्योंहूँ पटरंचक शरीरको ६२ साहस सहित
 बलबाहु सबिलाइ गये भीषमसमेत कोऊबोलत न तटको ।
 ब्यालसे विशाल काल दंडते कराल बाहु ऐंचि साक्यो
 पट दुश्शासन से भट को । आश छाड़ि पति की निराश
 बाम टेरे हरि करुणा निधान शब्द सुन्यो दीन रटको ।
 देहतें कव्योहै पट कोटिन मव्योहै छत्रद्रौपदी दुकूलबव्यो
 जैसे सूत नटको ६३ भीमसेन भीर तजी पारथहू पीर
 तजीधीरतजी धर्मपुत्रसत्तमें दढ़ाइकै । भीषमहू बानितजी

द्रोण पहिचानि तजी कण्ठतजी आनिरह्यो बिदुर बराइ
 कै । बुद्धिकुराज तजी दुश्शासन लाज तजी ऐंचिऐंचि
 हार्यो पट खरोई खिसाइकै । बार ना लगाई करी द्रौ-
 पदी की भाई तहां साँकरे सहाई यदुराई भये आइकै
 ६४ खेंचत पिरानी बांहें कीनी जु अनेक आहें दोऊ कर
 मींजि दुश्शासन दयातु है । भोडरके कत्ता भोजपत्तर
 के पत्तालों पट उघरत जातु पै न उघरत गातु है । दुर्जन
 दुश्शासन क्षमान गहतु क्षिन क्षिन छीजतु बसन पै न
 उघरतु गातु है । द्रुपद सुता को चीर पुजवत यादव बीर
 अंगते तरंगसों अम्बर होत जातु है ६५ ॥ दोहा ॥ पट
 झटकत भटकी नहीं भुजबल भये अनाथ ॥ आपुन लीनो
 ग्यारहों बसन रूप यदुनाथ ६६ ॥ दोहा ॥ ऐंचि ऐंचि
 हार्यो पटहि दुश्शासन अकुलाइ ॥ थाकिरह्यो करिवल
 घनो रही सभा अरगाइ ६७ (भीमसेन उवाच) दंडक
 कंद ॥ मारि डारों रणमें निकारि डारों गर्व सर्व मूलतें
 उखारि डारों बाहु दुस्सान के । तोरि डारों जानु जंघ
 दुष्ट दुर्योधन के तनक करो ना भ्रम दुष्ट न के तनके ।
 चाहि मुख नृपति युधिष्ठिर जू भीम कहै आयसु जो देहु
 तौ तौ सारों काज मनके । हमहिं अक्षत खल चीर ऐंचो
 द्रौपदी को धमकत हिये माझ जैसे घाउ घन के ६८
 दोहा ॥ द्रुपद सुताको इन गह्यो जिहिकर दुष्ट दुकूल ॥
 हों बर बाहु उखारि हों तेई भुजा समूल ६९ द्रुपद सु-
 तहि अन्हवाय हों ताके रुधिर मझार ॥ भीम पैज बोली
 यहै इहिविधि बारंबार ७० (भीष्म उवाच) सांचहु जाये

अंध के अकृत दृगनि जे अंध ॥ चलै कहोधौं एक की वै-
 सेही सब बंध ७१ महिमा करुणासिंधु की देखतहै खल
 नैन ॥ भये लटपटे मूढ़ भुज ऐंचत पट उबरैन ७२ शाप
 देहिं त्रिय क्रोध करि सभा भस्म हवै जाइ ॥ होनी होइ
 सो क्यों मिटै देखि देखि पछिताइ ७३ सुनी सकल
 धृतराष्ट्र यह ततछिनही अकुलाइ ॥ धर्म पुत्र युत द्रौपदी
 लीने निकट बुलाइ ७४ समाधान संतोष करि दीन्हें गेह
 पठाइ ॥ पहुंचे त्रिययुत इंद्रपथ पांचों बांधव आइ ७५
 इति श्रीमहाभारतपुराणे विजयमुक्तावल्यांकबिह्वत्र विरचि
 तायां द्रौपदी अक्षयदुकूलवर्णनो नाम षोडशोऽध्यायः १६ ॥

चौपाई ॥ दुर्योधन सब अनुज बुलाइ । तिनसों कही
 बात अकुलाइ ॥ कहा हमारे जीते होइ । वैसुख बिलसत
 हैं सब कोइ १ ऐसी मंत्र कछू अब कीजै । उनकी स-
 कल संपदा कीजै ॥ पांचों अनुजन देश निकासि । तब
 हवैहै सुखकी बहु रासि २ पठयो करुण इंद्रपथ गयो ।
 खेलन द्यूत संदेशा दयो ॥ चलनयुधिष्ठिर भूपति कह्यो ।
 न्योत पठाये जाइ नरह्यो ३ खेल कपट को तैसब जानै ।
 कही भीम की चित न आनै ॥ चलि कै नरपति पहुंचे जाइ ।
 आदर कीनो कोरव राइ ४ खेल कपटको तब तिनगन्यो ।
 कपट महा अपने चित अन्यो ॥ अभय कीजिये बचन
 ददाय । जो हारै सो बनको जाय ५ वाचा बंध दुहुमिलि
 कीनो । द्यूतखेल में तब मनदीनो ॥ हार्यो राज युधि-
 स्थिर भूप । हार्यो साहन पाट अनूप ६ हार्यो देश स-

हित भंडार । हार्यो गज बाजिन को दार ॥ प्रफुलित
 हवै दुर्योधन कही । राज पाट सब हारी मही ७ बारह
 वर्ष जाय बनरहो । गिरि गह्वर के सब दुख सहो ८
 दोहा ॥ बरष तेरही जाउ दुरि जो हम लेहिं निहारि ॥
 फिर करि द्वादश वर्ष को देंहैं तुम्हैं निकारि ९ (भीमसे-
 नउवाच) कपट द्यूत इन खेलिकै कानन दीनो वास ॥
 पाय रजायसु हों करों कौरव कुलको नाश १० नृपता
 लेहुं छिड़ाइकै करों राज भुव ईश ॥ करै सकल जगबं-
 दना छत्र धरौ किन शीश ११ (राजोवाच) नलदम-
 यंती की कथा भूप कही समुझाय ॥ द्वादश वर्षे बिपिन
 रहि राज करेंगे आय १२ (अर्जुनउवाच) मोको आ-
 यसु देहु जो राजछाड़ि सब लेहुं ॥ सकल परेखो जाय
 भिटि नृपता बिप्रन देहु १३ भिटै परेखो चित्त को दूजै
 हवैहै धर्म ॥ आयसु देहु कृपालु हवै यहै करों हों कर्म
 १४ (राजोवाच) छुपै ॥ धन्यधन्य तू पार्थ खण्ड खं-
 डन यश कीनो । धन्य धन्य भुजदंड कर्यो सुरपति बल
 हीनो ॥ धन्य धन्य तव पाणि कोपि धनु करत युक्तशर ।
 धन्य धनुर्धर धीर दियो विधना तो कहं बर ॥ कवि छत्र
 न कीजै शेषमन तुव सरवरि कहुको करहि । शंकत दश
 दिगपाल धर सुथर थरधरथरहरहि १५ दोहा ॥ बिप्र-
 नको यहदान नहिं देहु पंथ बलि बंड ॥ बारह वर्ष व्य-
 तीत करि करिहैं राज अखंड १६ (सहदेवउवाच) हतों
 अंध सुत अनुज सब यह मेरे जिय आज ॥ आप वचन
 प्रति पालिये बनहिं चलो महाराज १७ राज सिंहासन

द्रव्य सब साहन अरु भंडार ॥ रखवारो हवै राखि हों
कीजै यही विचार १८ बिपिन दुखीजनि होहुनूप मोसों
सेवक पाइ ॥ अन्नद्रव्ययुत भक्षण देहों वन पहुंचाइ १९
(राजोवाच) चौपाई ॥ तेरो पौरुष हों सब जानै । अति
हि शूरतनु कहा बखानौ ॥ पैनिजु वचन हमारो मानि ।
फेरि राज्यकरि हैं हम आनि २० नकुल पर जर्यो यों
हठि भाखै । कौरव मारों को अब राखै ॥ आज्ञा देहुभूमि
भरतार । हतौं अनुज सब लगै न बार २१ हारी पुहुमि
सुनीचे धरों । तरकी धरती ऊपर करों ॥ तापर बैठि राज्य
नृप कीजै । सकल अरिन ऊपर पगु दीजै २२ ॥ दोहा ॥
नकुल निवार्यो नृपति तब योंकहि बारंबार ॥ तोसोंवली
न और भुव जानै सब संसार २३ गहि ठोढ़ी नरनाथ
तब लघुबंधव समुझाय ॥ तबै इंद्र पथ धाममें पहुंचे स-
ब जन आय २४ (राजोवाच) तेरह वर्ष बिपिन बसि
फेरि आय हैं धाम । क्रोध नहीं कोऊ करो मनसा बाचा
काम २५ इति श्रीमहाभारतपुराणे विजयमुक्तावल्यां
कबिच्छत्र विरचितायां राजायुधिष्ठिर दुर्योधनद्यूतवर्णनो
नाम सप्तदशोऽध्यायः १७ ॥

अथ बनपर्व ॥

गीतिकाच्छन्द ॥ राजबिन्ह तजे युधिष्ठिर भूप सब
वनको चले । चतुर भ्राता संग लीन्हें हुते शूर भलेभले ॥
मातु राखी बिदुर के गृह हेतु बहुविधि जानिकै । राखी
सुभद्रा पुत्रयुत पुरद्वारका में आनिकै १ द्रौपदीके पंचसुत

नृपद्रुपद ढिगते राखियो । पंच बंधव द्रुपद तनयासहित
 बन अभिलाषियो ॥ छत्रपाट धरे सिंहासन सदन में सुख
 पायकै । भूप रथ चढ़ि बंधुयुत कानन चले अकुलायकै २
 चलतही यक असुर मारण विपिन को तब रोकियो । वि-
 कट घट अति रदन दीरघ भीमसेन बिलोकियो ॥ गदा
 युद्धहि छाड़िकै बलवंत रथतजि धायकै । मल्लयुद्ध कियो
 बली बहु दुष्ट अंकहि लायकै ३ भूमिगहि संहारि राक्षस
 विपिन को तब पगु धर्यो । लख्यो बन अति सघनद्रुम
 बहुभांतिकै बहुफल फरयो ॥ ललित ललित लवंग लतिका
 कलित करना सोहियो बैलि बल्ली बहुचमेली जुहीयुत मन
 मोहिये ४ ॥ छप्पै ॥ सोहत तरुवर ताल केलि करनार
 अमृत फल । सोहत कंजनयुक्तकिते सरवर जल निर्मल ॥
 सोहत निर्झर झरत सुथल थल सहित अखंडित । सोहत
 लतिका फूल भवर पुंजनि सुख मंडित ॥ शीतल मंदसु-
 गंध तहँ बहत पवन अति सुखद गति । कवि छत्र रम्य
 अवनी सुथल निरखत होत प्रसन्नमति ५ ॥ भुजंगप्रयात्
 छन्द ॥ तहां आपही को कुटी भूप कीनी । बिलोकी बनी
 ताथली की नवीनी ॥ कहुं काल के वृक्ष फूले फलेंहैं । तहां
 कोकिला आदि पक्षी भलहैं ६ तपी बिप्र केते तहां चित्त
 मोहैं । मनो देव देवेश लोकेश सोहैं ॥ मयूरी चहुं ओर ते
 नृत्य साजैं । कहुं हंसिनी हंस नीके बिराजैं ७ ॥ दोहा ॥
 तपसी मर्कटदेखि ऋषि कीने नृपति प्रणाम ॥ भांति भांति
 करि बंदना कही नृपति गुणग्राम ८ मोकहँ होहु प्रसन्न
 ऋषि देउ कछू उपदेश ॥ दीनो सूरज मंत्र तब सुनि सुख

भयो नरेश ६ जाप्यो भूप तुरंतही प्रगट भयो भूभानु॥
 कही भूप सो मंत्रको सुनिये सकल विधानु १० प्रात
 न्हाइकै भूप तुम जपियो मंत्रहि नित ॥ षटरस भोजन
 द्योस प्रति पहुँचाऊं तुव हित ११ ॥ चौपाई ॥ यहिबिधि
 भोजन प्रतिदिन पावें । आपनुजेवें ऋषिन जिवावें ॥ ऋषि
 सब भूपति को समुझावें । तिहि बन रहत न कछु दुख
 पावें १२ करि दुष्टता जयद्रथ आयो । हरण द्रुपद तनया
 को घायो ॥ सक्रयोन नेक युद्धकोकांधि । लीनो भीमसेन सो
 बांधि १३ (भीमसेनउवाच) आज्ञा मोहिं गुसाईं दीजै ।
 बांधि दुष्ट अवहीं मारीजै ॥ भूप कहैं ऐसी नहिं कीजै ।
 बांधि मारि अपयश क्यों लीजै १४ पाय रजायसु सो
 मुकरायो । लज्जित ह्वै गृहको चलिआयो ॥ करी तपस्या
 शिवकी जाय । केती वर्ष तन मन लाय १५ ॥ दोहा ॥
 बहुदिन बीते करत तप भये महेश उदार ॥ मांगु मांगु
 तोकहँ दयो सोई वर सुखकार १६ (जयद्रथउवाच) भीम
 धनंजय धर्मसुत सहदेव नकुल कुमार ॥ मीचु लहैं मो
 हाथते यह इच्छा मो सार १७ (शिवउवाच) विष्णुभक्त
 वे पंच जन तिनसों कहा वसाय ॥ एक द्योस वे पांडुसुत
 जीति जयद्रथ जाय १८ ॥ चौपाई ॥ जबहिं जयद्रथ यह
 बरपायो । चलि दुर्योधन के ढिग आयो ॥ आप पराजय
 सब अनुसरी । तब मैं शिवकी सेवा करी १९ एक दिवस
 दीनो शिव मोहिं । जीति जाय मैं दीनों तोहिं ॥ सुनिकै
 दुर्योधन बहु लाज्यो । दुःख भयो मन आनंद भाज्यो २०
 दोहा ॥ धर्मदुरन्धर धर्मसुत बिहरत बनमें जानि ॥ भेंट्यो

चाहत पुत्रको धर्मराज सुखदानि २१ लहै अकेलो पुत्र
 नहिं तब दानव बपु साजि ॥ शिर अकाश पगु धरणि सों
 देखि उठ्यो गलगजि २२ ऊपर लै गयो नृपति को बाण
 धनंजय तानि ॥ घायल नहिं ता दुष्टको कानि भूप उर
 आनि २३ सिंहनाद लौ भीमतहँ गरजि उठ्यो किलकारि ॥
 गिर्यो असुर भुव आयकै ज्यों मर हत्यो मुरारि २४
 सोरठा ॥ कह्यो व्यास ऋषिराय अर्जुन सों उपदेश तब ॥
 सेवो ईश्वर जाय मनबच कायिक नेम सों २५ ॥ दोहा ॥
 रुद्र बाण लहि रुद्रपै कहै पार्थ सति भाउ ॥ त्रिभुवन साईं
 करि कृपा अमरपुरी दरशाउ २६ तब ईश्वर आज्ञा दई
 कुसुम बिमान चढ़ाय ॥ दरशायो सब अमरपुर भेंट्यो तहँ
 सुरराय २७ चित्रसेन गन्धर्व सों प्रीति बढी बहुभाय ।
 नृत्य नाद तब अर्जुनै बिद्यादई सिखाय २८ पार्थ रिझाय
 इन्द्र बहु सातो स्वर तब गाय ॥ नृत्य कियो सुर तरुणि
 तब बाजन विविधि बजाय २९ ॥ सुंदरी छंद ॥ अर्जुन की
 बहुधा हरषी मति । तासे देव प्रसन्न भयो अति ॥ ईश्वर
 को सब धाम दिखावत । देखत पार्थ महा सुख पावत ३०
 विष्णुपुरी अवलोकि सबै तहँ । देखी जाय बिरञ्चिपुरी
 जहँ ॥ इन्द्र पुरी महँ मंदिर राजत । सुंदर रूप नियुक्त
 विराजत ३१ ॥ सवैया ॥ सुंदर मंदिर कंचनके मणि नील
 कंगूरनि सों कृबि छाये । लाल मनोहर माणिक जाल
 खँचै सित खंभ बिचित्र सुहाये । बिद्रुम मुक्त अमौलिक
 सों प्रति द्वारन बन्धनवार बँधाये । सुर प्रभा सी अभा
 कवि छत्र बिलोकिके पार्थ हिये सुख पाये ३२ ॥ चौपाई ॥

कहि गन्धर्व अचम्भो एह । काहेते सूनो यह गेह ॥ किहि
पुर मंदिर रच्यो बनाय । किहि हित तज्यो सुकह समु-
झाय ३३ (चित्रसेन गन्धर्व उवाच) तालवरण दानव यहि
नाम । तिहि सुर जीत्यो यह संग्राम ॥ वाके त्रास धाम
यह तज्यो । आखंडल दूजौ गृह सज्यो ॥ सुनिके पार्थहि
चिंता भई । सहसनैन पै अज्ञा लई ॥ नीको रण दानव
सों जाई । वह रण जुर्यो घोर दल लाई ३५ ॥ दोहा ॥
कहौ कहां लगि युद्धकी बाढ़ै कथा अपार ॥ तालवरण की
सब चमू मारत लगी न बार ३६ ॥ छप्पै ॥ करत अमित
गति युद्ध लड़त दानव बल जान्यो । इन्द्रपुत्र शिव बाण
कोपिकै तब संधान्यो ॥ रुण्ड मुण्ड कटि बांह जानु जंघा कर
टूटे । एकहि बाण निदान सर्व सेना बल लूटे ॥ भयभीत
शेष हति असुर सब तजि रण बल दुरिगये । जय युद्ध
पार्थ करि बाहु बल तन प्रसन्न आनंद हिये ३७ ॥ दोहा ॥
इंद्रहि सुबस बसाय कै सुचिते करि तिहि धाम ॥ लहि
आज्ञा आयो पुहुमि जीति असुर संग्राम ३८ ॥ चौपाई ॥
आय युधिष्ठिर के पद बन्दे । बंधव सुनत सकल आनन्दे
(राजोवाच) तोसों तुही काहि सरि दीजै । सुर नर कौन
बराबरि कीजै ३९ इति श्रीमहाभारतपुराणे विजयमुक्ता-
वल्यांकविच्छत्रसिंहविरचितायां अर्जुनविजयवर्णनो नाम
अष्टादशोऽध्यायः १८ ॥

नाराचकुन्द ॥ तबै नरेश धर्मपुत्र संग बंधु लै भले ।
निकेत नारि द्रौपदी महाअरण्य में चले ॥ लखे तहां अने-

क पुष्प स्वर्ण वर्ण देखिके । सबै सुगंध फूलमें नवीन हैं
 विशेषिके १ उठाय द्रौपदी लये सराहि ताहि यों कहै ।
 मँगाय लेहु भीमसेन पुष्प ये जहां लहै ॥ (भीमसेन उवाच)
 उड़ाय पौन ह्यां परे कहां सुनारि पाइये । न जानिये दिशा
 सुकौन कौन ओर धाइये २ (द्रौपद्युवाच) विलोकि देह
 आपनी विचार क्यों न तू कहै । बिना अनेक यत्नते न शूर
 कोय यों लहै ॥ कहां प्रसून हेतते विचार चित्तमें कियो ।
 न देहि माहिं आनिसों कठोर है महा हियो ३ ॥ दोहा ॥
 गदा लई तब भीमकर अन बोले अकुलाय ॥ उत्तर दिशि
 गिरि कंदरन कानन पहुंच्यो जाय ४ बैठि बीर गिरि
 शिखर पर उठ्यो महा गलगाजि ॥ पावस घन गरज्यो
 मनो चले सिंह सुनि भाजि ५ गिरि गह्वर मग सघन
 द्रुम ठाढ़े गुहा पहार ॥ सुनत नाद हनुमंत तब आयगयो
 तिहिबार ६ किये युद्ध कपि रूप तब पर्यो तहां बिचआइ ॥
 अवलोक्यो सो भीम तब सकैं न बाट कुटाइ ७ ॥ चौपाई ॥
 तारी दैदैं भीम डरावै । बानर के मन कछू न आवै ॥ झुकि
 झुकिकै वह तिन ललकार्यो । कुटै न मारग पचि पचि
 हार्यो ८ (भीमसेन उवाच) मारग छाड़ि कहतहों तोहिं ।
 लांघत जीवहि लज्जा मोहिं ॥ मेरे बचन पर्यो जो रहै ।
 आपुन कियो आपुही लहै ९ (हनुमंत उवाच) हों अशक्त
 बहुभांति निहारो । तुम समर्थ इत उत गहि डारो ॥ भीम-
 सेन बल करि करि हार्यो । मर्कट टर्यो न क्यों हूं टार्यो ॥
 १० तब तिन बहुविधि अस्तुति लाई । सत्य कहौ तुम
 कोहौ भाई ॥ असुर सुरेश कि गंधर्व कोई । सांची बात

कहौ तुम सोई ११ गर्व हमारो सबविधि भाग्यो । दौरि
भीम तब चरणन लाग्यो ॥ अब जनि कपट हिये नें राखो
अपनो भेद सकल विधि भाखो १२ (हनुमंत उवाच) हनु-
मान है मेरो नाम । चहौ सुपुजऊं तुव मन काम ॥ सुनतै
भीम उठ्यो अकुलाय । चरण कमल तिन बंदे जाय १३
दोहा ॥ भूलि गर्व मनमें कर्यो क्षमियो मो अपराध ॥
सदा चूक तिनकी क्षमैं जो जन साधु असाधु १४ लीनी
लंका रूप जिहि सो बपुदे दरशाय ॥ कही युधिष्ठिर भूप
सों जिनके मन पछिताय १५ मंदत आखैं भीमके कीनो
रूप कराल ॥ पग धरती आकाश शिर निरखत भीमबि-
हाल १६ (भीमसेन उवाच) देखसक्यो यह वपु नहीं बि-
कल होत मम देह ॥ ताते दरशावो वहै निज शरीर करि
नेह १७ निज मूरति हनुमंतकी दरशाई सो बाट ॥ पठयो
हित करिकै तहां हुते कमल जिहि घाट १८ (भीमसेन
उवाच) दुर्योधन करि दुष्टता लीने द्यूत हराय ॥ द्वादश
वर्ष बन लह्यो पहुंचे यहि थल आय १९ ॥ दोधक-
छंद ॥ युद्ध महा उनसों अब ह्वैहै । जीतिहि सो धरणी
अब पैहै ॥ आप कृपा करिके चलि आवैं । बैठ ध्वजा गल
गाज सुनावैं २० होय सहायक छाहहिं कीजै । तौ बर
जीति सबै धर लीजै ॥ बैन सुन्यो हित जबै जबैजू । बांह
दई हनुमंत तबैजू २१ नाय चलयो शिर सो सर देख्यो ।
उत्तम कंजन युक्त विशेख्यो ॥ गंधर्व रक्षक देखि घनेजू ।
थों तिनसों तब भीम भनेजू २२ ॥ दोहा ॥ आज्ञा देहु
कृपालुह्वै लहौ प्रसूनन धाय ॥ झुकिगंधर्व कहीयहै तूकत

नियरो जाइ २३ बरबट सरतर पैठि कै लीनो बीड़ा
 बांधि ॥ रक्षक दौरे धनुषगहि तीक्ष्ण बाणनि सांधि २४
 कमल फूल द्रुमतर धरे शिरते तरे उतारि ॥ कोपिगदा
 सों एक संग गयो करोरिक मारि २५ मुद्गर फरसा शक्ति
 शर भागे किन्नर डारि ॥ आनि कमल दीने सकल प्रिया
 पानि सुख कारि २६ (युधिष्ठिरउवाच) तोसों जुरैन युद्ध
 में किन्नर यक्षक कोइ ॥ तोहीं ते मनकामना सब विधि
 पूरण होइ २७ ॥ त्रोटकछंद ॥ जबहीं बहु द्यौस बितीत
 भये । बनमांहि अखेटक भीम गये ॥ पुनि दीरघ पन्नग
 एक लह्यो । तिनि दौरि तबै पगु आइ गह्यो २८ ॥ दोध-
 कछंद ॥ भीम बली न छुड़ावत कूट्यो । हारि रह्यो बल
 दीरघ टूट्यो ॥ मारि गदा अहिको शिरतोरी । ता कहं
 नेक सक्यो नहिं मोरी २९ बीति गये दश बासर ताही ।
 बाट तहां लगि भूपति चाही ॥ बंधुन सों मिलि कानन
 देख्यो । सर्प ग्रस्यो तब भीम बिशेख्यो ॥ ३० अर्जुन
 सोंअहि बाणनि मार्यो । दौरि खड्ग सहदेव प्रहार्यो ॥
 भूप कहो कत पन्नग मारो । देवन को अवतार बिचारो
 ३१ नाग घोष नृप को संताप । सर्प भयो सुनि बिप्रन
 शाप ॥ ऐसो जंतु आहि यह कोइ । तासों याहि प्रहारन
 होइ ३२ भीमसेन बल करिकरि हार्यो । सो कत मरत
 तुम्हारो मार्यो ॥ कीनो पन्नग जय जय कार । जान्यो
 भूप धर्म अवतार ३३ (सर्पउवाच) दोहा ॥ तव पुरखा
 हौं भूप सुनु नागघोष मो नाम । बिप्र दोष दुर्गतिभई
 भयो सर्प गुणग्राम ३४ अपनी नृपता में महा यह

कीनो अपराध ॥ लियोद्रव्य सब द्विजन को दीनो दंड
अगाध ३५ मोकहँ दीनो शाप तिन पायो यह अवतार ।
तब बिनयो करजोरिकै कब पाऊं सुखसार ३६ कही
द्विजन जब पुहुमि में होइ धर्म अवतार ॥ तब लहिहौ
शुभगति नृपति ताहि परसि तिहि बार ३७ ॥ चौपाई ॥
कुवत युधिष्ठिर मिटिगयो दोष । पायो नागघोष नृप
मोष ॥ छाड़ि भीम भयो अंतरधान । आयो बंधव निज
अस्थान ३८ सबही के मन आनंद भयो । शोक द्रौपदी
उरको गयो ॥ पंडु पुत्र बनमें ब्योपरहीं । बनफल खाइ
अहेरो करहीं ॥ इति श्रीमहाभारतपुराणे विजयमुक्तावल्यां
कविकृत्रसिंहविरचितायां राजानागघोषमोक्षवर्णनो नाम
नवदशमोऽध्यायः १६ ॥

दोहा ॥ दुर्योधन बैठ्यो सभा बंधु सहित सुखपाइ ॥
पांडुपुत्र पांचों तबै हियरा करके आइ १ करण दुशा-
सन शकुनि तब बोलि लिये सुखपाइ ॥ मो मन आई
सो करो अवर न कछु उपाइ २ ॥ सबैया ॥ बूझत हैं
सबही दुर्योधन बुद्धि उठी यह मों उरहीतैं । सुद्धि लहै
नपितामह भीषम जाइ युधिष्ठिर भूपहि जीतैं ॥ लेहिंगे
वे सब देश भंडार सबैधन आलख औधि बितीते । साजि
चले चतुरंग चमू सब बंधुन जीति न कुंज कुटीते ३
दोहा ॥ मानि रजायसु सासतिन साजे दल चतुरंग ॥
चले भूप करि दुष्टता करण दुशासन संग ४ गिरि
गह्वर मग देखि कै लख्यो घोर बन जाइ ॥ चित्र

सेन गंधर्व तव रोषित पहुंच्यो आइ ५ बांधे विधिकी
 फांससो दुरयोधन भुवपाल । मनबच क्रम बहु करणनृप
 कीनो कोप कराल ६ ॥ सुंदरीछंद ॥ करण महीपति कोप
 कर्यो बर । पूरिलयो बर बाणन अम्बर ॥ गन्धर्व बोलि
 उठ्यो तिनसो हँसि । कौन छुटावहि भूपलयो असि ७
 (गंधर्वउवाच) देवनसों रण तू कत ठानहि । मानव युद्ध
 नहीं उर आनहि ॥ गाजत करण सुबाण न छांडतु ।
 होत कछू नहिं पौरुष मांडतु ८ ॥ दोहा ॥ श्रवणकुला-
 हल पार्थसुनि आयो शर धनु साजि ॥ निरखि बँधे दुर-
 योधनै बली उठ्यो रण गाजि ९ (अर्जुनउवाच) चौपाई ॥
 जो बांध्यो दुरयोधन राज । कहै पार्थ तौ हमको लाज ॥
 यद्यपि हमको मारन आयो । अपनो कियो आप फल
 पायो १० तबहिं पार्थ विनवै गल गाजि । तू मोपै कत
 उबरै भाजि ॥ छाड़ि राय जो चाहै जियो । नातरु बेधतु
 हों तौहियो ११ (गंधर्वउवाच) दोहा ॥ दुर्योधन करि
 दुष्टता आयो तुव बध काज ॥ अबल अकेले जानि बन
 उर कछु धरी न लाज १२ मित्रभाव उरमें धर्यो तो
 बांध्यो भुव राय ॥ खोलि पांस सोंप्यो नृपति अर्जुन कर
 सुख पाय १३ छूट्यो मृग ज्यों बधिक तें यों भूपति उर
 जानि ॥ दियो रजायसु धर्मसुत बिदा करहु सुख मानि
 १४ (अर्जुनउवाच) आजुभये तुमते उरुण यों कहि समदे
 राय ॥ बिलखि बदन युत करण तब चले सदन दुख
 पाय १५ ॥ चौपाई ॥ जैसी करै सुतैसी पावै । ओछो ताकै
 ओछी आवै ॥ परहित कूप जो खोदैं कोई । निश्चयगिरिहै

तामैं सोई १६ ॥ दोहा ॥ मलिन भूप आये सदन निशि
 दिन कछु न सुहाय ॥ लखि लखि पुरवासी सबै यों तब
 करत चवाय १७ (पुरवासी उवाच) गये विपिन करि
 दुष्टता धर्मपुत्र बधकाज ॥ बांधि लये गन्धर्व नृप उपजी
 दल उर लाज १८ कुलहि कलंक बिचारि कै पार्थ उठ्यो
 अकुलाइ ॥ त्रास दिखायो गन्धर्व लीनो भूप छुटाइ १९
 गये ताकि हेदुष्टता गई जीवकी आस ॥ पार्थकुड़ाये जानि
 कै बैठे मलिन अवास २० हुते जहां नृप धर्मसुत धर्म-
 राज तहँ आइ ॥ देखत सत्या कर दयो मायामृग मुकराइ
 २१ आपु विप्रको रूपधरि आयो भूपति पास ॥ कह्यो देहु
 मृग पकरिके यह पुजओ मोआस २२ तुमक्षत्रीहौ विप्रहौ
 यहटारो मोंआरि ॥ तौसीजै मोकाजसब सिंह जाइगो मारि
 २३ ॥ दोधकछंद ॥ बांधव पांच तबै उठि धाये । कानन
 में मृगके ढिग आये ॥ दूरि कहूं कहूं सूझत नेरो । हाथ
 चढ़ै न धिरै कहूं घेरो २४ लागि तृपा बल थाकि रहे हैं ।
 क्लेश भये नहिं जात कहे हैं ॥ पर्वत पे चढ़िकै तब हेरें ।
 देखत सूझ पर्यो जल नैं २५ ॥ दोहा ॥ नकुल गये
 तहँ अम्बहित लीनो भरि करि नीर ॥ भइ अकाशबाणी
 तहां चकित भयो सुनि धीर २६ ॥ चौपाई ॥ मेरे बूझे
 उत्तर देहि । जबतू नीर आपु कर लेहि ॥ कह्यो न ताको
 इन कछुमान्यो । नकुल नीर तब बाहिर आन्यो २७ प्राणन
 तजि गये ताकी काय । चिंता करी युधिष्ठिर राय ॥ सहदेव
 धाइ नीर हित गयो । विधि वाही तिनिहूं जीदयो २८
 अर्जुन भीम गये जल पास । लयो अंब भरिकै सुविलास ॥

फिरि सो शब्द अकाशहि भयो । उत्तर ताहि न तिनहूं
 दयो २६ मृतक परे ता जलकी पारि । गये युधिष्ठिर भूप
 बिचारि ॥ नीरजहीं भरि अंजुलि लयो । सोईशब्द अका-
 शहि भयो ३० (आकाशवाणीउवाच) मैं बूझों तू उत्तर
 देहि । पाछे देव नीर भरि लेहि ॥ धर्म बिवाद सकल
 तिन ठयो । भूप सत्य तब उत्तर दयो ३१ ॥ सवैया ॥
 लाभ कहा गुणवंतन के सँग हानि कहा जु समौबितयेते ।
 दुःख कहा जड़ मूढ़की संगति सुःख कहा बुधिवंत भयेते ।
 ज्ञान कहा अवलोकै न आतम ध्यान कहा विषयान
 चहेते । प्रीतम को पति आहिं सबै त्रिय शीलवती नित
 कै चितयेते ३२ ॥ चौपाई ॥ कह्यो धर्महों रीझ्यौ तोहिं
 प्रीति भई उर अन्तर मोहिं ॥ अब तेरे जो मनमें भावै ।
 बर मांगै सो मोपै पावै ३३ (राजोवाच) चारोबीर मरे
 परे ते अब देहु जिवाइ ॥ और कछु नहिं कामना यहै
 करौ सुखदाइ ३४ (धर्मउवाच) ॥ दोहा ॥ जोई चाहै
 चारिमैं सोई देहुजिवाइ ॥ और न जीवै तीन में निश्चय
 जानो राइ ३५ ॥ चौपाई ॥ साई अब कीजै सतिभाव ।
 कही भूप सहदेव जिवाव ॥ फेरि भई ऊरध में बानी ।
 बात भूप तुम मिथ्यामानी ॥ अर्जुन भीम बीरमा जाये ।
 कहि काहेतें वे न बताये (राजोवाच) निजबीरन की प-
 करों बांह । अयश होय अति घरणी मांह ३६ ताते
 सहदेव देउ जिवाइ । मिथ्या बचन न भाष्यो जाइ ॥
 रीझो धर्मदेह धरि आयो । सत्यवंत भूपति उर लायो ३७
 तेरो पिता धर्महो आइ । अबै देउहों सबै जिवाइ ॥ जल

सों छिरक जिवाये चारि । कही सुनो सुतसब सुखकारि
३८ बारहवर्षगये बन बीति । चलियो व्यास कहीजिहि
रीति ॥ धर्मराइ कहि स्वर्ग सिधाये पांचों बंधु कुटी मह
आये ॥ ३९ ॥ इति श्रीमहाभारतपुराणे विजयमुक्तावल्यां
कविकृत्रसिंहविरचितायां भीमराजादुर्योधनमानभंगवर्ण-
नो नाम विंशोऽध्यायः ॥ २० ॥

अथ विराटपर्व ॥

दोहा ॥ धर्मसुवनभुवभूपतव सुमिरे श्रीऋषिव्यास ॥
आय गये तिहि ठामहीकरण सकल दुखनाश (राजोवांच)
चामरकुंद ॥ बुद्धिदैऋषीशमोहिं जायकै कहारहैं । सुखसों
रहैं जहांसमूह वस्तुको लहैं ॥ शोध अंधपुत्र सुद्धि रंचकौन
पावही । ठामसो हमें ऋषीश करिकृपा बतावही २ (व्यास
उवाच) और तौ दिशान भूप रावरे दुरो नहीं । जाउ जू
विराट देशसुख पाइहौतहीं ॥ चारिवर्णके हियेतहांसदा
दया रहै । गुप्तहोउ जाइकै ऋषीश बातयों कहै ३ ॥
दोहा ॥ तब ऋषीशको वचनसुनि कीनो नृप परवान ॥ तब
विचार कीनो यहै सब गुणज्ञान निधान ४ ॥ चौपाई ॥
जैऋषिनाम भूपकोभाख्यो । नामजयंत भीमकोराख्यो ॥
विजय तृहन्नल अर्जुन नाम । सहदेव ग्वाल भयो गुण-
ग्राम ५ बाहुक अश्वनि नकुल कुमार । यों कहिकै ऋषि
कियो विचार ॥ छांड़ि गर्व सेवक ज्यों सेव । कीजौ मन
मारे तुम देव ६ ॥ व्यासकीशिक्षा ॥ सबैया ॥ क्रोधतजो
हो विरोध तजौ अरु गर्व तजौ तुम धाम पराये । आयसु

पाइ करौ सब धायसु जाय रहौ सब आप दुरायें । ऊंचोउ
 नीचो कहैं कोउ आयकै सोउ सुने रहियो शिरनाये । शोच
 विमोचन राजिव नैन सदा राहियो तिनिसों चितलायें ७
 सोरठा ॥ चलियो तेही छांह जब जैसो समयो लखो ॥
 गर्व नहीं मनमांह नेकहु भूप विचारिये ८ ॥ दोहा ॥ यह
 विधिकै बहु सीख दै गये व्यास ऋषिधाम ॥ सोई मनु
 हिरदै लह्यो मनसा बाचा काम ६ पाइ सीख भूपाल
 तब बनते मये उचाट ॥ पांचों बंधव करि क्षमा आयें नगर
 विराट १० मृतक पुरुषसों वेगिहौ आयुध बांधे धाय ॥
 नगर निकट तरुवर समी तापर राख्यो जाय ११ निरखि
 ग्वालता थल कह्यो याहि क्वै जो आइ ॥ वर्ष दिवस
 लों मृतक यह ताकहुं खैहैं धाइ १२ ॥ चौपाई ॥ यह
 कहिकै ग्वालनि बौराई । आपनु चले नगर को राई ॥
 पैठत नगर सगुन भये घने । सहदेवसों भूपति यों मने
 १३ (राजोवाच) कैसे सगुन होत सुखकारि । सो तुम
 बंधव कहौ विचारि ॥ ऐसे लक्षण मैं पहिचाने । हवै है
 काज सकल मन माने १४ (सहदेवउवाच) ॥ सवैया ॥
 बाल खिलावहिं बालकको सुत अस्तनपान करै सुरभीको ।
 सुखमैंद्यौस सिरावहुगे सब होयगो काजमही पतिजीको ॥
 लील गयो दिशि बाम चिकारि कछू यहभो उर लागत
 फीको । केतिक काल वितीतभये तब शोचउठै कछुबिग्रह
 हीको १५ ॥ चौपाई ॥ पुरमें बंधव चारौ रहे । राजसभा
 चलि भूपति गहे ॥ द्विजके रूप करौती लिये । सोहत
 द्वादश तिलकनि दिये १६ उठि विराट निरखत शिर

नायो । कांतू विप्र कहां ते आये ॥ दै अशीश यों विन-
 बैराय । धर्म सुवनको बरुवा आय १७ गिरिगह्वर वे
 दुरि गे पांचो । मोसों वैन कह्यो यहसांचो ॥ जाहुविराट
 महीपति पास । रहियो तहां सुखी सविलास १८ धर्म
 पुत्र तुवपास पठायो । तातैं निकट तुम्हारे आयो ॥ सुनि
 भूपति कीनो सनमान बैठो मुनि गुण ज्ञान निधान १९
 (राजोवाच) जैऋषि नाम व्यास मुनि भाख्यो । सुनि
 क्षितिपति बहु आदर राख्यो ॥ अर्द्धासन बैठ्यो तब भूप ।
 शिरपर तान्या कूत्रअनूप २० फिरिकै आयो भीमकुमार ।
 आय भूपको कियो जुहार ॥ दीरघ तन दीरघ भुजदंड ।
 निरखत कौतुक भयो अखंड २१ (विराटउवाच) दोहा ॥
 कितते आये कोन तुम काह तिहारो नाम ॥ कोन जाति
 किहि हेतु तुम आये मेरे धाम २२ (भीमसेनउवाच)
 गीतिकाकुंड ॥ व्यास नाम जयन्त भाख्यो पण्डुसुत को
 स्वारहों । सर्वदा करती तहां बहु भीमको जु अहारहों ॥
 दया करते रचत भोजन हों सलोनों अति घने ॥ अति
 सुगंधित स्वच्छ व्यंजन सकल षटरस सोसने २३ रीझि
 रीझि नरेश दिनप्रति देत पट भूषण घनै । राखते बहु-
 मान मेरो अनुजसरवर कोगनै ॥ हवै विराट उदार हित
 करि बचनअमृत भाखियो । हेतसों बहुमान करिकैनिकट
 अपने राखियो २४ दोहा ॥ निरख्योसरवरि भीमकी भूप-
 ति ताकी देह ॥ वैसो बली विचारिकै ढिग राख्यो करि
 नेह २५ फिरि अर्जुन नटराज हवै कीनो तियको रूप ॥
 कंकण किंकिणि आदिदै सजि आभरण अनूप २६ सिंदुर

शीसत मोर मुख मेंहदी युत शुभपानि ॥ जावक चरण
 मृदंग की धुनि कीनी तिहि आनि २७ सुनि भीतर धोले
 नृपतिसब बूझ्यौब्यौहार ॥ सकलज्ञानसंगीत लखिकला
 चौगुनी चार २८ (अर्जुनउवाच) ॥ गीतिकाछंद ॥ होंतौ
 अखारे धर्मसुत के रहत बहु सुख पाइकै । भांति भांति
 रिझावतौ कारे नृत्य गीत सुनाइकै ॥ कौन अपनो गुण
 कहै सब बूझिजै ऋषि बोलिकै । देहि सकल सुनाइकै
 सबकहै विद्याखोलिकै २९ दोहा ॥ पारथको होंसारथी
 विजै विहंतल नाम ॥ जीवन आये रावरे गेह लियो
 विश्राम ३० ॥ चौपाई ॥ धर्मपुत्र करिकै बहुनेह । पठये
 इहां जानिकै गेह ॥ अब आभार हमारो लेहु । वस्त्रअन्नवर
 ममभरि देहु ३१ लघु कन्या बालकहिं पठाऊं । विद्या दै
 जगमें यश पाऊं ॥ भूपसुता उत्तरा कुवांरि । सौंपी पठन
 योग सुखकारि ३२ फिरिसहदेव पहूंचो आय । सुद्धिकरी
 भूपतिसों जाय ॥ (सहदेवउवाच) होंतौ धर्मपुत्रकाग्वाल ।
 करतो महा कृपा भुवपाल ३३ वेतोदुरि बनवीथिनगये
 दै उपदेश पठै ह्यां दये ॥ करि जानो गाइय को सार ।
 अरु सबविधि करि सकों हथ्यार ३४ मो देखत धनुको
 कहै गरै । कोरण जु रि मो समता करै ॥ नामसैनि यह
 वृत्ति हमारी । यह जीविका सुचित्त बिचारी ३५ अरु ज-
 यंत जैऋषि म्वहिं जानै । उनै बूझि भूपति सनमानै ॥
 सुनि तिन जान्यों बुदि विशाल । सौंपी सुरभी कीनो
 ग्वाल ३६ ॥ दोहा ॥ फेर नकुल आयो तहां लिये जात
 सो हाथ ॥ देखि रूपकीराशि तब चकित भयेनरनाथ ३७

(बिराटउवाच) कौन जाति को आपुहो कहा तिहारो नाम ॥
 केहि कारण कविछत्र कहि देख्या मेरो धाम ३८ (नकु-
 लउवाच) दोधकछन्द ॥ बाहुकुभूप युधिष्ठिर केरो । राखत
 मान सबै बिधि मेरो ॥ वे दुरिकै बनमाहिं सिधारे । दै
 सबतें हमको दुख भारे ३९ कट्टर कूटर अथ चलाऊं ।
 योजन सौ यक बासर धाऊं ॥ बूझहु जै ऋषिको गुणमेरो ।
 में बहु नाम सुन्यो नृप तेरो ४० सो कहैं सौपिय बाहन
 जेतो । जानहुंगे गुण मोमहैं तेतो ॥ यों सुनि भूप उदार
 भयो बित । हेत कर्यो बहुधा नितही नित ४१ दोहा ॥
 सौं प्यो साहन नकुल कर ह्वै भूपाल उदार ॥ बहु र्यो
 आई द्रौपदी भूपति सदन मझार ४२ देखी भूपति तरुणि
 जब संभ्रम बढ्यो अपार ॥ सची किधों रति मै नका रम्भा
 ते सुकुमार ४३ नगी पन्नगी कमलजा भुव आई धरि देह ।
 सब रनिवास चकोर सों शशि ज्यों आई गेह ४४ (रानी
 उवाच) कहौ कौनकी कुलबधू आई ह्यां किहि काम ॥
 कौन जाति वरणो सकल सबविधि कै गुण ग्राम ४५
 (द्रौपद्युवाच) पांडुपुत्र गृह द्रौपदी रानी परम उदार ॥
 ताकी दासी मोहिं गिन आई हों तुम द्वार ४६ सुंदरी छंद ॥
 वे बन में पति सँग गई दुरि । मोसों बैन कह्यो हंसिकै
 मुरि ॥ जाहु बिराट महीपति के घर । काटहु काल तहां
 त्यहि ओसर ४७ ॥ दोहा ॥ आई तुम सेवा करन मोहिं सु-
 जानी नाम ॥ आज्ञा देहु कृपाल ह्वै करौं यहां विश्राम ४८ ॥
 (रानी उवाच) कौन सेव उद्यम कहा करि जानों कहि बाल ।
 चन्द्र बदनि सों बेगि कहि सोइ सौं प्यो यहि काल ४९

(द्रौपद्युवाच) दंडकच्छंद ॥ मंजन कराऊं आछे भूषण बनाऊं चुनि चीर पहिराऊं आछे भोजन सँजोइहों । दर्पन दिखाऊं दरशाऊं महा नीकी द्युति कुंकुम सुगंध घनसार उर लोयहों । बीजना डुलाऊं जल शीतल पिलाऊं अरु सेजहू बिछाऊं न करोंगी काज दोइहों । ऐसे कै सुजानी कहै जानो नीके मेरी रानी जूठो होंन खैहों और पायँ हों न धोयहों ५० (रानीउवाच) चौपाई ॥ सत्य वचन तें कहै सुजानी । मैं तुम निज पंडोंकी जानी ॥ तनया सम मेरे गृह रहिये । मोसों मनकी बातें कहिये ॥ हलकी भारी जो कोउ भाखै । तू जनि ताको आदर राखै ॥ थोरेहूँ कीजै सन्तोष । निशदिन करिहों तुमपर दोष ५१ (सुजानी-उवाच) गीतिकाछन्द ॥ करत रक्षा पांच गंध्रव अंतरिक्ष सदां बसैं । विक्रमी बलवंत बहुविधि घोर रूप महालसैं ॥ देहिं मोको दुःख जोवे आय ताहि सँहारि हैं । देवको नर-देवको छितिदेव को न बिचारि हैं ५२ पाप दृष्टि जो मोहिं देखै प्राणगत सो जानियो । मो-पंच रक्षक वे सदा यह सत्य उरमें राखियो ॥ निकट तिन राखी सुजानी परम जिय सुख पायकै । देत शिक्षा रहत सब शृङ्गार रचति बनाय कै ५३ ॥ दोहा ॥ यहिविवि पांचों पांडुसुत और द्रौपदी बाम ॥ कालक्षेप तिनके करें छत्र सकल गुणग्राम ५४ ॥ चौपाई ॥ होहिं एक सँग कालहि पाई । सकल अवस्था बरगें जाई ॥ जब भुवपतिहि जुहारन आवैं । प्रथमहिं जैऋषि को शिर नावैं ॥ ५५ ॥ इति श्रीमहाभारतपुराणे विजयमुक्तावल्यां कविकृत्रसिंह विरचितायां

पांडवअज्ञातवासवर्णनोनामएकविंशोऽध्यायः ॥ २१ ॥

दोहा ॥ अपनी दुहिताको रच्यो नृपति विराट विवाह
 छत्र सकल पुर में भयो गृह गृह प्रति उत्साह १ क्षिति
 के किते क्षितीश तब आये तिनके धाम ॥ शक्रसमान परा-
 क्रमी जगमें जिनके नाम २ ॥ सोरठा ॥ सभा रची तिहि
 काल अमरावति सी जगमगै ॥ आपनु ज्यों सुरपाल भूमि
 देव सब देव से ३ ॥ भुजंगप्रयातछंद ॥ कहूं नृत्य कालीन
 के यूथ सोहैं । कहूं रागकी तानसों चित्त मोहैं ॥ कहूं कं-
 चनी लै मृदंगी नचावैं । लसैं उर्वसी सी सबै मान पावैं ४
 कहूं मल्ल माते भिरैं भीम भारे । कहूं मेष सूर डरारे ड-
 रारे ॥ कहूं मत्त मातंग ते घोर घूमैं । तपी पुत्रसे देखिये
 चारु भूमैं ५ ॥ दोहा ॥ मल्ल एक आयो तहां बानो बांधे
 जाल ॥ पग मैठो उर पीत पट बोलि उठ्यो उत्ताल ६
 सभा मांझ नरनाह तब चारिवरण की भीर ॥ बड़े धनुर्धर
 साहसी देखतहों सब बीर ७ मोसों मल्ल जुरै नहीं कोऊ
 काहू देश ॥ हैं कोऊ मोसों जुरै आज्ञा देहु नरेश ८ छप्पै ।
 मरहठ सोरठ जीति जीति सारंग तिलंगी । जीति विदर्भी
 मल्ल सकल भूधर के संगी ॥ मगध जीति मेवार महूधर
 जीति चंदेरी । वंदरवारिवि घाट जीति करनाटकहेरी ॥
 कविकुत्र जीति अंगद नगर नहिं कोऊ सरवरि करि
 सकै । भुज वरणहु तिहि सूरके जो करिवर सन्मुख तकै
 ९ ॥ चौपाई ॥ सुनि सुनि सभा न बोलै कोई । मन
 साहस काहूं नहिं होई ॥ नृपति विराटहि सुधिहवै आई

लीनो सार जयंत बुलाई १० (बिराटउवाच) सुनु जयंत
तू आयसु मान । मल्लयुद्ध तू यासों ठान ॥ जो हारै
तौ लाज न होय । जीतै द्रव्य दै हिंसब कोय ११ ॥ दोहा ॥
तब जयंत यह मल्ल सों कही बात हर्षाय ॥ हम तुम
रससों खेलिहैं लीजै सभा रिझाय १२ तू जो आनै शेष
मन डारै भुजा उपारि ॥ हम परदेशी न्यायही देंहैं भूप
निकारि १३ (मल्लउवाच) तन दीरघ दीरघ भुजा वचन
कहत कत दीन ॥ यों सोऊ नहिं उच्चरै होय जुतनको
हीन १४ ॥ चौपाई ॥ मल्लयुद्ध दोऊ मिलि करें । लट
पटाय धरती धुकिपरें ॥ फिरि फिरि बल करि उठत
सँभारि । कोउ न मानत द्वैमें हारि १५ जबहिं जयंत
भुजा बल कियो । मल्ल उठाय पुहुमि तैं लियो ॥
करि बहु क्रोध सु भूतल डार्यो । जनु सुर बजू धाय
गिरि पार्यो १६ सम्हारि उठ्यो ये वचन सुनाय । अब
मारों तू खल कित जाय ॥ लै तब गुरज उठ्यो अकुलाइ
हन्यो जयंत नाशिका आइ १७ विषम चोट थर हर्यो
शरीर । मूर्च्छित पुहुमि गिर्यो रणधीर ॥ निरखत जै
ऋषि और सुजानी हैहैहै करिकै अकुलानी ॥ चेति ज-
यंत उठ्यो गलगाजि जान न पायो सो खल भाजि ॥
भूमहिं सात बार धरि मार्यो । गहरो गर्ब दुष्ट को मार्यो
१८ सो फिरि जुर्यो न करि बल जोरि । दोवर कीनो
मल्ल मरोरि ॥ देखत सभा सकल नर हर्षे । बसन रजत
मणि माणिक वर्षे २० मृतक दियो सुरसरी बहाइ । तब
सब समदे राजा राइ ॥ जब सब नृपति बिदाह्वै गये ।

अपने अपने गृह सुखलये २१ ॥ दोधककुंद ॥ मंत्र
 गयंदहुतौ इक ऐसो । अंजन को भुव धूमर जैसो ॥ नीर
 निकेत सुछोरि चलायो । गर्जत धाम निडारत आयो २२
 कानि माहावत कीनि करैसो । प्राण तजै छिग आवत
 है सो ॥ सुंदर मंदिर डारि दयेजू । भीतर सब नर नारि
 भरेजू २३ भूपति सो सब लोग पुकारे । हवै कुंजर नर
 केतिक मारे ॥ ताहित केतिक लोग पठाये । बाधहु याको
 भाषत आये २४ ॥ चौपाई ॥ कोऊ निकट सकै नहिं
 जाई । भूपति सों सब कही सुनाई ॥ क्योंहूं हाथ न
 कुंजर आवै । करौ उपाय जो भूप बतावै २५ (राजोवाच)
 कै सब मिलिकै बांधो जाइ ॥ कै अब शस्त्र गहौ किन
 जाइ । बोलि जयंतहि आज्ञा दई ॥ या गयंद तैं चिंता
 भई । २६ कैवल बांधि कै ताकहँ मारि । पुरको कंटक
 बेगि निकारि ॥ कहै जयंत जुमारों याहि । कुंजर को
 जिनि पकरौ ताहि २७ सिंह नाद गाज्यो बल बीर ।
 तब गयंद थर हर्यो शरीर ॥ पूछ पकरि झक झोर्यो
 ऐसो । दावत मृगको चीतो जैसो २८ पकरि रदन लै
 पहुंच्यो थान । ज्यों अजया गहिलीजै कान ॥ बांधि ता-
 हि भूपति शिर नायो । तब जयंत बसननि पहिरायो २९
 दोहा ॥ इहि विधि बीते मास दश नृप विराट के तीर । काल
 छेप इहि विधि करें पंडुपुत्र बर बीर ३० इति श्रीमहा
 भारतपुराणे विजयमुक्तावल्यां कविकृत्रसिंहविरचितायां
 भीमसेनविजयगजबंधवर्णनो नाम द्वाविंशोऽध्यायः २२ ॥

सोरठा ॥ नृप तरुनी को बंधु कीचकवली विशाल

तन । यौवन मद अतिअंध सहसदुरद सम ताहि बल १ ॥
 चौपाई ॥ शत बंधव कीचक अतिबली । बर अवगाहत
 रन अस्थली ॥ सोहत एक मात के जाये । ऐसे सुभट
 महीपति पाये २ ॥ गीतिकाकुंद ॥ इक धौस कीचक
 मोहिकै निजमहल भूपतिके गयो । कीनो प्रणाम अशेष
 भगनी देखिकै आसन दयो ॥ पवन तेहि ठारें सुजानी
 नृपति त्रिय भोजन करै । रूपदासी को बिलोकत देह
 कीचक थरहरै ३ बात भगनीसों कहै चित अटक दासी
 सों रह्यो । कालघेरो मूढ़ हँसिकै तब सुजानी यों कह्यो ॥ हैं
 पंचरक्षक मोहिगंधर्व तुरत ताहि संहारि हैं । यहबली
 होउ कि होहु निर्बल कछु न चित बिचारि हैं ४ कामअंध
 भयो सु आतुर तुरत भगिनी साँकहै । देहु दासी मोहिं
 मांगे इच्छामों उरमें रहै ॥ देहु बदले सहसदासी एक
 यह मोहिं दीजिये । छाँड़ि लज्जा कहीतोसों कह्यो मेरो
 कीजिये ५ (रानीउवाच) आहि दासी द्रौपदी की कहौ
 केहिविधि दीजिये । रहै मेरे उत्तरा सम लोभ चित न
 कीजिये ॥ जीविका हित आइ बिरमी कहौ किहि विधि
 पाइये । दई जाय न बीर मोपै आप धाम सिधाइये ६
 (कीचकउवाच) दोहा ॥ कहिकैसे तू राखिहै दासी बल
 करि लेहुं ॥ राजपाट सब छीनिकै कोटि कोटि दुखदेहुं ७
 चौपाई ॥ चेरी लागिन साहिब राजा । तेरो कहा सुध-
 रिहै काजा ॥ अति बलवंत बीर हैं मेरो । राखिलेहु को
 एसो तेरो ८ (रानीउवाच) पर तरुनीरत जेनर भये ।
 अपनी करनी ते मिटिगये ॥ जोचाहै अपनी कुशलात ।

फेर कहौ जिनि याकी बात ६ । सवैया ॥ अंधमहा दश
 कंधहरी सिय राघव को शरता उर शाल्यो । शक्रहिशाप
 दयो मुनिगौतम जानि कुकर्म के कर्मनि चाल्यो । शुंभ
 निशुंभ हते तरुणी अरु तारहि लागि बध्यो वर बाल्यो ॥
 यों समझै मनमें शठत किनको न गयो परवामको घा-
 ल्यो १० ॥ दोहा ॥ भर्गिनी मुख ये बचन सुनि उठि सुधि
 धायो धाम ॥ विकल महाजिय कलनहीं घरी महरत
 याम ११ ॥ चौपाई ॥ कीचकको सुधि बुधि नहिं रही ।
 सूने सदन सुजानी लही ॥ काम अंध अंचल तब गह्यो ॥
 आतुर हवै याविधि सों कह्यो १२ चितमेरो तोसों अब
 लाग्यो । भौ आशक्त सुधीरज भाग्यो ॥ मेरे तरुणी शशि
 उनहारी । सबपर होउ सुहागिल नारी १३ उत्तम भूषण
 बसन बनाऊं । अरु दासीको नाम मिटाऊं ॥ काहेयावन
 उत्तम गँवावै । तूतौ मो उरमें अति भावै १४ (सुजानी उ
 वाच) गंधर्व पंच मोहिं रखवारे । दीरघ तन बल विक्रम
 भारे ॥ मोहिं कुवत वै तुरतहि आवैं । कीचक तेरे प्राण
 नशायैं १५ तोहिंमरे मोअपयश हवैहै । मोहींदोष सकल
 जगदैहै ॥ यहसुनि कीचक बहु भयमानी । तुरत गयो
 मुकराय सुजानी १६ निशिदिन ताकहं नींद न आवै ।
 धन संपति घरबार न भावै ॥ दूती बोलि सुइहि विधि
 कही । कह दासी मोचित बसिरही १७ भारै ल्याउ
 सुजानी अबै । मोमन इच्छा पुजवै सबै ॥ बहु बातन दूती
 समुझावै । चित्त सुजानी कछु न लावै १८ यह विचारि
 नहिं बोलै सोई । आजु कालि कछु कलह नहोई । कीचक

आतुर हवै उठि धायो । जहां सुजानी तिहि थल आयो १६
 दोहा ॥ सुने गृहमें पायकै गहेकेश कर धाइ ॥ शठ
 कहिधौं तौकोअबै कौनकुटावै आइ २० दासी कर्म कराय
 कै आसदिखाऊं तोहिं । अपनी मनभाई करौं यहै आनिहै
 मोहिं २१ क्योंहूं हठनहिं खलतजै अंचर डार्योफारि ॥
 करते केश न सोतजै अति अकुलानी नारि २२ (सुजानी
 उवाच) जानत रसकी रीति नहिं तूखल एकहु बात ॥
 पर तरुणीको मनदिये तबसब सुख सरसात २३ रसही
 रसही मनमिलै तब लहिये परनारि ॥ बौरायो ये बचन
 कहि गूढ़ उपाय विचारि २४ शिथिल भयो ये बचन सुनि
 केश दये मुकराइ (सुजानी उवाच) रैनि भये ते क्योंन
 तू नाच अखारे जाइ २५ भोग योगमूने सदन हवै निशि
 कीचकराइ ॥ जाहु तहांहों आयहों यामक रैनिविहाइ २६
 दोधककंद ॥ कीचक यों सुनिकै सुख पायो । बैन सुन्यो
 हितवन्त सुहायो ॥ जात भयो अपने गृह सोई । चाहत
 बाट निशा कब होई २७ बैन कह्यो तहँ आय सुजानी ।
 हैपतिभूप जहांसुखदानी ॥ कीचक कानिन नेकहुराखी ।
 सोगति बाम तहां सबभाखी २८ आयसु अर्जुन को
 अब दीजै । कीचक मारहिं सोमत कीजै ॥ रोवत बामहि
 श्वास न आवै । भूपति या विधिकै समुझावै २९ दोहा ॥
 मास दिवश बीते त्रिया मो ब्रत पूरणहोइ ॥ तौ लगि
 कालहि काटिये लखै कछु नहिं कोइ ३० ॥ चौपाई ॥
 अवधि बिते कीचक संहारों । तब नहिं और विचार बि-
 चारों ॥ कैतौ लगि रहिये मन मारि । कै बनबास करा-

वहिनारि ३१ बिलखिबदन त्रिय पहुंची तहां । हुतेबिह-
 न्नल अर्जुन जहां ॥ बरणी कीचक की अधिकार्ई । भूपति
 के मन कछू न आई ॥ मेरो कह्यो गुसाई कीजै । हनि
 कीचक को जग यश लीजै ॥ तुमहि अकृत कीचक दुःख
 दयो । पौरुष कहां तुम्हारो गयो ३३ (अर्जुन उवाच)
 जो भूपतिको आयसु पाऊं । तौ कीचकको मारि दिखाऊं ॥
 नृपकी कानि न तोरी जाय । तातैं कछू न करों उपाय ३४
 दोहा ॥ गई नकुल सहदेवपै बिलखि बदन वरनारि ॥
 अधिकार्ई तादुष्टकी सबविधि कहीविचारि ३५ (सुजानी
 उवाच) चौपाई ॥ कीचक बांह हमारी गही । तुममेंकहौ
 कहां पति रही ॥ मेरे जियको परिहसु सारो । क्योंनहिं
 अपने अरिको मारो ३६ (सहदेव-नकुल उवाच) सुनि
 सुनि तेरे बचन ये बाढ्यो क्रोध अपार ॥ मेट्यो जाइ न
 नृप बचन विनयो बारम्बार ३७ मारों कीचक क्षणक में
 भूपति आयसुपाइ ॥ करै अवज्ञा नारि अब कोकहि नरकै
 जाइ ३८ ॥ चौपाई ॥ मास एक तू और निवारि । तब
 सकिहैं कीचक को मारि ॥ इनहुं तैं त्रियभई निरास ।
 पहुंची भीमसेन के पास ॥ ३९ सजल नयन भरि आंसू
 डारे । मीडत नयन भरे रतनारे ॥ पवनपुत्र तब यह
 विधि जानी । बिलखी ठाढ़ी द्वार सुजानी ४० आयोद्वार
 लखी त्रियनैन । स्वासा लैलै कहैं न बैन ॥ बोलीबिलखि
 आंसुवनि मांह । कीचक दुष्ट गही मोबांह ४१ पंडुसुतन
 पै फिरी पुकारि । वे न गुहारि लगे कोउ चारि ॥ अब
 जो साईं तू सहिरैहैं । गहिसो दुष्ट मोहि लै जैहैं ४२

सवैया ॥ रोषचढ्यो बिषसो सब अंग लखी त्रियके मुख
 पै मलिनाई । बूझत उत्तर फेर न देत गरो भरिकै मुख
 बात न आई ॥ कीचक को सुनिता मुखनाम सुदौरि गई
 दृगमें अरुणार्द्र । देखतही विधिहों क्षणमें यह पैजु युधि-
 ष्ठिर भूप दुहाई ४३ पै हथि मोचु बुलाइ लई तिनस्यार
 बराइ कै सिंह सौ खेल्यो । दादुर धाइ जुर्यो अहिसों
 शुक पोत किधों बर बाज सोझेल्यो । मूषक युद्ध मंजा-
 रिहिसों पग पीलको चाहत गर्जम ठेल्यो । पर्योहै काल
 कराल सोई करजाय भुजंगम के मुख मेल्यो ४४ दोहा ॥
 काल सपर्पसों खल डर्यो काम लहरि अकुलाइ ॥ पूंछ
 मरोरी सिंहकी अब जीवत कितजाइ ४५ जो नहिंमारों
 क्षणकमें आवै कुंतिहि लाज । जोबैरी बल करिरहै जीवन
 कछू न काज ४६ (द्रौपद्युवाच) चौपाई ॥ तुम देखत
 सब पंचन मांह । दुश्शासन पकरी मो बांह ॥ दुर्योधन
 तब छीनेचीर । हुते अकृत तहँ पांचोवीर ४७ बिपिन
 जयद्रथ कलकै हरी । बांध्यो दुष्ट कानि नहिकरी ॥ दुख
 दै कीचक फार्यो चीर । ताते व्याकुल भयो शरीर ४८
 दोहा ॥ सभा मांझसुनि कीचकै भीमचल्यो अकुलाइ ॥
 अबहीं मारों दुष्टको अबको सकै बचाइ ४९ (द्रौपद्यु-
 वाच) अब न उतालव कीजिये जाने काल बचाइ ॥
 दुष्टहि मारों रैनमें रहै अखारे आइ ५० में सहेठतासों
 बदी आवै तहां निशंक ॥ ताहि तहां संहारियो करियो
 दया न अंक ५१ पूरौ मतौ सु कीजिये आवै जामें जी-
 ति ॥ नहीं उतावल कीजिये यहै स्यानकी रीति ५२ ॥

चौपाई ॥ भीमसेन तरुणी वपु कीनो । दृग अंजन शिर
सिंदुरदीनो ॥ पट भूषण आभरण सम्हारे । कटि किं-
किणि नूपुर झनकारे ५३ करि तरुणी वपु पहुंचे तहां
वही सहेठ अखारे जहां ॥ बैठि रह्यो तागृहमें जाय ॥
कीचक काल पहुंच्यो आय ॥ ५४ ॥ दोहा ॥ होनहारसो
नहिं मिटै भावी महा वलिष्ट ॥ कीचक मनसिज सिंधु
में बोल्यो बली अदिष्ट ५५ ॥ दोधकछंद ॥ रैनभयो
सुखकीचक पायो । बामसहेठ बदीतहं आयो ॥ देखि त्रिया
वपुयों हँसि भाख्यो । तू धनिहै अपनो प्रणराख्यो ५६
आवतही करता कहँ मैल्यो । मान कियो बहु बार न
ठेल्यो ॥ नेकजहीं बल कीचक कीनो । दुष्ट ढकेलि त्रिया
तब दीनो ५७ जानिगयो यहबाम न होई । है बरबीरन
में यह कोई ॥ तोकहँ मारि सुजानी लाऊं । जो न बधौं
द्विज दोषनि पाऊं ५८ ॥ सोरठा ॥ भिरे कोपि दोउबीर
लट पटात लोटत लिपटि । शूरसमर रणधीर भूधर
जनु भूतल भिरत ५९ ॥ चौपाई ॥ द्वे में हारि न कोऊ
मानै । कोपि अमित गति युद्धहिठानै ॥ अतिबल भीमसेन
तब कियो । मूढ़ उठाय पुहुमि ते लियो ६० पटक्यो भूमि
गरे पगदियो मारि सुदुष्ट प्राण बिनु कियो ॥ मांझ चौहटे
राख्यो जाय । जानैं नहिं पुरजन ये भाय ॥ एक बूंद कहुं
रुधिर न आयो । देखत सब जन विस्मय पायो ६१ दो-
हा ॥ मारि दुष्ट धरि चौहटे जियकी व्यथा नशाय ॥ अर्द्ध
रैन सुत पवनको निजथल पहुंच्यो आय ६२ जागे पुर
जन सदन सब प्रात भये नरनारि ॥ मृतक देखि कीचक

तबै सकै न कोउ बिचारि ६३ ॥ नगस्वरूपिनी छंद ॥
 नृपाल सुद्धि पायकै । गये तुरंत आयकै ॥ विलोकि भीति
 हवैरहे । न बैन जायँ तहँ कहै ६४ विलाप ताप सों तये ।
 अशेष शोक सोरये ॥ उपाव कौन ठानिये । कछू न बात
 जानिये ॥ ६५ ॥ दोधकछन्द ॥ बंधव की सुधि ताक्षण
 पाई । भूपति की तरुणी तहँ आई ॥ रोदन कै अतिही दुख
 ठाने । देखतभूप महा विलखाने ६६ (राजोवाच) कौन्यहिं
 कीचक शूर प्रहार्यो । जा संग युद्ध जुर्यो सोइ हार्यो ॥
 अंग नहीं छत श्रोणत आयो । भूलि रहे कछु शोध न पा-
 यो ६७ (रानीउवाच) दोहा ॥ रहै तुम्हारे गेह में जाहि
 सुजानी नाम ॥ गंधर्व रक्षक तासु के निशि दिन आठदु-
 याम ६८ कीचक अति आशक्त हवै गही सुजानी बाल ॥
 ताही दिनसों में लख्यो घेर्योहै यहि काल ६९ चौपाई ॥
 कीचक तिन गंधर्वनि हयो । काहू पास न राख्यो गयो ॥
 अबचलि ताकी किरिया कीजै । लै कुश ताहि तिलांजुलि
 दीजै ७० लखि कुतवालहि बोले राउ । परजा लोगनि
 बेगि बुलाउ ॥ लै कीचक को घाटहि जाउ । बिधिसों सब
 किरिया करवाउ ७१ ॥ गीतिकाछन्द ॥ कहै जैऋषि नीच
 लोगनि नाहिं अंग छुवाइये । वरण उत्तम होय जोई ताहि
 बेगि बुलाइये ॥ सुधिआई भूपको तबलै जयंत बुलायकै ।
 बारहैं एक राज आज्ञा तिहि दई तब टारिकै ७२ फेरि
 आयो पवनको सुत भूप तासों यों कहै । वचन मेरो मेटिकै
 कहु बेगि मूढ़ कहां रहै ॥ पांडुसुतकी कानि राखों क्रोधहवै
 कैसे हनो । तूतो रहै सन्मान सों बहु अनुज सरिवर हों

गनो ७३)जयंतउवाच) दोहा ॥ मार्यों कीचक में कहा
 कत कीजत है क्रोध ॥ मो दुख पायो बादि नृप अंतहि
 लीजै शोध ७४ भोजन भाजन छाड़िकै हों नहिं अंतहि
 जाउं ॥ मनसा वाचा कर्मना तुमको महा डराउं ७५ ॥ सो-
 रठा ॥ करी कृपा नरनाह यहिविधि कही जयन्त सों ॥
 लै कीचक को जाहु दूरि नगर ते कृतिकरौ ७६ (जयंतउ-
 वाच) बंधु कुटुंब जो होय सोई मृतकहि काढ़िहै ॥ कहा
 परी है मांहिं ऐसे कर्मन हों करों ७७ ॥ दोधकछन्द ॥
 भूपतिको फिरि आयसु पायो । यों नरनाथहि बैन सुनायो ॥
 जो अब भोजनको कछु पाऊं । लै कीचक को घाट सिधाऊं
 ७८ भोजन को भुवपाल मँगायो । बैठि जयंत तहां सब
 खायो ॥ रोवहिं कीचक के सब भाई । जेंवतसो नहिं नेक
 अघाई ७९ ॥ दोहा ॥ करि भोजन बलिवंड तब कीचक
 लयो उठाय ॥ दूरि नगर ते घाटपर मृतक उतार्यो
 जाय ८० बनउपवन द्रुम तोरिकै आनि धरे तिहिठौर ॥
 और शिखर बहु गिरिन के केतिक आने तौर ८१ इत
 कीचक के बन्धु सब पकरि द्रौपदी बाल ॥ जारन कीचक
 संगही लिये चले तिहिकाल ८२ ॥ चौपाई ॥ या हित
 मार्यो बन्धुहमारो । पकरि याहि वाके सँग जारो ॥ बर-
 जत पुरजनसों नहिं माने । कछु भय अपने चित्त न आने ॥
 पकरि ताहि लै पहुंचे तहां । कीचक मृतक परो है जहां ॥
 भरि भरि घट घृत केतिक आने । चन्दन के गुण कौन
 बखाने ८३ ॥ दोहा ॥ रुदन करति लखि द्रौपदी गृह तन
 चलयो जयन्त ॥ क्रोध बढ्यो अँग अङ्ग में देखत कर्म दु-

रन्त ८४ बसन उतारि धरे कटू भीम भयानक धाय ॥
 फूलि गात दूनो भयो उपमा कही न जाय ८५ कीच च-
 ढाई सकल अंग केश दये मुकराय ॥ कर लै तरुवर बज
 सम दई दिखाई आय ८६ देखि सकल भयभीत ह्वै
 भागिचले दिशिचारि ॥ एकौ कीचक के निकट रहे न नर
 अरु नारि ८७ ॥ चौपाई ॥ कीचक भागे तब अकुलाय ।
 यह गंधर्व पहंच्यो आय ॥ भीम बटोरि बीर सब लये ।
 सुर जनु बज्र धाय गिरि हये ८८ ॥ सवैया ॥ अंगन अंगन
 कीच लपेटि कै केश बड़े चहुंघा मुकराये । भेष भयानक
 देखि सबै नरह्वै भयभीत दिशान को धाये । हांकि हने
 द्रुम बज्र के धाय महीधर कीचक भूमि मिलाये । कोपि
 निशङ्कह्वै अंकभरे सुसकेलि सकेलि चितानि चढ़ाये ८९
 दोहा ॥ गये शेष नर भाजि कछु कहो भूप सों जाय ॥
 कर तरुवर गन्धर्व लै तिहि थल पहंच्यो आय ९० ॥ त्रोट-
 कछन्द ॥ द्रुम धाय हने वर बीर किते । अवलोकि भजे
 नर शूर जिते ॥ नृप कीचक है तिहि ठाम सबै । सुधि
 लीजिय जू तहँ जाय अबै ९१ न कह्यो कछु संभ्रम भूलि
 रहे । मुखते कछु बैन न जाय कहे ॥ सब कीचक भीम
 जराय दये । तरुणी उर आनंद कोटि छये ९२ ॥ दोहा ॥
 गृह तन पठई द्रौपदी आपु गयो सर पास ॥ न्हाइ धोइ
 पहिरे बसन आयो आप अवास ९३ सरवर तट द्रुम
 डारिकै आयो भूप निकेत ॥ धाइ धाइ नरनारि सब
 बूझत करि करि हेत ९४ ॥ चौपाई ॥ हेजयंत कहिये
 सतभाई । को गंधर्व पहंच्यो आई ॥ ताके हाथ कहाँ हथि-

यार । सो सब बरणहु ताको सार ६६ (भीमसेनउवाच)
 दंडकच्छंद ॥ आयो बीर ऐसो कोउ गंधर्व अनैसो गिरि
 मंदरहै जैसो कौन बरनि बतावई । हाथमें तमाल काल-
 दंडते कराल बाहु देखिये विशाल महा काल काल
 गावई । भारे भारे कीचक सँहारे मेरे देखतही भाजेहु न
 बीर भाजि जान कोऊ पावई । मोहिं बुद्धि आई एक कंदरा
 में पाई देखो त्रिभुवन राई बिनु और को बचावई ६७
 दोहा ॥ नीचे ऊपर काठ दैदीने कीचक जारि । आयोबीर
 कराल तहँ जहां सुजानी नारि ६८ ॥ चौपाई ॥ ताकेकान
 माझ कछुकह्यो । हों निशंक तहँ बैठ्यो रह्यो ॥ देखत सो
 उठि गयो अकास । डारि गयो द्रुम सरवर पास ६९
 सुनि सुनि सबही अति भयमानी । देवी करिकै गनी
 सुजानी ॥ अरु गंधर्व भक्ति उर राखैं । निशि दिन नृप
 सेवा अभिलाषें १०० पांचौ बंधव कालहि पाई । भये
 एक थल सब जन आई ॥ हर्षे भीमसेन गुण गाइ । कोऊ
 भेद सकै नहिं पाइ १०१ इति श्रीमहाभारतपुराणे विजय
 मुक्तावल्यांकविच्छत्रसिंहविरचितायां कीचकबधवर्णनो नाम
 त्रयोविंशोऽध्यायः ॥ २३ ॥

चौपाई ॥ दुर्योधन नृप यह सुधि पाई । कीचक किहि
 मारे सौभाई ॥ सो उर उपजत यह संदेह । भीम कर्यो
 है कारज एह १ (दुर्योधनउवाच) तोमरच्छंद ॥ सुनिदूत
 तिहि थलजाउ । यह सुदिलै फिरआउ ॥ तब भूप आयसु
 पाइ । पहुंच्यो तहां सो जाइ २ लहि भेद बात बनाइ ।

तिन कही नृपसों आइ ॥ शत हने कीचकराइ । कछु भेद
 जानि न जाइ ३ नहि पांडु सुत तेहि ठाम । लहिये कहु
 नहिं नाम ॥ तब दूत विनयो एह । नृपके भयो संदेह ४
 दोहा ॥ भूपति करि संदेह मन बोले भीषम द्रोन ॥ पुर
 बिराट कीचक बधे कहिधों कारण कोन ५ (भीष्मउवाच)
 कीचक को संहारिहै भीम बिना को और ॥ किते द्विरद
 सम ताहिवल सुभटन को शिर मौर ६ (सुशर्माउवाच)
 भूपति और बिचार न कीजै । मोसँग सैन अबैकछुदीजै ॥
 जो हरिकै सुरभी हमलावैं । होहिं तहां सब पांडव धावैं
 ७ वे सुरभीन हरी सहि रहैं । लागि गुहारि तहां चलि
 ऐहैं ॥ भूपति संग चमू सब दीनी । बैगि विदा तिहि
 अवसर कीनी ८ ॥ त्रोटकछंद ॥ नर नाह चमू सबसाजि
 चले । चतुरंगबने सबसैन भले ॥ दिशिउत्तर आपु महीप
 गये । बनबीथिनमें सब पूरिलये ९ ॥ दोहा ॥ कोपिसुशर्मा
 तब गयो दिशिदक्षिण उताल ॥ तत्क्षणा नृपति बिराट
 के हरे धेनुके जाल १० ॥ भुजंगप्रयातछन्द ॥ किते ग्वाल
 बांधे सुशर्मा जहांते । किते जीव लैलै भगे हैं तहां
 ते ॥ किते आयकै भूपही पै पुकारे । किते धेनु के वृन्द
 लीनेतिहारे ११ चलो सैनलै बीरियों आपु भाखें । किधों
 आपही जाय के धेनु राखें ॥ तबै भूप शौचै कहा मन्त्र
 कीजै । रहै आपनो दांड सोबोलि दीजै १२ ॥ दोहा ॥ कीच-
 कको सुमिरे नृपति यह कहि बारंबार ॥ वा बिनु सुरभी
 बैडिये कोकहिलगे पुकार १३ हरुबै बोल्यो भूप तब
 सेनपलानो जाइ ॥ धाय सुशर्मा वीरते सुरभीलेहु छड़ाइ

१४ ॥ नगस्वरूपिणी छंद ॥ नरेश साजिकै चले । अनेक
 शूरलै भले ॥ कुरंगज्यों तुरंगहैं । करी समूह संगहैं १५ महा
 कराल क्रोधमें । चले सुधेनु शोधमें ॥ न अस्त्रसों कहूं मुरें ।
 सुवर्मलै तहां जरें १६ ॥ दोहा ॥ विजय विहन्नल गृहरह्यो
 पांडुपुत्रतेचारि ॥ देखत कौतुक युद्धको सकैन कोऊ हारि १७
 चौपाई ॥ तबरण सुभट सुशर्मा कोप्यो । भूपविराट नहीं
 पग रोप्यो ॥ भागत जानि बांधिरथ धर्यो । लै कहिताहि
 पयानो कर्यो १८ ॥ दोहा ॥ सहदेव वपु ग्वाल को जै
 ऋषि को शिरनाइ ॥ टेरि सुशर्मा हाँक दै फेर्यो तत्क्षण
 जाइ १९ मत्तकरी दल तासु को अंकुश लै फिरि धाइ ॥
 फेर्यो बलकरि सिंह ज्यों गह्यो कोपि धसि जाइ २०
 चौपाई ॥ सबै सुशर्मा बलकरि हार्यो । पांडुपुत्रसो धरणि
 पछार्यो ॥ मल्ल युद्ध करि दल बिचरायो । छोरि बिरा-
 टहि दल में लायो २१ जै ऋषि को तिन माथो नायो ।
 ताकी सेना बहु सुख पायो ॥ लै सुरभी तन मन सुख
 पाइ । चले आप गृह को तब राइ २२ उत्तर दिशि दु-
 र्योधन राइ । बेड़ि लई सुरभी सुख पाइ ॥ करण दुशा-
 सन अरु भगदंत । किते यूथ लेचले तुरंत २३ ॥ दोहा ॥
 भागे ग्वाल पराय कै बहु बिधि करी पुकारि ॥ उत्तर
 क्योनि निश्चित हवै बैठ्यो सदन मझारि २४ ॥ छप्पै ॥
 दुर्योधन इक हरी हरी दुश्शासन बलकरि । एक करण
 कुल हरी कोप करि आगे धरि धरि ॥ हरी हरषि भग-
 दंत किती कपिला अरु धौरी । लक्ष्मण कुंवर कलिंग
 हरी केतिक इक ठौरी ॥ हरी द्रोण सुरभी किती क्योनि

श्रवण यह किज्जिये । सुनि उत्तर उत्तर दिशा सब तेरो
 धन लिज्जिये २४ ॥ चौपाई ॥ करत कुलाहल गिरि
 गिरि जात । दीरघ दीरघ स्वर कहि बात ॥ ऐसो धिक्
 है जगमें जिये । कहा कुंवर तू हारै हिये २५ (उत्तरउ-
 वाच) जोमेरे ढिग सारथि होतो । तौकहि कौरव को दल
 केतो ॥ ताबिनु कैसेकै रथ बाहों । पैड़ो यातैं नृप को चाहों
 २६ (द्रौपद्युवाच) ॥ दोहा ॥ द्रुपद सुता ये बचन
 सुनि अर्जुन सों हरषाइ । कही सकल युत साहसै इहि
 विधि कै अकुलाइ २७ ॥ सवैया ॥ क्षत्रिय युद्ध डराइ
 रहैं जग कर्म वृथा सब धर्म अकारथ । काज त्रिया द्विज
 गाइन के बरदेत अभैपद जीति कै भारथ ॥ तू सब बात
 डराइ रह्यो कत चाउन चित्त कहाइ कै पारथ । काहेते
 बैठि रह्यो हठि कै अब क्योंन करै उठि उत्तर स्वारथ
 २८ ॥ दोहा ॥ उत्तर सों तबहीं कही विजैविहन्नल
 बात ॥ क्योंन युद्ध की बात को हरषत है हठि गात ॥
 पारथ स्वारथ में कियो जानो रथ हों बाहि ॥ जहां होत
 हों सारथी कहों कहां डर ताहि ३० भयो विहन्नल
 सारथी रथ आरुह्य कुमार ॥ सजि कै दल लीनो घनो
 कोपि कस्यो करवार ३१ (उत्तरउवाच) ऐसोरथ अब
 हांकि तू तुरत तहां चलि जाउं । हनों सकल शत बंधुवे
 बचै न कौरव नाउं ३२ ॥ चौपाई ॥ तब सारथि वरुकरि
 रथ हांक्यो । औघट घाट न कानन ताक्यो ॥ कौरव दल
 लखि सिंधु समान । लखि उत्तर घट रहे न प्रान ३३
 गाजत सिंधुर अतिहय हींसत । मारै मार करत भट

दीसत ॥ उत्तर तब विनवै करजोरि । सारथि फिरि
 गृहतन रथ मोरि ३४ बारबार सो विनती करै । एकौ
 सारथि चित नहिं धरै ॥ रथतजि सो भाग्यो अकुलाइ ।
 धाय पार्थ पकर्यो सो जाइ ३५ बांधि धर्यो रथ
 ऊपर आइ । सनमुख चलयो सेन के धाइ ॥ तब गुरु
 द्रोणपार्थ पहिचान्यो । सबही सों यह बचन बखान्यो
 ३६ (द्रोणउवाच) ॥ सवैया ॥ बांधि रथी रथ आनि
 धर्यो जिहि आपनि शंक न शंक खरीसी । सायर संगम
 को अवगाहन आपु भुजा बल पैज करीसी ॥ बाण श-
 रासन शूरसजौ यह बानि भली कछुमैनहिं दीसी । पौन
 के गौनहुते अतिलाघव आवनि सूझति अर्जुनकीसी ३७
 दोहा ॥ उत्तरसों सारथि कही करि न कछू भव अंक ॥
 सकल निपातों अरि चमू रहिये आपनिशंक ३८ नगर
 निकट तरुवर समी तापर धनु अरुबाण ॥ आनिउताइल
 में निकट गंजों अरिदल प्राण ३९ ॥ दोधकछंद ॥ बैन सु-
 न्यो उठिउत्तर धायो । बेगिहि ताद्रुमके ढिगआयो ॥ लेतहि
 पन्नग सोदर देख्यो । संभ्रम चित्तमहा तिनलेख्यो ४०
 सारथि को फिरबैन सुनाये । व्याल भयेइषु मोकहँ धाये ॥
 यों सुनिकै तब सो उठि धायो । बाण शरासन लै त-
 हँआयो ४१ ॥ दोहा ॥ निर्गुण धनु गुणवंतकरि सूधे कीने
 वान ॥ काढी गंगा भूमिते धाये सकल कृपान ४२ पहिरि
 कवच शिरटोपदै करी धनुष टंकार ॥ हाँक्यो रथ बहु
 क्रोध करि पहुंच्यो कटक मझार ४३ बीरधनुर्वर धीरके
 उरमें कछू न शंक ॥ भट दुर्घटघट सब कटक करो महा

आतंक ४४ ॥ चौपाई ॥ बैल्यो आनिधुजा हनुमंत । जाके
 बलको कछू न अंत ॥ पूर्यो शंख धनुष टंकार्यो ॥ जीतन
 दुर्जनदलपगुधार्यो ४५ (उत्तरउवाच) मोसों कहिन बिहं-
 न्नल आन । सत्य कहो को आप निदान ॥ अद्भुत कर्म कछू
 कहतन आवै । महानिशंकयुद्धको धावै ४६ (अर्जुनउवाच)
 सुनिये उत्तर यह सतभाय । जैऋषि भूप युधिष्ठिर राया ॥
 हौं अर्जुन यह सुनो कुंवार । भीम जयंत तुम्हारो स्वार ॥
 ४६ सहदेव सुरभी राखत सैन । बाहक नकुल मनोमहि
 मैत ४७ ॥ दोहा ॥ वह रानी है द्रौपदी जाहिसुजानी नाम
 कछून भय चित कीजिये जीतों सब संग्राम ४८ हमहीं
 लागि सुरभी हरी लेत हमारो शोध ॥ अब सुनि बीती अव-
 धिसों तबमें कीनों क्रोध ४९ फिर उत्तर लाग्यो चरण
 सुनिसोई सतभाय ॥ दशों नाम अपने कहौ तौ मो मन प-
 ति आय ५० (अर्जुनउवाच) जन्मोको हरवृक्षतन अर्जुन
 पायो नाम ॥ सितवाहन अरु फालगुन कृष्ण जिष्णु उर
 जाम ५१ विजय किरीटी नाम भी और विभत्सुहि जानि ॥
 सव्यसांची अरु धनंजय ये दश नाम बखानि ५२ ॥ चौपाई ॥
 भीमसेन सब कीचक मारे । लख अपराधी ते संहारे ॥
 मार्यो मल्ल द्विरद गहिलायो । तेरे गृह हम बहु सुख पा-
 यो ५३ तेरी आय बिपति हम टारी । बरस दिवस की
 अवधि निवारी ॥ द्वादश बरसैं बनमें रहे । तुम क्लायामें
 अति सुख लहे ५४ (उत्तरउवाच) हलकी भारी जो हम
 कही । समरथ आपनु सो सब सही ॥ जो कछु हमते भो
 अपराधु । सो सब क्षमियो आपनु साधु ५५ ॥ दोहा ॥ वीर

धनंजय क्रोधकरि चलयो सबलरथ हांकि ॥ अति बलपरे
तुरंग तब श्रमित रहेतहँ थांकि ५६ तेजदयो गंधर्व तब
फिरि बलभरे तुरंग ॥ कही द्रोणगुरु पार्थसों क्योंकरै
रणरंग ५७ (द्रोणउवाच) सबैया ॥ आयो धनुर्द्धर
धीरबली सुकहौ रण सन्मुख को अबरैहै । युद्ध जुर्यो
नहिं नेकहु सो यम खाइगयो मुख त्योंदल खैहै । याही
ते शोच बढ्यो उर अन्तर को कहिधौं बर बाणि निसैहै ।
कोटि उपाय करोतुम पारथ जीत्यो न जैहै न जैहै न जैहै ॥
सोरठा ॥ बीरालयो कलिंग जीतन पारथ बीरको ॥ कि-
यो कोटिरण रंग अचल मेरुसो धरपर्यो ५८ ॥ दोहा ॥
पार्थ सहस दश बाणसों हन्यो कोपिकै बीर ॥ मूर्छित
गिर्यो कलिंग रण धरि न सकत दलधीर ६० जबकलिं-
ग मूर्छित गिर्यो तब विकर्ण रण गाजि ॥ कोपि शरासन
बाणलै आयो सन्मुख साजि ६१ ॥ नाराचकुंद ॥ तबै
विकर्ण बाणतीस पार्थके हिये दये । विशेष बाण वृष्टि
सों सलोप सूर हवैगये । नजानिये निशान द्यौस अंध-
कारसों छये । सरोष पांडु पुत्रहवै कृपान कोपिकै लये ६२
दोहा ॥ तब विकर्ण चालीस शर हनेकोपि बलबंड ॥
कोटि बाण नभ छायेकै संग्रमकियो अखंड ६३ तब वि-
कर्ण साहस सहित भूमि गिर्यो मुरझाय ॥ निरखि करण
बरबीर तब लीनो धनुष चढ़ाय ६४ रण अर्जुनके नेकहुं
सहिन सकयोसो बान ॥ रण मंडल तजिसो भज्यो रवि
सुततेज निधान ६५ ॥ चौपाई ॥ देखेकरण महाबल हारे ।
दुःशासन भगदंत सम्हारे ॥ दुर्योधन शत बंधव धाये ।

चहुंदिशि घेरि पार्थको आये ६६ ॥ सुंदरीकुंद ॥ नीरदघेरि
 रहे गिरिको जनु । योंचहुं ओरनि तैं भट अर्जुन ॥ कोपित
 बीर घने शर डारत । इक लैलै गिरिके गन मारत ६७
 लैकर बाणनि पार्थ उठ्यो तब । मारि भगाय दये बलकै
 सब ॥ भागत शर नहाँफिरि हेरत । तेरणभूमि धिरेनहिं
 घेरत ६८ ॥ सर्वैया ॥ घोरघने घनसे घुमड़े उमड़े दलदी-
 रघ दीसन लागे । चामरसे धुरवाधरधार ध्वजा चलदामि-
 नि कीद्युति जागे ॥ बुंदनिसे बँधैं शरजाल सुबीर सबै
 रसबीरसों पागे । पौन ज्यों पत्थर उड़ाये दये भहरायके
 नीरदसे भट भागे ६९ अक्षय तूनते एक कढ़े शर देखत
 ही लखिये करऐसो । आवतही मृग यूथनि ऊपर कोपि
 उठ्यो सुतकेहरि कैसो ॥ सेही करै भटबोधि सबै तिन
 और कियो वर विक्रम ऐसो । काटिदये ध्वज बैरख चौंर
 बिछाइदयो कदली बन जैसो ७० ॥ भुजंगप्रयात्कुंद ॥
 जबै पार्थके क्रोधसों बाण कूटे । किते सैनके जूहके शीश
 टूटे ॥ गयेभागिकै एक पीछे न चाहैं । कटैंकते जानु जंघा
 न बाहैं ७१ महा क्रोध कैकै धनैबाण साधैं । सशोकै कि-
 ते बीरके यूथवाधैं ॥ कुठ्यो मोहिनी बाणसो सर्व मोहैं ।
 कहाँलों बखानों नमोहैं सुकोहैं ७२ ॥ चौपाई मोहिरह्यो
 दल संभ्रम छाइ । एक नमोहे भीषम राइ ॥ उत्तर पठ्यो
 तबै प्रचारि । पटभूषण सबलाउ उतारि ७३ ॥ गीतिकाकुंद ॥
 शीशभूषण सेनके नृप आदिदै सबके हरे । आनिकै तिहि
 बार उत्तर पार्थके आगेधरे ॥ जागिकै कुरुराज लज्जित
 बाण धनु करगहि लियो । धाय भीषम बरजि राख्यो

प्रगट तासों योंकियो ७४ एकपार्थ अनेक जानो युद्धजी-
त नहींसको । लाजह्वैहै बीर भागत चित्तमें यह नात-
को ॥ विकलह्वै विलखात विथक्यों कछूनहिं मुखते कहै ।
व्याल ज्योंलै श्वास दीरघ बचन घनसे उर सहै ७५
दोहा ॥ भीषम आयसु मानिकै दललै चलयो अवास ।
धावन धाइगयो तबै नृप बिराट के पास ७६ (दूतउवाच)
जीतीउत्तर अरिचम कौरवगये पराइ । सुत सपत कीनी
विजय भाग तिहारै राइ ७७ ॥ चौपाई ॥ भूपति खेलत
पांसे सारि । संग लिये जैऋषि सुखकारि ॥ हरष्यो
सुतकी कीरति गावै । सब जन मन आनन्द बढ़ावै ७८
(जैऋषिरुवाच) दो० ॥ विजय ब्रिहन्नल जिहि कटक सो
कत जीत्योंजाय ॥ युद्धजुरें संग्राम थल यमहूं देइ भगाय
७९ ॥ चौ० ॥ इतनी सुनत भूष परजर्यो । रातेदृग करि बहु
रिसभर्यो ॥ ततछिन नहिनरनाथ बिराट । पांसेजैऋषि
हयेलिलाट ८० ॥ कूट्यो रुधिर द्रौपदीधाई । अंजल में तिन
लीनो जाई ॥ निरखि भूप उर चिन्तामानी । क्योंन क-
है यह भेद सुजानी ८१ (सुजानीउवाच) भूतल रुधिर
परे जो एह । द्वादश वर्षन वर्षे मेह ॥ यों कहिकै भूपति
समझायो । भीमसेनके उर दुखआयो ८२ ॥ दोहा ॥ क्रोध
भयो लखि भीमउर धर्मपुत्रदै सैन ॥ बरज्यो केहरि क्षुधि-
त ज्यों युक्तकछू यहसैन ८३ ॥ दोधकछंद ॥ उत्तर गृह
तबहीं चलिआयो । भूपति को यह बैन सुनायो ॥ आजु
ब्रिहन्नलही दल जीत्यों । कौरवको बहुधा बलरीत्यों ८४
शूर भगाइ दये सबरेयों । पौन विडारत मेघ घनेज्यों ॥

मौनहि भूपति काम सिधायो । उत्तर भीतर बोलि पठायो
 ८५ युद्धकथा शवरी सुनिलीनी ॥ सारथिकी शर जाल
 प्रवीनी ॥ अर्जुनहै जिहि कौरव मारे । द्यौसइते इहिठाम
 निवारे ८६ ॥ दोहा ॥ धर्मपुत्र नरनाह सों अर्जुन बोल्यो
 बैन । जाने हम सब कौरवन अब कछु चिन्ता हैन ८७
 तेरह वर्ष द्यौसदश बीतगये इहिठाम । अब बैठो शिर
 कृत्रधरि गुप्तकरो कतनाम ८८ ॥ सवैया ॥ पाइकै त्रास अ-
 वास तजै बनबासजे दुःखन साधना साधी । भूखन प्यास
 उदास महागति योग के योगिनि की अवराधी ॥ नेकहु
 शोच सकोच कर्यो नहिंकानि सबै कुरुनन्दन वाधी ।
 आयसु दीजिये कोपि महीपति लेहिं भुजा बलसों भुव
 आधी ८९ ॥ दोहा ॥ प्रातहोत शिरकृत्र धरि धर्मपुत्र सुख
 पौइ ॥ दानदये कबि कृत्रकहि विप्रहि विप्र बुलाइ ९०
 बंधव चारों जोरिकरि ठाढ़ेभये सुजान । कारण सबही
 काजकै कीजैकाहि समान ९१ नाहिंन बाहन उपनह्यौ
 उत्तर सहित विराट ॥ नृपति युधिष्ठिर चरण पर राख्यो
 आनि लिलाट ९२ (विराटउवाच) सोरठा ॥ ढिठय भई
 जो होय सोक्षमिये करिकै कृपा । भूप बड़ेजे होय चूकन
 मानत जननकी ९३ ॥ चौपाई ॥ दोखे तुमपै सेवकराई । सो
 सब चूक कहिनहिं जाई ॥ ओछीपूरी मननहिं धरिये । ईश
 अनुग्रह हमपर करिये ९४ (युधिष्ठिरउवाच) दोहा ॥
 तुमसे तुमहिं न दूसरो जगमंडलमें आन ॥ विपति हमा-
 री सबहरी राखे पुत्र समान ९५ ॥ चौपाई ॥ तुम पटु तर
 को दीजैआन । सुरनर नाहीं अपने जान ॥ तुम हमको

विजयमुक्तावली ।

१२५

सब कीनी भली । तब कीरति सब भूतल चली ६६ नित
नितनेह दीसिहैनये । अबतुम भुजा हमारी भये ॥ जीतस-
मर सुरभीजे आनी । जितनी२ जाकी जानी ६७ तेसब
जाकी ताकोदीनी । सबकी बिदा महीपति कीनी ॥ दुर्यो-
धन संदेश पठायो । भूप युधिष्ठिरपै चलिआयो ६८ ॥ दोहा ॥
प्रगटे भीतर अवधि तुम फेरिकरौ बनबास ॥ मितिसों पूर-
ण कीजिये तब तुम करौ प्रकाश ६९ कहिसब विधि मल-
मासकी समझायो सोदूत ॥ समदिशही बैठ्योतहां ज्यों
सुरपुर पुरुदूत १०० इति श्रीमहाभारतपुराणे विजय
मुक्तावल्यां कविकृत्रसिंह विरचितायां अर्जुनविजयवर्णनो
नामचतुर्विंशोऽध्यायः ॥ २४ ॥

दोहा ॥ उत्तरसों कीनोमतो नृप विराट तिहिवार ॥
दुहितादीजै अर्जुनहि करिबिवाह शुभचार १ ॥ दोधकछंद ॥
अर्जुन ताको नृत्य सिखायो । द्यौसनिशा गुणता सुपठा-
यो ॥ ताकहँसो दुहिता अबदीजै । जियमें और बिचार न
कीजै २ योंकहिकै तिन दूतपठायो । अर्जुनको यह बैन
सुनायो ॥ तोहिंसुता नृप अपनी दीनी । हेतुबिवाह सबै
विधिकीनी ३ (अर्जुनउवाच) मैंदुहिता सम जानि पठा-
ई । लाजतुम्हें नहिं भाषत आई ॥ मोसुतको दुहिता
अब दीजै । आनँदसों सब कारज कीजै ॥ भूपतियों सुनिकै
सुखपायो । बूझि मधूरत मंगल गायो ॥ गावत आनँद
सों नरनारी । भूप युधिष्ठिर को सुखभारी ५ ॥ दोहा ॥
दूत द्वारका नगरको पठयो बहुसुख पाइ ॥ बार न लागी

बाटमें कही कृष्णसों जाय (दूत उवाच) दंडकछंद ॥ दीनन
 केनेहसो न डोलतहौ गहेगहे द्रौपदीकी लाज बहेऐसी
 कोन बाततौ । तात मात पास प्रहलाद हवै निराश रहे
 जौन होती तेरी आश त्रास कैसे सहतौ ॥ ओकछाड़ि
 आपनो सुलोक कियो लोक लोक कौन भांति थिर थोक
 ध्रुवलोक लहतौ । त्रिभुवन राय जोपै होते न सहाय आ-
 पु कैसे कै धौं मेरो काज और लों निबहतौ ७ ॥ दोहा ॥
 करि आये हौ करत हौ करियो सदा सहाइ ॥ सहित मातु
 अभिमन्यु लै आपु पट्टंच्यो आइ ८ चले कृष्ण भगिनी
 सहित लै अभिमन्यु हि साथ ॥ चले तुरत सुख पाइकै
 धर्मसुवन नरनाथ ९ मिलि कै शारंग पाणि को लै आये
 निजगेह ॥ अस्तुति वंदन युत करी मन बच क्रम करि नेह
 १० (युधिष्ठिर उवाच) ॥ छन्द ॥ श्री यदुनन्दन मुनि
 जन वंदन । कल्मष हर सब दुष्ट निकंदन ॥ जग तारण
 वक बदन विदारण । दुख दारण गजराज उधारण ११
 जग पावन संतन मन भावन । ब्रज छावन गिरिवर नख
 लावन ॥ जन मन रंजन भव भय भंजन । दनुजन मर्दन
 भव धनु गंजन १२ कंस विनाशन प्रभु गरुडासन ।
 यदुवंशी अवतंस प्रकाशन ॥ असुर निवारण मुनि जन
 पारण । कुंजविहारण गनिका तारण १३ जगधर नग
 धर पीतांबर धर । हरि दामोदर हलधर सोदर ॥ सिंधु
 सुता वर श्रीराधावर । नरकनि हर वर रदन धरणिधर
 १४ जनकसुता भूषणभुव भूषण । सुर रिपुदूषण तल तल
 पूषण ॥ भक्तन हितकारी हरि निशि चारी । भक्ति ति-

हारी सब भयहारी १५ ॥ दोहा ॥ करि अस्तुति श्री-
 कृष्ण की भूपति पुनि शिर नाइ ॥ नगर कंपिला द्रुपद
 गृह दीनो दूत पठाइ १६ ॥ चौपाई ॥ सुनत संदेशो फू-
 ल्यो हियो । भूपति द्रुपद पयानो कियो ॥ गजरथ वाहन
 तुरी तुषार । सब दल युत साहन भंडार १७ पंचाली सुत
 पांचौ साथ । पहुंचे पुर विराट नरनाथ ॥ विदुर गेह तें
 कुंती आई । मिली सुतन अति आनंद छाई १८ द्रुपद
 सुता ताके पद वंदे । सब विधि कै सब जन आनंदे ॥ बन
 तें चली घरू का आयो । मायावी माया मग छायो १९
 नगर राज गिरि तें चलि आयो । दुरासंघ भूपति मन
 भायो ॥ धर्मपुत्र सुरराज समान । विबुध अनुज सब
 बुद्धि निधान २० ॥ दोहा ॥ शुभ घटिका शुभ लग्नगनि
 शुभवासरहि सुधाइ ॥ रच्यो ब्याह अभिमन्यु को
 मंगल चार कराइ २१ दोऊ कुल की रीति ज्यों करि
 बिवाह सुख दानि ॥ बाजीगज रथ छत्र कहि दीनो आनंद
 मानि २२ ॥ सुंदरीछन्द ॥ भाट भले बिरदावलि गावत ।
 सिंधुर बाजिन के गन पावत ॥ नृत्य गुनी जन नर्तन
 साजत । ताल परबावज साजत बाजत २३ को बरखौ
 सब आनंद संयुत ॥ वासरहू निशि कौतुक अद्भुत । भां-
 वरि पारत वेदनि उच्चरि ॥ द्वौ कुलकी ऋषि रीति तबै
 करि २४ ॥ दोहा ॥ दै सोवो समदी सुता हरषे भूप
 विराट ॥ धर्मपुत्र सुख पाय कै लसत अनंदित पाट २५
 (युधिष्ठिरउवाच) ॥ सोरठा ॥ सुनि अर्जुन गुणग्राम
 वेगि बुलावो मयसुतहि ॥ धवल सवारहु धाम खचि ख-

चि रचि रचि जाल मणि २६ ॥ त्रोटकछंद ॥ तब पार्थ
 मयासुर बोलि लयो । बहुभांतिन के सुख सदा ठयो ॥
 प्रति धामनि चित्र बिचित्र कर्यो । रंग रंगनिही गुरु
 बान ढर्यो ॥ अति दीसत सुंदर सेतअटा । इक नील
 बने जनु मेघ घटा ॥ उपमा कवि कौन बखानि कहैं ।
 निरखैं नर कौतुक भूलि रहैं २८ इक अद्भुत वाहिर शोभ
 सने । नृपके रहिवे कहँ धाम बने ॥ तहँ बैठत भूपति
 नित्य सभा । अमरावति मोहति देखि प्रभा २९ पुर
 अंतर धाम सुशोभगहैं । रनिवास जहां सब वाम रहैं ॥
 हय हींसत वारन गाजत हैं । निशि बासर दुंदुभि वा-
 जत हैं ३० भुव भूपसभा सुख साजत हैं । द्विज वृंद
 तहां बहु राजत हैं ॥ बहु भीर तहां दरबार रहैं । कहि
 को कवि ताहि बखानि कहैं ३१ इति श्रीमहाभारतपुराणे
 विजयमुक्तावल्यांकविच्छत्रसिंहविरचितायां अभिमन्यु बि-
 वाहवर्णनो नाम पंचविंशोऽध्यायः ॥ २५ ॥

(भुजंगप्रयातछंद) सोमवंश धर्मपुत्रशक्रसो सभालसौ
 चारिवंधु देवसे विलोकि दुःख सोनशैं ॥ अंजलीन जोरि
 जोरि कृष्णपै विनैकरी । शोधिकैं जहां तहां विपत्ति जीव
 कीहरी ॥ अर्द्धदेश पाइये बिचार आपसो करौ । ज्यों हरै
 अशेष शोकत्यों कलेश ये हरौ ॥ देशते निकारि अंध पुत्र
 कानि नाकरी । धाम ग्राम छीनिछीनि संपदा सबैहरी २
 दोहा ॥ करि आयेहौ करत हौ सेवक सदा सहाय ॥ करी
 वंदना कृष्णकी धर्म सुवन भुवराय ३ (युधिष्ठिरउवाच)

चौपईकुंद ॥ कच्छप बपु धरि साइ रथा हन । मत्स्य
रूप संखासुर दाहन ॥ वंदत सुनि जन सनक सनंदन
। जैजैजै तुम जै जगवंदन ४ शूकर रूप रदन धरनी
धर । बर हिरण्याक्ष पतित प्राणनि हर ॥ भूतल खल
दल दुष्ट निकंदन । जैजैजै तुम जै जगवंदन ५ नर हरि
बपु धरि भक्त सँवारण । हिरनाकुश नख उदर विदा-
रण ॥ कोटिक कष्ट हरण जग फंदन । जैजैजै तुम जै जग
वंदन ६ छल बल बलि पताल पठावन । बावन बपु धरि
भूतल आवन ॥ काटत सब माया दुख दंदन । जैजैजै
तुम जै जगवंदन ७ परशु पाणि छत्रिय मद नाशन ।
रघुकुल कमल दिनेश प्रकाशन ॥ रामचंद्र दशरथ नृप
नंदन । जैजैजै तुम जै जग वंदन ८ कंस कठोर असुर भय
कारी । केशी मर्दन अजिर बिहारी ॥ पीत बसन
तन चर्चित चंदन । जैजैजै तुम जै जग वंदन ९ बोध
स्वरूप पुहुमि पर धरिहौ । कल की हवै दुष्टनि संहरि
हौ ॥ वरणात विदित छत्र बहु बंदन ॥ जै जैजै तुम
जै जगवंदन १० ॥ दोहा ॥ विनय मानिकै करिकृपा
दुर्योधन पै जाउ समझाओ बहु विधिन कै बचै गोतको
घाउ ११ ॥ चौपाई ॥ विहँसि कृष्ण तबहीं उठिघाये ।
नगर हस्तिनापुर चलि आये ॥ सुनि कुरु नंदन अनुज
पठाये । सभामध्य श्रीकृष्णहिलाये १२ (श्रीकृष्ण उवाच)
धर्मपुत्र तुमपास पठाये । गोत बिरोधहि मेटन आये ॥
भूपति जगमें यह यशलीजै । आधोदेशबांटे कै दीजै १३
अपने कुलहि कलंक न लावौ । कलह गोत को भूप ब-

चावो ॥ दुर्योधन बोल्यो अकुलाई । कैसे सकों कलेश
 बचाई १४ देशवांछिजो उनको देहों । योगीह्वै कपाल कर
 लेहों ॥ भूमिवांछि कत मोपै पावैं । जोवे नभ भूतल फिरि
 आवैं १५ (श्रीकृष्ण उवाच) और भूमि भूपति जिनि देहु । पंच
 ग्राम दीजै करिनेहु ॥ तिल पथ नाग इंद्रपथ लीजै । अ-
 रुसुनि पथ पानीपथ दीजै १६ (दुर्योधन उवाच) ॥ दोहा ॥
 सचि अग्र जितनी कढै सो कबहूँ नहिं देहुं ॥ पीछे भुव
 वैईलहें प्रथम युद्ध करि लेहुं १७ ॥ चौपाई ॥ तुमहिं क-
 हत यह कैसे आवै । जीवत मोहिं को धरनी पावै ॥ सुनि
 मुनि वचन जरत है गात । जियत सुनै यह अद्भुत बात ८
 (श्रीकृष्ण उवाच) सवैया ॥ लोकमें शोक समूह बिनै अपलोक
 महा अपने शिरलेहौ । केलि सकेलि महादुख मेलिहौ
 यों यश पेलिकै अपयश पैहौ । उपायकै व्याधि न ली-
 जिये रायसु आयपरै ते हिये पछितैहौ । सुझिपरी यह
 कृष्ण कही तब आपु मही सब दैहौ जुदैहौ १८ कोपिकै
 लेइ गदाकर भीम सुपार्थ धनुर्धर वाण निवाहै । बंधु
 समेत तहाँ सहदेव सुसाइर संग्रम को अवगाहै । बैठि
 ध्वजा हनुमंतबली रणगाजि उठै यह तू मन चाहै । ऐ-
 सोइ भावतुहै जिय तोहिं सुजाने को तेरी कहा मनसाहै
 २० ॥ दोहा ॥ कृष्ण उठे ए वचन कहि तिनको यह
 समझाय ॥ भावी सोकैसे मिटै को कहिसकै बचाय २१
 नगर हस्तिनापुर तबै कुंती पहुंची आय ॥ समाचार श्री-
 कृष्णजू कहे सकल समुझाय २२ दुर्योधन मति परिहरी
 देतन पांचो ग्राम ॥ देवैको कहिका चली श्रवण सुनत

नहिं नाम २३ एकवात को भय भयो कर्णहि बाढ्यो गर्व ॥
 मारि लेहुं यह कहतु है जीतौ भारत सर्व २४ जाहु
 आपतुम कर्णपै लाउ अपने गेह ॥ कुशल होइ तुम सुतन
 को बाढ़ै अद्भुत नेह २५ कर्ण पास कुंती गई उन उठि
 बंदेपाइ । करि आदर आसन दयो बैठै सबसुख पाइ ॥
 (कुंत्युवाच) चौपाई ॥ जेठो सुत तू तेरौ राज । लेहु स-
 कल गृह चलिये आज ॥ हंस्यो करण माता मुख चाहि ।
 यह सब बात अबज्ञत आहि २७ तब तुम राज हमारो
 टार्यो । घालि मंजुषा जलमें डार्यो ॥ तन पोष्यो दु-
 र्योधन छांह । अबकत डारत नर कन मांह २८ (कुंत्यु-
 वाच) जो नचलो सुतकरिके नेहु । एक वात तो मांगेदेहु ॥
 मो पुत्रन को करिन प्रहार । यह सब करौ दया को सार
 २९ सुनिसुत मेरोवचन बिलास । पांच बाण जो तेरेपास ॥
 जननी को करिकै हित देहु । यामें जगत विदित यश
 लेहु ३० (कर्णउवाच) चारिपुत्र तुवहित परिहरों । एक
 पार्थ सों तोरण करों ॥ औरनि को नहिं घालों घाउ ।
 अब माता अपने गृह जाहु ३१ ॥ दोहा ॥ दीने पांचों
 बाणकर कुंती को तिहि काल ॥ बिदा करी पग बंदिकै
 तबै कर्ण भुवपाल ३२ ॥ चौपाई ॥ यहसुनि कुंती आई
 तहाँ । त्रिभुवननाथ कृष्णहै जहाँ ॥ कही कर्ण सो वरणि
 सुनाई । यहि विधिकै सब निशासिराई ॥ ३३ दोहा ॥ प्रात
 होत श्रीकृष्णजी दुर्योधन के पास ॥ गये फेरिहित संधिके
 छत्र सुबुद्धि अवास ३४ (श्रीकृष्णउवाच) कह्यो हमारो
 कीजिये पंचग्राम किन लेहु ॥ बंधु एकसौ पांच सौ निशि

दिन बढ़ै सनेहु ३५॥ (दुर्योधन उवाच) नित उठि उसले
 सालहरि कतहिं सलावत आनि ॥ करों अपांडव भूमिसब
 करों न कुलकी कानि ३६ (श्रीकृष्ण उवाच) ॥ सवैया ॥
 कोपि कोपि भीम भुजा रोपि रोपि रण मांझ ओपिओ-
 पि मुख गदा लीने गल गाजि है । रोष हिये आनि
 आनि क्रोध धनु तानि तानि लैकै पार्थ पानि धनुबाण
 सूधो साधि है ॥ अश्विनी कुमार के कुमार नीकी हांक
 सुने धीर न धरोगे बल पौरुष सो भाजि है । गर्वही
 आरूढ़ मंत्र मूढ़ तू न जानै कछू चेति है तू मूढ़ जब आय
 मूढ़ बाजि है ३७ ॥ दोहा ॥ यह सुनि शकुनि सरोष
 ह्वै कही नृपति सों जाय ॥ कहा कानि याकी करों वां-
 धिलेहु सुख पाइ ३८ सब मिलिकै चाहत कियो बनै
 नहीं कछु बात ॥ बिलखे भीषम बिदुर तब बिह्वल ह्वै
 गयो गात ३९ ॥ चौपाई ॥ भीषम बिदुर बिलोकत जानि ॥
 बदन पसार्यो सारंग पानि ॥ मुख भीतर देख्यो ब्रह्म-
 ण्ड ॥ संभ्रम पायो चित्त अखंड ४० ॥ छप्पै ॥ देख्यो
 गगन सु सूर्य चंद्र तारागन देखे ॥ देखी पहुमिसु नीर
 भूरि भूधर सु विशेषे ॥ देखे सरिता सलिल सिंधु सर-
 वर जल संयुत ॥ देखे तरुवर बिपिन सघन द्रुम उप-
 वन अद्भुत ॥ मृगराज भक्तमातंग लखि अवलोकै ऋषि
 राज गन ॥ भ्रम भूलि बिदुर भीषमरहे शिथिल बिकल
 ह्वै सकलतन ४१ (भीषम उवाच) खल दुर्योधन मर्म
 न जानत ॥ सिख त्रिभुवन पति की नहिं मानत ॥
 भूल्यो मूरख नृपता गर्व ॥ कुल के कर्म तजे ति-

न सर्व्व ४२ ह्वै है सो जु रची करतार । भीषम कहत
बारही बार ॥ चले कृष्ण नृप को समझाइ । पहुंचे धर्म-
पुत्र पै जाइ ४३ (श्रीकृष्णउवाच) सूक्ष्म महि तुमको
नहिं देत । उद्यम लीनो भारत हेत ॥ विना युद्ध वह
कछू न देहै । जो रण जीतै सो भुव लेहै ४४ ॥ इति श्रीम-
हाभारतपुराणे विजयमुक्तावल्यां कविकृत्रसिंहविरचिता-
यां श्रीकृष्ण दुर्योधनसंवादो नाम षड्विंशोऽध्यायः ॥ २६ ॥

अथ उद्योगपर्व्व कथनं ॥

सुंदरीछन्द ॥ बैठि सभासुत धर्म मही पति । बोलि
लये तहँ कृष्ण महामति ॥ बंधव चारि विराजत ताथल
कौन बखानि कहै तिनके बल १ (राजोवाच) चौपाई ॥
युद्ध बचै हरि सो कछुकीजै । भूतल में बहुधा यश लीजै
मोहि महा उरमें डरु आवत । बिग्रह हौं निशि द्योस
बचावत २ ॥ दोहा ॥ बनिआई सबके मतै लीने द्रुपद
बुलाइ ॥ संधि काज कुरुराज पै दीने तुरत पठाइ ३
गये द्रुपद नरनाह तब भूपति कौरव पास ॥ आदरकरि
आसन दयो बोल्यो वचन प्रकाश ४ (दुर्योधनउवाच)
गीतिकाछंद ॥ कौन हेत महीप आये सो कहौ समझाय
कै । पावन भये तुम दरश ते बहु सुख दीनो आयकै ॥
द्रुपद भूपति यों कह्यो जग में महा यश लीजिये । नृप
युधिष्ठिर को धरा नृप बांटि कै कछु दीजिये ५ नेह करि
कुल कलह नाशौ लैहु तिनहि बुलाय कै । सब आपनी

मर्याद सों रहिहैं सदा सुख पायकै ॥ लगी शरसी बात
 यह सो चित्त नहिं कछु लावही । कहत बिनु रण कौन
 मोपै भूमि रंचक पावही ६ को युधिष्ठिर भीम को है व-
 चन कौटि न पावही । तौ न छांडों वरुण सुरपति आप
 आय बचावही ॥ द्रुपद सुनि कै शीश ढोर्यो रची सोई
 ह्वै रहै । सो बचाई क्यों बचै झुकि क्रोध सों तब यों
 कहै ७ सवैया ॥ लोक में आप कछु अपलोक न लीजै
 न लीजै न लीजिये जू । चाहत भूमि युधिष्ठिर सूक्ष्म
 दीजिये दीजिये दीजिये जू । यों करिराज निकंटक आ-
 पन कीजिये कीजिये कीजिये जू । कृत्र महा हित कै तुम
 वैन पतीजिये पतीजिये पतीजिये जू ८ दीजिये पंच उने
 अब ग्राम नहीं नृप की नृपता घटि जैहै । बैठि रहै ति-
 नमें अब जाय युधिष्ठिर आप महा सुख पैहै । जानि अ-
 जान प्रमाण के मान कि भूमि अब अपने बल लैहै ।
 बाण कि धारमें स्यो परवारहितोहिं बहाइ धनंजय दैहै ९
 दोहा ॥ फिरि आये तब द्रुपद नृप नृपतियुधिष्ठिरपास ॥
 दुर्योधन की कुमति के कीने वचन प्रकाश १० (द्रुपद-
 उवाच) बुधिकै कै बहु चातुरी अरु कैकै उनमान ॥ सम-
 ज्ञायो समझै नहीं करि देखे सब स्वान ११ हरि विराट
 पठये तहीं नृपति तीसरीबार । समझाओ दुर्योधनै बाचै
 कलह अपार १२ ॥ चौपाई ॥ नृप विराटबहु बिधिकै कह्यो ।
 सूक्ष्मसी कछु दीजै मही ॥ वे संतुष्ट बैठि तहँ रहैं । फेरिकछु
 नहिं तुमसों कहैं १३ (दुर्योधन उवाच) दोहा ॥ ह्वै है कै
 जग बाबरो मांगत धरनी आय । हनौ पंडु सुत छिनक में

को अब सकै बचाय १४ हमसों राखौहेत तुममति भाषौ
 वै बैना जौलों जियमें जीवधर कहौन तिल भरिदैन १५
 (विराटउवाच) सबैथा ॥ आपु बराबहु गोत को घाउ
 उतै उनि बारही बार बराई । देन कहौ नहिं चारिक
 ग्राम कहा मतिधौं तुमको बनिआई । होनी जो होइ सो
 होइ रहै न मिटै यह भूपति में मति पाई । नीकीयो और
 बुरी बुधिको सबको करताहरता करताई १६ ॥ चौपाई ॥
 इन कहिबे में कछु न राखी । जो मुख आई ते सब भाखी ॥
 कहा कहै काहु के होई । होनी मैटिसकै नहिं कोई १७
 आयेनृप विराट उठि धाम । किये कृष्ण को अमित प्र-
 णाम ॥ कहेन मानत खल कछु बात । सुनि सुनि बैन
 जरत है गात १८ यह सुनि कृष्ण बिदा तब भयो । च-
 लिकै नगर द्वारका गयो ॥ नृपति युधिष्ठिर मन दुचिताई
 वाचत सूझी नहीं लराई १९ ॥ दोहा ॥ उत दुरयोधन
 अनुज युत कीनो चित्त बिचार । भीषम अरु आये विदुर
 बैठ्यो सब परिवार २० (दुर्योधनउवाच) भुजंग प्र-
 यातकंद ॥ बढ्यौ शोच तौ आपने चित्त कीजै । मतो होय
 पुरो पिता मोहिं दीजै ॥ सदा पंडु के पुत्र हैं साल मेरे ।
 तिन्हें नाशकै यत्न कीने घनेरे २१ कहौ मंत्र जो जासु
 के चित्त आवै । हितू होय सो हित्तही की बतावै ॥ गई
 तेरहों वर्ष यों सुख माहीं । रहै साल जाको सुजीवै वृथा-
 हीं २२ (विदुरउवाच) करो मंत्र सोई तुम्हें चित्त आवै ।
 हमारो कह्यौ क्यो हिये मांहि भावै ॥ तजौ विग्रह संग्रहौ
 बात ऐसी । सबै भूतली में कही वेद जैसी २३ (भीष्म-

उवाच) सर्वेषा ॥ एक सुनै नहिं भाषी अनेक सुटेक
 सबै है कुटेक की टेकी । ताको भलोन भयो कबहुं जिहि
 पैज तजी नहिं आपु कहे की । यों समझौ अपने मनमें
 हठ झूठ की नाहिं न बानि भलेकी । छांड़ि दई कुलकी
 करनी यह रीति लई हठिकै अबिवेकी २४ ॥ चौपाई ॥
 भुवपै रहत नदीसै कोई । अमर एक यश अपयश होई ॥
 हिरनाकुश अरु रावण गयो । यह धन नहिं काहू को
 भयो २५ कत अभिलाष तासु को कीजै । लोक बिलोक
 अलोकन लीजै ॥ हानिहोइ जीते अरु हारे । यम रहिहैं
 नित बदन पसारै ॥ २६ सुनत बचननहिं भूपहि भायो ।
 तब तिन नियरो शकुनि बुलायो ॥ सोई करो जु मंत्र
 विचारो । मोउरभावत बचनतिहारो २७ (शकुनिउवाच)
 मेरो मतौ महीपति कीजै । नगर विराट वेगि लै लीजै ॥
 जौलों उनकों नहीं सहाउ । लै सब सेना तिहि थल
 जाउ २८ पांचों बंधु न मारौ आज । सीझि जाय तौ स-
 गरौ काज ॥ उपजतही जो काटिय व्याधि । फिरिकत
 मारिय औषधि साधि २९ ॥ दोहा ॥ अंकुर निरखि क-
 रेछ को कपि तोरे तिहि काल । त्यों अपने अरि मेटिये
 कुटंब सहित भुवपाल ३० ॥ चौपाई ॥ सुनि मत मानि
 भूप दल साजा । सकल बुलाये भुव के राजा ॥ सिमटे
 दल पहुमी न समाय । द्वार भये सब गिरिवर जाय ३१
 आये सोम दत्त भुव राय । अरु भगदत्त सबल दल
 लाय ॥ तिनके दलकी संख्या नाहीं । रथहय हाथी गनेन
 जाहीं ३२ सेना सल्प छोहनी तीन । कोरथ वाजी गनै

करीन ॥ कर्ण महारथवंत पलान्यो । अगणित दल
 कलिंग तहँ आन्यो ३३ कोपि चढ्यौ रण आप सुशर्मा ।
 कौन गनै रण अद्भुत कर्मा ॥ दुर्योधन द्वारावति आये ।
 आवत श्रीहरि दर्शन पाये ३४ (दुर्योधन उवाच) करौ
 सहाय हमारौ आप । तौ जग में अति होय प्रताप ॥ दल
 सजि चलयौ हमारे साथ । बार बार विनवैं नरनाथ ३५
 (श्रीकृष्ण उवाच) दोहा ॥ मैतौ सब आयुध तजे अस्त्र
 गहौं नहिं हाथ ॥ कृतवर्मा यादव दयो दल युत ताके
 साथ ३६ यादवदल सजिकै चलयौ सुभट चमू चतुरंग ॥
 अस्त्र शस्त्र तनु त्राण कसि कसे चर्म सब अंग ३७
 तीन छोहनी शकुनिदल नीरद घोर समान ॥ चपला चं-
 चल चल ध्वजा धनुषहि धनुष बखान ३८ दल एका-
 दश छोहनी सिमिटि चलयो कुरुखेत ॥ महारथी अरु अति
 रथी बलकृत हैं रण हेत ३९ ॥ सवैया ॥ कोपि चलयो
 दुर्योधन को दल कोपि चले सब शूर बली हैं । कुंजर
 पुंजनि पायक जाल सुभार परै भुव भूरि हली हैं । छा-
 य रह्यौ तम लोपि दिवाकर लोपि गई सब व्योम थली
 हैं । बाजिन की खुर तारनि सों उठिकै धर धूरि अकाश
 चली हैं ४० (सुंदरीछंद) कुंजर पुंजनि पुंजनि सोहत
 लाल ध्वजा तिनपै मन मोहत । दीरघ शब्द महाधुनि
 गाजत । ज्यों तड़िता युत वारिद राजत ४१ हैयह चंचल
 कै खग खंजन । पौन कुरंगन की गति गंजन ॥ शंख घने
 बहु दुंदुभि बाजत । बंदि सबै बिरदावलि साजत ४२
 ॥ मधुमारछंद ॥ सुपर्वत चूरि । भये सब धूरि ॥ गये मि-

टि नीर । हुते जुगंभीर ४३ गये कुरुखेत । सजेरण हेत ॥
 पर्यो दल जाय । धरा न समाय ४४ ॥ दोहा ॥ इत
 दल साज्यो सबल अति नृपति युधिष्ठिर नाह ॥ चढ्यो
 बीर रस सबनि को सबही के उत्साह ४५ साज्यो बहु-
 रि विराट दल रथी अतिरथी शूर ॥ चलत द्विरद बाजी
 चपल फूटि होत गिरि चूर ४६ साज्यो द्रुपद विराट दल
 दुरासंघ सुख पाइ ॥ चले पंडुसुत साजि कै गर्जि नि-
 शान बजाइ ४७ अर्जुन समदे द्वारका त्रिभुवनपति के
 हेत । हमसों अरु कुल कौरवनि युद्धहोइ कुरु खेत ४८
 (अर्जुनउवाच) चौपाई ॥ हेरत बाट युधिष्ठिर राइ । चलि
 ये सांई करो सहाइ ॥ जैसे काज सदा करि आये । सोन
 कछू अब जात गनाये ४९ (श्रीकृष्णउवाच) दुर्योधन
 बहु दल लैगयो । तजे अस्त्र यह मैं पनु लयो ॥ जोजिय
 में यह भावै तोहिं । तौ अर्जुन लै चलिये मोहिं ५० (अ-
 र्जुनउवाच) दल दुर्योधन को सब दीजै । हम विनवैं
 सो परण कीजै ॥ आप चलौ नित दरशन पावैं । कल्म-
 ष और कलेश नशायैं ५१ ॥ दोहा ॥ आप हमारे पगु
 धरो दल कोऊ लै जाहु ॥ पार्थसाथ श्रीहरि चले जहां
 हुते नरनाहु ५२ ॥ चौपाई ॥ आवत धर्मपुत्र सुख पाये ।
 हरषि हरषि हरिके गुण गाये ॥ सिमिढ्यो सेन क्षोहिनी
 सात । उद्यत रणको प्रफुलित गात ५३ ॥ दोहा ॥ उम-
 ङ्यो घुमङ्यो जलद सों कीनो कटक पयान ॥ तड़ित
 पताका गरज घन गरजनि सिन्धुर जान ॥ सोरठा ॥
 चलि आये कुरुखेत जित तित दीसत घोरदल ॥ बलकत

भट रण हेत सजे कवच सेना हतन ५४ ॥ दोहा ॥ जुरि
 अष्टादश क्षोहिनी दोऊदल इकठौर ॥ महारथी अरु अ-
 तिरथी शूर सुभट शिरमौर ५५ अथ अक्षोहणी संख्या ॥
 दोहा ॥ एक द्विरद रथ एकहै तीन अश्व असवार ॥ जम
 ले दश संख्या कहे पायक पांच बिचार ५६ हाथी १
 रथ १ असवार ३ पयादे ५ जमले १० ॥ दोहा ॥ तीन
 पंक्ति को होय इक सेना मुख ता नाम ॥ अपने अपने बुद्धि
 बल समुझि लेय गुणग्राम ५७ हाथी ३ रथ ३ अस-
 वार ६ पयादे १५ जमले ३० इति सेनामुखता संख्या
 ताते तिगुनी गुल्म इक जानि जानि उर लेहु ॥ ताकी
 संख्या क्षत्रकवि बुधि बल सब करि देहु ५८ हाथी ६
 रथ ६ असवार २७ पयादे ४५ ॥ इति गुल्म संख्या ॥
 दोहा ॥ फेरि गुल्म तिगुनी करौ जो ककु संख्या होय ॥
 क्षत्र कहौ सो वाहिनी कहै जगत सब कोय ५९ हाथी २७
 रथ २७ असवार ८१ पयादे १३५ इति वाहिनी संख्या ॥
 दोहा ॥ कीजै तिगुणी वाहिनी ताही पृतना जानि । हय
 हाथी पायक रथी कहि कविकृत्र बखानि ६० हाथी ८१
 रथ ८१ असवार २४३ पयादे ४०५ इति पृतना संख्या ॥
 ताल पृतना जोरि कै एकचमू तब होय ॥ अपने अपने
 चित में समुझि लेहु सब कोय ६१ हाथी २४३ रथ २४३
 असवार ७२९ पयादे १२१५ इति चमू संख्या ॥ दोहा ॥
 एक चमू को जोरि कै तिगुणी करौ जो कोई ॥ क्षत्र सकल
 समझौ अबै अनीकिनी सो होइ ६२ हाथी ७२९ रथ
 ७२९ असवार २१८७ पयादे ३६४५ इति अनीकिनी

१४०

विजयमुक्तावली ।

संख्या ॥ दोहा ॥ अनीकिनी सेना सकल तिगुणी कीजे
ताहि । सोई संख्या क्षत्रकवि अनीकिनी दश आहि ६३
हाथी २१८७ रथ २१८७ असवार ६५६१ पयादे
१०६३५ इति दश अनीकिनी संख्या ॥ दोहा ॥ दशअनी-
किनी दश गुनी साजत पण्डित जानि ॥ ताही सों इक
छोहनी कहि कवि छत्र बखानि ६४ हाथी २१८७० रथ
२१८७० असवार ६५६१० पयादे १०६३५० इति अ-
क्षोहिणी संख्या दोहा ॥ जुरे अठारह क्षोहिनी कोकबिकहै
बखान ॥ छत्र सकल संख्याकही जानिलेहु सब जान ६५
हाथी ३६३६६० रथ ३६३६६० असवार ११८०६८०
पयादे १६६८३०० इति अष्टादशक्षोहिनी संख्या ॥ दोहा
दल एकादश क्षोहिनी कुरुनन्दन नरनाथ । भीषम अरु
भगदत्तनृप द्रोण कर्ण सब साथ ६६ हाथी २४०५७०
रथ २४०५७० असवार ७२१७१० पयादे १२०२८५०
इति कौरवदल की संख्या क्षोहिनी ११ ॥ दोहा ॥ सप्त
क्षोहिनी पंडुसुत राजत सेनसमाज ॥ द्रुपद विराटनरेश
तहँ शुभकारी वृजराज ६७ हाथी १५३०६० रथ
१५३०६० असवार ६५५६२७० पयादे ७६५४५०
इति श्री महाभारतपुराणे विजयमुक्तावल्यां कविछत्रसिंह
विरचितायां राजादुर्योधनयुधिष्ठिरकुरुक्षेत्रआगमनो नाम
सप्तविंशोऽध्यायः ॥ २७ ॥

दोहा ॥ कार्तिककी सितपक्षकी त्रयोदशी शुभजानि
सन्मुखदल दोऊजुरे फिरि तहँ कियो मिलान १॥ सुंदरी

छंद ॥ भानु गयो छिपिरैनि भईतब । अपनेठौर बिराजतहैं
 सब ॥ घोरघटा समसेन परीतहैं । बंदिसबै कुलके किलके
 जहैं २ हैचपला चलसी ध्वज सोहति । सो बिदिशानि-
 दिशा मन मोहति ॥ गाजत कुंजरज्यों घन गाजत । गोर
 मदायनसे घन राजत ३ नाद सजे सब ठाम गुणीजन ।
 बोलत ज्योंपिक चात्रक के गन ॥ घोरघने घनसों उमड्यो
 दल । द्वादशयोजन लोपिलियो थल ४ ॥ दोहा ॥ कार्तिक
 शुक्ल चतुर्दशी प्रातभयो सबजानि ॥ दुहूँ ओरके सेनतब
 ठाढ्यो भयो पलानि ५ बुधि पूरौ विक्रमबली साधु संत
 सुरज्ञान ॥ सुरसरिसुत दलपति कियो कुरनंदन बलवान
 ६ अमित पराक्रम मेरुसम सरबर कीजैताहि । सोनभार
 भीषमलथो समलज्जा उरजाहि ७ सुरसरिसुत दलपति
 कर्यो सुन्यौ पंडुसुत कान । बिलखि बदन दुचिते भये
 रहे न घटमें प्रान ८ ॥ चौपाई ॥ जब यह भीषम की सुधि
 पाई । जनेजने के मन दुचिताई ॥ त्रिभुवनपति अब रक्षा
 करिहैं । धर्मपुत्र के सब दुख हरिहैं ९ कृष्णहिपूछि मतो
 यह लीनो । धृष्टद्युम्न चमूपति कीनो ॥ महापराक्रम संयुत
 शरी ॥ रणमें जो बल विक्रम पूरौ १० ॥ दोहा ॥ लयों
 सैन आभार शिर हवैकै प्रफुलित गात । ताको साहस
 को कहै कहत न बनई बात ११ जुरिठाढ़े द्वै दलभये रज
 छाई असमान ॥ भई कृपासी द्यौसही भये कृपाकर भान
 १२ उतदलपति भीषमलखे कहतपार्थ भटराउ ॥ त्रिभु-
 वनपति यह युक्तिनहिं क्योंकरि घालौघाउ १३ ॥ नाराच
 छंद ॥ बिनयकरो सुरारिजू सुमानि चित लीजिये । तजे

कृपाण गोतघाउ कौनभांति कीजिये । विलोकिकै कुटुम्ब
 बंधु पुत्रमित्र कोगनै । अलोकहोइ लोकलोक युद्धमें तिन्हें
 हनै १४॥ दोहा ॥ इनभीषम कोटिक दुःखहरे । बहु
 भांतिन के प्रतिपाल करे ॥ तिनको क्यहि भांति हथ्यार
 सजौं । अपकीरति सों बहुचित्त लजौं १५ यहकाज नहीं
 हमते सरिहैं । नहिं सन्मुख बाण धर्यौ परिहैं । जब
 अर्जुन ये बहु बैन सजे । अरु आतुरहवै धनुबाण तजे १६
 (श्रीकृष्णउवाच) कहिक्यों यहकातर बुद्धिभई । शिशुता
 मनसे अजहूं न गई ॥ अब क्षत्रिय धर्म विचारि हिये ।
 नहिं पाप कछू अब युद्ध किये १७ ॥ दोहा ॥ समुझाये
 बहुज्ञानकथि भगवद्गीता गाइ । अमर एक भुव यशरहै
 कह्यौ कृष्ण समुझाइ १८ ॥ सबैया ॥ तेजधरा जलपौन
 अकाश मिलैकैविरंचि शरीररच्योहैं । क्रोधविशेष सलोभ
 सकाम सुगर्व समोह समूह रच्योहैं ॥ एक रहै जग में
 यश औयश कालबली पै न कोऊ बच्योहैं । बंधु कुटुम्ब
 त्रिया सुंतहेतहि लीनभयो बहुनाच नच्योहैं १९ ॥ दोहा ॥
 बदन पसार्यो कृष्णतब पार्थलख्यौ अकुलाइ ॥ देख्यो
 सब भारतभयो अद्भुत कह्योनजाइ २० (श्रीकृष्णउवाच)
 चौपाई ॥ कत अर्जुनत संशय करै । यहदल सबया थल
 संहरै ॥ यामें सब बचिहैं दशजने । और सकल तू जझे
 गने २१ मैं यह सब भारत करि राख्यौं । यह तीसों में
 यशहित भाख्यौं ॥ तेरो कर्यो कहा अब होई । करैकहा
 ताको अब कोई २२ अर्जुन को सुनि संशय गयो । लयो
 धनुष हरि आयसु दयो ॥ संभ्रम केवल कृष्ण भगायो ।

उठ्योबीरतिनकोशिरनायो २३ ॥ इति श्रीमहाभारतपुराणे
विजयमुक्तावल्यांकबिष्णुसिंहविरचितायां श्रीकृष्णभग-
वद्गीताज्ञानउपदेशवर्णनोनाम अष्टाविंशोऽध्यायः ॥ २८ ॥

अथ भीष्मपर्व कथनम् ॥

दोहा ॥ पंडुपुत्र कुरुराज रण कोपउठे दलदोइ । चर्म
बर्म तन त्रानकसि बलकत भट सब कोइ १ । दंडकछंद ॥
बीररसरसे सूरकवच संताहकसे कोपिकोपि यत्रतत्रपैज
युद्धकीलई । चूरिचूरि बननीर सोखिसोखि भूरिभूरि पूरि
पूरि व्योमधूरि द्यौसहीनिशाभई । थरथर कपिउठे भूतल
के थलथल धरधर कूरमकी छातीमें महाठई । पायक
अपारनिसों मत्तदंती भारनिसों बाजिखुरतारनिसों क्षिति
छारहवैगई २ (भीष्मउवाच) छप्पै ॥ छत्रीकुलहिकहाय
सकल कुलधर्म नशाऊं । पातकानि दैनिगम और द्विज
दोषनिपाऊं ॥ गुरुके बंचननिमेदि सर्वतीरथ ब्रतहारों ।
गुरुजन शासनभंग लोककी लीकहि टारों ॥ बहुलाज
होयनृप शांतनुहि बाणकृपाननि परिहरों । प्रतिद्योसदीह
दुर्घट सुभटसों जोन सहसदश संहरो ३ ॥ दोहा ॥ शूर
संहारों सहसदश दिनप्रति करि चितचाउ । नित्यकरो
जलपानतब इतनोंकरि भरिठाउ ४ ॥ चामरछंद ॥ ब्रह्मरुद्र
इन्द्रजु सहाय आय जोकरें । कोपि कोपि युद्ध बाण कोटि
कोटि जो धरें ॥ लोकपाल जो जरें तऊन पैज टारि हों
आजुते इतेक शूर नित्य नित्य मारि हों ५ पार्थसों जुरे
कराल युद्ध भौ महा घनों । लंकनाथ सों सकुद्ध रामचन्द्र

हैं मनौ ॥ गंगपुत्र अस्त्र शस्त्र बाण दृष्टि यों करै । सा-
 रथी रथी समेत ठाम ठाम संहारै ६ ॥ दोहा ॥ उत्तर झू-
 म्यौ प्रथमही करि बहुधा संग्राम ॥ एक अयुत भीषम
 हने गने न परई नाम ७ जूझे दोऊ सेनके रथी द्विरद र-
 ण मांझ ॥ भीषम पुजयो आपु ब्रत बहुरि ह्वै गई सांझ
 ८ रैनि भये सब शूरमा कियो न शर संधान । सजे सकल
 भट सेन के प्रात उगतही भान ९ मारु मारु दुहुदल
 भई उठे बीर रणगाजि । पायक रथी मतंग गण अरु
 जूझे बहु वाजि १० मंडलीक कीनो धनुष शर छाये
 आकाश ॥ ब्रत पाल्यो दश सहस हति करि सेना उर-
 त्राश ११ ॥ चौपाई ॥ दिन प्रति दश दश सहस संहारो
 रथी अति रथी गज रथ मारे ॥ मारग कृष्णा षष्ठी भई ॥
 पंडु पुत्र उर चिंता ठई १२ भीषम अगणित शूर संहारो
 पंडु पुत्र सबही हिय हारे । रह्यो युद्ध तहँ निशि ह्वै गई
 । पंडु सुतनि के उर मति भई १३ ॥ दोहा ॥ अर्द्धरैनि
 जबहीं गई आये भीषम पास । बहु विधिकै अस्तुति करी
 कीन्हें वचन प्रकास १४ ॥ दोधक छंद ॥ आजु पिता क-
 छु सोमति दीजै । जाविधि जीति सबै दल लीजै ॥ ज्यों
 कुरु नंदन को दल छीजै । आयसु देहु सुतौ अब कीजै
 १५ (भीष्मउवाच) ॥ छप्पै ॥ जौलग मोघट प्राण क-
 हौ को सरवर पावै । चिरंजीव कुरुराज ताहि पद ओछो
 आवै ॥ विजय करै को शूर मोहिं देखत रण माहीं । जो
 चितवै ब्रत राज तोहिंतौ अचरज नाहीं ॥ सुनि धर्म पुत्र
 सुखसीव यह सत्य मानि चित लीजिये १६ गीतिकाछंद ॥

अर्जुन भीम लख्यो तृणतूल । लई शक्ति जैसो शिव
 शूल ॥ रावण ज्यों लक्ष्मणपै कंडी । वरु करि इंद्र पूत
 तब खंडी १७ खंड करी द्वै बाणनि काटि । और लयो
 दल बाणनिपाटि ॥ तब भगदत्त सँहारो आप । जाको
 जग में बड़ो प्रताप १८ पांच बाण करमें तिनलये । तब
 अर्जुन के उरमें हये ॥ लागत उरमें सो पर जख्यो ।
 बिषम बाण तिन धनुपर धर्यो १९ ॥ दोहा ॥ झुकि
 कुंजरके शिरहयो डार्यो शशिबिदारि ॥ पार भायो शर
 बंधितन कर्यो फांक द्वै फारि २० कुंजर सबल फका
 कर्यो दाबि गह्यो भगदत्त ॥ गिरन न पावत भूमि में
 साजत यतन अनंत २१ जीत्यो चाहत पार्थ को पेलत
 बारंवार ॥ पग दे सकत न द्विरदसो अंकुश हने अपार २२
 सवैया ॥ दाबि गह्यो युग जानु में सिंधुर पौरुष को
 कवि कौन बखाने । युद्ध जरै न मुरै बर वीर सो भांति
 अनेकनि के रण ठाने । पेलत क्रोध किये भगदत्त न
 कुंजर नेकहु अंकुश माने । निर्द्वन की त्रिय आयसु ज्यों
 अपने पति की कछु चित न आने २३ ॥ दोहा ॥ युगुल
 जंघ में मृतक गज बार बार झक झोरि ॥ हार्यो दैदौ
 अंकुशै नहीं सकत अँग मोरि २४ बीते एक मुहूरते भू-
 मि गिर्यो गजराज ॥ प्यादो ह्वै भगदत्त तब धायोभट
 शिर ताज २५ ॥ सोरठा ॥ कोपि खड्गलै धाय क्रोधित
 अति राते नयन ॥ मघवा चढ्यो बजाय चपला असिबर
 जलद तन २६ ॥ दोहा ॥ दोशर लै दोऊ हनी तबहीं
 पारथ बाहु ॥ बिन भुज संमुख पार्थ के चलो बलीनर

नाहु २७ ॥ सोरठा ॥ पार्थ तीसरो बाण हन्यो शीश में
 क्रोधकरि ॥ मुरछि गिर्यो बलवान उठि अर्जुन संमुख
 चलयो २८ ॥ चौपाई ॥ तब सो पंच पैड़ चलिगयो ।
 अर्द्ध चंद्रलै अर्जुन हयो ॥ काढ्यो जानु जंघधर पर्यो ।
 यों भगदत्त भूप संहर्यो २९ हाहाकार कटक में भयो ।
 शूरन मन रबिसम आथयो ॥ कौरव नृपके दुख अति
 भारी । सुखकी सकल बासना जारी ३० ॥ दोहा ॥
 लीनो अर्जुन लाय उर भूप युधिष्ठिर आप ॥ आजुकरी
 संग्राम जय कीनो प्रगट प्रताप ३१ ॥ इति श्रीमहाभारत
 पुराणे विजयमुक्तावल्यां कबिच्छत्रसिंहबिरचितायां भगदत्त
 बधनवर्णनो नाम एकत्रिंशोऽध्यायः ॥ ३१ ॥

सुन्दरी छंद ॥ जूझि पर्यो भगदत्त लख्यो जब ।
 कौरव सोदर रोवत हैं सब ॥ शोच बढ्यो जियमें अति
 शोचत । नैननतें असुआ बहु मोचत १ बंदत हैं गुरु के
 नृप पायन । दीन भये बहु भाषत भायन ॥ आपनु हों
 सब कारज लायक । क्यों बिगरै जहँ होउ सहायक २
 आजुभयो तुमयुद्ध पराजय । वेरण जीतिगये सबनिर्भय ॥
 आपुबिचार कछू अबठानहु । होय विजयमतिसों उर आनहु ॥
 ३ ॥ दोहा ॥ राच्यौ चक्रव्यूह गुरु सुनि अवनपतिबैन ॥
 दुर्गम दीरघ दुसहता जान्यो कछूपरैन ४ (द्रोण उवाच)
 न्योतिपठावहु पंडुसुत आवहिरणको आज । कैजूझैकैजाहिं
 बन सीझिजायँ सब काज ५ ॥ त्रिभंगीछंद ॥ सुनि गुरु
 बानी सोशिखमानी उर आनीतब बुद्धियहै । तब दूत बुलायो

सो चलि आयो बेगिपठायो जाय कहै ॥ तब आयसु पायो
 तुरत सिधायो शीशनवायो भूपजहां । सोसबनि जुहार्यो
 लैबैठार्यो बंधवचार्योलसततहां६ (दूतउवाच) सोरठा ॥
 दीनो यह संदेश चक्रव्यूह राच्यो तहां ॥ रणहित चलहु
 नरेश कै तजि बिग्रह जाहु बन ७ (युधिष्ठिरउवाच)
 दोहा ॥ न्योति पठाये आयहैं कहौ जाय संदेश ॥ दूत
 समदि कीनौ तहां भूपति उर अंदेश ८ ॥ चौपाई ॥ जेते
 भटहैं यादल माहीं । चक्रव्यूह सो जानत नाहीं ॥ अर्जुन
 श्रीहरि संग सिधायो । तीरथ ते चलि सो नहिं आयो ९
 ताबिन युद्ध कौन यह करिहै । चक्रव्यूह बैठिकै लरिहै ॥
 अर्जुनबिन जानो दलहीनो । तातेन्योतो रणकोदीनो १०
 तीनोंबंधुन राजा बूझै । कहौ मंत्रजो जाकोसूझै ॥ जो यह
 युद्ध नहीं बनि आवै । राजपाट क्षिति को को पावै ११
 प्रथमहि भीमहि बूझै राजा । जोरण जीतों सीजैकाजा ॥
 सुनिकै उत्तर भूपहि दीनो । ऐसो सुन्यो न मै रणकीनो १२
 कृष्णै ॥ जुरै युद्ध गंधर्व सब्ब तिनको बल गारों । किन्नर
 नर अरु यक्ष सबल बल दल संहारों ॥ बजू पाणि जो
 बजू लेहिं तो चित न आनो । युद्ध करत दिन रैन नहीं
 हों कछू अधानो ॥ बहु शंक अंक नग पन्नगनिको मोसों
 सरवरि करै । सुनिभूप मोहिं यायुद्ध की सोन कछूबिधि
 जनि परै १३ ॥ दोहा ॥ बूझै नृप सहदेव तब जो यह
 जानहु युद्ध ॥ जीतिलिये हवै जायगो राजपाट सब शुद्ध
 १४ (सहदेवउवाच) जीतों दानव देवहों जुरै युद्ध जो
 आय ॥ पै बिधि चक्रव्यूहकी कछू न जानी जाय १५

(राजोवाच) करो नकुल संग्राम यह राखि कटक की
 लाज ॥ नातरु भूमि गई सबै रण कीनो विनुकाज १६
 (नकुलउवाच) । छप्पै आजु अमित संग्राम देवदानव
 सोमडों । जरै युद्ध जो आय काल दंडहु को दंडों ॥ सब
 अवनी पति जीति गर्व तिनके बर गंजों । सकल शत्रु
 संहारि बाहु बल सब दल भंजों ॥ सुनि भूप पाय तुव
 आयुमें होइतनो संग्राम करो । यह सौह मोहिं नृप पंडु
 की सो उलटि पहुमि ऊपर धरौ १७ ॥ दोहा ॥ देख्यो
 सुन्यो न कानहू चक्रव्यूह नरेश ॥ सोनयुद्ध कहूंमें कियो
 यह जियमें अदेश १८ ॥ चौपाई ॥ राजा बहु जियमें
 पछिताइ । क्यों जीत्यो अब संग्रमजाइ ॥ बिना पार्थबहु
 भयो अकाज । पहुमि नशाई बूढ्यो राज १९ सुर नर
 दल सब भीनहि डरें । ताहू ते कछु काज न सरें ॥
 सहदेव अरु नकुल बिचारि । तेऊ गये हिये अबहारि २०
 बैठ्यो भूपति नाये शीश । नहिं बोलत कोऊ अवनीश ॥
 चार्यो बंधव मनमें शोचैं ॥ मन पछितायँ नयनजल मोचैं
 २१ सकल कटक में बीत्यो त्रास । अंतहपुर सब पर्यो
 उपास ॥ यह सब साधु सुभद्रा सुन्यो । हिये शोच
 करि माथो धुन्यो २२ पति की सुरति चित्त में धरी ।
 नैननि जल देहीं थरहरी ॥ कृष्ण साथ चलि अर्जुन
 गयो । बहुर्यो नहीं कहा सो भयो २३ सुत अभिमन्यु
 गोद में पर्यो । माता नैननि अंश ढर्यो ॥ पर्यो पुत्र
 उरपै तिहि बार । चिला कीनी चौंकि कुमार २४
 (अभिमन्युरुवाच) दोहा ॥ कौनहेतु तुम मलिन हौ कहि

धोंसो समझाइ । या जगमें तो तैं सुखी औरन कोऊ आइ ॥
 २५ सवैया ॥ जेठ युधिष्ठिर भीमवली जहाँ हैं जगबंदन
 कृष्ण सोभाई । धीर धनुर्धर अर्जुनसो पति युद्ध जुरै यम-
 दूखमि खाई । है बिबि बंधु सहदेव सो देवर कीरति है
 सब भतल छाई । सो सम पुत्रहि पाय कै माय कहा
 कहिधों मुखपै मलिनाई २६ ॥ दोहा ॥ बरुण करन को
 या समय कहिधों कारण कौन ॥ काटूके उर त्रास नहिं
 संपति संयुत भौन २७ (सुभद्र उवाच) तुम पितु रणहित
 कृष्ण सँग गयो कसेतन त्राण ॥ आई सुधि नीकी नहीं
 कहौरहत क्यों प्रान २८ ॥ चौपाई ॥ भूपयुधिष्ठिर दुःख
 निदान । भोजन करें न खंड्यो पान ॥ तीनों अनुज रु-
 द्न बहु करें । बैननही मुख ते अनुसरें २९ नहीं पार्थ
 की सुधि कछु नीकी । यहै बात सुत है मोजीकी ॥ चलि
 अभिमन्यु भूप पै गयो । जाय सभा में ठाढ़ो भयो ३०
 बिलराख्यो सब परिवार विलोक्यो । नैननि ते जल
 रुकै नरोंक्यो ॥ माता बचन सत्यकैमान्यो । जूझ्यो अर्जुन
 निश्चय जान्यो ३१ ॥ दोहा ॥ उलटि चल्यो तब गंह
 को निरखि भीम तब धाय ॥ बिलख्यो देख्यो पार्थ सुत
 लीनो अंकलगाय ३२ (अभिमन्युरुवाच) क्यों भूपनि मन
 मलिन हो अरु दुचिते सब मौन ॥ हरष न काटू उर ल-
 ख्यो कहिये कारण कौन ३३ (भीमसेन उवाच) क्लृप्तकीनो
 इक द्रोण गुरु चक्रव्यूह बनाइ ॥ ताहित न्योतो युद्ध को
 दीनो यहाँ पठाइ ३४ कहि पठई कुरुराज नृप कैरण
 राख्यो आय ॥ कै तजिकै संग्राम थल रहौ बिपिनि में

जाय ३५ ॥ गीतिकाच्छंद ॥ नहीं हमसो समर जानें श्र-
 वणहूं न सुन्यों कहूं । देवपुर पाताल जीत्यों नहीं देख्यो
 सोतहूं ॥ और भूपन ताहि जानत पार्थको धोखो रह्यो ।
 सुनतही अभिमन्यु उठिकै पवन सुतसों यों कह्यो ३६
 यह काजहैं सब सारिहैं कह चित्तमें संशो कियो । जाय
 भूपति निकट तबहीं युद्ध हित बीरा लियो ॥ आजु कौरव
 कुल संहारों द्रोण कर्णहि संहरो ॥ हतोंवर दुश्शासन
 या समर की जयहों करो ३७ ॥ सवैया ॥ काहेको शो-
 चकरो जू इतौ यह काज कितौ अबहीं सब सारों । आजु
 हतो क्षणमें रणमें सब कौरव को कुल कोपि संहारों ॥
 देखतही दल द्रोण को दारि सुखग दवागिनि सों पर
 जारों । बाजि द्विरद गरद करों सब भीड़ि महा रथवंतनि
 मारों ३८ दोहा ॥ अद्भुत गति भूपति गनी लखि शिशु
 साहस धीर । सूरनि मनि केहरि कलित शील सिंधुसा
 बीर ३९ (राजावाच) नहिं गुरु ढिग बिद्या पढ़ी स-
 मर न देख्यो नैन ॥ करि साहस बीरा लयो जानी कछू
 परैन ४० मोहिं अचंभो पुत्र सुनि को तू दानव देव ॥
 गंधूब किन्नर यक्ष तू कहि सब अपनो भव ४१ (अभि-
 मन्युरुवाच) कृप्यै ॥ सेवक सोई धन्य स्वामि कारजमें
 शूरो । धन्य धन्य सोइ पुत्र मात पितु आयसु पूरो ॥ धन्य
 धन्य वह दास भंग नहिं शासन करई । धन्यधन्य सोइ
 शूर समर पग उलटि न धरई ॥ धनि बोलि सत्य कवि
 कृत्र कहि सुयश सकल जग लीजिये । बहु राज काज
 मन लाज धरि जन्म सुफल अब कीजिये ४२ ॥ दोहा ॥

नहीं भूप संशय करो शोच नशावहु चित ॥ करों विजय
भट सब हनों आजु रावरे हित ४३ इति श्रीमहाभारत
पुराणे विजयमुक्तावल्यांकविच्छत्रसिंहविरचितायांचक्रव्यू-
हरचनोनामद्वित्रिंशोऽध्यायः ॥ ३२ ॥

(युधिष्ठिरवाच) ॥ दोहा ॥ पढ्यो न गुरु ढिगैं कहूं
लख्यो न नैनन युद्ध ॥ क्यों कांध्यो तैं भार सुत सो
मोसों कहि शुद्ध १ (अभिमन्युरुवाच) सुनि नृप पूरब
जन्मकी कथा कहों समझाय ॥ मथुरापुर उत्तम अवनि
शोभा कही न जाय २ ॥ सुंदरीछंद ॥ भार भयो उपजे
बहु दानव । चैन नहीं बहुधा मुनि मानव ॥ होम घने
तप यज्ञ नशावत । होन नहीं वृत संयम पावत ३ भा-
रत विप्रनि देखि तपो थल । दीरघ दीरघ दानवके दल ॥
ह्वै बहु तैं बसुया जिय व्याकुल । जात भई तब ब्रह्म
पुरी थल ४ ता मुख बात सुनो जगबंदन । भूमि भये
तबही नंदनंदन ॥ भार उतारि दले दल दानव । ठावहि
ठाव थपे मुनि मानव ५ ॥ सवैया ॥ भूतल भार उतारन
को जग में अवतार मुरारि धर्यो । मारि बकी बग को
मुख फारि अघासुरको बल प्राणहर्यो । तोरि लये रद
धाय भुशुंडते कोपि करी जब आनि अर्यो । कंस को हंस
बिध्वंसि तहाँ सब दानव बंश निबंश कर्यो ६ ॥ चौपाई ॥
तब श्रीकृष्ण पैज उर धरी । सकल भूमि बिनु दानव
करी ॥ छोटे बड़े असुर जे भये । ते बर बिक्रम के सब
हये ७ मारे सब बहु त्रास दिखाई । मो माता तब बची

पराई ॥ गर्भवती पितु गृह सो गई । ऐसी गति बिधना
 निर्मई ८ ताके गर्भ जन्म में लयो । कछू ज्ञान तब मो
 उर भयो । खेलन जाउं शिशुन के संग । नाना बिधि
 सब राचत रंग ९ एक शिशु यों कहि गारी दई । सुनत
 मोहिं बहु लज्जा भई ॥ तब उन केहिन ज्ञातिन गोत
 तोहिं हनों तेरो को होत १० चलि तब माता पैहों आयो
 तबहीं सब वृत्तांत बतायो ॥ को कुलकौन पिता कहु माता ।
 कहा कुटुंब बंधुनिज भ्राता ११ (मात उवाच) पुत्र पिता
 को जो गति सुनिहो । बहु पछितैहो माथो धुनिहो ॥ कु-
 टुंब तुझारो श्रीहरि हन्यो । बालक वृद्ध तरुण नहिं ग-
 न्यो १२ ॥ दोहा ॥ कोऊ उबर्यो असुर नहिं पुरुष न
 कोऊ बाम ॥ कीनी अपु बश पुहुमि सब निर्भय मथुरा
 धाम १३ लाज भई यह बात सुनि क्रोध भयो बहु चित्त ॥
 सुनि पितुकी वैसी दशा कियो यतन ताहित १४ धूम धूँटि
 ह्वै ओंघमुख नींद भूख सब साधि ॥ तन मन सब एकांत
 करि शिवसों लगी समाधि १५ ॥ दंडक छंद ॥ नीचो राखि
 मूरध चरण किये ऊरधमें धूम धूँटि धूँटि तप कीनो त्रासना
 कछै । सूखि गई त्वचा सब आमिष बिलाय गयो श्रोण
 को सलिल चलयो केतिक बखानिचै ॥ एक चित्त साधि
 कै समाधि महा कष्ट साधि कीनो न बिराम कबहूँ न
 घटिकाहू द्वै । छत्र कहि शंभुनाथ भूतनाथ भवनाथ शं-
 कर प्रसन्न भये मोपर दयालु ह्वै १६ ॥ दोहा ॥ हौं प्र-
 सन्न तोसों भयो मांगु मांगु उत्ताल ॥ जो इच्छा तुम
 मन रहै सो पुरवउं इहिकाल १७ ॥ चौपाई ॥ तबमें तिन

अर्जुन भीम लख्यो तृणतूल । लई शक्ति जैसो शिव
 शूल ॥ रावण ज्यों लक्ष्मणपै छंडी । वरु करि इंद्र पूत
 तब खंडी १७ खंड करी द्वै बाणनि काटि । और लयो
 दल बाणनिपाटि ॥ तब भगदत्त सँहारो आप । जाको
 जग में बड़ो प्रताप १८ पांच बाण करमें तिनलये । तब
 अर्जुन के उरमें हये ॥ लागत उरमें सो पर जख्यो ।
 बिषम बाण तिन धनुपर धर्यो १९ ॥ दोहा ॥ झुकि
 कुंजरके शिरहयो डार्यो शीशबिदारि ॥ पार भायो शर
 बेधितन कर्यो फांक द्वै फारि २० कुंजर सबल फका
 कर्यो दाबि गह्यो भगदत्त ॥ गिरन न पावत भूमि में
 साजत यतन अनंत २१ जीत्यो चाहत पार्थ को पेलत
 बारंबार ॥ पग दे सकत न द्विरदसो अंकुश हने अपार २२
 सवैया ॥ दाबि गह्यो युग जानु में सिंधुर पौरुष को
 कवि कौन बखाने । युद्ध जुरै न मुरै बर बीर सो भांति
 अनेकनि के रण ठाने । पेलत क्रोध किये भगदत्त न
 कुंजर नेकहु अंकुश माने । निर्दन की त्रिय आयसु ज्यों
 अपने पति की कछु चित्त न आने २३ ॥ दोहा ॥ युगुल
 जंघ में मृतक गज बार बार झक झोरि ॥ हार्यो दैदौ
 अंकुशै नहीं सकत अँग मोरि २४ बीते एक मुहूरते भू-
 मि गिर्यो गजराज ॥ प्यादो ह्वै भगदत्त तब धायोभट
 शिर ताज २५ ॥ सोरठा ॥ कोपि खड्गलै धाय क्रोधित
 अति राते नयन ॥ मघवा चढ्यो बजाय चपला असिबर
 जलद तन २६ ॥ दोहा ॥ दोशर लै दोऊ हनी तबहीं
 पारथ बाहु ॥ बिन भुज संमुख पार्थ के चलो बलीनर

नाहु २७ ॥ सोरठा ॥ पार्थ तीसरो बाण हन्यो शीश में
 क्रोधकरि ॥ मुरछि गिर्यो बलवान उठि अर्जुन संमुख
 चलयो २८ ॥ चौपाई ॥ तब सो पंच पैड़ चलिगयो ।
 अर्द्ध चंद्रलै अर्जुन हयो ॥ काट्यो जानु जंघधर पर्यो ।
 यों भगदत्त भप संहर्यो २९ हाहाकार कटक में भयो ।
 शूरन मन रविसम आथयो ॥ कौरव नृपके दुख अति
 भारी । सुखकी सकल वासना जारी ३० ॥ दोहा ॥
 लीनो अर्जुन लाय उर भूप युधिष्ठिर आप ॥ आजुकरी
 संग्राम जय कीनो प्रगट प्रताप ३१ ॥ इति श्रीमहाभारत
 पुराणे विजयमुक्तावल्यां कविकृत्रसिंहबिरचितायां भगदत्त
 बधनवर्णनो नाम एकत्रिंशोऽध्यायः ॥ ३१ ॥

सुन्दरी छंद ॥ जूझि पर्यो भगदत्त लख्यो जब ।
 कौरव सोदर रोवत हैं सब ॥ शोच बढ्यो जियमें अति
 शोचत । नैननतें अंसुआ बहु मोचत १ वंदत हैं गुरु के
 नृप पायन । दीन भये बहु भाषत भायन ॥ आपनु हों
 सब कारज लायक । क्यों विगरै जहँ होउ सहायक २
 आजुभयो तुमयुद्ध पराजय । वेरण जीतिगये सबनिर्भय ॥
 आपुबिचार कछू अबठानहु । होय विजयमति सो उर आनहु ॥
 ३ ॥ दोहा ॥ राच्यो चक्रव्यूह गुरु सुनि अवनपतिबैन ॥
 दुर्गम दीरघ दुसहता जान्यो कछूपरैन ४ (द्रोण उवाच)
 न्योतिपठावहु पंडुसुत आवहिरणको आज । कैजूझै कैजाहिं
 बन सीझि जायँ सब काज ५ ॥ त्रिभंगी छंद ॥ सुनि गुरु
 बानी सो शिखमानी उर आनीत ब बुद्धिय है । तब दूत बुलायो

सो चलि आयो बेगिपठायो जाय कहै ॥ तब आयसु पायो
 तुरत सिधायो शीशनवायो भूपजहां । सोसबनि जुहार्यो
 लैबैठार्यो बंधवचार्योलसततहां ६ (दूतउवाच) सोरठा ॥
 दीनो यह संदेश चक्रव्यूह राच्यो तहां ॥ रणहित चलहु
 नरेश कै तजि विग्रह जाहु बन ७ (युधिष्ठिरउवाच)
 दोहा ॥ न्योति पठाये आयहें कहौ जाय संदेश ॥ दूत
 समदि कीनो तहां भूपति उर अंदेश ८ ॥ चौपाई ॥ जेतै
 भटहैं यादल माहीं । चक्रव्यूह सो जानत नाहीं ॥ अर्जुन
 श्रीहरि संग सिधायो । तीरथ ते चलि सो नहिं आयो ९
 ताबिन युद्ध कौन यह करिहैं । चक्रव्यूह बैठिकै लरिहैं ॥
 अर्जुनविन जानो दलहीनो । तातेन्योतो रणकोदीनो १०
 तीनोंबंधुन राजा बूझै । कहौ मंत्रजो जाकोसूझै ॥ जो यह
 युद्ध नहीं बनि आवै । राजपाट क्षिति को को पावै ११
 प्रथमहि भीमहि बूझै राजा । जोरण जीतों सीजैकाजा ॥
 सुनिकै उत्तर भूपहि दीनो । ऐसो सुन्यो न मैं रणकीनो १२
 छप्पै ॥ जुरै युद्ध गंधर्व सब्व तिनको बल गारों । किन्नर
 नर अरु यक्ष सबल बल दल संहारों ॥ बज्र पाणि जो
 बज्र लेहिं तो चित्त न आनो । युद्ध करत दिन रैन नहीं
 हों कछू अघानो ॥ बहु शंक अंक नग पन्नगनिको मोसों
 सरवरि करै । सुनिभूप मोहिं यायुद्ध की सोन कछूविधि
 जनि परै १३ ॥ दोहा ॥ बूझै नृप सहदेव तब जो यह
 जानहु युद्ध ॥ जीतिलिये हवै जायगो राजपाट सब शुद्ध
 १४ (सहदेवउवाच) जीतों दानव देवहों जुरै युद्ध जो
 आय ॥ पै विधि चक्रव्यूहकी कछू न जानी जाय १५

(राजोवाच) करो नकुल संग्राम यह राखि कटक की
 लाज ॥ नातरु भूमि गई सबै रण कीनो बिनुकाज १६
 (नकुलउवाच) । कृष्ण आजु अमित संग्राम देवदानव
 सोमंडों । जरै युद्ध जो आय काल दंडहु को दंडों ॥ सब
 अरुनी पति जीति गर्व तिनके बर गंजों । सकल शत्रु
 संहारि बाहु बल सब दल भंजों ॥ सुनि भूप पाय तुव
 आयुसैं होइतनो संग्राम करो । यह सौह मोहिं नृप पंडु
 की सो उलटि पहुमि ऊपर धरों १७ ॥ दोहा ॥ देख्यो
 सुन्यो न कानहू चक्रव्यूह नरेश ॥ सोनयुद्ध कहूंमें कियो
 यह जियमें अदेश १८ ॥ चौपाई ॥ राजा बहु जियमें
 पछिताइ । क्यों जीत्यो अब संग्रमजाइ ॥ बिना पार्थबहु
 भयो अकाज । पहुमि नशाई बूझ्यो राज १९ सुर नर
 दल सब भीमहि डरें । ताहू तै कछु काज न सरें ॥
 सहदेव अरु नकुल विचारि । तेऊ गये हिये अबहारि २०
 बैठ्यो भूपति नाये शीश । नहिं बोलत कोऊ अरुनीश ॥
 चार्यो बंधव मनमें शोचैं ॥ मन पछितायँ नयनजल मोचैं
 २१ सकल कटक में बीत्यो त्रास । अंतहपुर सब पर्यो
 उपास ॥ यह सब साधु सुभद्रा सुन्यो । हिये शोच
 करि माथो धुन्यो २२ पति की सुरति चित्त में धरी ।
 नैननि जल देहीं थरहरी ॥ कृष्ण साथ चलि अर्जुन
 गयो । बहुर्यो नहीं कहा सो भयो २३ सुत अभिमन्यु
 गोद में पर्यो । माता नैननि अंश ढरयो ॥ पर्यो पुत्र
 उरपै तिहि बार । चिंता कीनी चौकि कुमार २४
 (अभिमन्युरुवाच) दोहा ॥ कौनहेतु तुम मलिन हौ कहि

धोंसो समझाइ । या जगमें तो तैं सुखी औरन कोऊ आइ ॥
 २५ सवैया ॥ जेठ युधिष्ठिर भीमवली जहाँ हैं जगबंदन
 कृष्ण सोभाई । धीर धनुर्द्धर अर्जुनसो पति युद्ध जुरै यम-
 दूखमि खाई । है बिबि बंधु सहदेव सो देवर कीरति है
 सब भतल छाई । सो सम पुत्रहि पाय कै माय कहा
 कहिधौं मुखपै मलिनाई २६ ॥ दोहा ॥ बरुण करन को
 या समय कहिधौं कारण कौन ॥ काहूके उर त्रास नहिं
 संपति संयुत भौन २७ (सुभद्र उवाच) तुम पितु रणहित
 कृष्ण सँग गयो कसेतन त्राण ॥ आई सुधि नीकी नहीं
 कहौरहत क्यों प्राण २८ ॥ चौपाई ॥ भूपयुधिष्ठिर दुःख
 निदान । भोजन करें न खंड्यो पान ॥ तीनों अनुज रु-
 दन बहु करें । बैननही मुख ते अनुसरें २९ नहीं पार्थ
 की सुधि कछु नीकी । यह बात सुत है मोजीकी ॥ चलि
 अभिमन्यु भूप पै गयो । जाय सभा में ठाढ़ो भयो ३०
 बिलराख्यो सब परिवार बिलोक्यो । नैननि ते जल
 रुकै नरोंक्यो ॥ माता बचन सत्यकैमान्यो । जूझ्यो अर्जुन
 निश्चय जान्यो ३१ ॥ दोहा ॥ उलटि चल्यो तब गह
 को निरखि भीम तब धाय ॥ बिलरूख्यो देख्यो पार्थ सुत
 लीनो अंकलगाय ३२ (अभिमन्युरुवाच) क्यों भूपनि मन
 मलिन हो अरु दुचिते सब मौन ॥ हरष न काहू उर ल-
 रूख्यो कहिये कारण कौन ३३ (भीमसेन उवाच) कूलकीनौ
 इक द्रोण गुरु चक्रव्यूह बनाइ ॥ ताहित न्योतो युद्ध को
 दीनो यहाँ पठाइ ३४ कहि पठई कुरुराज नृप कैरण
 राच्यो आय ॥ कै तजिकै संग्राम थल रहौ बिपिनि में

जाय ३५ ॥ गीतिकाच्छंद ॥ नहीं हमसो समर जानें श्र-
 वणहूं न सुन्यों कहूं । देवपुर पाताल जीत्यो नहीं देख्यो
 सोतहूं ॥ और भूपन ताहि जानत पार्थको धोखो रह्यो ।
 सुनतही अभिमन्यु उठिकै पवन सुतसों यों कह्यो ३६
 यह काजहैं सब सारिहैं कह चित्तमें संशो कियो । जाय
 भूपति निकट तवहीं युद्ध हित बीरा लियो ॥ आजु कौरव
 कुल संहारों द्रोण कर्णहि संहरो ॥ हतोंवर दुश्शासनै
 या समर की जयहों करो ३७ ॥ सवैया ॥ काहेको शो-
 चकरो जू इतौ यह काज कितौ अबहीं सब सारों । आजु
 हतो क्षणमें रणमें सब कौरव को कुल कोपि संहारों ॥
 देखतही दल द्रोण को दारि सुखग दवागिनि सों पर
 जारों । बाजि द्विरद्व गरद्व करो सब भीड़ि महा रथवंतनि
 मारों ३८ दोहा ॥ अद्भुत गति भूपति गनी लखि शिशु
 साहस धीर । सूरनि मनि केहरि कलित शील सिंधुसों
 बीर ३९ (राजावाच) नहिं गुरु ढिग बिद्या पढ़ी स-
 मर न देख्यो नैन ॥ करि साहस बीरा लयो जानी कछू
 परैन ४० मोहिं अचंभो पुत्र सुनि को तू दानव देव ॥
 गंधूब किन्नर यक्ष तू कहि सब अपनो भव ४१ (अभि-
 मन्युरुवाच) छप्पै ॥ सेवक सोई धन्य स्वामि कारजमें
 शूरो । धन्य धन्य सोइ पुत्र मात पितु आयसु पूरो ॥ धन्य
 धन्य वह दास भंग नहिं शासन करई । धन्यधन्य सोइ
 शूर समर पग उलटि न धरई ॥ धनि बोलि सत्य कवि
 छत्र कहि सुयश सकल जग लीजिये । बहु राज काज
 मन लाज धरि जन्म सुफल अब कीजिये ४२ ॥ दोहा ॥

नहीं भूप संशय करो शोच नशावहु चित्त ॥ करें विजय
भट सब हनों आजु रावरे हित ४३ इति श्रीमहाभारत
पुराणे विजयमुक्तावल्यांकविक्रमसिंहविरचितायांचक्रव्यू-
हरचनोनामद्वित्रिंशोऽध्यायः ॥ ३२ ॥

(युधिष्ठिरवाच) ॥ दोहा ॥ पण्यो न गुरु ढिगतेँ कहूँ
लख्यो न नैनन युद्ध ॥ क्यों कांध्यो तैं भार सुत सां
मोसों कहि शुद्ध १ (अभिमन्युरुवाच) सुनि नृप पूरव
जन्मकी कथा कहौँ समझाय ॥ मथुरापुर उत्तम अवनि
शोभा कही न जाय २ ॥ सुंदरीछिंद ॥ भार भयो उपजे
बहु दानव । चैन नहीं बहुधा मुनि मानव ॥ होम घने
तप यज्ञ नशावत । होन नहीं वृत संयम पावत ३ भा-
रत विप्रनि देखि तपो थल । दीरघ दीरघ दानवके दल ॥
हवै बहु तैं वसुधा जिय व्याकुल । जात भई तब ब्रह्म
पुरी थल ४ ता मुख बात सुनो जगबंदन । भूमि भये
तबही नंदनंदन ॥ भार उतारि दले दल दानव । ठावहि
ठाव थपे मुनि मानव ५ ॥ सबैया ॥ भूतल भार उतारन
को जग में अवतार मुरारि धर्यो । मारि बकी बग को
मुख फारि अधासुरको बल प्राणहर्यो । तोरि लये रद
धाय भुशुंडते कोपि करी जब आनि अर्यो । कंस को हंस
बिध्वंसि तहाँ सब दानव बंश निबंश कर्यो ६ ॥ चौपाई ॥
तब श्रीकृष्ण पैज उर धरी । सकल भूमि बिनु दानव
करी ॥ छोटे बड़े असुर जे भये । ते बर विक्रम के सब
हये ७ मारे सब बहु त्रास दिखाई । मो माता तब बची

पराई ॥ गर्भवती पितु गृह सो गई । ऐसी गति बिधना
 निर्मई ८ ताके गर्भ जन्म में लयो । कछू ज्ञान तब मो
 उर भयो ॥ खेलन जाउं शिशुन के संग । नाना बिधि
 सब राचत रंग ६ यक शिशु यों कहि गारी दई । सुनत
 मोहिं बहु लज्जा भई ॥ तब उन केहिन ज्ञातिन गात ।
 तोहिं हनों तेरो को होत १० चलि तब माता पैहों आयो
 तबहीं सब वृत्तांत बतायो ॥ को कुलकौन पिता कहु माता ।
 कहा कुटुंब बंधुनिज भ्राता ११ (मातउवाच) पुत्र पिता
 को जो गति सुनिहो । बहु पछितैहो माथोधुनिहो ॥ कु-
 टुंब तुझारो श्रीहरि हन्या । बालक वृद्ध तरुण नहिं ग-
 न्यो १२ ॥ दोहा ॥ कोऊ उबर्यो असुर नहिं पुरुष न
 कोऊ बाम ॥ कीनी अपु बश पुहुमि सब निर्भय मथुरा
 धाम १३ लाज भई यहबात सुनिक्रोधभयो बहु चित्त ॥
 सुनि पितुकी वैसी दशा कियो यतन ताहित १४ धूम घूंटि
 ह्वै औंधमुख नींद भूख सब साधि ॥ तन मन सब एकांत
 करि शिवसों लगीसमाधि १५ ॥ दंडकछंद ॥ नीचो राखि
 मूरध चरणकिये ऊरधमें धूम घूंटि घूंटि तप कीनो त्रासना
 कछै । सूखिगई त्वचा सब आमिष बिलाय गयो श्रोण
 को सलिल चलयौ केतिक बखानिचै ॥ एक चित्त साधि
 कै समाधि महा कष्ट साधि कीनो न विराम कबहूँ न
 घटिकाहू द्वै । छत्र कहि शंभुनाथ भूतनाथ भवनाथ शं-
 कर प्रसन्न भये मोपर दयालु ह्वै १६ ॥ दोहा ॥ हों प्र-
 सन्न तोसों भयो मांगु मांगु उत्ताल ॥ जो इच्छा तुम
 मन रहै सो पुरवउं इहिकाल १७ ॥ चौपाई ॥ तबमें तिन

सों विनई सेव । नमोदेव दवन के देव ॥ वृत्ति भूमि मो
मथुरा गाँउ । तीनिहुं भवन प्रगट ता नाउं १८ बासुदेव
भूतल अवतर्यो । दानव को कुल तिन संहर्यो ॥ लघु
बालक कहुं रहननपायो । सोहरितहुँअवनीश कहायो १९
भागी गर्भवती मो माता । नैहर गई जहाँनिज आता ॥
ताके गर्भ भयो ताठाउँ । धरो मातु अहि दानव नाउँ २०
अब स्वामी सों करो उपाउ । अपने कुलको पाऊं दाउ ॥
लगे न आयुध होय न घाउ । दै कछु ऐसो करो सहाउ २१
दोहा ॥ जाके बल हरिको हतों कुलको बदलो लेहुं ॥
लहों विरत बर आपनी जननी को सुख देहुं २२ दीनो
एक मजुष तब हवै शिव परम दयाल ॥ तुव रक्षाहवैहै
समर सब भाष्यो तिहिकाल २३ (शिवउवाच) मधु-
भारकंद ॥ जबरण जैहै । जययशपैहै ॥ अरिकुल गंजै ।
परदल भंजै २४ जब रण जानै । अरि न परानै ॥ बहु-
बल कीनो । करिबल लीनो २५ ॥ दोहा ॥ रहिये बैठ
मजुष में तोहिं न लखिहै कोइ ॥ तुम तनकी रक्षा महा
याहीते सब होइ २६ आयो गेह मजुष लै बीते केतिक
काल ॥ मथुरापुर को उठि चल्यो जीतन श्रीगोपाल २७
जब कछु चलि मारग गयो लये मजुषा शीश । विप्ररूप
मोको मिले तीनि भुवन के ईश २८ ॥ गीतिका छंद ॥
जरायुत सब देह निर्बल लकुट करमें लेखिये । चल्यो
आवत कष्टसों विचवाट केशव देखिये ॥ दयाउपजी मोहिं
देखत कही यहगति हेरिकै । कहो विप्रचले कहां बाणी
सुनाई टेरिकै २९ रदन दाबी अंगुली द्विज कही मोदिग

आयकै । सुनत आवै कृष्ण यों कहि क्यों बचै भगि
 जायकै । शब्द ऊंचो क्यों करै स्वरदीन क्यों नहिं बो-
 लई ॥ ता बिप्र की मुख सुनत बाणी मोहिं चित चिंता
 भई ३० ॥ दोहा ॥ मैं बिनयो ता विप्रसों कृष्णहि कहा
 डराउं । क्यों बोलै स्वरदीन तू सो कहि मोसों भाउ ३१
 बिरति भूमि मथुरा पुरी तहँ असुरन को बास ॥ कृष्ण
 मानिकै वैर चितकीनो सबको नास ३२ हों प्रोहित तिन
 को सदा तिन बिनुहवै गयो हीन । नहीं बच्यो यजमान
 जग अब सबसों आधीन ३३ ॥ चौपाई ॥ कृष्ण सँ-
 हारे असुर अनेक । भागि बची तरुणी तहँ एक ॥ गर्भ-
 वती पितुके गृह गई । ऐसी गति बिधना निर्मई ३४
 ताके पुत्र भयो मैं सुन्यो । चलि तहँ जाऊँ चित्तमेंगुन्यो ॥
 वह सुतहवैहै बहु बलवान । अवशि राखिहै मेरोमान
 ३५ हति कृष्णहि मथुरा पुर लेहैं । धाम ग्राम हमको
 लैदेहैं ॥ यह सुनिकै मेरो मनमान्यो । वह मैं निज प्रो-
 हित करिजान्यों ३६ तब मैं सो द्विज निकट बुलायो ।
 सब बिधि अपनों भेद बतायो ॥ तू प्रोहित हों तुव यज-
 मान । रहु मों पास राखिहों मान ३७ ॥ दोहा ॥ फू-
 ल्यो द्विज ये वचन सुनि हर्षवन्त अकुलाइ । मोसोंहित
 भाषे वचन कहियों तू कितजाइ ३८ ॥ चौपाई ॥ तबमें
 अपनो भेद बतायों । कृष्णहिं हों जीतन चलिआयों ॥
 तब फिरि बिप्र कहै अकुलाय । तोपै क्यों रिपु जीत्यो-
 जाय ३९ ॥ दोहा ॥ बलीनहीं है कृष्णसों तीनिलोकमें
 कोय । तासों तोंसों युद्धमें कैसे सरवर होय ४० तोहिं

देखि धीरज भयो जान्यो जीवन आज । अब मथुराज-
 नि जायतू ह्वैहै महा अकाज ४१ तबमें कह्यो मजुषको
 भेद सबै समुझाय । दीनो शंभुकृपालह्वै प्राणन रक्षक
 आय ४२ सकल निपातों अरिचमू कौनसके रण जीति ।
 हारत जानि मजुषमें पैठि रहौ यह रीति ४३ सोरह
 सहस करीलगी ते सब लेहु लगाइ । मोहिलखै नहिं
 शंभुबिनु दूजो कोऊ आइ ४४ ॥ चित्रपदछंद ॥ विप्रकहै
 तब ऐसे । तूरण जीतहि कैसे ॥ जानतहौं छल कीनो ।
 तो कहँहै यह दीनो ४५ सोन कछू कहिजाई । त कहि
 मोंसों समुझाई ॥ में सब बात बताई । बात सबैद्विजपा-
 ई ४६ ॥ दोहा ॥ सीख लराई सबलई छलि करिद्विज
 बपुमंडि । बैठ्यो मांहि मजुषहौं सकलकपटको छंडि ४७
 चौपाई ॥ बिकट करी उनसबै लगाई । जेमें हुती वाहि
 समुझाई ॥ तामें मोहिं मूंदिसो गयो । बुद्धि नशाई पर-
 बश भयो ४८ थाक्यो बल सब पौरुष भाग्यो । कीनो
 सो कछु काज न लाग्यो ॥ शिवशिव कहत तजेमैंप्राण ।
 फिरि तब प्रगट भये भगवान ४९ ॥ दोहा ॥ एक कुपी
 में मूंदियो श्रीहरि मेरे प्राण । होनीसोई ह्वैरहै जोराचै
 भगवान ५० चौकस कै तबसो कुपी दई सुभद्रा हाथ ।
 बिनबूझे खोलों न तुम यों बिनयो यदुनाथ ५१ ॥ चौपा-
 ई ॥ पतिके गेह सुभद्रा आई । तबसो कुपी हाथहीलाई ॥
 न्हाई ऋतुवंती ह्वैनारि । जानि सुगंध सुलखी उधारि
 ५२ सूंघत ताको बहु सुख पायो । ताके उदर पैठि हौं
 आयो ॥ दिनदिन बाढ़त बिकट शरीर । व्यथासुभद्रहि

धरति न धीर ५३ दशों द्वारकी रूंगी श्वास । ताहिगई
 जीवन की आश ॥ सहस बाहु अहि दानव भयो । सह्यो
 न भार मात पैगयो ५४ ॥ दोहा ॥ दिन दिन देही थर
 हरी कृशह्वै रह्यो शरीर । देखन आये सुनि व्यथा भग-
 नी को यदुवीर ५५ (श्रीकृष्णउवाच) कहा तोहिं मन
 कामना कहां बसैतुवचित्त ॥ सो मोसों समुझाइ कहि आनों
 तेरे हित ५६ (सुभद्रउवाच) पैरों रुधिर प्रवाह में यह
 भैया चितमोहिं ॥ नित्यनित्य इहिविधि करों अथवांमारों
 तोहिं ५७ ॥ त्रोटकछंद ॥ भूमश्रीहरि चित्त भयोतबहीं ॥
 भगिनी मुखबैन सुन्यो जबहीं ॥ बहु संभ्रम चितहि छाथ
 रह्यो । कछुजाय नहीं मुखबैन कह्यो ५८ जब शूर छिप्यो
 कछुरैनि गई । तब व्याकुलता भगिनीहि भई ॥ हरि सों
 यह बैन विचारि कह्यो । कहि एककथा बसि चित्त रह्यो
 ५९ ॥ दोहा ॥ श्रीहरि चक्रव्यूहकी कीनीकथा प्रकाश ॥
 क्षमा भई सुनिकै कछू मिट्यो कछूमन त्राश ६० ॥ चौ-
 पाई ॥ यहिविधि कथा तहां सुनि लई । सुनत सुनत आधी
 निशिगई ॥ दैत्य न हूंको निद्राछई । कछू क्षमा ताके उर
 भई ६१ कथारही यह मो चित आई । हूंकादै तब कथा
 कहाई ॥ तबहीं हरिभाषा पहिंचानी । कही न तबसों
 फेरि कहानी ६२ ॥ कुंडलिया ॥ कीनो संभ्रम चित्त में
 कृष्ण कमल दल नैन । उत्तरु काहू असुर को नरकी
 भाषाहैन ॥ नरकी भाषाहैन उदर में हौं तिन जान्यो ।
 सहस बाहु को शत्रु आपनो तब पहिंचान्यो ॥ पहिंचान्यो
 तिहि बार सज्यो तब यतन नवीनो । कोकबि सकै ब-

खानि चित्तजेतो भ्रम कीनों ६३ ॥ दोहा ॥ सहसबाहु
 को कृष्ण तब पुतरा रच्यो बनाइ । कर कुशलै अभिषेक
 करि मंत्रजप्यो अकुलाइ ६४ तासों सकल भुजा नशीं
 द्वै भुजरहीं शरीर ॥ तब हों प्रगट्यो भूमिपर भई सुभद्रहि
 धीर ६५ चक्रव्यूह कथा मुनी सुन्यो गेह को भाउ ।
 भीम पैजकरि ताहिबर तोरिलेइ करि चाउ ६६ जिती
 कथा सब मै सुनी सोबरनी तो जाइ ॥ रह्यो सुने बिनु
 भीम सों त्रोरिदेहि सुनिराइ ६७ ॥ छप्पै ॥ भीमसेन की
 पैजकरत को शंक न करई । मुनि गण तजत समाधि शं-
 भुको आसनटरई ॥ भूतलव्याम पताललंकपति कंपतथर
 थर । गदा लेत कर कौपि अंक आतंक सकल नर ॥ कोन
 कंयहि कवि छत्र कहि डरि डरि करिवर परि हरत ॥
 क्षोभहोत सुर असुरको सु पवनपुत्र क्रोधहि करत ६८
 दोहा ॥ जीत्यो चक्रव्यूह रण कौन सकै अब राखि ॥
 नहि नरेंद्र चिंताकरो बचन कहे इमि भाखि ६९ ॥ दं-
 डकच्छंद ॥ दृढ़ दल पारोंरोरि सुभट संहारों दौरि पौरि
 पौरि गर्व सब शूरन के गारिहों । श्रोणहूं में बोरों
 द्रोण रथते बिरथ्य करों करहूं विकर्णहूं को आजुरण
 मारिहों ॥ सासन दुशासन का चैनदह बैनहूं को भूध-
 रसे दूधर को भूतल पछारिहों । वाणनि की वायु सों
 उड़ाय देहूं शकुनिहिं क्रोध दुर्योधन के शीशही सों
 सारिहों ७० ॥ दोहा ॥ ह्वै सुचित्त बीरादयो धर्म सुवन
 नर नाह । पांचक्षोहणी सबल दल दीनो करि उत्साह
 ७१ सहदेव अरु नकुल संग चले द्रुपद नरनाथ । चले

विराट चमू लिये और घरूका साथ ७२ भूपति को
 शिर नाय कै चलयो निसान बजाय । गेह आय जननी
 चरण बन्दे बहु सुख पाय ७३ इति श्रीमहाभारतपुराणे
 विजयमुक्तावल्यां कविकृत्रविरचितायां अभिमन्युउत्साह
 वर्णनोनामत्रयस्त्रिंशोऽध्यायः ३३ ॥

(सुभद्राउवाच) ॥ चौपाई ॥ देखत तोको मनु गह-
 बर्यो । धनि धनि कुशा मों अवतर्यो ॥ अपने कुल को
 राख्यो पान्यो ॥ धन्य धन्य सुत में पहिचान्यो १
 ॥ दोहा ॥ मुक्ता चौक पुरायकै वैद उचारत विप्र ॥ च-
 ल्यो वीर रसमों सुभट शत्रुहिं जीतन छिप्र २ मंगल
 गाये सखिन मिलि बाजन विदित बजाइ । न्योक्तावरि
 मणि मुक्त करि नीरज चीर लुटाइ ३ बंदिन मिलि बोल्यो
 विरद रथ आरूढ़ कुमार ॥ चलयो सबल दल साजिकै
 कोपि कर्यो किर वार ४ ॥ सुंदरीछंद ॥ कुंजर पुंजनि-
 पुंजनि सोहत । बैरख जाल महामन मोहत ॥ देखत यों
 कविता क्वि साजत ॥ ज्यों उत दामिनि वारिद राजत ५
 चंचल बाजि किधों खग खंजन । पौन कुरंगनि की गति
 गंजन ॥ ज्यों सलभा गण पायक राजत । शोभन दी-
 रघ दुंदुभि बाजत ६ ॥ दोहा ॥ रज उड़ि लोप्यो व्योम
 रवि रह्यो धार तम छाइ ॥ कमठ कसमस्यो शेषकोलच-
 कि लचकि शिर जाइ ७ ॥ दंडकछंद ॥ क्वाती होत धरधर
 शेषकी धरा धरत कुरम कलमलात भुरि तलातलतल ॥
 टूटिटूटि द्रुम क्षिति कूटि कूटि नीरगये खूदि खुरतार मुखै

सरिता सकल जल । चहुँ और चकित चवाइ ससवाइ
 गये अरि अवनोश कंपि कंपि उठे हल हल ॥ सुर अव-
 तंस पंडु वंश अंश अर्जुनके सेन चले हालि उठे भूतल
 के थल थल ८ ॥ दोहा ॥ चलत कटक पहुंच्यो तहाँ
 जहाँ बिराट को धाम । दियो सोधु इक सहचरी जगी
 उत्तरा बाम ९ (सरयुवाच) जीतन चक्रव्यूह को कोपि
 चढ्यो तब कंत ॥ चढ्यो वीर रस कटक में हर्षवंत दी-
 संत १० अति आतुर जे बचन सुनि उठी उत्तरा बाम ॥
 निरख्यो प्रीतिम प्राणपति सब साहस को धाम ११
 चौपाई ॥ कीन्ही कुमरि मोहु अधिकार्ई । नहीं करी कछु
 कृष्ण भलाई ॥ अबहों सत्य बचन इमि भाख्यो । जात
 कुमार को अबहुँ राख्यो १२ उपज्यो मोह कृष्ण प-
 हिँचान्यो । तब विचार उरमें यह आन्यो ॥ परम निठुरता
 तब उपजाई ॥ मोह काटिकै रची रुखाई १३ तब अ-
 भिमन्यु लखी तिय ऐसी । चंद्रबदन रति कमलाजैसी ॥
 सूक्ष्म सुभग सकल अगवनी ॥ दीनी विधि शोभा अति
 घनी १४ ॥ दोहा ॥ बरणि कहालों कहि कहों रूप बाहि
 कम वाल । निरखि कुंवर को मन मथ्यो मन्मथतेही
 काल १५ ॥ चौपाई ॥ तब उपाव श्रीहरिजु कर्यो । सब
 तन मथि मनसिज जल ढर्यो ॥ पान मांझ सो जल
 धरि लयो । कुमरि उत्तरा के करदयो १६ भक्षत वगरि
 गयो तन माहीं । यह संयोग कहु जान्यो नाहीं ॥ ह्वै
 संतुष्ट सुबीरज लयो ॥ चलि अभिमन्यु अगाड़े गयो १७
 निशिको कीनी जाय मिलान । भई निशा तब अथयो

भान ॥ सूती सेन उत्तरा नारि । जागी स्वप्न अरिष्ट नि-
हारि १८ (उत्तरा उवाच) ॥ दोहा ॥ देख्यो स्वप्न अरिष्टमें
याते मन अकुलाइ । जावों कुशल न कुंवर की प्राण
उठ्यो सों जाय १९ ॥ सवैया ॥ जाति बिवाहन को अभिमन्यु
भये सपने कपि रीछ बराती । गावत जंबुक बाघ सो गी-
तनि मंडप छावत गिद्ध संघाती ॥ रातइ भूषण रातिय
माल सो पागवनी गहरे रंगराती । पांच सखी मिलि
तेल चढ़ावति याडरते धरकी बहु छाती २० ॥ दोहा ॥
कह्यो विप्र सों दान करि बैठि रहो सोवाल । बीराजल
संतुष्ट हवै गर्भ धर्यो तिहि काल २१ चलि पहुँच्यो
अभिमन्यु रण चक्रव्यूह निकेत । खबरि भई कुरुराजको
पठयो नर सुधिहेत २२ इति श्री महाभारत पुराणे वि-
जय मुक्तावल्यांकवि कृत्र विरचितायां अभिमन्यु पयान
वर्णनो नाम चतुस्त्रिंशोऽध्यायः ३४ ॥

अथ दोधकच्छंद ॥ बंदि तबै नरनाथ पठायो । नाम
लसै विदवन्त सुहायो ॥ को सजिकै रणको चढ़ि आयो ।
सो हटि सेन कितो संग लायो १ जाय बसीठ तहाँ इमि
देख्यो । घोर घनो घन सो दल लेख्यो ॥ बूझत लोगनि
को सजि आयो । भीम युधिष्ठिर रोषनि छायो २ कै स-
हदेव कि अर्जुन सो है । शूर कहो अब को दल में है ॥
जात कहां कित तें दल आयो । भेद कछू अब में नहिं
पायो ३ (सेन उवाच) ॥ दोहा ॥ अर्जुन सुत अभिमन्यु
यह चढ्यो निसान बजाय । जीतन चक्रव्यूह को को अब

विजयमुक्तावली ।

१६६

सकै बचाय ४ चलि बसीठ पहुँच्यो तहां पारथ सुत के पास । बैठ्यो देख्यो कुँवर तहँ साहस युत सु विलास ५ दै अशीष ठाढ़ो भयो आदर कियो कुमार । कुशल प्रसन्न हिं बूझिकै बैठक दई अगार ६ (अभिमन्युरुवाच) कैसो चक्रव्यूह नृप रच्यो कहो किहि रीति । सोई घटिका एक में पैठि लेहुं सब जीति ७ (बसीठउवाच) कोट रचे इक ईश गुरु संघट करो न जाय । पैठि कौन कहनी करै बं-कट दुर्ग मझाय ८ बिकट दरी मारग बिकट सागर सम गंभीर । ताके अमित प्रवाह धसि कौन लहि सकै तीर ९ दुर्योधन बलि बंड सुत लाखनि नाम कहाइ । प्रथमकोट आभार शिर लयो भुजा वर आइ १० कोट दूसरे बिकट में बिदुर बीर को बास । तीजै शल्य कह्यो बली तीजै कोट निवास ११ कोट चतुर्थ में द्रोण सुत रह्यो बली दल गाजि । कोट पाँचवे सकुन दल राख्यो बहु दल साजि १२ छठै सु शर्मा सात में साज्यो सबल सबाह । अष्टम बिश्वासेन तहँ सजे कवच संनाह १३ नवम बिषम भूरिश्रवा दश में कौ सब भार । एकादश अरु द्वादशैं ताही को बिस्तार १४ कोट तेरहें द्रोणगुरु सकल सेन की लाज । चतुर्दशैं गांगेय तहँ राजत बड़ो समाज १५ है कलिंगगढ़ पंद्रहैं जिहि बहु जीते युद्ध । दुश्शासनगढ़ षोडशैं सेना सहित सकुद्ध १६ ॥ चौपाई ॥ सप्त दशैं क्रतवर्मा देख्यो । ताको महा गर्व में लेख्यो ॥ अष्टादशैं लसै मह बाहु । नव दश सेना युत उत्साहु १७ ॥ दोहा ॥ कोट बीस में करण नृप ताके बल नहिं अत । एक बीस

मैंह जयद्रथ साज्यो दुसह दुरंत १८ दुर्योधन सब अ-
 नुज सुत साजि सेन चतुरंग । न्यारो लसै महीप तहं
 सुभट बिकट सब अंग १९ यह बिधि चक्रव्यूहकी सुनि
 अभिमन्यु कुमार । करौ बिदा चलि जाउं हौं दुर्योधन
 के द्वार २० (अभिमन्युरुवाच) साजै नृपति महारथी
 सकलसजे तनत्राण । यह संदेशो देहुतुम करवर गहौ
 कृपाण २१ पहुंच्यो दूतमहीपपै कहींसकल बिधिजाय ।
 नृपति युधिष्ठिर की चमू तुम पर पहुंची आय २२ साज्यो
 चक्रव्यूहपै पारथसुत बलिबंड ॥ नाम भेष लघु जानिये
 पौरुषपरम प्रचंड २३ ताको साहसमें लख्यो कहत न
 बनईबात ॥ कहतलेहुंहौं जीतिकै चक्रव्यूहको जात २४
 करो उताइल कटकमें साजोराजा राय ॥ सावधानसब
 होहु भट गरजि निशान बजाय २५ ॥ त्रोटकछंद ॥ प्रति-
 हार नरेश तबै पठयो । अवनौशनि सोधु सो दैन गयो ॥
 सुनि ता मुख बैन सबै सजिकै । तन त्राण कसे बहुधा
 गजिकै २६ चहुं ओरनि घोर निशान बजे । कहुं कुंजर
 बाजि समूहसजे ॥ रथवंत महारथ साजितहां । लखिये
 नहिंपौन प्रवेश तहां २७ अभिमन्युजबै तहँ साजिचल्यो ।
 बहु बीरन को हिय देखि हल्यो ॥ पहिले गृह मध्य
 प्रवेश करयो । तब लाखन के मन शोच पर्यो ॥ लखि
 बालक सौं न करै रणको । यहशोकभयो अतिहीमनको ॥
 नगहै धनुबाण सो शीश धुनै । पलही पलही हियमाहिं
 गुनै २८ (लखनउवाच) ॥ दोहा ॥ अति अपराधी मो
 पिता पंडु सुतनि नहिंखोरि ॥ उनतधरी जियमांझ इन

ओगुण किये करोरि २६ प्रथम बरुण मंदिर रच्यो तामें
 दिये जराय ॥ भजिउबरें दावाग्निते श्रीहरि कियोसहाय
 ३० पांसे कपट बनाइ कै छलकरि लिये हराइ ॥ राज
 पाटसब छीनिकै दीनो बिपिन पठाइ ३१ खेंचत लज्या
 नाकरी द्रुपद सुताको चीर ॥ हरि सहाय उघर्यो नहीं
 कितहूं तनक शरीर ३२ ऐसे कोरि बिचारि कै समर न
 आप अज्ञाइ ॥ जान दयो सुत पार्थको नहिं राख्यो बिर
 माइ ३३ गयोपैठि गृहदूसरे पार्थपुत्र बरबीर ॥ निरखत
 धनु गुण युत कर्यो बिदुर उठे रणधीर ३४ निरखतही
 अभिमन्यु को बिदुर डुलायो शीश ॥ रक्षा बालककीकरो
 ह्वै कृपालु जगदीश ३५ आपुन कांधो युद्ध नहिं धनुष
 दियो भुवडारि ॥ पापीबैठे गेहकत पंडुपुत्र तुमचारि ३६
 पौरुषतजि लज्यातजी तजीसकल कुलकानि ॥ बालक
 रणहिं पठाइकै आपुरहे सुखमानि ३७ दीरघतन दीरघ
 भुजा दीरघ पौरुष पाइ ॥ कातरह्वै बैठेसदन बहुबल-
 वन्त कहाइ ३८ बिदुर साथ बरजो सबै कोऊ जुरै न
 युद्ध ॥ चल्यो तीसरी पारिको पार्थपुत्र ह्वै शुद्ध ३९ पैठि
 गयो गढ़ तीसरे पार्थ पुत्र तब धाइ ॥ सहित शल्य भट
 सकल मिलि लीनो धनुष चढ़ाइ ४० सन्मुख समर
 सरोषि ह्वै जुरे बीर विवि युद्ध ॥ तबहिं पार्थसुत शल्य
 उर हनी शक्तिह्वै क्रुद्ध ४१ बिषमचोट नहिं सहिसक्यो
 भज्यो बेगिदै पीठि ॥ पारथ सुत कीनी तबै चौथे गृहपर
 दीठि ४२ ॥ चौपाई ॥ तहां द्रोणसुतहैं बलबंड । जाको
 पौरुष लसै अखंड ॥ तहँ अभिमन्यु बेगि दैगयो । तासों

महायुद्ध तब भयो ४३ अग्निबाण उन लीने तीनि ।
 डारे पार्थ पुत्र ते छीनि ॥ बाण बीस सों गुरुसुत हयो ।
 ताके परम क्रोध उर छ्यो ४४ तब अभिमन्यु हयो शत
 बान । उन शर कियो सहस संधान ॥ दोऊ समर करत
 बलिबंद । दोऊ बरषत बाण अखंड ४५ ॥ दोहा ॥ एकै
 बिद्या दुहुनकी संग्रम करत समान ॥ ऐसे वेई और को
 पटतर दीजै आन ४६ क्रोध कर्यो तब पार्थ सुत रिसकै
 छांडेवान । द्रोण पुत्र मुर्छित भयो आगे कर्यो पयान ४७
 तबहीं पार्थ सुतगयो कोट पाँचवें कोपि ॥ शकुनि रह्यो
 तहँ क्रोध करि अंगद ज्यों पग रोपि ४८ (शकुनिरुवाच)
 बांधौ जीवत बालकै भागि न पावै जान । मारिलेहु तिन
 को अबै जो कोऊ सजै कृपान ४९ छेंक्यो चहुं दिशिते
 कुंवर बाण अनेक चलाई ॥ घोर कर्मकीनो महा रह्यो
 व्योमशर छाड़ ५० रण कराल अभिमन्यु को सक्यो न
 खलपै जाइ । जितहि दवागिनि सों उठै तृण ज्यों दल
 भहराइ ५१ भजे लजे नहिं शकुनि उर सबदल गयो
 पराइ । बहुत बीर अभिमन्यु सों उबरे हाहा खाइ ५२
 छठे सातवें आठवें नवमें कोट मंझाय । दश एकादश
 द्वादशें पहुंच्यो बलही जाय ५३ सबही को शरशेखर सों
 हतिकै गर्भ नशाइ ॥ गयो तेरहें कोट धसि द्रोण उठे
 अकुलाइ ५४ (द्रोणउवाच) चौपाई ॥ बालक तरण में
 कित आयो । हौंन सुन्योगृहते कितधायो ॥ तोसंगसंग्र-
 म हौं कत मंडौं । बालक जानि हियेअबच्छंडौं ५४ जान-
 तहूँ अब क्यो भगिजैहौ । क्यो करिकै इखु तीक्ष्ण सैहै ॥

काल बलीवर तो कहँ लायो । बालक भूलि इहांकत
 आयो ५५ पारथ भीम युधिष्ठिर आवै ॥ सो कछु नेक
 प्रवेशहि पावै ॥ तूकत पैठि सकै गढ़ माहीं । तो अवगा-
 हन की यह नाहीं ५६ ॥ दोहा ॥ सुनत कुंवर यह प-
 रजर्यो झुकि बोल्यो ये बैन । धनुगहि कर गुरु विप्र तू
 क्षणइक युद्ध करै ५७ ॥ सवैया ॥ बालक मोहिं गनो
 जिन द्रोण सुक्यों नहिं वाण शरासन साजत । जानत-
 हौ शशिवंशकी रीति नहीं लखिकै कोउ युद्धहि भाजत ॥
 मोसँग जौलगि आपुजुरै नहिं तौलगि हौं इहि मंडल
 गाजत ॥ तौलगि आपुन चित्तन आनत जौलगि बाणन
 शीश बिराजत ५८ ॥ दोहा ॥ कौन हमारे बंशमें भाग्यो
 देखि जुझार । ताते द्रोण विचारिकै करटेको करवार ५९
 कृपा करौ जो आप उर प्रथमहिं करो प्रहार ॥ रह्यो न
 धोखे चित्तमें धरिये आप हथ्यार ६० ॥ गीतिका छंद ॥
 वाण द्रोण तजै नहीं इन बचन कोटिक भाषियो । जानि
 बालकबेष करुणा हृदयमें बहुराखियो ॥ कोप करि अभि-
 मन्यु छाँड़े कालसे शरलेखिकै । सहजही तिन छीनि
 डारे उरध आवत देखिकै ६१ ॥ दोहा ॥ खुरप वाण अ-
 भिमन्यु लै ध्वजा पताका काटि । डारे भूतल शरन सों
 सब दललीन्यो पाटि ६२ ॥ सवैया ॥ जैबहु कालहुने
 जित बार सोते उजरे नहिं युद्ध अनैसे । वाण बिधे सब
 के तनयों जिमि रोषित ब्याल बिले महँपैसे ॥ शर सनद्ध
 भये अध अंधक मध्य गिराय दये सब ऐसे । ज्यों उनमत्त
 मतंग सरोवर पैठि बिदारत बारिज जैसे ६३ ॥ दोहा ॥

हयो द्रोण हवै लक्षशर कह्यो न संग्रम जाइ । शलभा-
 गण ज्यों ब्योमधर रहे वाण तहँकाइ ६४ ॥ सवैया ॥
 कोटिन कोटिहुते बहु योधासु काहुन द्वै घटिका वि-
 रमायो । पौन के गौन ते बाढ़ि उठ्यो दल नीरद संघटसो
 बिचरायो ॥ भूतल ब्योम दिशा विदिशा सुत पारथ केशर पंजर
 छायो । हवै भय भीत सशो कित अंगन कौरव जानत
 अर्जुन आयो ६५ ॥ दोहा ॥ मंडलीक कीनो धनुष पारथ
 सुत बलिवंड । वेध्यो गुरु द्वै लक्षसों जीत्यो समर अखंड ॥
 ६६ समर सह्यो नहिं द्रोण गुरु रह्यो मानि हिय हारि ।
 पैठ्यो अगिले कोट में पारथ सुत भट भारि ६७ और
 सबल थल जीति कै पहुंच्यो करण निकेत । तबहीं उठि
 ठाढ़ो भयो सोई रण के हेत ६८ (करण उवाच) दो-
 धकच्छंद ॥ जानत हों शिशु मीच बुलायो । ठीठ भयो चलि
 मो ढिग आयो ॥ वृद्ध हुतौ द्विज द्रोण पुरानो । हों ति-
 नुका करि तो कहँ जानो ६९ जीवित क्यों न बचै भजि
 मोपै । होय कहा अब मो ढिग तोपै । पारथ को सुत यों
 तब भाखै । कर्ण बुलाउ जो तो कहँ राखै ७० ॥ सवैया ॥
 बीर अबीर महा मट भीर सो तीरही तीर खरे सबहेरे ।
 आजु तबै सब गर्भ हरो अब पायो है मैं करि आपने नेरे ॥
 जीवत जाय न सन्मुख आयकै तो सों मूढ़ कहों यह टरे ।
 भूप युधिष्ठिर की जय को कुरु नंदन बाधहुं देखत तेरे
 ७१ ॥ दोहा ॥ आप धनुर्धर धीर तुम रहे कहाइ कहाइ ।
 तौ बलदाई जानिहों युद्ध जीति जो जाय ७२ दुर्योधन
 बांधों जियत तेरे देखत आज । नृपता महि मंडल करें

युधिष्ठिर महाराज ७३ ॥ सुंदरीकुंद ॥ करण महीपतिको प
 कियो जब । ऊरध में शर छाये दये तब ॥ ते अभिमन्यु
 बली रण तोरत । सन्मुखते अंग नेक न मोरत ७४ आहि
 धनुर्धर धीर महावर । व्योमहि छावतु है शरही शरा ॥ अद्भुत
 युद्धनहीं कहि आवत । कोउपमा कहि ताहि बतावत ७५
 दोहा ॥ लख्यो करण अभिमन्युसों जबहि जयद्रथयुद्ध ॥
 बलसों रोंकै पंडुसुत तिरछौ पैठि सकुद्ध ७६ ॥ चौपाई ॥
 भूप युधिष्ठिर भीम प्रचार्यो । तोपहं जाय न सो अरि
 मार्यो ॥ पंडु महीपति के सुत रोके । बैठिरहे सुसवाईस
 शोके ७७ ॥ दोहा ॥ भयोसहार्द ईशबर रोके पंडवचारि
 रह्यो जयद्रथ रोपि पगु अंगदकी उनहारि ७८ ॥ चौपाई ॥
 चलि अभिमन्यु गेह में गयो । पारथ कुंवर अकेलोभयो ॥
 भयो करण सों युद्ध कराल । कृप्यो अकाश धराशरजाल
 ७९ तब अभिमन्यु बढ्यो बहुक्रुद्ध । रबिनंदन सहिसक्यो
 न युद्ध ॥ बिचलि भग्यो नहि रोप्यो पांउं । उर पारथ
 सुतके भौचाउं ८० ॥ सुंदरीकुंद ॥ बाणन साथ उड़ाये
 दये भट । पौन चले जिमि नीरद संघट । कौरव यों
 लखिकै उर आनत । आय गयो रण पारथ जानत ८१
 दोहा ॥ पाछे देख्यो पार्थसुत साथ न पांडव चारि ॥
 बिलखि बदन बिस्मयकियो रह्यो बिचारि बिचारि ८२
 (अभिमन्युरुवाच) ॥ गीतिकाकुंद ॥ आजुतो रण भीम
 होतो युद्ध मेरो देखतो । हवै पराजय करण भाग्यो सकल
 कौतुक लेखतो । लखै पौरुष कौन मेरो कियो इहि थल
 आयकै । जानिकै उतपात कौरव कुंवर कैंक्यो जायकै

८३ दीपऊ परज्यों पतंगों यों परे भट धायकै । मेघ झर
 ज्यों वृष्टि शायक करी चहुं दिशि जायकै । जुरे रणभूरि-
 श्रवा दह बैन दूशासन बली । जुरे कौरव युत कलिंगहि
 शोभिजै रण अस्थली ८४ ॥ दोहा ॥ चहुं दिशिसे अभि-
 मन्यु तब कैंकि लयो बलिबंड ॥ घेर्यो सुरपति गिरिन
 ज्यों करि करि कोप अखंड ८५ बढ्यो कोप अभिमन्यु
 उर तब मुकुराये बाण ॥ कटे पताका चौर ध्वज कटिगथे
 करण कृपाण ८६ ॥ भुजंगप्रयातछंद ॥ चले भागि चौहूं
 दिशा रावराने । निषंगी चले चर्म बर्मा पराने । रथी
 सारथी अश्व हस्ती भगेहैं । नहीं युद्धमें बीर कोऊ खरेहैं
 ८७ पताका ध्वजा काटि द्वैखंड कीने । तजे अस्त्र काहू
 नहीं हाथ लीने । तहाँ कोपिकै कर्णको पुत्र आयो । मनो
 दंडवारी महारोस छायो ८८ तबै पार्थ के पुत्रसों युद्ध
 ठान्यो । नहीं चित्तमें नेकहू त्राश आन्यो । कटे बाणहीं
 बाणसों अंगताके । करें बीर दोऊ दुहूं युद्ध थाके ८९
 दोहा ॥ रवि नंदन को पुत्र तहँ बीरनि मणि वृषकेतु ॥
 पार्थ पुत्रको जोरही जान न भीतर देतु ९० अर्द्ध चंद्र
 अभिमन्यु लै हयो हियो बलबीर ॥ मोहित हवै भतल
 गिर्यो अति थर हर्यो शरीर ९१ ॥ चौपाई ॥ दुर्योधन
 सुत लक्ष्मण आयो । पारथ सुतसों रणकोधायो ॥ दोऊ
 भिरत न माने हारि । सकैं न कोऊ काहू मारि ९२ दिशि
 दिशिते मिलि कौरव आये । चहुं दिशिते तिन शर मुक-
 राये ॥ मुद्गर काहू शक्ति प्रहारी । बलकरि पारथ सुततन
 डारी ९३ मुर्छितगिरे धरणि अकुलाई । दुर्योधनसुत तब

उठि धाई ॥ दोहथ गदा सुलक्षण हयो । बिनाजीव पारथ
सुत भयो । धर्मयुद्ध नहिं हियेबिचार्यो ॥ पर्यो कुंदर तिहि
दुष्ट संहार्यो ॥ सुनत युधिष्ठिरबहु दुख पायो । अतिआनंद
कटकमें छापो ६५ ॥ दोहा ॥ कृष्णपक्ष एकादशी मारग
मासबखानि । प्राणतजे तबपार्थ सुतकटक रह्योभयमानि
६६ इति श्रीमहाभारतपुराणे विजयमुक्तावल्यांकविच्छत्रवि
रचितायां अभिमन्युविमोहनेनाम पंचत्रिंशोऽध्यायः ३५ ॥

॥ दोहा ॥ अर्जुन आयो जीतिरण पश्चिम दिशि अब
गाहि । निरखि सशोक्यो कटक सब अति भय उपजी
ताहि १ ॥ भुजंग प्रयातछंद ॥ सशोके बिलोके सबै राव
राने । महादुःख संयुक्त ते को बखाने ॥ नगावैं गुणी ना-
कहूं बंदि गाजैं । बुधी सों नहीं बेद विद्या मसाजैं २ मसा
लैं न दीसैं नहीं दीप देखैं । सबैशूर आतंक सो चित्त
लेखैं ॥ तबै पार्थ जीमें महा त्राश आयो । तहाँबैन श्री-
कृष्ण जूको सुनायो ३ (अर्जुन उवाच) ॥ दोहा ॥ बिलख्यो
देख्यो कटक सब अरु बिलख्यो सब साथ । जानतु हों
जूझो इहाँ धर्म पुत्र नर नाथ ४ कैरण जूझो भीम अब
सबविधि भयो अकाज ॥ पुरुषारथ सब बलगयो गयो
हाथते राज ५ नृपति युधिष्ठिरपै गये देख्योसब परिवार ।
पगबंदे करजोरि कै अरु बूझ्यो व्यौहार ६ (अर्जुन उ
वाच) देखत सबहीं कुशल सों कुशल सकल अवनीश ।
कौनहेत बिलखे सबै सोमोसों कहिईश ७ लाज महाउर
नृपति कै कह्यो कछूनहिं जाइ । हरुवैं नृप बोल्योतबै

बिलखि बदन अकुलाइ ८ (राजोवाच) कहों कहाँ कह-
 तन बनै भई अनैसीबात । जूझि पर्यो अभिमन्यु रण
 दुखन जरत सब गात ९ कपट युद्धरचि द्रोण गुरु चक्र-
 व्यूह बनाय । ताहित हमको पार्थ सुनि न्योतो दियो प-
 ठाय १० सोरण हम जानै नहीं रहै चकित नरनाथ ।
 साहस कै अभिमन्यु तब वीरालीनो हाथ ११ पैठ्यो बंकट
 कोटमें भीम आदिदैं साथ । द्रोण करण को देखिकै धी-
 रजु रह्योन हाथ १२ नकुल सहदेव भीमको रह्यो जय-
 द्रथ रोंकि । भयो सहार्इ ईश बर रहे बिलोकि बिलोकि
 १३ कुंवर करण सों युद्ध करि फेरि गिर्यो मुरझाय ।
 लक्ष्मिन कोपि गदा लई परे सुमार्यो आइ १४ हाहा
 करि सुनिकै गिर्यो तबहीं पारथ वीर । बीते एक मधूरते
 सुधिमैं भये शरीर १५ (अर्जुनउवाच) सहैबाण क्यों
 द्रोणके क्यों करि अँगयो युद्ध । मुख चाह्यो सुत कौन को
 करन भयो जब क्रुद्ध १६ रोंकिरह्यो मगु जयद्रथ भीम
 न पायो जान । निपट अकेलो पुत्र तब तिहि थल छांड्यो
 प्रान १७ ॥ चौपाई ॥ भीमसेन जो पावै जान । क्यों
 बूझन पावै सुनि दान ॥ कह्यो जयद्रथ को यह मायो ॥
 ताते में अब यह व्रत लायो १८ आजुबैरु सुतको हों
 सारों । अथवत भानु जयद्रथ मारों ॥ जो पौरुष इतनो
 नहि साजौ । मात पिता पांडुहिहों लाजौ १९ ॥ सवैया ॥
 मात पिताहि लजाउं महा अरु तीरथ धर्म सबै व्रत
 हारों । दोष बिना तरुणीहि तजैं तिनकी गति पाय निरै
 पग धारों ॥ बिप्रनको अपमान किये पति सों त्रिय बीच

बिछोहहि पारों । एतिक पातक मोहिं लगें पुनि जोनहिं
 आजु जयद्रथ मारों २० हेमहरे द्विज दोष करे अति
 गर्वभरे गुरु मानन पावें । मित्रको द्रोहलये पर चित्त
 सोचित्तकु कर्मनिके मगलावें ॥ झूठिये साखिजे आवत
 भाखिनि एज कहा अप स्वारथ भावें । जोन बधों वर आजु
 जयद्रथ एतिक पातक मोशिर आवें २१ ॥ दोहा ॥ करी
 पैज हति पार्थ यह बहु दुख करि रणधीर । जब जान्यो
 विस्मय करत चरित रच्यो यदुबीर २२ माया वपु अभि-
 मन्यु तब अर्जुन को दरशाइ । सपनो सांचों जानि चित
 संभ्रम रह्यो भुलाइ २३ शिवपुर देख्यो पुत्र तब सपने
 खेलत सारि ॥ चितयो सो इत में नहीं रह्यो पार्थ मन
 मारि २४ रुदन करयो सुत इंद्रके आसू चले अपार ॥
 परे पुत्रकी पीठिपर चितै कह्यो तिहिबार २५ (अभिमन्यु-
 उवाच) ॥ सोरठा ॥ कौन कौनको भायतू मूरखरोवै कहा ॥
 सब जग आवत जाय कर्म फांस वंधन बंध्यो २६ को
 माता को पूत कौन कहो काको पिता । बरधूतें जग
 धूत कित याको संशय करो २७ ॥ दोहा ॥ भग्यो शोक
 तब पार्थ को सुनत पुत्र मुख बैन ॥ इतने निरखि चरित्र
 को उघरि गये फिरि नैन २८ ॥ नाराचछन्द ॥ कह्यो चरित्र
 कृष्ण सों जो पार्थ आपु देखियो ॥ रह्यो भुलाय चित्तमें
 कछू बिषादना कियो ॥ उठ्यो समर्थ गाजिके बढ्यो सु-
 रोष चापसों ॥ कस्यो निखंग कोपिकै कराल कालभालसों
 २९ ॥ त्रोटकछन्द ॥ कुरु राज सुनी यह बात जहीं । प्रगढ्यो
 गुरु सों सब भेद तहीं ॥ कछु आपुन आजु बिचार करो ॥

यहमो बिनती चित मांहि धरो ३० दिन एक जय द्रथ
 राखि अबै । मग पूजहि तो मन काज सबै ॥ व्रत आजु
 धनंजय कोटारि है ॥ नरहै जग जीवत सो मरिहै ३१
 कुरुराज कहै यह मानि अबै । सुत पंडु अनाथ बिचारि
 सबै ॥ तबहीं नृपसों गुरु द्रोण कहै । बलजा कह रा-
 खहुं कौन लहै ३२ ॥ दोहा ॥ द्रोणाचारज तब रच्यो
 सकटव्यूह बनाइ ॥ भेद भाव जाको कछू कहूं न जान्यो
 जाइ ३३ आगे सूची अग्र सम रच्यो विकट अति व्यूह ।
 आस पास हाथी रथी राखे शूर समूह ३४ यमहुं कौन
 प्रवेश जहँ दुर्गम दुसह संवारि । नर किन्नर नहिं लहिं
 सकैं रहैं सुरेशौ हारि ३५ भाग्यो चाहत जयद्रथ पै नहिं
 पावत जान । राख्यो सकटव्यूह में तजों अथावत भान
 ३६ ॥ चौपाई ॥ राख्यो व्यूह मांझ सो लाय । यमहुं
 पै सो लख्यो न जाय ॥ आस पास गज रथ की पांति ।
 दुर्गम दुसह रच्यो बहु भांति ३७ रक्षक द्रोण चमूपति
 बीर । अतुल पराक्रम साहस धीर ॥ गाज्यो पार्थ धनुष
 लैवान ॥ स्वारथ कीनो तब भगवान ३८ ॥ दोहा ॥ बाजे
 मारू जूझकै अति गति तबल निशान ॥ भेरि शंख बहु
 धुनि भई करवर गहे कृपान ३९ प्रथम युद्ध गुरु द्रोण
 सों असि वर बाजी मार । नहिं प्रवेश अर्जुन लहै करत
 अमितसंहार ४० मार्यो परै न पार्थपै द्रोणविप्र बलबंडा
 शरसमूह नभकाय तहँ संग्रम कियो अखंड ४१ ॥ गीति-
 काछंड ॥ पार्थके रथकेतुरंगनि छतनतिल तिलकैछये । दै
 सके नहिं अग्रको पगु परम बिहबल व्हैगये ॥ चाहि मुख

श्रीकृष्णबोले वीरयह सुनिलीजिये । अंबुपीवै बाजिजैसे
 सो कछूबिधिकीजिये ४२ बाणछाय अकाश अर्जुन गेहसों
 तब करि लयो । मारि शरसों गंग काढी नीर अश्वन को
 दयो ॥ फेरिकरि श्रीकृष्णजू रथपैचढ़े अकुलाय कै । पंडु को
 सुत द्रोणसों तबहीं जुर्यो रण आयकै ४३ ॥ दोहा ॥
 बल करिकै द्विजद्रोण के शर हित चित्त अमाय । गयो
 पंथदै दाहिनो दलमें पहुंच्यो जाय ४४ भयो समर नृप
 कर्ण सों तिनहूं रण अववाइ । पेलिगयो चलि अगमनो
 जयको शंख बजाइ ४५ योजन तीनि गयो बली चलही
 कटक मँझार ॥ तहां जुर्यो रण शकुनि सों संग्रम भयो
 अपार ४६ भयो कुलाहल सोंरहै सुन्यो कछू नहिं
 जाय । सुन्यो शंख नहिं पार्थ को धर्मपुत्र बिलखाय ४७
 चौपाई ॥ पांच जन्य शब्द सुनि राई ॥ मनहीं मन बि-
 लखै अकुलाई । सत्य किजादव पठयो तहां ॥ संग्रम क-
 रत पार्थहो जहां ४८ रथ चढ़ि धनुष बाण तिनलयो ।
 प्रथम द्रोण गुरु आड़ो भयो ॥ कह्यो आदि यादव रण
 आयो । मैहीं तुव गुरु पार्थ पठायो ४९ घटिका चारिक
 संग्रम भयो ॥ भूतल व्योम शरन सोँक्यो । निशि बि-
 दिशा सूझै नहि नैन ॥ सात्यकि कहै विप्र सों बैन ५०
 सात्यकि उवाच) ॥ दोहा ॥ जाहु विप्रअब भागिकै समर
 करत बे काज । जोन भगाऊं तोहिं हों तौ गुरु पार्थहि
 लाज ५१ बिषम बाण उर लगतही द्रोण गिर्यो अकु-
 लाइ ॥ जहां हुतो भूरिश्रवा ता ढिग पहुंच्यो जाइ ५२
 कोप्यो लखि भूरिश्रवा करलीन्हें दशवान । सात्यकि के

तिन उर हये सुरपति बज्र समान ५३ बहुत युद्ध तिन
 सों भयो को कहि सकै सुनाइ ॥ तब सात्यकि मोहित
 भयो धरणि गिर्यो अकुलाइ ५४ ॥ गीतिकाछंद ॥ धा-
 यकै भरिश्रवा करि केश यादवके गहे । क्रोध सों झक-
 झोरिकै बहु बचन इहि विधिके कहे । आजुही शठ तोहि
 मारौं तोहि कौन बचावई ॥ आयकै अबतोहिं राखेताहि
 क्योंन बुलावई ५५ ॥ दोहा ॥ ताके बधहित खड्ग ले
 भुजा उठाई वीर । निरखि पार्थ बहुक्रोध करि बाण ह-
 न्यो रणधीर ५६ ॥ दोधक छंद ॥ दक्षिण बाहु सखड्ग
 उड़ानी । टूटि परी सबरे दल जानी ॥ कूटि गयो तब
 यादव ऐसे । केहरि ते मृग कूटतजैसे ५७ यादव कोपि
 कृपाणसम्हार्यो ॥ कोबरणौ बलही अरि मार्यो । काटि
 तबै शिर भूतल डार्यो ॥ ज्यों द्विजयज्ञनमें पशु मार्यो ५८
 नगस्वरूपिणी छंद ॥ नधीर सेनमें रही । न जाय सो
 कछू कही ॥ शशोकवंतहवै गये । नरेशदुःख सों छये ५९
 दोहा ॥ पहुंच्यो अर्जुन पास तब सात्यकि यादवजाय ।
 हत्यो बली भूरिश्रवा कुरु नंदन पछिताय ६० ॥ सो-
 रठा ॥ कह्यो युधिष्ठिर राय भीमसेन को बोलिकै । सुधि
 लावहु तह जाय जहां पार्थ संग्रम करै ६१ ॥ त्रोटकछंद ॥
 कर बाण शरासन भीमलये । तब पार्थ की सुधि लेन-
 गयो ॥ तह मारग में द्विज द्रोण लह्यो । तिन देखतही
 इमि बैन कह्यो ६२ फिरि जाहु घरै नहिं बाट लहौ ।
 ममवाण नहीं क्षण एक सहौ ॥ सुनि कै दुहुं वीरन
 युद्ध कियो । धर भूतल वाणन छाड़ लियो ६३ तबहीं

रण भीमहिं क्रोध भयो । गुरु को रथ वीर उठाय लयो॥
 पटक्यो धरणी थल में जवहीं । न रह्यो भगि विप्र ग-
 यो तवहीं ६४ ॥ दोहा ॥ रथ के बाजी भीम तब क्षण-
 हीं में संहारि । बढ्यो क्रोध षोडश कुंवर तवहीं डारे
 मारि ६५ कोपे दूधर दुष्ट बल सुबल सुबाहु प्रचंड ।
 सोम कलिंग अशेष रण जिन जीति बलवंड ६६ भीम-
 सेन रण कोपिकै इक इक शर सबमारि । और रथी रण
 धीर रण डारे बहुत संहारि ६७ चलयो पूर रण श्रौण
 को को कवि कहै बखानि । भागि चले बहु शूर गण जुरे
 न क्षणभरि आनि ६८ ॥ दंडककुंद ॥ श्रोणित सलिल माहिं
 कीने के करीसे शीश श्याम श्याम केश ते सिवार ऐसे
 लेखिये । ब्याल ह्वै विशाल शृंड दंडनि के जाल जहां
 ग्राह के करीन के कलेवर विशेषिये । कच्छपति रति
 चर्म चक्रवाक चक्र रथ चामर पताका गण मीन अवरे-
 खिये । पवन पूत क्रोध ह्वै समर सिंधु साच्यों रच्यो
 फूलन मराल बग माग द्विज देखिये ६९ ॥ दोहा ॥
 भूतल डारिमहा रथी आगे पहुंच्यो जाय । निरखि शरा-
 सन बाण लै करण उठ्यो अकुलाय ७० (करण उवाच)
 जीते केतक समर तैंभीम कहां अवजाया जीवन दुर्लभ
 जानि बशपर्यो हमारे आय ७१ भीम करण के उरहये
 सप्तबाण करि क्रुद्ध । धनुषकाटि रवि पुत्र तब हृदयहन्यो
 शर सुद्ध ७२ ॥ चौपाई ॥ फेरि क्रोध रवि नंदन भयो । क-
 वच भीमको तब कटिगयो ॥ धायो भीम उघारे अंग ।
 कीनो जाय तहां रणरंग । ७३ रथ आरूढ़ पवन सुत

भयो । रवि सुतके उर मुठिका दयो ॥ भूतल गिर सौ
 उठि अकुलाई । मेल्यो धनुष भीम शिर आई ७४ बार
 बार रिससों झक झोर्यो । ऐंच्यो कइयो बारकढोर्यो ॥
 भीमसेनको पौरुष गया । करण शक्ति अति व्याकुल
 भयो ७५ ॥ दोहा ॥ करि सुधि कुंती बचनकी भीम दयो
 मुकुराय । बिलख बदन चली पार्थ पै तबहीं पहुंच्यो
 जाय । ७६ देख्यो पौरुष पार्थ को तब कुरु नंदनराय ।
 सोलह सहस मतंग तहँ दीनेतुरत पठाय ७७ ॥ भुजंग
 प्रयातछंद ॥ चले मत्तमातंग ते अग्र आये । मनो भूतली
 में महा मेघ छाये ॥ तहां पंडु के पुत्र चिंता भ्रमाये । स-
 शोके हियेमें महा त्रास लाये ७८ हिये शोच शोचै गयो
 नेम मेरो । रह्यो आसराहै दया सिंधु तेरो ॥ सदा आ-
 पहोदीनही के सहाई । परी भीरभारीसबैसो नशाई ७९
 ॥ दोहा ॥ कही भीमसों पार्थतब अब बलवंत सम्हारि ।
 कातर लों अति शिथिल तनकहा रह्यो हिय हारि ८०
 यों सुनि गाज्यो सिंह ज्यों आकंपे मातंग । बिचलि चले
 मृग यूथ ज्यों सूखि गयेसन अंग ८१ उछ्यो भीम बलि
 दंड तब कह्यो न पौरुष जाय । एक बार दश सहस गज
 ऊरध दये चलाय ८२ ॥ सबैया ॥ एक रथी रथमंत महा
 इक एक हते बर बीर निखंगी । तेउ जुरे नहि आयुध
 लै जु हते बल विक्रमसत्र के भंगी । मत्त मतंग तजे नभ
 को बिरच्यो रण भीम सदा रण रंगी । पौनके चक्र में
 जाय परे सबह्वै रहे अंग त्रिशंकु के संगी ८३
 दोहा ॥ जेतिकगज ऊरध तजे फिरि भुव गिरे न आय ।

सहस्र पंच गजदूसरे ऊरध दये चलाय ८४ लंक पौरि
परते गिरे ककुक कंदरन माझ । सहस्र मतंग गदा हने
जानि नीयरी सांझ ८५ दुर्योधनके अनुज तहँ तीसहने
बलबीर । पैरतरथ जल जंतुसे श्रोणितसलिल गंभीर ८६
हयहस्ती रथ भंजिकै दीनेदल बितलाय । निकट जय-
द्रथ पार्थतब पहुंच्यो बलही जाय ८७ सूक्ष्म निरख्यो
द्योस तब बार बार अकुलाय । उतहि जयद्रथ निशिचहँ
निरखि निरखि रविजाय ८८ ॥ दोधकच्छंद ॥ द्वैजनको
मन शोचत ऐसे । है तरुणी चकई मनजैसे ॥ रैनचहँ वह
द्योसहि चाहै । यों तिनके मनमें मनसाहै ८९ ताकत
भानु जयद्रथ देख्यो । पार्थ तबै निजकाज बिशेख्यो ॥
अंजलि बाण धनंजयलीनो । ताक्षणहीं अरिके शिरदी-
नो ९० ॥ दोहा ॥ उख्यो बाणके संग शिर कोकबि कहै
बनाइ । परयो तासुपितु अंजुली निरखि गिर्यो अकुला-
इ ९१ ॥ चौपाई ॥ जबहीं शिर अंजुलि में गयो । निर-
खत शोक वंत सोभयो ॥ कौरव दलमें अति भयभा-
री । परे औंध मुख नरअरु नारी ९२ हाहा कुरुनंदन अनु-
सरै । कोऊ काहुं धीरन धरै ॥ पूरि पैज पारथकी भई ।
हरि अर्जुन शंखध्वनि ठई ९३ इति श्रीमहाभारतपुराणे
विजयमुक्तावल्यांकबिष्णुसिंह विरचितायां जयद्रथवधन
अर्जुनविजयवर्णनो नाम षट्त्रिंशोऽध्यायः ॥ ३६ ॥

दोहा ॥ जूझौ जानि जयद्रथै दुर्योधन हवैक्रुद्ध । तुरत
हि रथ ऊपरचढ्यो चलयो युद्धको युद्ध १ ॥ सुंदरीछंद ॥

सूर्य छिप्यो तमरैनिभई तब । गाजिमहारथमंत उठेतब ॥
 देखिघरूकहिक्रोध बढ्योअति । ब्योमगयो बहुशूरन को
 हति २ रैनि भई न तहां कछु सूझत । अपने बाणन लै
 भट जूझत ॥ युद्ध भयो कबि कौन बखानहिं । द्वैदल में
 कोउ हारि न मानहिं ३ ॥ दोहा ॥ तजत घरूकाऊर्द्ध
 ते गिरिवर शिखर अपार ॥ शरतर फरसा शक्तिसोंकरत
 अमित संहार ४ ॥ चौपाई ॥ भयो अंधेरो ना कछुसूझत ।
 जल थल कौरव को दल जूझत ॥ नारदमुनि मसाल
 दरशावैं । दल संहरत महा सुख पावैं ५ अर्द्ध रैनिलों
 बीती मार । द्वै क्षोहणि दल कियो संहार ॥ दलकोनाश
 जानि कुरुराय । कह्यो करणसों तब अकुलाय ६ (दुर्यो-
 धनउवाच) ॥ दोहा ॥ हवै अदृश्य यह ब्योम तें बरषत
 गिरि तरुजाल । प्रलय करत सब दल हन्यो कीनोकर्म
 कराल ७ आनी शक्ति जो पार्थहित तासों याहि संहारु ॥
 बड़त रणकी धारमें यह दल बीर उबारु ८ शक्तिप्रहार
 कियो करण जानि कटक को नाश ॥ गिरो ऊर्द्ध ते बीर
 धर भयो सकल दलत्राश ९ बज्रपातसों धरपर्यो गिरि
 से सुभट गिराइ ॥ हन्यो खूँदि एक क्षोहणी दल सब
 चल्यो पराइ १० जूझि घरूका घर पर्यो पंडु पुत्र दुख
 पाइ ॥ रुदन करत तब हँसिउठेश्रीहरि बहु सुखपाय ११
 समाधान करि योंकही पार्थ जियोहै आज ॥ गईजुसेखी
 कर्णकी अब सीझो सबकाज १२ भयो द्योस तब त्रयो-
 दशी जब बीत्यो इक याम ॥ उठ्यो द्रोण तब गाजिकै
 कियो अमित संग्राम १३ ॥ चौपाई ॥ पांडवसेन चल्यो

अकुलाइ । काहू पास न राख्यो जाइ ॥ नृपति विराट
 तीस शर हयो । इन करि क्रोध शरासन लयो १२ तीन
 बाण गुरुके उर मारे । काटि पताका औ ध्वज डारे ॥
 एक बाण उरमें तब हयो । लागत द्विज व्याकुल ह्वै
 गयो १५ ॥ दोहा ॥ बहुरि सम्हारो द्रोण गुरु शायक
 हन्यो ललाट ॥ बास लियो हरिलोक तब जूझ्यो भूप
 विराट १६ जबहींझुकि धरणीगिर्यो करवरगहेकृपान ॥
 रोक्यो द्रुपद नरेश गुरु लहै न आगे जान १७ सहदेव
 धायो नकुल पार्थ युधिष्ठिर आप ॥ जग मंडल नवखंड
 में जाको अमित प्रताप १८ ॥ त्रोटकछंद ॥ चहुंओरनि
 ते गुरु घेरि लयो । तब देखतही बहु रोष भयो । सबके
 उरमें बहुबाण हने । मुरझाय गिरे कबि कौन भने १९
 (अर्जुनउवाच) जगबंदनदै सिख मोहिं अबै । रणजीत-
 हिं ज्यों वर आजु सबै ॥ तुमहीं बिपदा सब ठाम हरी ।
 मनकी बहु पूरण आशकरी २० ॥ कवित्त ॥ त्रिभुवन ईश
 जगदीश सों करन जोरि नाथ नाथ शीश पार्थ बंदना
 महा करी । काटि काटि कोटि कोटि संकठ अनेक भांति
 भांति २ जनन की आपदा सबै हरी । भारी भारी भीर
 भाव जहाँ जहाँ जानीभय तहाँ तहाँ पैज कहूं सेवक की
 नाटरी । अमित अपार बल संतन के रखवार गावत नि-
 गम नव कीरति घरी घरी २१ (श्रीकृष्णउवाच) नारा-
 चछंद ॥ तजै कृपाण बाण द्रोण पुत्र जौ मर्यो सुन्यो ।
 कोटिघों कराल शोक दुःखहोहि सोगुन्यो ॥ सरोष भीम-
 सेन आज हाथ जो गदा धरै । तुरंत द्रोण पुत्र नाम को

मतंग संहारै २२ ॥ दोहा ॥ अश्वत्थामा नामगज हन्यो
 भीम करि कोह ॥ द्रोण होइ बिह्वल सुनत बड़ै हिये बहु
 कोह २३ बैन युधिष्ठिर नृप कहै तबहिं बिप्र पतियाइ ॥
 तजै सकल आयुध सुनत अति बिह्वल हवै जाइ २४
 द्रुपद पुत्र धृष्टद्युम्न तबहीं काटै शीश ॥ यह उपाय करि
 जीति हौ बाले त्रिभुवन ईश २५ दुरद अश्वत्थामा
 हन्यो भीमसेनतिहिबार ॥ हन्यो द्रोण तब पुत्र में अव
 कत गहै हथ्यार २६ द्रोणनहीं रण को तजै बैन सुन्यो
 न पत्याय ॥ तौ मानैं मन बचन क्रम कहै युधिष्ठिर राय
 २७ तबै प्रचार्यो धर्मसुत कहि गुरुतजे कृपान ॥ बंधुन
 हित बोल्यो तबै भूपति बुद्धि निदान २८ (युधिष्ठिरउ-
 वाच) समर अश्वत्थामा हन्यो भीमसेन सुनि बिप्र ॥
 नर नारी कुंजर हत्यो कही नृपति यह छिप्र २९ (ओ-
 टकछंद) यह बैन सुन्यो गुरुद्रोण जहीं । बहु व्याकुल
 हवै गिर्यो भूमि तहीं ॥ समझावत कौरव सोनसुनै ।
 बहु व्याकुल हवै द्विज शीश धुनै ३० ॥ सोरठा ॥ तब
 गुरु तजे कृपाण धृष्ट द्युम्न अबलोकि कै ॥ शिर काट्यो
 तिहि बाण धर्म पुत्रकी जय करी ३१ ॥ दोधकछंद ॥ दु-
 र्योधन के दल दुचिताई । मोपै छत्र कही नहिं जाई ॥
 बुद्धि थकी सुधिकी गति थाकी । आश थकी मनमें नृप
 ताकी ३२ ॥ दोहा ॥ धर्म पुत्र जय रण भई गहरे बजे
 निशान ॥ कर्यो चमूपतिकरण तब दुर्योधन दै मान ३३
 इति श्रीमहाभारतपुराणे विजयमुक्तावल्यांकविच्छत्रसिंहवि-
 रचितायां द्रोणगुरुवधोनाम सप्तत्रिंशोऽध्यायः ३७ ॥ इति ॥

अथ कर्णपर्वकथनं ॥

सोरठा ॥ दलपति कीनो कर्ण दुर्योधन अपने सुप्रण ॥
 जन जनको दुखहर्ण पट् दरशन को कल्पतरु १ ॥ दोहा ॥
 चढ्यो कर्ण रणधीर तब कर लीने धनुवान ॥ सुर नर
 गणके तासुकी पटतर नाहीं आन २ शल्य कियो स्थ
 सारथी पारथ जीतन काज ॥ कृतवर्मा लक्ष्मिन चढ़े
 लैसँग शकुनि समाज ३ दुश्शासन रक्षक भयो कर्णसंग
 सुखपाइ ॥ यूथ जूझ सेनाचली गरजि निशान बजाइ ४
 अर्जुन अर्जुन कहत भट आये रण गलगाजि ॥ बांधिलेउ
 बर आजुही जानन पावैं भाजि ५ सजे कँवच सन्नाहतन
 बाण शरासन हाथ ॥ बीर दुशासन आदिदै सब धाये
 इक साथ ६ भीम दुशासन देखिकै परम क्रोधसोधाया ॥
 धरिकै पटक्यो भूमिपर दैग्रीवा पै पाय ७ (भीमसेन
 उवाच) ॥ सवैया ॥ है कोउ द्वौ दलमें समरत्थ दुशासन
 को बर आनि छुड़ावै । रेंकुरुनंदन रेखिनंदन सोकरुसों
 तोपै बनि आवै । शूर घने रण रोवत देखत जूझ करै
 सब यों मन भावै । कालहु ते उबरै भाजि जीवत जीवत
 सों भजि जान न पावै ८ ॥ दोहा ॥ द्वौदलमें समरत्थ
 जो याको लेहि छुड़ाइ ॥ पाछे कहिहौ बालकन देखत
 राजा राइ ९ शंखध्वनि हरि तब करी नत क्षणही
 अकुलाइ ॥ बचन भीमको पार्थ सुनि तबहिं युधिष्ठिर
 राय १० कौरवदल कछु नाकर्यो लीनीभुजा उखारि ॥
 केहरिज्यों मृगको उदरत्यों उरडार्यो फारि ११ ॥ सवैया ॥
 ज्योंरघुनाथहन्यो रणरावण जंभकिधौं सुरराज पछार्यो ॥

राघव वीर बध्यो बाणासुर तीक्ष्ण बाण समूल प्रहार्यो ।
 कै त्रिपुरारि हन्यो वर राक्षस एकहि बाण उरस्थल
 कार्यो । ऐसहिं भीम दुशासन मारि तबै मनको वह
 रोष निकार्यो १२ कोपिकै वीर बली बलसों दुश्शासन
 द्वैदल बीच सँहार्यो । केहरि ज्यों मृग दौरि दल्यो सुर-
 राज किधौं भुव पर्वत फार्यो । ज्यों हनुमंत बलीबलसों
 महिरावण को भुज मूल उपार्यो । त्यों नरसिंह सक्रोध
 भयो हरणाकुशको जो उरस्थल फार्यो १३ ॥ दोहा ॥
 मन भायो करि फारि उर रुधिर अंजुली चारि ॥ अँचै
 भीम प्रफुलित भयो मनको रोष निकारि १४ औररुधिर
 भरि अंजुली लैकै पहुंच्यो धाम ॥ जाय न्हवाई द्रौपदी
 सब पूजे मन काम १५ ॥ सोरठा ॥ यशहै जीवन मरि
 इहि पुर अरु वहि पुर सुखी ॥ ते सब हवैहैं धूरि द्विज
 दोषी अरु अपयशी १६ ब्यालबसै जिहि गेह पर द्वारा
 रतिजे पुरुष ॥ निश्चय जानोंएह मृत्युमाहिं संशयनहीं
 १७ छैपर तरुणीचीर सबजगमें अपयश लियो । मर्यो
 दुशासन वीर देखत सकल महारथी १८ द्रुपदसुतातब
 रुधिर न्हवाई । रण मंडल सो पहुंच्यो जाई ॥ नकुल
 शकुनि सौरण भयो घनों । जुरे असुर अरु सुरपतिमनों
 १९ बाणन मारि शकुनि बिचरायो । बध्यो उर वरभूमि
 गिरायो ॥ जूझत शकुनि कुलाहल भयो । हाहा
 शब्द सकल दल छयो २० ॥ दोहा ॥ भयो द्रुपद
 अरु करणसों अतिगति करि संग्राम ॥ जूझे भट द्वै
 सेनके वरणि सकै को नाम २१ कर्ण द्रुपद नरनाथ

को उर मारे दशबाण ॥ कौन कहै तिन धरणिधुकि
तत्क्षण छांडे प्राण २२ ॥ दंडकछन्द ॥ धीर तजे बीर
सबै व्याकुल शरीर हवैकै संग्रम गंभीर बीर कर्ण सो
महारथी । शूर कहलाने दहलाने दल दीरघ जे हाथी
हहलाने शंक जाय कौनपै कथी ॥ यत्र तत्र शत्रदाह दु-
र्घट बिकट भट काटि काटि कीने कालदंड लोकके पथी ।
कहूं डरे अश्व कहूं पायक पताका रथ कहूं गिरे रथी कहूं
महिगिरे सारथी २३ ॥ दोहा ॥ करण पराक्रम कै बढ्यो
नहीं सुरोंक्यो जाय ॥ कटक त्राश उर जानिकै रुप्यो
पार्थ रण आय २४ ॥ इति श्रीमहाभारतपुराणे विजय-
मुक्तावल्यां कविच्छत्रसिंहविरचितायां दुश्शासन शकुनि
राजाद्रुपदबधवर्णनो नाम अष्टत्रिंशोऽध्यायः ॥ ३८ ॥

त्रोटकछन्द ॥ रविनन्दन पार्थ जुरे रणमें । बहु क्रोध
दुहूं जनके मनमें ॥ अति संग्रम भो कवि कौन कहै । शर
जालन को तहं पौन बहै १ धर ऊरध बाणनछायलयो ।
छपि सूर तहां तम छायागयो ॥ अति अद्भुत बिक्रम कौन
कहै । सुरवे लखि लाखनि भूलिरहै २ ॥ दोहा ॥ बाण
चले दुहुबीरके योजन एक प्रमान । वेसै येई युद्धको पट-
तर नाहीं आन ३ अस्त्र शस्त्र सो परस्पर समर रचतदोउ
बीर ॥ जुरिजुरि क्योंहूं सरस महि दोऊ रण रणधीर ४
आयो वासर तीसरो क्योंहूं रण उस रैन ॥ सुर असुरन
यह कर्म कहूं सुन्यो न देख्यो नैन ५ कब छांड्यो कब
शरलयो सेन परै कहूं जानि ॥ मंडलीक कीनो धनुष थके

न क्योंहूँ पानि ६ रह्यो करणके तूण में बाण हवैगयो
 व्याल ॥ धर्यो धनुष बलवंड सो क्हांडि दियो उत्ताल
 ७ ॥ दोधकच्छंद ॥ आवतसो अहि श्रीहरिदेख्यो । पारथ
 काल हिये महँ लेख्यो ॥ दाबि कियोतबहीं रथनीचो ।
 शीश बच्च्यो लहि सूक्ष्म बीचो ८ वतटि किरीटहि-
 लै गयो सोई । सेन समूह ब्रशे सब कोई ॥ फेरि सो
 व्याल सरोषत धायो । कर्ण निकेत तबै चलिआयो ९
 (सर्पउवाच) ॥ दोहा ॥ निजअरि मोरोंपार्थहै करण सो
 बुद्धि निदान ॥ हनों शत्रु तुम मोह जो करिकै क्हांडो
 बान १० (कर्णउवाच) ॥ हौ समरथ पार्थहि हतों चाहों
 नहीं सहाय ॥ कह्यो न मान्यो सर्प कोवह करि थक्यो
 उपाय ११ ॥ चौपाई ॥ कटक सुकट पारथ रिस भर्यो ।
 खुरप वाण धनु योजित कर्यो ॥ बल करि रविनंदन
 शिर हयो ॥ टोपा काटि पार सो भयो १२ दोऊ रोष-
 वंत वर बीर । करत युद्ध नहिं श्रमित शरीर ॥ तजत न
 रण शिर छूटे केश । दोऊघोर असुरके भेश १३ ॥ गीति-
 काच्छंद ॥ शल्य सो नृप करण भाख्यो कौन रथवर बा-
 हई । सुनत सारथि रोष कीनो भूमि अबबैरिनि भई ॥
 गिले रथके चक्र धरती थकित हवै चलिना सक्यो ।
 बार बार अशेष उद्यम किये सो करिकै थक्यो १४
 श्राप पूरब जन्म दीनो बिप्रबहु दुख पाय कै । गिलेरथ
 के चक्र धरणी रह्यो संभ्रम काय कै ॥ कवचकुंडल इंद्र
 लीने बाण कुंती लैगई । भई बैरिनि मेदिनी चित कर्ण
 के चिंता भई १५ (कर्णउवाच) ॥ दोहा ॥ क्षत्रीधर्म

विचारि उर क्षण इक समर निवारि ॥ सुन्यो पार्थ जों लैं
रथै भुवतेलेहुनिकारि १६ (श्रीकृष्ण उवाच) ॥ सवैया ॥ पौन
को पूत बहायदियो जल भोजन माँझ हलाहल डार्यो ।
सुरभि हरी जब भूप विराट की जायतहाँ बहु साँकरो पा-
र्यो । करी न कछू मर्यादकी बात जबै सुत धर्म को देश
निकार्यो । द्रौपदी को खल चीर गह्यो तब पाप कियो
तुम धर्म विचार्यो १७ ॥ दोहा ॥ करै निहोरो क्यों
जियो ताते कीजै युद्ध ॥ ज्यों पावक में घृत जलै भयो
करण अति क्रुद्ध १८ कोपि शरासन कर लयो चले
करण के बान ॥ हनत पार्थ मोह्यो महा भूतल पर्यो
निदान १९ बल करि काढ्यो कंध दै भुवते रथ स-
विलास ॥ बहुरि दृष्टि शरकी करी छायो धर आकाश
२० ॥ दोधकच्छंद ॥ चेततही उठि पारथ धायो । करण
लख्यो नियरो जब आयो ॥ सारथि सों बिनवै तब ऐसे ।
हाँकु रथैरण जीतहुं जैसे २१ फेरि धरारथ चक्र गिल्यो
है । सोवर ठेलतहू न ठिल्यो है ॥ बारहिं बार महा झक
झोर्यो । भूमि हली अहिको शिर ठोर्यो २२ पारथ
क्रोध कियो बहुधाहीं । बाण हयो रिपु के उर माहीं ॥
जुझि पर्यो रविनंदन ऐसे । बज्र हन्यो सुरने गिरि
जैसे २३ ॥ चामरच्छंद ॥ हाय हाय यत्रतत्र हवै रही
जहाँतहाँ । देवलोक भूमिलोककर्णसों रथीकहाँ ॥ सैनता
बिना भयो अशेष भाँतिदीनसो । अंध पुत्र भो महाविशेष
दुःख लीन सो २४ ॥ दोहा ॥ भागि चले सब शूरगण
कर्ण पर्यो रण देखि ॥ दुर्योधन तब आपनी मृत्युगिनी

सुविशेषि २५ अहंकार युत जब कस्यो दलपति शल्य
 जुझारि ॥ पाय रजायसु बेगिही कोपि कस्यो किरवार २६
 लोपि गयो दिन कर जहाँ कर्ण परयो रण देखि ॥ रुदन
 करतगंधर्व सब सुर शोके सबिशेखि २७ नैनहीन अंबुज
 बदन योबन त्रिया शृंगार । त्योहीं कौरव दीनदल को
 कहि थंभनहार २८ ॥ सवैया ॥ चंद्र बिना रजनी रजनी-
 पतिरैनिबिना द्युति मंदअनैसो । नीरबिना सर नैन बिना
 नरधाम धनी बिनदेखिय जैसो । नीरबिना मुक्ताहलसो
 अरु दीप बिना रजनीतम जैसो । त्योहीं शृंगार बिना
 युवती नृप कर्ण बिना दल लागत तैसो २९ ॥ दोहा ॥
 परयो देखि नृप कर्ण को बिप्र रूप धरि आय ॥ दुर्बल
 अति हवैकै कह्यो नृपति कर्णसों जाय ३० ॥ चौपाई ॥
 दारिद्रहि बहु भातिसतायो । याचनतोहिं यहाँहों आयो ॥
 कर्ण सुन्यो जगमें बड़भागी । ताको चित्त भयो अनुरागी
 ३१ (कर्ण उवाच) पाहन लैकर बिप्र सयाने । मोरद
 भंजन शंक न आने ॥ बेगि करहु यह बार न लावहु ।
 लै सोइ कंचन धाम सिधावहु ३२ (श्रीकृष्ण उवाच)
 दोहा ॥ साधु साधु तू करण नृप पट तर दीजै काहि ॥
 तोसों तुहीं न दूसरो जग में कोउ न आहि ३३ (कर्ण-
 उवाच) बिप्रन हित कंचन दियो सुनियो बिप्र समान ॥
 निज त्रिय रति योबन गयो स्वामि काज ये प्रान ३४
 आदि अंत जाको नहीं सब जग व्यापक आय ॥ भई स-
 कल मन कामना तिनको दर्शन पाय ३५ ॥ श्लोक ॥
 कृपायुक्तस्तदाकृष्णो यत्रकर्णो रणेहतः । जीवकर्णसहस्रेण

योदतेकृष्णवोपुनः ३६ वृद्धब्राह्मणरूपेण कृष्णस्तुस्वय
मागतः । बिप्रोहंकर्णराजेंद्र दारिद्र्यबहुव्यापते ३७ पाषाणं
गृहणेविप्र दंतभंजयतेमम । सवाभारसुवर्णश्चयथात्वंरण
उच्यते ३८ (श्रीकृष्णउवाच) साधुसाधुमहाबाहो सर्व
शास्त्रविशारद । दातारसमकर्णस्य पृथिव्यांनप्रजायते ३९
(कर्णउवाच) बिप्रार्थेनधनंक्षीणं स्वदारागतयौवनं । स्वा-
मिकार्य्यंगताप्राणाअंतकालेजनार्दनम् ४० ॥ दोहा ॥ कर्ण
पर्योदिनतीसरे जब बीतेद्वैयाम ॥ समर भूमिउद्यतभयो
शल्यकियोसंग्राम ४१ इतिश्रीमहाभारतपुराणे विजयमु-
क्तावल्यांकविक्रत्रसिंहविरचितायां कर्णवीरसंमोहनोनाम
ऊनचत्वारिंशोऽध्यायः ॥ ३९ ॥ इतिश्रीकर्णपर्वसमाप्तम् ॥

अथशल्यपर्वकथनम् ॥

दोहा ॥ शल्यशूर रथ आरुहो कर लीने धनुवान ॥
जीत्यो चाहत शल्य को साजत समर बिधान १ द्रोण
कर्ण भीषम हते रण जित बार अनंत ॥ जीत्यो चाहत
शल्यरण आशा बहु बलवंत २ ॥ दोधकछंद ॥ अर्जुन
को रथ बाणन छाये । सेन घनो बलकै बिचलाये ॥
धूरिउड़ी उठि अंबर लोप्यो । शल्य तहाँ जमि कै पग
रोप्यो ३ द्वैदल में नहिं सूझत कोऊ । सन्मुख युद्ध जुरे
भट दोऊ ॥ शूर घनो करि पौरुष जूझत । काहू की कोऊ
बात न बूझत ४ ॥ दोहा ॥ जरासंध को पुत्र तब दुरा-
संध तिहि नाम ॥ सहित आपने सेनसों जूझि पर्यो
संग्राम ५ दुरासंध जूझो लख्यो नकुल पर्जर्यो वीर ॥

हन्यो सुशर्मा क्रोधकरि जूझि पर्यो रणधीर ६ ॥ चौ-
 पाई ॥ नृपति युधिष्ठिर कोपे आप । जाको जगमें बड़े
 प्रताप ॥ असुर हिडंब आपकर हयो । बिनाजीव परि
 भूतल गयो ७ एक घरी दिन लगि रण कर्यो । भूप
 युधिष्ठिर सों संहर्यो ॥ दौर्यो पवन पूत बलिबंड ।
 कीनो तिन संग्राम अखंड ८ ॥ छप्पै ॥ शूर हने रण
 धीर हने रथवंत बीर बर । कहूं हने गजराजगिरे
 कटिकुंभ चरण धर । गिरे सारथी अश्वगिरे कहूं छत्र
 चमर धर । कहूं गिरे ध्वज दंड कहूं थर हर पायक
 नर । बीस कुंवर कौरव तहाँ भीमसेन बर संहरे । का-
 टिदियो बन कदलि ज्यों थल थल भट दीसत परे ९
 दोहा ॥ सब कौरव निन्यानवे हनेभीम बलबंड ॥ दु-
 र्योधन एकै बच्यो भो संग्राम अखंड १० सहदेव अरु
 शल्य सों संग्रम भयो अपार ॥ को बरणौ बिधि परस्पर
 करत अमित संहार ११ ॥ चौपाई ॥ सहदेव कर असि-
 वर लयो । शल्य सारथी तब तिनहयो ॥ तोर्यो रथअरु
 हने तुरंग । कीनोघाव शल्य के अंग १२ मार्योशीश
 टूटिधर पर्यो । दुर्योधन थरथर थरहर्यो ॥ भजे शेषभट
 आयुध डारि । कितेचले भट हियरा हारि १३ ॥ दोहा ॥
 कुरुनंदन तिहि थल रह्यो निपट अकेलो आप ॥ हती
 चमू चतुरंगसब जाको अमित प्रताप १४ ॥ छप्पै ॥ छप्पन
 योजन छत्र छाँह जाकी धर मंडहि । दुर्गम दुसह दुरंत
 अदंडनि बलकरि दंडहि ॥ बंधु कुटुंब अशेष सकल
 किंकर चहुंओरहि । सबजग अमित प्रताप ताप क्षत्रिन

क्षिति क्षोरहि ॥ बहु छत्रचँवर गज बाजिरथ दलवर दीर-
घ पेखिये । सोइ भूमिभूप कुरुराज रण निपट अकेलो दे-
खिये १५ ॥ सोरठा ॥ होनी होयसो होय नहीं मिटावै
ईशसो ॥ ताते जग सबकोय संशय चित्तन आनिये १६
जो राचो करतार सोई सोई ह्वैरहै ॥ यहै बात सबसार
मूरख जो संशयकरै १७ इति श्रीमहाभारतपुराणे विजय
मुक्तावल्यांकबिह्वसिंहविरचितायां सुशर्माशल्यवधोना-
मचत्वारिंशोऽध्यायः ॥ ४० ॥ इति श्रीशल्यपर्व समाप्तम् ॥

अथ गदापर्व कथनम् ॥

चौपाई ॥ राजानिपट अकेलो भयो । मंत्र जपन जल
भीतर गयो ॥ जपन चारि घटिका जोपावै । तौ अपने
सब सेन जियावै १ यह सुधि पाये पंडव धाये । जलमें
भूपहुतो जहँ आये ॥ कहौ कहाँ दुरि कुरुपतिगयो । सो
नहिं हमें सामुहै भयो २ (भीमसेन उवाच) ॥ दोधकच्छंद ॥
तौ लगि केतिक भूपति काये । नाम कछूनहिं जातगनाये ॥
ताथल जज्ञि परे सब तेई । क्षत्री जे बलवंतहु तेई ३ तौ उ-
रहै इतनौ डरु पैठ्यो । तू दुरिकै जलभीतर बैठ्यो ॥ क्ष-
त्रिय धर्म बिचारि हियेमें । शोच कछूनहिं आपकियेमें ४
जो भजि बीर पतालहि जाई । तौ न बचै अब मोपहँ भा-
ई ॥ भूमि पताल सँहारेँ तोहीं । शपथ महीपति पंडुकि
मोहीं ५ ॥ दोहा ॥ हने बीर निन्यानवे तूकत उबरै भागि ॥
जौ लगि तोहिं हने नहीँ नवै न तामस आगि ६ ॥ चौपा-
ई ॥ पंडु सुतन में तोहिं जो भावै । सोई तोसां रणको

आवै ॥ जोई आयुध तू कर धरिहै । ताहीसों सोतोसों
 लरिहै ७ अबजो क्षत्रिय धर्म न गहिहै । सब जगमें उप-
 हासहि सहिहै ॥ सुनत बैन भूपति परजर्यो । ज्योंघृत
 माँझ हुताशन पर्यो ८ रोषवंत केहरि सोंकढ्यो । रोष
 देखि भीमहिं उर बढ्यो ॥ बज्रपातसम मुष्टिक मार्यो ।
 कौतुक देखत बंधव चार्यो ॥ ६ ॥ नगस्वरूपिणीछंद ॥
 सरोषह्वै दुहूंजुरै । न भँति भँतिते मुरै ॥ अशेष युद्ध
 साजहीं । न रोष छाड़ि भाजहीं १० ॥ दोहा ॥ गिर्यो
 बार दश भीमधुकि मोहिमोहि बलवंड ॥ सप्तबार भूपति
 गिर्यो करि संग्राम अखंड ११ कोऊ बीर करै नहीं
 भूपर गिरे प्रहार ॥ भिरत अमित गति कोकहै तारणको
 बिस्तार १२ (दुर्योधनउवाच) ॥ सुन्दरीछंद ॥ ठीठभयो
 तू कत रण ठानत । मोहिं न तू अपने उर आनत ॥ बा-
 लक मारि कितो बलबोलत । कैयह विक्रमफूलयोडोलता ॥
 १३ जीवत क्यों उबरै अबमोपै । युद्धकरो बनिआवैतो-
 पै ॥ बंधव तेरेइतोहिं सराहत । भँतिनभँतिन तोमुख
 चाहत १४ डारि गदा भगिजाय न क्यों अब । जीवतछा-
 डोंन तोहिं इहाँ जब ॥ द्वैमें हारि न कोऊ मानत ।
 भँति अनेकन युद्धहि ठानत १५ ॥ दोहा ॥ हिय
 हार्यो तब पवनसुत बिलखे बंधव चारि ॥ फेरि
 सम्हार्यो देह तिन जब झुकि कह्यो मुरारि १६
 (भीमसेनउवाच) सकल देव नरदेव के जो पीछे दुरि
 जाय ॥ तऊन छाड़ों तोहिं हों कोटिक करो उपाय १७
 सैनदईश्रीकृष्ण तब भीमहिं चितवतजानि ॥ तब रिसा-

यकै उठिचल्यो ठोंकि जंघसों पानि १८ ॥ चामरछंद ॥
 सैनजानि भीमसेन जंघमें गदाहनी । मोहि मोहि भूमि
 में गिर्यो सुभूमिको धनी ॥ बेगिदै महीप धर्मपुत्र पास
 आइयो । देखिदेखि सोथली अशेष दुःख पाइयो १९
 (राजोवाच) ॥ कृपै ॥ जाभुज भीषम करण द्रोण भग-
 दत्त सुशर्मा । दुश्शासनदै आदि बंधुसब अद्भुत कर्मा ॥
 देशदेशके भूप द्योसनिशि शंका मानत । दुर्योधन पग
 परसि आपनी जीवन जानत ॥ निशिद्योस छत्र छायाच-
 लै तेज अमित गति पेखिये । रण भूमि भूमि भूपति गि-
 र्यो सोकोउ साथन देखिये २० ॥ दोहा ॥ श्वेतछत्र कबि
 छत्रकहि तन्यो युधिष्ठिर शीश ॥ बहुत बिसूरे कृष्णको
 मुखचाह्यो अवनीश २१ (राजोवाच) ॥ चौपाई ॥ हुतोस-
 कल दल सो कित गयो । भूपति बिनवै बहुदुख छयो ॥
 रथी अतिरथी शूरअपार । कितगयो साहन सब परिवार
 २२ जिन तृणकरि मेरोदल लेख्यो । क्षितिपर कोऊ शत्रु
 नदेख्यो ॥ जाकेडर थर थर थरहर्यो । सोईभूप अके-
 लो पर्यो २३ जाकोक्षिति सब जॉरै हाथ । सोभुज पर्यो
 नकोऊ साथ ॥ यहिविधि धर्मपुत्र दुख छाये । भीमआ-
 दि सब बंधव आये २४ (भीमसेनउवाच) ॥ दोहा ॥
 कतदुख कीजै भूप अब क्षत्रीधर्म विचारि ॥ पायपायतुव
 आयसु डार्यों कटक संहारि २५ हमचूके सेवक नहीं
 आयसु मान्यों शीश ॥ गुण औगुण जोबनिगयो तबअ-
 ज्ञा अवनीश २६ चित्त कर्यो फिरि चलनको भूपयुधि-
 ष्ठिर राय ॥ पहुंचे तहँ वलभद्र तब भूपतिके ढिगजाय २७

२००

विजयमुक्तावली ।

गीतिका छंद ॥ देखि दुर्योधन पर्यो भुवजंघ घाउबि-
लोकिकै । जानियुद्ध अधर्मको बहु चित्तमाझ सशोकिकै ॥
हैगदाके युद्धको यह धर्मचित्त विचारितौ । अर्द्धतन कटि-
कै पर्योसो स्वप्नहू नहिंमारितौ २८ ब्योमभूमि पताल
भीमहिं हौंनहीं अब छंडिहों । आजुही बल आपने हठि
सर्वगर्ब निखंडिहों ॥ बाड़वानलसों उठ्यो करिक्रोध बहु
दुख पाइकै । अति रोषवंत विलोकि श्रीहरि योंकह्यो ढि-
ग आयकै २९ (श्रीकृष्णउवाच) द्रौपदी तब सभाआनी
कर्मकर्कश नृपकियो । जंघ तोर्यो मारिकै यहनेम भीम
तहाँलियो ॥ ताहेतु दुश्शासन सँहार्ये आपनो पनुपा-
रियो । हतिशत्रु बलही जीवके इन सर्वशोक निवारियो
३० ॥ दोहा ॥ समझायेबहुभाँतिकरि सुनि बलभद्रसोबात ॥
कुरुनंदन अपराधकी सुधि करिकरि पछितात ३१ करी
बिदा बलभद्रकी उरको क्रोध निवारि ॥ बंधक पांचोंसंग
लै निजथल चले मुरारि ३२ एक क्षोहिणी दल बच्यो
धर्म सुवनके साथ ॥ रथचढ़ि चारों बंधुयुत तबैचले नर-
नाथ ३३ रैनिभये धृष्टद्युम्न निशि सूत्यो सुखबीर ॥ द्रुपद
सुताके पाँचसुत सूते श्रमित शरीर ३४ इति श्रीमहाभारत
पुराणे विजयमुक्तावल्या कबिच्छत्रसिंहविरचितायांगदा
युद्धदुर्योधनबधवर्णनोनाम एकचत्वारिंशोऽध्यायः ॥ ४१ ॥

दोहा ॥ सूत्यो जान्यो कटक दल नंदिघोष रथ
पाय ॥ दूरिगये लै कृष्ण तब पंडुपुत्र सुखपाय १
उतरे रथते अनुजयुत तबहीं भुवभरतार ॥ घसत कृष्ण

रथते तबै उठो अगिनि की धार २ नंदिघोष जरि
 भस्मभो कह्यो न कौतुक जाय ॥ यह लखिकै पांचों
 अनुज संभ्रम रहे भुलाय ३ (श्रीकृष्णउवाच)भीषम गुरु
 अरु कर्णके शरन दियो रथ जारि ॥ याको अब परभाव
 सुनि प्रगट्यो भेद मुरारि ४ ॥ चौपाई ॥ जौलगि हों रथ
 ऊपर रह्यो । तब लगि सो बाणन नहिं दह्यो ॥ जबहों
 धसि भुवऊपर आयो । नंदिघोष तिन शरन जरायो ५
 हरिचरित्रतिन ऐसो देख्यो।बरगयो जायन अद्भुत लेख्यो॥
 दुर्योधनजहँ रणमें पर्यो । द्रोणपुत्र तिहिथल पगुधर्यो६
 (अश्वस्थामउवाच)॥दोधकछंद॥आयसुदे कुरुनंदनमोको।
 दुष्ट हनों बहुदै सुख तोको ॥ पैजकरी यहिभाँतिभनैसों।
 पार्थ युधिष्ठिर कौन गनैसों ७ सेन रही सोइ आज सँ-
 हारों । बंधव पांच तुरंतहि मारों ॥ जीवतमोहिं परे सुख
 सोवैं । आजु सबै यमको सुख जावैं ८ ॥ चामरछंद ॥
 पंचबंधु मारि आजु पंच शीश लायहों । तबै महीप तोहिं
 सुख आयकै देखायहों ॥ बेगिदै कृपालहवै नरेश भागि
 जो सकै । गाजिकै चलयो बली सरोष चित्त माँझकै ९
 कुंडलिया ॥ बैर पिता को आजुही लेहों दल संहारि ।
 और हनों बर पांडुसुत धृष्टद्युम्न को मारि ॥ धृष्टद्युम्न को
 मारि सकल मनभायो करिहों । वृद्ध तरुण शिशु बाल
 चित्तमें एक न धरिहों ॥ धरिहोंशंक न अंकहतों उर संशय
 जाको । सोई करिहों काज मिलाऊं बैर पिताको १०
 दोहा ॥ चलि सो पहुंच्योदल निकट द्रोणपुत्रयुतक्रुद्ध ॥
 पुरुष एक ठाढ़ो भया तासों कीनो युद्ध ११ द्रोणपुत्र की-

न्हो तहाँ दो घटिका संग्राम ॥ बहु संतुष्ट कियो सुनर
 तब कीन्हो विश्राम १२ ॥ चौपाई ॥ तब तिहि पुरुष दया
 बहु करी । माँगु माँगु यहिबिधि अनुसरी ॥ जोई वर तेरे
 मनभावै । माँगतही सो मोपैपावै १३ (अश्वस्थामाउवाच)
 बीर अबीर सबै अरि मारौ । पांडुसुतनयुतभट संहारौ ॥
 यहै दयाकरिकै वर दीजै । परम अनुग्रह मोपै कीजै १४
 एवमस्तु करि दीनो जान । गयो कटक में गहे कृपान ॥
 सोते कुंवर शिखंडी देख्यो । भारत भयते निर्भय लेख्यो ।
 १५ ॥ दोहा ॥ प्रथम प्रहार्यो सो कुंवर धृष्टद्युम्न को
 जाय ॥ बाम चरण छाती हन्यो सोवतबीर जगाय १६
 उठन न पायो बीरसो मार्यो दुःख दिखाय ॥ द्रुपद सुता
 के पंच सुत तेऊ मारे जाय १७ अर्द्ध रैन लौं सब क-
 टक ठाम ठाम संहारि ॥ एक क्षोहिणी दल हन्यो चलयो
 सकल भुव डारि १८ पंचालीके सुतनके शीश काटि लै
 हाथ ॥ तबपहुंच्यो तिहि ठाम जहँ दुर्योधन नरनाथ १९
 (अश्वस्थामाउवाच) धर्म पुत्रको आदिदै शिर लै आयो
 काटि ॥ दुर्योधन उर सुख भयो ताके कर ते डाटि २०
 त्रोटकछंद ॥ सुख दुःख समान भयो जबहीं । नर ना-
 यक प्राण तजे तबहीं ॥ चलि भूप युधिष्ठिर गेह गयो ।
 लखि कै दलते भय भीत भयो २१ (राजोवाच) सुत
 द्रोण कहा यह कर्म कियो । शिशु मारि कहा अपराध
 लियो ॥ बहु दुःख धनंजय चित्त धर्यो । अपने उरमें बहु
 क्रोध कर्यो २२ भगि कै अब सो अरि जाय कहा । अ-
 बहीं हतिहों पुनि बेगि तहाँ ॥ रुकि कै तबहां रथ और

सज्यो । तिहि रोष नहीं पल एक तज्यो २३ सुनिकै
 गुरुपुत्र भज्यो तबहीं । बहु पारथ रोष कर्यो जबहीं ॥
 तिन जाय लयो नहिं भाजि सक्यो । अति व्याकुलह्वै
 थहराय थक्यो २४ ॥ दोहा ॥ अर्जुन योजन एक पै
 गुरुसुत लीनो जाय ॥ जान्यो नहीं उबार तिन फिर्यो
 शूर समुहाय २५ उपज्यो अद्भुत युद्ध तहँ कोकबि सकै
 बखानि ॥ शरही शर नभ छायागो थके शूर नहिं पानि
 २६ काटत दोऊ परस्पर बाण समूह अनेक ॥ एक व्यो-
 ममें एक धर करन कटत है एक २७ ॥ चौपाई ॥ हारि
 न मानत दोऊ बीर । दोऊ समर बली रण धीर ॥ एक
 हि गुरु पै विद्या पाय । व्योम थली बाणन करि छाया ॥
 २८ दोऊ रण को तब अलि बढे । एक संग दोऊ विद्या
 पढे ॥ ब्रह्म अस्त्र कर पारथ लीनो । वही द्रोण सुत यो-
 जित कीनो २९ उपजी अग्निनि दुहुन ते भारी । त्रिभुवन
 कंपे नर अरु नारी ॥ हाहा शब्द सकल पुर ठयो । महा
 ताप सुर असुरन भयो ३० ॥ सौरठा ॥ आकंप्यो सुर-
 राज देखन बहु आतंक उर ॥ प्रलय होत है आज इहि
 बिधि जग जन उच्चरत ३१ ॥ दोहा ॥ ब्रह्म बाण क्यों
 पार्थ को रणमें निष्फल जाय ॥ शीश फोरि कै मणि लई
 तब दीनो मुकराय ३२ गर्व उत्तराको हन्यो गुरु सुत कै
 संधान ॥ भयो मृतक सुत तिहि समैं सब कुल दुःख नि-
 दान ३३ कृष्ण अनुग्रह सुत जियो भयो परीक्षित नाम ॥
 चले पार्थ गृहको तबै रहित भयो संग्राम ३४ ॥ चौपाई ॥
 चले हस्तिनापुर सब आये । नृप धृतराष्ट्र तबै समुझाये ॥

भाँति भाँति विनयो कर जोरि । मिटै न होनी किये क-
 रोरि ३५ भयेशुद्धपानी तिनदियो । काज कर्मकृतिसब
 विधिकियो ॥ रुदनकरैं कौरवकी नारी । दुख दावागिनि
 तैं परजारी ३६ तव भीषम सब त्रियसमझाई । होयरचैजो
 त्रिभुवन राई ॥ पांडु पुत्र सबपासबुलाये । दिन प्रति राज-
 नीति समझाये ३७ (भीष्मउवाच) ॥ सवैया ॥ क्रोध
 वृथान करो कबहूँ न मतो कहु मूढ़नसों करियेजू । मित्रन
 को अपमान रचो न दया उरशत्रुन की धरियेजू । कृत्र
 सदा परस्वारथ कीजिय लोकअलोकनतें डरियेजू । होउ
 हठी न छली नरनाथ न वित्त कहूं द्विजको हरियेजू ३८
 कृष्णै ॥ दयाराखिये अंक भूलि ब्रतही मन करिये । युगुल
 चोरकीसोंहचितमेंएकनधरिये ॥ सदा रक्षिये ताहि शरण
 शरणागतआवै । भूलिहुचित प्रवीन नहीं कातरतालावै ॥
 त्रिया काज द्विज गायके निज काजन सब परिहरत ।
 कबिकृत्र चलत यहिरीतिजो सो नृपता महिमंडलकरत
 ३९ ॥ दोहा ॥ बिरद बड़ाई पायकै गर्वन कीजैचित्त ॥
 नाबिसरहु हरिको हिये बिसरायो जनिमित्त ४० राज-
 नीति सब सब कही भाँति भाँति समझाय ॥ कृत्र कृपा
 करि भक्त बश श्रीहरि पहुंचे आय ४१ (भीष्मउवाच)
 सकल भई मन कामना कलिसल गये नशाइ ॥ अंत
 अवस्थामें सुखद श्रीहरि दरशन पाइ ४२ ॥ सवैया ॥
 लाजसदा बिरदावलिकी कबिकृत्रसदाजनकोसुखकारी ।
 धावनि चक्रगहे करकीकह बानिकहूं बिसरै न बिसारी ।
 केहरि ज्यों उतर्यो गिरिते अवलोकतही जिमि कुंजर

भारी । वेदकी कानि न साधत ज्यों ब्रत राखि कृपानिधि
पैज हमारी ४३ ॥ दोहा ॥ करी बंदना कृष्णकी भीषम
बुद्धि निदान ॥ प्राणतजे भीषम तबै उत्तर आये भान ४४
इति श्रीमहाभारतपुराणे विजयमुक्तावल्यां कविकृत्रसिंह
विरचितायां भीष्मपरमधामगमनो राजायुधिष्ठिरविजय
दुर्योधनबधवर्णनो नाम द्विचत्वारिंशोऽध्यायः ॥ ४२ ॥

दोहा ॥ तबै राज अभिषेक करि भूप युधिष्ठिर आप ॥
बैठ्यो प्रफुलित पाट पर बाढ्यो अमित प्रताप १ करत
निकंटक राज्यघर नाशे शत्रु समूल ॥ छत्र कहै सजनन
के बाढी तन मन फूल २ ॥ दंडकछंद ॥ कर्महै कुकर्म
जेते मिटेहैं अघर्म सब भूतल सकल धर्म सरसाइयतुहै ।
ठौर ठौर दान सनमान घने बिप्रन के आनंद निधान
भौन भौन गाइयतुहै । यत्र तत्र छत्रकवि कोउ नाहीं
शत्रुरह्यो अस्र छाड़ि छाड़ि सोन ढूँढ़े पाइयतुहै । भूपति
युधिष्ठिर के राजमें सुचैन जग मेटिकै असत्य सत्यधरा
छाड़यतुहै ३ ॥ दोहा ॥ चारि वरण ते स्वप्नहूं परत्रिय
रत नहिं कोय ॥ परद्रोही नर कृतघ्नी अयश न काहू
होय ४ ॥ भुजंगप्रयातछंद ॥ दरिद्रै दरिद्रो अधर्मै अधर्मी ।
महाशोक शोकै कुकर्मै कुकर्मी ॥ लसै इंद्र कीसी पुरी
राजधानी । सबै सन्न नीके महा सुखदानी ५ सुहावे
अटादेखिये धाम धामा । पुरस्त्री बिराजैं मनो कामकामा ॥
कहाँलों कहों तापुरी की निकाई । चहूं ओर दीखै महा
शोभ छाई ६ सबैबाग फूले फले चित्तमोहैं । मनोतेलता

२०६

विजयमुक्तावली ।

कल्पकी छत्र सांहे ॥ तहाँ धामहैं नीर संयुक्त ऐसे । मनो
देव देवेश के सद्य जैसे ७ छहूँ कालके वृक्ष फूले फलेहैं ।
तहाँ कोकिला आदि पक्षी भलेहैं ॥ कहाँ लों बखानों
महा शोभ नीकी । तहाँ शोक शंका नशै सर्व जीकी ८
दोहा ॥ धर्म सुवन भूपति बने आगे बंधव चारि ॥ सेवत
मन बच कर्म सों सकत न आयसु डारि ९ ॥ गीतिका
छंद ॥ गोत घाउ बिचारिकै ऋषिराज तहँ बोले घनै ।
व्यास ऋषि दुर्वास युत ऋषिराज योतिको गनै ॥
यज्ञ तहँ हयमेध कीनो सर्व विधिन बनायकै । पार्थलै
चतुरंग सेना भूमि जीती जायकै १० ॥ दोहा ॥ आयो
दश दिशि जीति कै आन्यो बाजी धाम ॥ पूरण कीनो
यज्ञ तहँ सब पूजे मन काम ११ ॥ चौपाई ॥ यज्ञ सि-
रायो सुरसरि तीर । धर्म धुरंधर गुण गंभीर ॥ समदे
ऋषि जे आये भूप । भूपति पहिरे बसन अनुप १२ जिती
हुती कौरवकी नारी । ग्रसीं सकल दुःखनिसों भारी ॥ ते सब
व्यास महाऋषि राई । लीनी अपने पास बुलाई १३
दोहा ॥ मायाबीतिनके पुरुष दीने ऋषि दरशाय ॥
पति लहि सब आनन्दयुत पगन परीं सब जाय १४
घसीं सुरसरी के सलिल भई सुअंतर धान ॥ ह्वैहै सोई
जो कछू रचि राखी भगवान १५ रहे तहाँ धृतराष्ट्र अरु
गंधारी संग नारि ॥ बहुत बिसूरै रैन दिन सुतको शोच
बिचारि १६ एक छत्र महिभोगई भूप युधिष्ठिर आप ॥
रामचंद्र ज्यो अवध में दिन दिन बढ्यो प्रताप १७ नि-
शिदिन सेवा मातकी करै न शासनभंग ॥ आज्ञाकारी सर्वथा

चारो बंधव संग १८ वृद्धि भई शशिवंशकी अरु साहन भं-
 डार ॥ बाढ्यो छत्र विशेषि के यदुकुल बहु परिवार १९
 चौपाई ॥ करि भारत ठवरेदश जने । अब कबितिनके नाम
 नि भने ॥ पांचौ पंडु पुत्र बलवान । कूठे शोभिजै श्रीभग-
 वान २० करणपुत्र शोभित वृष केत । मेघ बरण बहुविधि
 सुख देत ॥ कृतवर्मा यादव बलिबंड । द्रोण पुत्र संग्राम
 अखंड २१ ॥ दोहा ॥ उबरे भारत में इते और रह्यो
 नहिं कोय ॥ जोई चतुरानन रची सोई सोई होय २२
 सोरठा ॥ करण पुत्र वृषकेतु सुत सरिबर भूपति गनो ॥
 करि कुंती बहुहेतु जानति ताकहँ प्राण सम २३ ॥ छ-
 प्पै ॥ नित्य नित्य ऋषिराज भूरि भोजन तहँ पावहिं ।
 षट दरशन रनिवास सकल मङ्गल उपजावहिं । सप्त
 द्वीप नवखण्ड सकल बंदीगुण गावहिं । हरषि हरषि
 मणि मुक्त द्विरद बाजीगण पावहिं । कबिछत्र सकल
 भूपति जपति दीन न नरकोउ देखिये । भुवभूप युधिष्ठिर
 राजमें सो थल थल आनंद लेखिये २४ ॥ दोहा ॥ द्वा-
 दश वर्षे बनरहे त्रयोदशे अज्ञात ॥ मारि कीचकन यश
 लियो हर्षवंत ह्वै गात २५ सब कौरव परिवार युत
 मारे जग यश जीति ॥ रहे हस्तिनापुर नृपति चारों
 अनुज समीति २६ ॥ छप्पै ॥ कूलद्रोण गांगेय सकल
 कौरव तरु साजै । बारि जयद्रथ भयउ लहरि रबिनं-
 दन राजै ॥ कच्छ मच्छ जलजंतु शल्य तहँ भयउ सुशर्मा ।
 भूरिश्रवा भगदत्त भयो तहँ ग्राह सुवर्मा ॥ करिनाव
 धनंजय धीर को त्रिभुवन पति केवट भयउ । यश तिलक

युधिष्ठिर शीशकरि सोरण सरिता तरि गयउ २७ ॥ दो-
 हा ॥ जीत्यो भारत कृष्ण मत तिनहिं सहाईपाय ॥ एक
 छत्र महि भोगई छत्र युधिष्ठिर राय २८ भारत सुनि
 भाषा कियो छत्र सुबुद्धिहि पाय ॥ कहत सुनत पातक
 नशत अघ दीरघ दुख जाय २९ चारि वरण में जो सुनै
 तरुणी पुरुष जो कोय ॥ प्रगटै हरिकी भक्ति उर मोचन
 अघ को होय ३० ॥ सबैया ॥ जोफल तीरथ बर्त किये
 अरु जो फल षोडश दान दियेते । ज्ञान कथानि सुने फल
 जो कवि छत्र बढै बहुबुद्धि हियेते । जो फल संयम नेम
 रचे अरु जो फल है शतयज्ञ कियेते । जो फल रुद्र प्र-
 सन्न भये फलसोइ युधिष्ठिर नामलियेते ३१ सेवत सा-
 धक सिद्धिन को अरु ईश प्रसन्न भयेबर पाये । तीरथ
 राज प्रयाग गये अरु सागर संगम गंग अन्हाये । योग
 किये व्रतनेम लिये अरु ऊखल सप्तपुरी निशि धाये ।
 यज्ञ जपे भगवंत भजे जप जाप सजे जु युधिष्ठिर गाये
 ३२ ॥ दोहा ॥ अष्टादशौ पुराण में सुनै जगत में कोइ ॥
 सुनत विजयमुक्तावली तैसोई फल होइ ३३ वरणयो
 ग्रंथ सुछत्र कवि अपनी मति अनुसार ॥ क्षमियो चूक
 बुद्धीश सब कविता समुजनहार ३४ ॥ छप्पै ॥ मधु-
 कैटभ कुल हन्यो हन्यो हिरण्याक्ष अघासुर । हरणा-
 कुशजिहि हन्यो हन्यो धेनुक केशी सुर । बंधु सहित दश-
 कंध हन्यो बत्सासुर जिहिबर । नरकासुर तिहि हन्यो
 हन्यो शिशुपाल अधम धर । सुत धर्म कर्म रक्षण करन
 महिमा नहिं जानी परै । त्रैलोक्यनाथ कबिछत्र कहि

विजयमुक्तावली ।

२०६

पढ़त सुनत रक्षा करै ३५ ॥ सवैया ॥ ब्यालधरे शशि
भाल धरे गज खाल धरे तन भस्म चढ़ाये । ज्वाल धरे
शिर माल कपाल धरे बिषकंठ महासुख पाये । गंग
धरे अर्द्धग शिवा ढिग भंग धरे गण भूतनकाये । ऐसे
सदा शिव होहिं प्रसन्न सो छत्र विजय मुक्तावलि गाये
३६ ॥ दोहा ॥ फौज सुदरवारी लसै भूपति सिंह क-
ल्याण ॥ पूरण कीनी छत्र कवि ग्रंथ सुतिहि अस्थान ३७
इति श्रीमहाभारतपुराणे विजयमुक्तावल्यांकविच्छत्रसिंह
विरचितायां राजायुधिष्ठिरराजवर्णनो नाम त्रिचत्वारिंशो-
ऽध्यायः ॥ ४३ ॥

छप्पै ॥ तिलक भाल बनमाल अधिक राजत रसाल
छवि । मोर मुकुट की लटक चटक वरणत अटकत कवि ॥
पीताम्बर फहराय मधुर मुसक्यानि कपोलन । रच्यो
रुचिर मुख पान तान गावत मृदु बोलन ॥ रतिकोटि
काम अभिराम अति दुःख निकंदन गिरिधरन । आनंदकंद
ब्रज चंद प्रभु सुजयजयजय अशरन शरन १ मोर मुकुट
नग जड़ित कर्ण कुंडल हेम झलकैं । मृगमद तिलक
ललाट कमल लोचन दल पलकैं ॥ घुंघरवारी अलक
कौस्तुभ कंठ विराजै । पीत वसन बनमाल मधुर मुरली
धुनि बाजै ॥ करत कोटि आभावरण सुचन्द्र सूर्य देखत
लजत । ब्रह्मदेव ये भक्त जन सुश्याम रूप प्रीतिम सजत २
चतुरानन सम बुद्धि विदित जो होय कोटि धर । एक एक
धर प्रतिन शीश जो होय कोटि वर ॥ शीश शीश प्रति

बदन कोटि करतार बनावैं । एक एक मुख माहिं रसन
 फिर कोटि लगावैं ॥ रसन रसन प्रति शारदा कोटि
 बैठि वानी बकहि । महिजन अनाथ के नाथ की महिमा
 तबहुंन कहि सकहि ३ भूमि परत अवतरत करत बा-
 लक बिनोद रस । पुनि यौवन मद मत्त तत्व इन्द्री अ-
 नंग वस ॥ विषय हेतु जड़ फिरत बहुरि पहुंच्यो वृद्ध-
 प्पन । गयो जन्म गुण गनत अंत कछु भयो न अप्पन ॥
 थिर रहत न कोउ नरपति नवल रहत एक चहुं जुग
 यस । सोइ अजर अमर नरहर निरखि जपियत भक्ति
 भगवंत रस ४ विमल चित करि मित्र शत्रु कलबल वश
 किज्जिय । प्रभु सेवा बश करिय लोभवंतहि धन दि-
 ज्जिय ॥ युवती प्रभु बश करिय साधु आदर बश आनिय ।
 महाराज गुण कथन बन्धु समरससम मानिय ॥ गुरु
 नमित शीश रस सों रसिक विद्या बल बुधमन हरिय ।
 मूरख बिनोद सुकथा बचन शुभ सुभाय जग बश करिय ५
 सौयाचक लघु पद लहै कामातुर जो कलंक पद । लो-
 भीदुर्यश लहै अस न लालची लहै गद ॥ मूरख औगुन
 लहै लहै पढ़ि पढ़ि गुण पंडित । शूर सूरन यश लहै रहै
 रणमें महि मंडित ॥ निर्वाण सुपद योगी लहै जो न
 गहै ममता सुमति । सुख भगत जगत जन लहै करै
 सुनो विधि भक्ति अति ६ धिक मंगन बिन गुनहि गुन
 सुधिक सुनत न रीझै । रीझक धिक बिन मौज मौज धिक
 दैत जो खीजै ॥ देवोधिक बिन साँचि साँचि धिक धर्म
 न भावै । धर्म सुधिक बिन दत्त दया धिक अरि कहँ आवै ॥

अरिधिक चित्तन सालई चितधिक जहँ न उदार मति ।
मतिधिक के सब ज्ञानबिन ज्ञान सुधिक बिन हरिभगति ७

कवित्त ॥ नेहराज रूपराज रसिक रसराज नैन
सुख राज गहिकै उठायो गिरिराज है । छोटे से करन
वर अँगुरी पै धर्यो गिरि पूंभी कैसो कृत्र हरि लिये गज-
राज है । हाथन ललाई तामें पहुँचिनि कृबिक्राई ऊँचो
कियो हाथ सब कृबिको समाज है । नैननिकी सैननिसों
कहै अलबेली अलि चोर चोर खायो दधि काम आयो
आज है । नेकु तो निहारो प्रिय प्राणन को प्यारो अ-
ति पंकज से हाथ लिये धार्यो गिरि भारी है । प्रेमसों
लपेटी कहै नेह भरी बात अलिलेहुरी लकुटि नेकु देहुरी
सहारो है । कहैं अलि मिलि सब काम आयो आजु व-
लि खायो रुचि माखन जो चोर कै हमारो है । नेह भरी
बात सुनि हिय हुलसात मंद मंद मुसक्यात मुख रूप
कोउ धारी है ॥ सबही के ग्वाल बाल सबही के गोधन
हैं सबही पै आनि परी प्राणन की भीरहै । सबही पै
मेघ बरसत है गोलाधार सबही की छाती छेद करत स-
मीरहै । किधों मेरोई अनोषो ढोटा भागि आनो एरी
वीर वोझल पहारतर कोमल शरीर है ॥ नेकु याके हा-
थ ते गिरि लेहु क्यों न तुमहीं सब अहीर पै न काहू
हिये पीर है ॥

इति विजयमुक्तावलीसमाप्ता ॥

नामकिताब	नामकिताब	नामकिताब	नामकिताब
चित्रचंद्रिका	ज्ञानमाला	अमरचिन्ह	मुहूर्तदीपक
बारहमासाबलरवप्र	गोपीचंदभरती	वैद्यजीवन	वृहज्ज्ञातकसटीक
मनोहरलहरी	कथाश्रीरंगजी	श्रीपथिसंगहकल्पवल्ली	जातकालंकार
गंगालहरी	अवधयात्रा	अष्टतारावदवद्वेष्ट	जातकाभरणा
यमुनालहरी	भरतरीगित	वैद्यमनोत्सव	होराभरंद
जगद्विभोद	सनलीलावनागलीला	दिल्लगन	मुहूर्तभार्तंडसटीक
शृंगारवतीसी	दोहावलीरत्नावली	ज्योतिषभाषा	संस्कृतउर्दूटीका
राग	गोकार्गभाषास्य	जातकचंद्रिका	भनुस्मृति
रागप्रकाश	श्रीगोपालसहस्रनाम	जातकालंकार	विष्णुहारीत
लावनी	कथासत्यनारायणस	देवशाभरणा	महिम्नस्तोत्र
किस्साचंगेरह	हनुलाटक	ज्ञानस्वरोदय	ब्रतार्क
नानार्थनीसंग्रहावली	हनुमानबाहुक	रमलसार	याज्ञवल्क्यस्मृति
ब्रह्मसार	जनकपञ्चीसी	रमलनौरत	संस्कृतभाषाटीका
शिवसिंहसरोज	हरिहरसंग्रहानिगुरा	द्वंद्वज्ञान	अथर्वकोषतीर्थाकोड
भक्तमाल	पदावली	संस्कृतकीपुस्तके	याज्ञवल्क्यस्मृति
द्वंद्वसभा	वनयात्रा	लघुकोमुदी	सन्ध्यापद्धति
विक्रमविलास	कायस्थवर्गानिर्णय	सिद्धान्तचंद्रिका	ब्रतार्क
बैतालपञ्चीसी	बिहारखंडावन	भाषातत्त्वप्रकाश	भगवद्गीताटीकाह
सिंहासनवतीसी	समरबिहारखंडावन	पंचमहायज्ञ	भगवद्गीताटीकाआ
पद्मावतीखंड	कल्पभाष्य	निर्णयसिंधु	गीतगोविंद
शुकबहन्तरी	लक्ष्मीसखतीसंवाद	संग्रहशिरामरिा	कथासत्यनारायण
बकावलीसुमन	हरती	भगवद्गीतापंचरत्न	परमार्थसार
चहारदरवेश	अक्षरावली	दुर्गापाठमूलवस	शार्ङ्गधरसंहिता
किस्साहातमताई	स्वयंबोध	विष्णुभागवत	पाराशरीसटीक
अपूर्वकथा	ज्ञानचालासी	कथायमद्वितीया	श्रीघ्नबोधसटीक
किस्सागुलसनोवर	दोहावली	अपराधभंजनस्तोत्र	तन्त्रजातक
सहस्ररजनीचरित्र	बालाबोध	कायस्थकुलभास्कर	षट्पंचाशिका
राविन्सनकाइतिहास	विद्यार्थीकीप्रथमपुस्तक	कायस्थधर्मनिस्स	सामुद्रिक
सीताहरण	किताबजंजी	तथाछोटा	गरुडपुराण
सतीविलास	गरिगतकामधेनु	मधुरासभा	रामविवाहोत्सव
किस्साभईऔरत	लीलावती	ज्यातेष	तीर्थपततालीमकी
संगीतप्रह्लाद	पदवारिषोकीपुस्तकभा	मुहूर्तगरायति	पुस्तके
सुतफकांत	वैद्यकभाषा	मुहूर्तचक्रदीपिका	संस्कृत
शनिश्चरकीकथा	निघाट	मुहूर्तचिंतामरिास	नृजुपाठभाग

नामकिताब	नामकिताब	नामकिताब	नामकिताब
ऋजुपाठ २भाग तथा ३भाग धात्वरवि	अवध देशीयभूगोल इंग्लिस्तानका इति हास	पशुचिकित्सा पहावरवत कैथी तथा कबूलियत	१८६७ ई० मजमूआ ऐकअ- वध लगान १८ सन १८६८ ई०
नागरी कैथी	हितोपनिषा	रजिस्टर दारिबल-	सन १८६८ ई०
वर्गमाला कैथी	बालाभूषणा	खारिज तुलबामद	पुरझादारी २६
१भाग तथा २भा-	पद्यसंग्रह	सा	सन १८६६ ई० व-
तथा कैथी फारसी	भाषाकाव्यसंग्रह	रजिस्टर हाजिरी	गौरह
नागरी	कवितरत्नाकर १भा-	पाठशाला	ऐक स्टांम्प दस्ता-
हरूफ मुफर्दात	तथा २भाग	क्षेत्र व्यवहारिक	वेजात १८ सन्
अक्षरारम्भ	मंगलकोष	तत्व १भाग	१८६८ ई०
वर्गी प्रकाशिका	अंक प्रकाश	तथा २भाग	ऐक ताल्लुकदारा-
१भाग तथा २भाग	गणित प्रकाश १भा-	व्योहार पत्र संग-	न मकरुज अवध
सूरजपुर की कहानी	तथा २ व. ३ वधभाग	हू कैथी	२४ सन् १८७७
धर्मसिंहका वृत्तान्त	गणित क्रिया	कानून कैथी	ईसवी
शिक्षावली	क्षेत्र प्रकाश	पटवारियों के कायदे	ऐक चौपायों का
शिशु बोध	क्षेत्र चंद्रिका १भाग	उई कैथी महाजरी	मदारवलत बजा
पत्राहितैषिणी	तथा २भाग	टिकट के लाइस-	१ सन् १८७७ ई०
पत्र दीपिका	सकील दायरा	न्स का ऐक २ सन्	ऐक मजमूआ जा-
विद्याचक्र	रेखागणित १भाग	१८७८ ई०	बिता फौजदारी १०
विद्याकुर	तथा २भाग	नागरी	सन् १८७२ ई०
पदार्थ विद्यासार	बीजगणित १भाग	ऐक लगान मग-	ऐक मान गुजारी
पदार्थ ज्ञान विटप	रमायण तुलसीरुत	रबी व शिमाली	मगरबी व शिमाली
भोज प्रबंधसार	बाल काराड	१० सन् १८५८ ई०	१८ सन् १८७३ ई०
राज नीति	अयोध्या काराड	इंडियन पिनल-	तरमीम मजमूआ
भाषालघुव्याकरणा	आराय काराड	कोर्ट	जाबित फौजदारी
१भाग तथा २भाग	किष्किन्धा काराड	मजमूआ जाबिता	११ सन् १८७४ ई०
भाषा तत्व दीपिका	सुन्दर काराड	फौजदारी ऐक	तकावी के कायदे
भाषा चन्द्रोदय	लंका काराड	२५ सन् १८६१ ई०	सवाल व जवान
भूगोल तत्व	उत्तर काराड	ऐक रजिस्टरी २०	पुलिस
भूगोल दर्पणा	गुटका १भाग	सन् १८६६ ई०	अवध रुहेलखंड
इतिहास तिमिर ना-	तथा २भाग	ऐक स्टांम्प १ सन्	रेलवे का दस्तखत
शक १भाग	तथा ३भाग	१८६२ ईसवी	अमल
तथा २भाग	हिदायत नामा मु-	ऐक स्टांम्प अदा-	इति
तथा ३भाग	दरिसान	लत २६ सन्	

